

**NINTH MIZORAM LEGISLATIVE ASSEMBLY  
(SECOND SESSION CUM BUDGET SESSION)**

**REVISED LIST OF BUSINESS**

FOR SIXTEENTH SITTING ON WEDNESDAY, THE 13<sup>th</sup> MARCH, 2024  
(Time 10:30 A.M to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LEGISLATIVE BUSINESS**

*Bill for introduction, consideration and passing*

2. **PU VANLALHLANA**, Minister to beg leave of the House to introduce the following Bills –
- (i) The Mizoram Salaries and Allowances of Speaker and Deputy Speaker (Amendment) Bill, 2024.
  - (ii) The Mizoram Salaries and Allowances of Minister (Amendment) Bill, 2024.
  - (iii) The Mizoram Salaries and Allowances of Government Chief Whip & the Deputy Government Chief Whip (Amendment) Bill, 2024.
  - (iv) The Mizoram Salaries, Allowances and Pension of Members of the Legislative Assembly (Amendment) Bill, 2024.

**ALSO**

***to introduce the Bills***

***to move that the Bills be taken into consideration***

**AND**

***to move that the Bills be passed.***

**FINANCIAL BUSINESS**

**DISCUSSION AND VOTING ON DEMANDS**

3. **PU LALNGHINGLOVA HMAR**, Minister to submit to the vote of the House various Demands under his charge.

<b>Demand No.</b>	<b>Purpose</b>	<b>Amount in (₹)</b>	<b>Demand For Grants Page No.</b>
<b>7</b>	Excise & Narcotics	54,56,93,000.00	46-49
<b>22</b>	Sports & Youth Services	25,71,20,000.00	218-228
<b>28</b>	Labour, Employment, Skill Development & Entrepreneurship	31,75,42,000.00	293-299
<b>TOTAL</b>		<b>1,12,03,55,000.00</b>	

4. **PU LALDUHOMA**, hon. Chief Minister to submit to the vote of the House various Demands under his charge.

<b>Demand No.</b>	<b>Purpose</b>	<b>Amount in (₹)</b>	<b>Demand For Grants Page No.</b>
<b>1</b>	Legislative Assembly	47,44,15,000.00	1-6
<b>2</b>	Governor	30,60,000.00	7-11
<b>3</b>	Council of Ministers	7,37,45,000.00	12-17
<b>4</b>	Law & Judicial	47,73,44,000.00	18-33
<b>5</b>	Vigilance	7,11,46,000.00	34-39
<b>9</b>	Finance	34,38,13,62,000.00	54-69
<b>11</b>	Secretariat Administration	1,20,32,60,000.00	73-75
<b>14</b>	Planning & Programme Implementation	1,20,27,41,000.00	84-96
<b>15</b>	General Administration	1,05,30,67,000.00	97-129
<b>TOTAL</b>		<b>38,94,01,40,000.00</b>	

**LEGISLATIVE BUSINESS**

*Bill for introduction, consideration and passing*

5. **PU LALDUHOMA**, hon. Chief Minister to beg leave of the House to introduce “The Mizoram Appropriation (Demand for Grants 2024-2025) Bill, 2024.”

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

VANLALTHANTLINGI  
Commissioner & Secretary

\*\*\*\*\*

**HON. SPEAKER** : “*A tâwp berah chuan, Lalpaah leh a chakna thahruih chuan thiltihtheihna neiin lo awm rawh u*”.

-Ephesi 6:10

Hei, vawiinniah Member zahawm tak takte - Lt. Col. Clement Lalhmingthanga, taksa lam harsatna avangin kan zingah a lo tel thei dawn lova; Tuichawng Bialtu Pu RM Chakma hian, “Eng emaw rokhawlhna, thil ÷ul ka nei a, chawhma chu ka rawn lang thei lo ang”, a ti bawk a; Siaha Bialtu Member, Dr. K. Beichhua hian, “Governor nen thil pawimawh sawi dun tur kan nei a, ka rawn tlai hret ang e” a ti bawk a; House ka han hriattir e.

Tichuan, *List of Business* kha revised a ni a, kan dawng tawhin ka hria a, member-te hnenah sem kual turin kan inhrilh a. Chuvangin revised ang khan kan kal ang a.

Tin, vawiin hi tun ÷um kan budget session tawp ni a lo ni reng ta mai a. Chuvangin, tlaiah chawhlui kan kil ho ang a; *Speaker’s Dinner* kan kilho dawn a ni.

Tichuan naktuk, Ni 14 dar 12:30 PM hian Governor-in member zawng zawngte chhunchaw min buatsaih sak dawn a, member-te kim takin kal kan tum dawn nia. Tin, naktuk vek, Ni 14 tlai dar 5 PM-ah kan Chief Minister zahawm takin kan kawppui leh kan thiantha berte nen dinner min buatsaih sak bawk dawn a nih kha.

**PU LALDUHOMA, HON.CHIEF MINISTER:** Pu Speaker, naktuk kha party hrang hrang hian committee pawimawh kan ko a, kan MNF unaute pawh rawn lang thei an awm dawn lova; ZPM lam pawh committee pawimawh a awm a, kal thei kha an tlem lutuk dawn a, Governor lunch-ah khan. “A mualpho-thlak ang a; i ÷ulh mai thei em?” ka ti a chhanna ka la dawng lova. Kha te kha lo hre mai mai ta ila. Nakinah chhanna kan dawn hunah kan la inhrilh dawn nia.)

**HON. SPEAKER** : Aw le, vawiin tlai lamah chuan confirm theih turah ngai ila, kan inhriattir tlang leh mai dawn nia.

**QUESTIONS & ANSWERS:**

*Starred Question No. 261-na* zawt turin Aizawl South-II Bialtu zahawm tak Pu Lalchhuanthanga.

*Starred Question No. 261 - Electric Bill bat chungchang.*

**PU LALCHHUANTHANGA:** Pu Speaker, ka lawm e. *Starred Question No. 261 - Power & Electricity Department Minister* chhan atan ka zawhna chu -

“Power & Electricity Department hian bill ba engzat nge a neih?” tih a ni e.

**HON. SPEAKER** : A chhang turin Power & Electricity Department changtu Minister, Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, ka lawm e.

Kan member-pui, Pu Lalchhuanthanga zawhna – “Tun dinhmunah Power & Electricity Department-in power a leina aṅga ba a neih zat chu a hnuaiah tarlan ang hi a ni a, hei hi ni 16.02.2024-a lak a ni:

<b>Firm</b>	<b>Total Outstanding Dues</b>
Generating Company	₹127,08,09,493/-
Transmission Company	₹16,67,16,173/-
North east load Dispatch Centre (NERLDC)	₹49,83,094/-
<b>Total</b>	<b>₹ 144,25,08,760/-</b>

Ka lawm e.

**HON. SPEAKER** : *Zawhbelhna* zawt turin zawhna neitu, Pu Lalchhuanthanga ilo sawm ang.

**PU LALCHHUANTHANGA:** Pu Speaker, ka lawm e. Ka zawhbelhnate chu -

- i) “Power & Electricity Department hi Corporation-a dah tumna a awm em?”
- ii) “Khawpui chhunga electric line hlui tawh tak takte hi a thara thlak tumna a awm em?” tihte a ni e. Ka lawm e.

**HON. SPEAKER** : *Zawhbelhna* - Hrangturzo Bialtu zahawm tak, Pu Lalmuanpuia Punte.

**PU LALMUANPUIA PUNTE:** Pu Speaker, ka lawm e. Ka zawhbelhna chu -

- i) “Electric bill hi prepaid-a tih tumna a awm em?” tih leh,
- ii) “Chekkawn khi krismas dawn khan an transformer a chhia a, Krismas-a eng an neih loh an hlau si a, hmanhmawh deuh maiin minister hian hma min lak sak a, emergency deuhin an han dah chho a. Krismas zawhah a chhia a chhe leh ta mai a. Khi khi min thlak sak thei em?” tih a ni a.

Pu Speaker, i phalnain ka han sawi belh duh lawk chu - khawchhak sumdawng inzuar bawr deuh mai hi in khatah a lut a; “Hei, nang kha; i thil zawrh kha a chhe lutuk; i emergency light ka lei kha thlamah ka hmang char char a, thla hnih pawh a daih lo; a chhe leh daih tawh. A va tlo lo ve!” a ti a. “Nang pawh, emergency na na na engah nge rinrawlah i hman reng reng”, a ti a.

Chuvang chuan, Chekkawn khi emergency taka min pek kha a ni a, rinrawla hman chi chu a ni lova; “A thar min pe thei ang em?” tih a ni e. Ka lawm e.

**HON. SPEAKER** : *Zawhbelhna* - Lawngtlai West Bialtu, Member zahawm tak Pu C. Ngunlianchunga.

**PU C. NGUNLIANCHUNGA:** Pu Speaker, ka lawm e.

Kha, ₹14 crores lai mai electric bill ba kan lo nei a. Kan House Leader zahawm tak khan, “Electric bill te hi, bat chuan interest a awm avangin, buhfai man te chu kan ba ve dawn lo a ni”, a tih kha; hei, sawrkar hnu, Ni 16. 2.2024 a ni ta a; “he electric bill ba hi tun sawrkar thar hian engtikah nge a pek tlak ang?” tih ka zawh belh a ni e.

**HON. SPEAKER** : *Zawhbelhna* - Palak Bialtu, Member zahawm tak Pu K. Hrahmo sawm ang.

**PU K. HRAHMO** : Pu Speaker, ka lawm e. Sawlai Lawngtlai leh Siaha District- ina electricity kan hmuh chhiat zia saw; chhe tak a ni. January thla phei kha chuan ni 30-ah zan 10 vel eng kan hmu a, zan 20 eng kan hmu lo a ni. A chhan leh vang an sawi danah chuan, “Khawiva atangin a line kan hmu lo; Khawiva-ah light an cut; Khawiva-in electricity a dawng lo” tih vek hi a ni a. Ka bial mipuite chuan Khawiva hi mihring rimchhe tak, palian-pui mai; hang dum tak, current min pe duh lotu angah an ngai tawh mai a. Chuvangin, a bik takin Siaha phei chu kan chhe leh zual a. Siaha leh Lawngtlai inkar hi temporary tala siamthat dan a awm thei ang em?.

**HON. SPEAKER** : A theih ang anga chhang turin a changtu Minister, Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, ka lawm e.

Zawhna-neitu, Pu Chhuana zawhna kha - corporate lam hi chu kan hawi tan a; kan hmalakna kawng tinrengah intodelh phawta hmalak turin ruahmanna kan siam a. Tuna *Sezawl-chhuah* a nih ngawt theih loh avangin, tuna kan hmalakna kawng tinreng hi corporate lam hawi zawng a ni e.

Khawpui chhunga hrui hlui hi tunah RDS hmangin kan thlak mek a, line te pawh a thim zing viau mai a; inhriatthiam te pawh kan inngen nghal ni se. Theih tawpin hma kan la a, keimahni pawisa nilovin central pawisa in tunah hian km 20 vel khawpui chungah hian hrui tharin kan thlak mek a ni.

Pu Muanpuia zawhna kha - Ni e, Krismas dawn khan theihtawp kan chhuah a, transformer te kan han dah thar a. Amaherawhchu, tum aiin a lo chhe leh hma a.

Theihtawpa kan hmalakna kha kan han chhunzawm leh ang a, a chhiatna chhan te pawh zawn chhuah a ngaiin kan hria a. In tlemte an ni a, 100 kVA kan dah a, 36 vel chauh zo tura kan ngaih kha a chhe rang riau mai a, ‘kan lo enfiah leh ang’ tih kha ka han sawi duh a.

Pu Ngunlianchunga zawhna - electric bill ba chungchang hi, hei, kan policy ah te pawh kan dah a. Kan CM-in, “March thla chhung hian power leina ba chu rulh vek kan tum a ni” a tih kha kan inhriattir a, a lawmawm hlein ka hria.

Pu K. Hrahmo, Palak Bialtu rawn zawhna kha – “Lawngtlai lam, chhim lampang saw a thim zing” a ti a. Kan han inzawt kual a, a hrui saw a lo hlui tawh khawp mai a, a *dish* te pawh a lo chhia a. Ruahsur loha current kal tlang kha, ruah a sur chuan a dish te a lo khi a, chung khi karah chuan current a lo leak thei a. Chung chu tunah hian a vaia zawn vek theih a nih loh avangin kan sum awm ang angin a thlakna kan han ngaihtuah a. Tunah hian an thlak mek a, thal chhung hian kan thlak zo hman mai thei a. Ruahsura pianga thim lo tur chuan hma kan la a, theihtawp kan chhuah a; tun sorkar hi chuan “kan ngai pawimawh khawp mai” tih kha ka han sawi duh a ni, Pu Speaker.

**HON. SPEAKER** : Hei, Power & Electricity Department hi a chhuak hnem riau mai a, tun tum hi; kan minister pawh a din deuh tlauh tlauh a ngai dawn a ni; lo in ring deuh se la a tha ang e.

Aw le, Starred Question No. 262 zawt turin Thorang Bialtu, Member zahawm tak Pu R. Rohmingliana ilo sawm ang.

*Starred Question No. 262 - Electric current avanga zangnadawmna chungchang.*

**PU R. ROHMINGLIANA:** Pu Speaker, ka lawm e. Starred Question No. 262 - Power & Electricity Department Minister zahawm tak chhana tan - “Electric current kal dik loh vanga consumer-te bungrua a chhiat hian, sawrkar hian *zangna-dawmna* a ngaihtuah sak thei em?” tih a ni e.

**HON. SPEAKER** : A chhang turin a changtu Minister Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, ka lawm e.

*Starred Question* No. 262 chhanna chu – “Thei e” tih a ni. Amaherawhchu, electric current kal dik lo chu a chhan leh vang hriat hmasak a ngai a. Dan kalha mipui leh consumer ten wiring leh connection te tidanglama an lo khawih chingpen hian, dan anga hrem theih anni zawk.

**HON. SPEAKER** : *Zawhbelhna* zawt turin a zawhna neitu Pu R. Rohmingliana ilo sawm ang.

**PU R. ROHMINGLIANA:** Pu Speaker, ka *Zawhbelhna* –

- i) Complain hun chhung a awm em? A chhiatna rei tawh viau mahse, tun hunah a la complain theih em?
- ii) Engang chinah nge zangna-dawmna hi pek theih a nih?

**HON. SPEAKER** : *Zawhbelhna* - East Tuipui Bialtu, Member zahawm tak Pu Ramthanmawia ilo sawm ang.

**PU RAMTHANMAWIA** : Pu Speaker, ka lawm e. Ka *Zawhbelhna* chu –

- i) Ka bial Vaphai-ah hian transformer pali kan nei a, 100 kVA pahnih leh 25 kVA pahnih a ni a; 100 kVA pakhat hi a hlui tawh lutuk a, a chhiat pawhin kan han siam thin a, a daih rei thei lova; a chhe reng mai a. Hei hi min thlaksak thei ang em? Tin, 25 kVA pakhat zawk pawh hian kan mamawh a puhruk zo tawh lova, *peak hour*-ah hian inenchhawk a ngai a. Chuvang chuan, transformer lian 100 kVA pakhat leh 25 kVA hi 63 kVA-a min thlak sak turin Kan Minister hian min ngaihtuah sak thei ang em?
- ii) Tun kumthar atang khan Vaphai-ah hian electric bill a sang thut mai a, a ngaihna kan hre lova, kan buai khawp mai a. “Meter box dik loh nge, eng nge?” kan ti a, kan buai khawp mai a. Hei hi kan Minister hian min chhuichian sak thei ang em?

Ka lawm e.

**HON. SPEAKER** : *Zawhbelhna* zawt turin Member zahawm tak Pu Lalramliana Papua, Lunglei South bialtu ilo sawm ang.

**PU LALRAMLIANA PAPUIA:** Pu Speaker, ka *Zawhbelhna* chu –

Saw, Lunglei khawpuiah sawn ‘electric thir hrui’ kan tih ang chi hi zam a la awm nual a. Chungah chuan a then chu hmun ual-au deuh, hlauhawm lai deuhah, naupangin hmawlh sei deuha an han vuak phak mai tur ang chi te a la awm a.

Tin, nikum lawk mai pawh khan inchung pakhat in sa laiin a tui pe lai electric wire thir hrui ang chi khan a man avangin a nunna a chan pah tawh bawk a. Khatiang khan, hlauhawm tak tak hi a la awm nual a ni. Sawtiang ang chi ho tal saw (a zawng zawng a theih loh pawhin) ABC (Aerial Bunched Cable) kan tih ang chi hmang hian min thlak sak ve thei ang em? “Thlak tumna a awm em; a hrui hlauhawm zual ang chi te tal saw?” tih kha ka zawhna a ni e. Ka lawm e.

**HON. SPEAKER** : A theih ang anga chhang turin, a changtu Minister Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, zawhbelhna neitu Pu Rohmingthanga zawhna kha - complain theih chhung chu a complain theih deuh reng a. Amaherawhchu, a chhan leh a vang (nichina kan sawi tak ang khan) uluk taka zir chian a, hmalak dan tur te pawh committee hran an awm a, Consumer Committee te indin thar leh in a zau thei ang bera puanzar te pawh a ni a. Khangte pawh kha kan lo ngaihven turah ngai ila a tha ang e.

Tin, Pu Ramthanmawia, East Tuipui bialtu rawn zawhna kha - ni e, transformer hi hmun tinah kan in daih lova. Tunah pawh tun sawrkar thar hian vaibelchhe 7 in transformer lei kan tum a, chuti hunah chuan a tul zualte chu han thlak kan tum a. Kan sawi thin angin tuna kan transformer 68% hi chu kum 20 hma lama lei tawh kha a ni a. A lifetime hi kum 20 a ni a, lifetime pel deuh vek tawh a nih avangin bial tinah hian kan indaih lova.

Nimin khan kan Education Minister khan MLA fund atanga zirtirtu rawih belh te a ti a; MLA fund atang te pawh hian transformer te pawh hi lei ila, mahni bialah hian a thlakna a awm chuan thlak zung zung mai ila; chung te pawh chu mipui rawngbawlina tho a ni a. Pu Speaker, chungte chu ngaihtuahnaah a awm a; kan tangkaipui viau mai thei a, mipuite pawhin. Chu chu ka han sawi zau deuh duh a.

Bill sang chungchang kha chu, tunah hian a system dik lo te pawh a lo awm a, a system te pawh an han siam thar leh a; nimin khan report te pawh kan dawng a. Kan system hi tlemin khawl thil te a ni a, a mumal lo ve deuh zeuh zeuh a. Khang kha chu kan hotute'n an lo ennawn turah ngai ila, department lam te pawh kan lo inhrilh dawn nia.

Pu Papuaia zawhna kha - Lunglei-ah sawn; ni e, hrui hlui (aluminum ang) kha a la awm nual a ti a. Ni e, tunah hian kan la thlak vek thei lo nain, hmalakna kan nei a, kan theh lut dawn a. Chu chu Central lam RDSS hnuaiia Modernization Scheme-ah hian vaibelchhe eng emaw zat kan theh lut dawn a. Chu chu min rawn phalsak chuan, khang te pawh kha ngaihtuahnaah kan lo hmang dawn nia. Ka lawm e.

**PU R. ROHMINGLIANA:** Pu Speaker, ka zawhna pahnihna kha min chhang lo tlat mai a, khawngaihin min chhan theih chuan – “Eng ang chenin nge zangna-dawmna pek theih a nih?” tih lai kha; a percentage-in nge awm, khalai taka kha hriatchian ka van duh em.

**PU F. RODINGLIANA, HON. MINISTER:** Pu Speaker, percentage a awm lova. Nichin a ka sawi tak ang khan, *Redressal Committee* a awm a, chungho in an rel ang leh a thil chhiaa te kha a chhan leh a vang, (nichin a sawi ang khan) current pawh kha keimahniin a kan lo pawh belh teuh avanga kang a nih chuan, ‘anmahni kha hrem theih anni zawk’ tih kha nichin khan ka chhang telin ka hria.



**HON. SPEAKER** : Aw le, tunah *Starred Question* No. 263 zawt turin Tuivawl Bialtu, Member zahawm tak Pu Lalchhandama Ralte ilo sawm ang.

*Starred Question No. 263 - Tlawng Hydrel Project chungchang.*

**PU LALCHHANDAMA RALTE, OPP. LEADER** : Pu Speaker, *Starred Question* No. 263 - Power & Electricity Department changtu Minister min chhan a tan -

- a) “Lungleng khaw bula Tlawng-Hydro Project 54 mW pechhuak thei tur chungchangah hmalak a ni tawh em?” tih leh,
- b) “Hmalakna awm tawh ni se, engnge kan thlen chin?” tih a ni e.

**HON. SPEAKER** : Chhang turin, a changtu Minister Pu F. Rodingliana i sawm ang.

**PU F. RODINGLIANA, HON. MINISTER:** Pu Speaker, kan ding zing ve ta hle mai. Pu Lalchhandama Ralte zawhna-chhanna chu –

- a) Ni tawh e.
- b) Tlawng HEP hi a tira CWC ruahman dan chuan 54 mW pechhuak thei tur a ni a. A hnuah CWC vekin 120 mW turin hma thar a la leh a. Chutihrualin, he lui tho hi a hmun ngaiah sawrkar thar hmalaknain 24 mW pechhuak tura ruahmanna kalpui leh a ni e. Ka lawm e.

**HON. SPEAKER** : *Zawhbelhna* - zawt turin zawhna neitu Pu Lalchhandama Ralte.

**PU LALCHHANDAMA RALTE, OPP. LEADER:** Pu Speaker, a changtu minister-in min han chhanna kha - 54 mW pe tura beisei niin, sawrkar hmalakna tur bu an ziaha telh a ni a. Kha CWC khan “140/120 mW velah ennawnin a rawn dah a” a ti a. Amaherawhchu, tuna a rawn sawi leh khan 24 mW velah a tlahniam duai mai a. Khalai te kha han sawi fiah ni sela.

Pahnihnaah chuan, “hei hi khuap thei dawn ta ila, state sum atangin kan ti dawn nge, funding agency kan hmu sa?” tih kha ka zawhna a ni a. Tin, chumi kaihnhawihah chuan - tui han khuap ta ila, a catchment area-a compensation tih ngai a component kha a lian viau em; chu chuan harsatna min siam thei ang em?”

A tawp ber atan chuan, tuna mega-watt a pekchhuah tur a rawn sawi kha tui tam lai, a san lai ber a ni turah ka ngai a. Tui tlem laiin engzat nge a pek chhuah theih ang?

**HON. SPEAKER** : *Zawhbelhna* - Serlui Bialtu, Member zahawm tak Pu Lalrinsanga Ralte ilo sawm ang.

**PU LALRINSANGA RALTE** : Pu Speaker, Power Minister zahawm tak chhan atana ka zawhbelhna chu -

i) Serlui 'B' tuikhuah mega-watt 12 pechhuak thei hi Mizoram-in a vaia kan neih, kan ta a ni a. Official in commission la ni lo mahse, tunah hian hman mek a ni tho a. Khawl pathum mega-watt 4 theuh pechhuak thei a awm a, tunah hian khawl 2 a tha a, khawl 1 tha lo hi siam mek a ni a, hei hi a vaia kan ta, kan tharchhuah zawng zawng kan neih theih a nih avang hian, kan sawrkar hian Serlui 'B' khu chei that tumna a nei em?

ii) Tin, ZPM-sawrkar a lo pian theihna tura mipuiin min vote nana an hman ber nia ka hriat - *Power & Electricity* chungchangah hian Pu Speaker, I phalnain, SDRP ah hian ZPM a lo sawrkar chuan hmun thumah tui khuah tum a ni a. Chutah chuan, Matsekawi, mega-watt 120 (Rotlang khaw bula awm) hi engtikah nge bul tan a nih dawn?" Tin, Tuivai Phase-I mega-watt 100 pechhuak thei Ngopa bul ami hi engtikah nge khuah a nih dawn?

iii) Tun kumah hian heng tuikhuah buaipuina tur hian sawrkarin power engzat nge P&E Deptt. ah hian a pek? He SDRB bu-ah hian kumtin crore 800 dah tura ruahman a nih hmel a, a inziak a, Pu Speaker. Tun sawrkarah hian crore engzat nge dah a nih?

**HON. SPEAKER** : *Zawhbelhna* zawt turin Aizawl South-III Bialtu, Member zahawm tak Pi Baryl Vanneihsangi ilo sawm ang.

**PI BARYL VANNEIHSANGI:** Pu Speaker, ka lawm e.

Power & Electricity Deptt. changtu Minister ka zawh belhna tur pakhatna hi chu zawhna neituin a zawh tawh avangin ka rawn sawinawn lo mai ang a. Hemi hi starred question ah khan ka lo zawh tawh avangin 'DPR te pawh buaipui mek, siam mek a ni' tih kha min chhanna a niin ka hria a. Kha DPR kha "engtikah nge an peih theih ang?" tih hi ka zawhbelhna pakhatna a ni a.

Tin, pakhat hi solar chungchang a ni a, mahse Pu Speaker, rem min tihsak hram la, vawiin last day a ni tawh si a, hei bak zawhna hun a awm tawh lova. Hei, solar kan buaipui tan a; solar battery hi "a life-time engchen nge; engtianga rei nge?" tih leh, "A hautak tham ve baw si a, helaia kan buaipui ang hian kan ram hian kan chhawr thei dawn em?" tih kha ka zawhbelhnate a ni e. Ka lawm e.

**HON. SPEAKER** : *Zawhbelhna* zawt turin Pu C. Ngunlianchunga I lo sawm ang.

**PU C. NGUNLIANCHUNGA:** Pu Speaker, ka lawm e. Power & Electricity Deptt. changtu Minister zahawm tak ka zawhbelhna chu -

i) Electric bill kan tisang lo ang tih hi a ni a. Amaherawhchu, mipui atanga zawhna tam deuh chu, 'kan tisang lo ang' ti si hian bill tam deuh deuh hi a lo kal tho mai si a, 'kan pe tho a ni' an tih hi engnge maw a chhan le?

ii) Tin, electric bill sang deuh deuh an hmu a; an va complain a, a tlahniam leh mai thin hi engnge maw a chhan le?

iii) Tin, transformer kha, kan ngaihtla a. East Tuipui bialtu zahawm tak zawhnaah khan, Vaphai khuaah khan transformer 4, 100 kV pahnih leh 25 kV pahnih, a vaiin pali an nei a. Khatiang lo deuh khan a khaw lian deuhah chuan 500 kV ang te emawa chawmtir mai tumna a awm em? Khuua zirin transformer lian deuh khaw chawm thei tur; khua chu thang zel a ni a, 25 kV ang te hi chu a tetham khawp mai a. Hetiang lo hian transformer lian deuh kha 'leina tur kan nei dawn a ni' tih a ni a. Khatiang ngaihtuahna te kha sawrkar hian a nei em?

iv) A tawp berah chuan, kan electric bill hi prepaid-a tih theih dan a awm em? He sorkar hian tih a tum em? Ti ila chuan, a bill pawh a lut tha ang a, 'disconnect' tih awm reng lo hian. Sawrkar thar a lo piang a, beiseina sang tak mipui pawhin kan nei a. Chuvang chuan, helai hi ka han zawt a ni, Pu Speaker. Ka lawm e.

**HON. SPEAKER :** Aw le, a theih ang anga chhang turin kan Power Minister Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, zawhna a tam deuh hlek a, a zawhbelhtu Pu Chhandama zawhna kha - hei hi kan han tihdanglamna chhan pawh CWC hian 54 mega-watt hi 2022 a zo tura ruahmanna a ni ta. Amaherawhchu, a lui te an han en a, tha an ti a, 120 mega-watt in an thlak leh a, chu chu 2024 ah hian zawh hman an tum a. Kan policy ah khan multipurpose dense siam turin kan ti a, a DPR siam turin Oikos pawh kan be fel tawh a, tunah hian hma an la tan mek a. Hei hi, kan hre vek a, kan tui lak Tlawng Lui khu thal lai chuan a kang chat deuh thaw a nih avang hian, fur laia tui tam tak luang ral hi khuap ila, Aizawl tuilakna atan te pawh a tangkai turah kan ngai a, tin, tourism attraction atan te pawh. Chuvang chuan, meg-awatt 24 hi chu khawi atanga sum kan hmu lo a nih pawhin state sawrkar pawhin kan phak a nih chuan theih ang tawka hmalak dan tur te kan ngaihtuah a. Amaherawh chu, a DPR ber kan la neih loh avang hian, 'eng chen nge a chim dawn; eng tiangin nge compensate a awm dawn' tih chu waviinah hian kan chhang mai thei lo a, min lo hriatthiamna ka beisei a.

Tin, Pu Rinsanga zawhna kha – Serilui-B khu kan ngaipawimawh a. Tun kum kal taah pawh khan nuaih 15 vel a tih thar nan kan ti a, tunah hian khawl pathum *run* turin kan inpuahchah mek a, khawl pahnih chu thla hmasa khan a *ran* tawh a; pathumna *run* leh tur hian technician te rawn kal tura tih, 'kar leh' vawithum vel an ti tawh a. Chuvang chuan, technician rawn kal hunah a khawl pathum-a *run* turin hma kan la mek a, pawisa pawh kan dah fel tawh a ni.

Tuivai Lui hi a tirah chuan 210 mega-watt a ni a, amaherawhchu, kan han zir chiang a, 150 mega-watt vela tih tlak hian a catchment area te pawh a zim ang a, a khuah man te pawh a tlem avangin 'kan source of income ah' tiin kan hotute pawhin Tuivai Lui ti thar leh turin Delhi ah vawi 2-3 an kal tawh a, central lam pawhin min ngaihven viau a.

Tunlaih power mamawhna a sang tawh a; Central Minister-in min hrilh dan phei chuan, ‘tun atanga kum 5 ah chuan electric motor hi kan uar tawh dawn avangin, nangni lam khi resource nei tha inni a..’ tiin tang turin min ti a. Tuivai pawh hi an inhawng ang reng viau a. Tunah pawh hian lehkha thar hmuh mai ka inbeisei a. Chuvang chuan, kan han thlak danglam deuh a ni a.

Tin, Mat saw kan han zir chiang a, ‘120 mega-watt’ tih kha, a DPR kha pahnih a lo awm a, chu chu mega-watt 70 vel te pawh kan ngaihven leh a. Saw saw ram laili taka awm a ni a, a tangkai dawn em avangin khuaptu turte pawh ngaihtuah thar leha, hma thar lak tura ruahmanna kal mek a ni a. Tin, tun sawrkar hian khang tih vel nan khan crore 7 vel investigation te, DPR han siam thatna atan te leh a tul anga kan mi leh sa han vei-vahna atan crore 7 a dah a ni.

Tin, Baryl-i zawhna kha - DPR chu a ni a, tunah hian company 2 ah ruahmanna siam tir mek a niin, a zo hma zawk zawk leh kan duh zawk thlang tura tih a ni a. Solar chungchang pawh hi khaw tam takah tunah hian ruahmanna a kal a. Hei hi a tangkaiin a-emergency deuh hlek a, theih tawpa hma lak kan tum a ni.

Tin, Pu Ngunlianbunga zawhna – ‘bill sang’ han tih hi, a chhit man hi chu kan chawi dawn a. Amaherawhchu, *multiplying factor*, a rate kha chu a ngai rengin kan kal tir dawn a ni. Kan hman tam na na na chuan a chawi pawh kan chawi tam ang a, amaherawhchu, kum tina percent sang tak taka pung thin kha .... (interruption)

**PU C. NGUNLIANCHUNGA:** Pu Speaker, chhit ngai reng si, bulb pawh belh chuang lo fridge te, TV te a ngai reng siah khan, thla hmasa aia thla lo thara bill tam ta daih kha a ni a, kan sawi chu; tihbelh chu ni se thu dang a ni a. “Sawrkar tharah bill kan tipung dawn lo e”, tih a nih avang khan, bill kha a sang an hmu ta daih mai a; in luah ngai te khan chu chu an han sawi tam ber a nih avangin ka han zawt a ni a.

**PU F. RODINGLIANA, HON. MINISTER:** Pu Speaker, kha kha chu a *technical* deuh a, nakinah department te pawhin la enfiah se a tha ang e. A rate a pawh kha kan sawi tawh a, bill sang leh thut kha. Smart meter vuah kan tum a, hma kan la mek a, tunah hian Central-ah kan dil a, chu chu kan hmuh ngei pawh kan beisei a. Chu chu a nih hunah chuan khang bill-a buai te pawh kha a reh thei turah kan ngai a.

Tin, ‘500 kV vuah’ tih te pawh kha, a thatlohna lai a awm ve a, pakhat a chhiat khan a thim a zau lutuk a. Chuvang chuan, 500 kV ni lova khatianga a veng bill ang deuha tih kha ‘technical thilah a fuh zawk a ni’ tih kha kan hotute ngaihdan a ni e.

Ka chhang kimin ka hria a; a kim loh pawhin kan inzawt leh mai a ni ang chu, Pu Speaker. Pre-paid kha chu, smart meter khan a keng tel dawn a ni.

**HON. SPEAKER** : *Starred Question No. 264 - Zawt turin, Champhai North Bialtu zahawm tak Pu H. Ginzalala.*

*Starred Question No. 264 - Tualpui khua Power Transmission chungchang.*

**PU H. GINZALALA** : Pu Speaker, ka lawm e.

Minister zahawm tak Power & Electricity Department changtuin min chhan atan ka zawhna chu hei hi a ni e -

Champhai North huamchhungah Tualpui khua tana power pekna hruipui hi 11 kV chauh a ni a. A line kal dan pawh a dik lo hle mai a; kawng kam pawh ni lo, Ramhnuaiyah line kaltlang tir a ni a. Hei hian line-fault a ti tam em em mai a ni. “He power transmission line hi kawng kama sawn 11 kV atanga 33 kV line-a thlak a rem em?” tih hi ka zawhna a ni e. Pu Speaker, ka lawm e.

**HON. SPEAKER** : Chhang turin a changtu Minister Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, ka lawm e. Zawhna chhanna chu –

11 kV line kawng kama sawn (re-alignment) hi chu sum a awm chuan tih mai theih a ni. Tin, 11 kV line 33 kV line a thlak tur hi chuan Tualpui khuaah hian 33/11 kV sub-Station siam thar a ngai dawn a. Hei hi a hautak mai bakah, Tualpui khua electrical load ngaihtuahin tun dinhmunah chuan 33/11 kV sub-Station han siamna khawp niin a lang lova. Pu Speaker, helai ‘11 kV chauh’ tih hi, ‘chauh’ a ni lova, a line hi a kalna a dik lo zawk a. Tun January Ni 10 leh tih khan an VC ten min rawn hmu a, hmanlai Jeep kawng hluia kal a ni a, a kawnga kha abandon a nih tawh avangin maintenance a harsa a, chu chu tunah hian RDSS suma ruahmanna kalpui mek a ni; ka han sawi belh deuh a nih chu.

**HON. SPEAKER** : A lawmawm e. Tuna mi ang deuh chiah khan kan bial Suangpuilawn-ah pawh khian a awm a. Hmanlai Jeep road kawng kha a la zawh a, maintenance a buaithlak em em mai a. Kha kha ‘kan Power Minister khan khawngaihmin min lo hriat sak se’ tiin remchang ka han chuh ve teh ang.

*Awle, Zawhbelhna zawt turin zawhna neitu Pu H. Ginzalala ilo sawm ang.*

**PU H. GINZALALA** : Awle, Pu Speaker, ka lawm e.

A dik khawp mai a, Hon. Minister min chhanna kha. Amaherawhchu, 11kV line a a kal hian line lost hi a tam a, nakin zelah chuan hetiang line thui hi chu 11 kV line-ah kal reng lo sela, 33 kV line a kal theih dan awm sela a thain ka ring a.

Ka *Zawhbelhna* chu hei hi a ni - Solar Power hi kan hre tlang ta viau mai a, ka lo buaipuina te pawh a rei ve ta a. Kum 2020-a Pu Man Mohan Singh sawrkar tum khan ‘JNNSM - Jawaharlal Nehru National Solar Mission’ an ti a, a hawnnaah te pawh ka zuk tel ve a; North-East a a tel awmchhun te pawh ka zuk ni ve a ni. Ka ngaihtuahnaah chuan tunah hian Solar, Mega-watt scale in kan siam a; hei hi theih chu ni se, kan thalai -entrepreneur-te eizawna atana siam sak hi a tha khawpin ka hria a. Chuvangin, company lian pui puite allotment lo pek zung zung te pawh, ‘a him em’ tih te pawh hi ka ngaihtuahnaah a awm a ni.

Chu chu a nih avangin, kan thalaite hian anmahni phak taw ang zela investment an rawn tih ve theihna turin ruahmanna siam hi a tha khawpin ka hria a, employment generate nan a tha a ni; thingtlang kil tinah kan ti thei baw a. Khawtin hian power energy consumption atangin allotment ve deuh hlek siam saka, kha khua a mi ngei, kha tlangval ngei khan investment a tiha revenue a lo hmuh kha ka duhsak khawp mai a. A rate chungchangah te pawh tlema han hlawk ve theihna tur te pawha siampui mai ni sela a thain ka ring a. Hei hian employment nasa takin, khaw tinah a generate dawn a ni. Chu chu a nih avangin, State pawn atanga company lian pui-pui, sum ngah tak-takte hlawkna tur ringawta kan tih kha chu a him lo deuhna chin a awmin ka ring a. Chu lai chu min hriat sak se; eng emaw chenah min chhan sak theih pheichuan ka lawm khawp ang a.

A pahnihnaah chuan, member dangte pawhin in sawi vek a; line-fault awm chhan, fur laia line chhiat chhan tam tak chu - a ban hi a hniam em a ni. Keini bialah pawh transmission-line hi hniam te tein a awm vek a, mau tamna ramah pheichuan mauin a vaw phak vek a ni. SP-29 steel port kan tih ang chi te kan hmang a, kha kha thlak theih sela chuan furah pawh buai miah lo tur hi a ni a. Tin, line-maintenance - maintenance court hi a san phah em em mai a ni. Chu chu a nih avangin, zawi zawiin a tahtawlin vawi lehkhatah chuan a theih hauh lo ang a; *tower-type* a han thlak hian thui tak tak te pawh a pawh theih a. A hlawk zawk dan, a sustainable zawk dan riau te pawh a awm a ni. Chu chu a nih avangin, steel-port tam tak hi kan bialah te pawh a awm a ni, Hnahlan tlangdungah te pawh hian. Heng te pawh hi zawi zawia ‘power-type a thlak theih dan awm se’ tih hi ka dilna leh ka zawhna te pawh ni bawk sela. Pu Speaker, ka zawhna hi a tam deuh hlek a, min hriatthiam theih chuan.

Hei, electric line kal sual avanga thihna kumtin a awm ringawt mai hi a dik lo a ni. Ramhnuaiah hian line hniam tak tak ‘Bawng pawhin a taw phak ang’ tih tur te pawh keimah pawhin ka hmu a, a thla te pawh ka la a ni; amaherawhchu, ka thehdarh chuang lova. Tin, ‘Jumper’ an ti a, ‘a ban atanga a in pass chhawnna’ ti mai ang; tlema thliin a han chhema rawn tla thlaa, a ban a zuk vuak avanga line kalsualin mihring thleng te pawh a a man theih dan te pawh hi a awm a. Heng zawng zawngte pawh hi uluk zawkin enkawl ni sela a that ka ring a.

Tin, Champhai hi 132 kV single line-in min chawm chauh a ni a, line a lo chhiat palh hian a buaithlak khawp mai a. *Torrent-line* pawh ka dil tawh a, hei pawh hi min lo hriat sak se ka duh a; chu chu ka dilna pawh ni bawk teh se. Pu Speaker, ka lawm e.

**HON. SPEAKER** : *Zawhbelhna* zawt turin member zahawm tak, Mamit Bialtu Pu H. Lalzirliana ilo sawm ang.

**PU H. LALZIRLIANA** : Pu Speaker, ka lawm e.

I biala mi ang ve tho, power supply-line hlui, ngaw kar - Rawpuichhip leh Hmunpui inkarah khuan a kal a, khu kawng khu abandon deuh tawh a ni a; kawng thar, Lengpui lam atanga kalna kha a awm daih tawh a. Chutah chuan shift tura dilna han thlen te pawh kan nei a, Ministry hmasaah te, department-ah te pawh. Kha kha tunah RDSS hnuaiah hian han tih ve dan a awm ang em? Rawngpuichhip – Lengpui line khu thuan that emaw, ‘a kalna khu thlak tawp emawin tihdan a awm ang em?’ tih kha ka zawhna pakhatna ni sela.

Pahnihnaah chuan, ‘linesman’ kan tih lai taka hi, khuti lai bial hnai Nghalchawm, Lengte, Sihmui atang khuan khulai area zawng zawng khu mi pakhatin a cover a, a indaih lo khawp mai a. Khulaiah khuan linesman, ‘MR’ kan tih ang chi kha min pe turin ka ngen a. Chubakah, Damparengpui area-ah khuan kan mamawh khawp mai a, min tihsak dan a awm ang em?

**HON. SPEAKER** : *Zawhbelhna* - Zawt turin Tuivawl Bialtu zahawm tak Pu Lalchhandama Ralte.

**PU LALCHHANDAMA RALTE, OPP. LEADER:** Pu Speaker, ka lawm e.

Demand sawi ni te hian mahni bial han sawi vak kha a rem lo thin deuha kan hriat avangin, zawhna lo kal nena inzawm bawk avangin ka inthlahrung lo mai ang a. Hmannia ka sawi deuh thuak tawh, a bik takin Saitual - Tuivawl bial lamah khian kan line kan la phei a, i bial Suangpuilawn lamah lo kalin, Darlawn ah a lo phei a, Darlawn atangin Sakawrdai lamah a lo phei leh a. Kan line hi thli leh ruah a nasat hian a chhe zing khawp mai a, heng te hi hemi kan scheme tharah hian min enfel sakin, min thlak fel sak dawn hnai em?

Tin, ka hmaa zawhna ang tho khan, thingtlang khua pathum-pali te khi linesman pakhatin tun hunah hian an vil a, Village Council thenkhata an VC sum tein linesman tur, electric lama thiamna background pawh nei lo te kha an han ruai a. Tin, MLA fund te pawhin khatiang linesman te kha kan ruai nawk nawk a. Hei hi a bik takin Muster Roll base-in emaw, thingtlang lama kan electric line te viltu tur hi pek belh theih kan ni ang em?

**HON. SPEAKER** : *Zawhbelhna* - Zawt turin Hachhek Bialtu zahawmtak Pu Robert Romawia Royte.

**PU ROBERT ROMAWIA ROYTE:** Pu Speaker, ka lawm e.

Linesman indaihloh chungchang kha chu hun hmasa lamah khan ka bial preference-a hmangin ka sawi tawh a, ka sawi nawn tawh lo ang a; ‘kan mamawh hle a ni’ tih kha ka sawi chin ni mai sela.

Ka zawhbelhna chu ka hma Member zahawm tak takte pawh khan an zawt nual tawh a. Zamuang - Chuhvel kal tlanga Saikhawthlir, khu lai khu kawngpui hrul ni lovah power-line a kal a, a chhiat nikhuain a buaithlak khawp mai a. A chhiatna lai te hriat a harsa em em mai a, a ramhnuai a, tih fe te a ngai thin a. Department lam hotute pawh ka sawipui tawh a, tuna kan Power Minister zahawm takin scheme a sawi ‘RDSS’ ang chi emaw, state fund atang te pawhin khulai khu siamthat tumna a awm ve thei ang em? Ka lawm e.

**HON. SPEAKER** : A zau khawp mai a; a theih ang anga chhang turin a changtu Minister Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, ka lawm e.

Zawhbelhna kha a tam khawp mai a, ‘pathum bak’ kan ti a, paruk a ni deuh fur hlawm mai a. Vawiin chu min hrem a ni deuh berin ka hria; parukna a ni chiahin ka hria, Pu Robert-a zawhna kha.

**HON. SPEAKER** : Tun tumah khan Pu H. Ginzalala, Pu H. Lalzirliana, Pu Lalchhandama Ralte leh Pu Robert Romawia Royte te an ni, tun zawhnaah khan.

**PU F. RODINGLIANA, HON. MINISTER:** Engpawh ni se, ka rilruah Ngopa papakhat thil sawi a lo lang a, ‘*Sap nuna nun kan tum a, kan nunin a tlin lo a ni*’ a tih ang deuh a ni a. Thil tha chu kan duh tlang khawp mai a, mahse, kan sumin a tlin si lo lai hi a buaithlak lai chu a ni a. Kha leh chen kha sawrkar chelhtute’n an lo chelh tawh a, hei, keinin thla hnih hmel kan han hmu a, hma kan han la char char a, theihtawpin; *mawng-vawm-ba* angin kan che vein kan hria. Thil zawng zawng hi vawikhatah a siamthat thut theih loh a, sum indaih dana zira kal turah te pawh kan inngai a.

Zawhbelhtu han zawhna – ‘khawtinah solar plant te siam ila’ tih kha, kha kha chu environment lam atanga remtih a nih pawh ka ring chiah lova, tuna kan neih sa thenkhat pawh hi a then chu an complain lek lek a, tunah hian ruahmanna kan nei mek a, chungte chu – Vantawng - Thenzawl ramah sawn 10 mW a ni a, Pamtul ram - North Vanlaiphai ah 20 mW a ni a, Dilkhan - Sumsuih ramah 5 mW, Keifang - Saitual bulah khian 10 mW hmalakna a ni a. Heng bakah hian khaw thenkhatah ‘min rawn tihsak ve rawh u’ ti



an awm a; khaw eng emaw zat chu la tih theih turah ka ngai a. Amaherawhchu, khua zawng zawng tih em em hi chu a ni lo deuh turah kan ngai a, Pu Speaker.

Tin, electric ban thlak chungchang pawh hi, kan sum dinhmunin a zir loh avangin kan phak ang tawk kan hmang maiah kan ngai a. Kan duh dan ang chuan a tower-a kal tir vek kan duh a, amaherawhchu, ‘sumin a tlin lo a ni’ tih kha Pu Ginzalala pawh khan min lo hriatsak ka duh a.

Champhai line khi hrui khatin a kal tawh lova, tunah chuan hrui hnihin a kal a. Saitual line a chhiat pawhin, Serchhip lam atangin line a kal chho a, chu chuan a pawt thei vek tawh a. Chuvang chuan, *double-lane* kal ang a ni a, Serchhip leh Saitual lam atangin. **(Pu H. Ginzalala:** Pu Speaker, lawkin. Khawzawl atang zawkin a nia ka sawi chu; Khawzawl - Champhai line hi single-line a ni.) Tower tho a ni a, a pahniha a kal kawp avang hian, khi khi chu ‘a ngaihtuahawm lo a ni’ tih kha ka han hrih nawn leh duh a ni e.

Mamit bialtu Pu Zira zawhna kha - hrui hlui hi chu thlak kan duh a, sawi ang khan a dish te pawh a hlui tawh hlawm a, kan sum dinhmuna zir zelin thlak kual kan tum a. Tin, *Housing for All*-ah hian eng emaw zat kan thlak thei dawn a, chu chu tunah hian ruahmanna kal mek a ni. Hmannia kan hotute zuk kal pawh khan khaw riat vel an rawn tihbelh leh a, chungte a nih chuan tuna kan harsat zualna hi chu kumthar lo awm turah hi chuan kan tih theih mai kan ring a. A hrui mai ni lovin, a dish a hlui tawh hlawm a, chu chuan (nichina ka sawi ang khan) harsatna min siam a ni.

Rawpuichhip chungchang pawh kha - tuna kan sawi ang bawh khan hmalak tum a ni a, 132 kV Bairabi atanga kal tur te kha a tih theih hunah forest clearance te kan neih chuan, eng emaw chen chu a let zawng te pawhin a rawn ti thei turah kan hotute pawhin an ngai a ni.

Pu Chhandama zawhna - linesman chungchang hi tunah hian kan department ah hian post ruak 1000 dawn a awm a, chu chuan min tibuai khawp mai a. Tin, kan buaina bik chu, *Aikal phal loh* kan ti a, kum 60 te, kum 55 chuang te an ni tawh a, kan linesmen te hi, kum 40 hnu lamah chuan a bana lawn te a lo har tawh a, chu chuan indaihlohna a tizual a, keimahniah chuan; henge pawh hi min hriatthiam a ngai a. Ban bula thu tawk vel hi kan ngah tawh khawp mai a, *Aikal* kan phal tak lohah chuan. Chuvang chuan, hmun dang danga kan indaihlohna - an aikal thin kha an kal tak loh avangin nidang aiin line te pawh a lo chhe zing deuh a nih pawhin, thil tha kan duhna avanga kan tawrhnaah min ngaihsak mai turin memberte ka han sawm duh a.

Pu Robert-a rawn zawhna - Chuhvel te pawh kha *Housing for All* a lo chhuah chuan ‘hmalak kan tum a ni’ tih kha Pu Speaker, ka han sawi duh a ni e. Ka lawm e.

**HON. SPEAKER** : Aw le, a lawmawm e. Vawiin chu kan Power Minister a rim tlah tlah khawp mai a. Kha, zawhnate kha a tam angreng a, rinai takin a rawn chhang felfai thei zawk a, a lawmawm takzet zet a ni.

*Starred Question No. 265*, a zawhna neitu hi Lt.Col. Lalhmingthanga a ni a. Mahse hun tira kan sawi ang khan, taksa lam harsatna avangin kan zingah a awm thei lova, a aia zawt turin Aizawl West-I Bialtu, Member zahawmtak Pu TBC Lalvenchhunga i lo sawm ang.

*Starred Question No. 265 - Eklavya Model Residential School chungchang.*

**PU TBC LALVENCHHUNGA:** Pu Speaker, ka lawm e. Social Welfare, Tribal Affairs, Women & Child Development changtu Minister hnena ka zawhna chu –

- a) Eklavya Model Residential School hi Mizoram chhungah eng zat nge sak a nih tawha, khawi hmunah te nge?
- b) Eng zat nge functional?
- c) Eng zat nge din belh leh tum a nih? Din belh leh tum a nih chuan, khawi hmunah te nge?

Ka lawm e.

**HON. SPEAKER** : Chhang turin Social Welfare, Tribal Affairs, Women & Child Development changtu Minister, Pi Lalrinpuii ilo sawm ang.

**PI LALRINPUII, HON. MINISTER:** Pu Speaker, ka lawm e.

Lt. Col. Clement Lalhmingthanga zawhna kha chhawng thumin a awm a, a zawhna chhanna chu -

- a) Eklavya Model Residential School (EMRS) hi Mizoram-ah 11 sak tawh a ni. Tunah hian function mek 6 a awm a, chungte chu –
  - i) EMRS, Lunglei,
  - ii) EMRS, Serchhip,
  - iii) EMRS, Lawngtlai,
  - iv) EMRS, Chawngte (Lawngtlai District),
  - v) EMRS, Tuipang (Siaha District),
  - vi) EMRSA, Ngopa (Saitual District) te an ni.

Sak lai mek (under construction) hi 5 a awm a, chungte chu –

- i) EMRS, Tlangnuam (Aizawl District),
- ii) EMRS, Zawlnuam (Mamit District),
- iii) EMRS, Bilkhawthlir (Kolasib District),
- iv) EMRS, Tlungvel (Aizawl District),
- v) EMRS, Niawhtlang (Siaha District) te an ni.

Helaiah hian pakhat hi tihsual deuh hlek a awm a, chhanna in type saa ‘Thingsulthliah’ tih kha, ‘Tlungvel’ tih zawk tur a ni, Pu Speaker.

- b) Tarlan tak angin, tunah hian functional EMRS hi 6 a awm mek a ni.
- c) EMRS sak mek bakah hmun 6 ah din belh leh tum a ni a, chungte chu –
  - i) EMRS, Tlangnuam (Aizawl District)
  - ii) EMRS, Hnahthial,
  - iii) EMRS, Lungsen (Lunglei District)
  - iv) EMRS, West Phaileng,
  - v) EMRS, Khawzawl,
  - vi) EMRS, Darlawn (Aizawl District)
  - vii) EMRS, Khawbung (Champhai District) te an ni.

Ka lawm e.

**HON. SPEAKER** : *Zawhbelhna* - Zawhna neitu Pu TBC Lalvenchhunga.

**PU TBC LALVENCHHUNGA:** Pu Speaker, ka lawm e.

EMRS hi kan hriat theuh angin 100% central funding a ni a, CBSE hnuaiah a awm a. Tuna functional hi paruk niin, 2020-2021-ah hian paruk tihbelh tum mek a ni a; hetah hian a bialtu, a zawhna neitu duh dan angin, *Champhai-pa* ka nih vang ni lovin, list leh ah hian Champhai lamah hian a la lang hlauh mai a. Ngopa chhak lampang khi EMRS (proposal thehluh tawh nen) 17 zet mai a awm a. Champhai-ah khian Higher Secondary phe chu vawin ni thlengin pakhat chiah a awm a, 1971-a college neih tawh kha, college pakhat, Higher Secondary pakhat neiin an la kal mek a.

Tin, he EMRS-a hi tuna sanction hnukung ber phe hi chu crore 24, school pakhatah lakh 2400/- zet mai sanction a han ni hlawn a. Hengte atang hian zirlaiteah hian –

- i) Hma kan sawnpui em, kan student-te a enkawlnaah?
- ii) Duhsak bikna ‘*Vulnerable Tribal Groups*’ kan tihah hian kan nei reng em?
- iii) Champhai-ah khian dah tumna a awm ve em?” tih te kha a ni e.

Ka lawm e.

**HON. SPEAKER** : *Zawhbelhna* - Zawt turin Champhai North Bialtu zahawmtak, Pu H. Ginzalala.

**PU H. GINZALALA** : Pu Speaker, ka lawm e. Ka zawhna chu member zahawmtak khan a rawn sawi tawh tho a. Hon. Minister hnenah pawh vawi duai lo ka lo sawi tawh a; kan bial RD Block-ah hian kan la nei ve miah lo a ni. DO letter te pawh ka rawn ziah kha. Chuvangin, ka bialah hian hei hi chu min dahsak ngei pawh ka ring a, min dahsak dawn avang pawhin lawmthu ka han sawi lawk teh ang.

Ka zawhna chu - “Eklavya Model Residential School hi Champhai North bial chhungah min lo dah sak thei em?” tih a ni. Ka lawm e.

**HON. SPEAKER** : *Zawhbelhna* - East Tuipui Bialtu, Member zahawmtak Pu Ramthanmawia.

**PU RAMTHANMAWIA** : Pu Speaker, ka lawm e.

Kan Minister zahawm tak Social Welfare, Tribal Affairs, Women & Child Development Department changtu chhan atan -

Ka bial Khawbung EMRS dinna tur hian 2020-2021 khan phalna min pe a. Hei hi, a hmun hma te chin fel kha a rei viau mai a; tunah hian engnge a thlen chin? Engtik nge an sak tan ve theih ang? Kan lo nghakhlelh khawp mai a. Min chhan theih chuan ka lawm khawp ang. Ka lawm e.

**HON. SPEAKER** : Chhang turin, a changtu Minister Pi Lalrinpui ilo sawm ang.

**PI LALRINPUI, HON. MINISTER:** Pu Speaker, ka lawm e.

Pu Speaker, i phalnain, Minister-te Demand sawi laia din an phal baw k si lova, *Zawhna & Chhanna* hun hi kan din ve theih hun a ni mai a. Ka bial te pawh hian, “I van ding khat ve!” an rawn ti deuh thin a. Chuvang chuan, ka bial te hi ka din hleih theih loh chhan nangmah kaltlangin ka han hrilh a ni e.

Pu Speaker, tunah hian zawhbelhna zawttu Pu TBC Lalvenchhunga’n Pu Clement-a aiawha a rawn zawh kha, ka chhanna chu - EMRS Champhai-ah hian kum 2021-ah khan Ministry of Tribal Affairs (MOTA) hnuaiah heng khuate tana dil belhna an rawn thawn daih tawh a, sawrkar hmasa hunlai khan. Chung khuate chu - Aibawk, Thingdawl, East Lungdar, Reiek, Bunglemun, Sangau, Phullen, Champhai leh Bungle South te an ni. Kut an ben loh chuan mak ka ti viau ang; an rin aia tha khan a lo kal tawh si a.

Pu Speaker, a pahnihaah chuan, “Tribal-te duhsak bikna a awm em?” han tihah khan, a chhanna hi thui tak helaiah hian a awm sa a –

Ministry of Tribal Affairs chuan, tribal naupangte hi zirna kawng hrang hranga hma an sawn zual zel theihna tur leh, hmun tha an neih theihna turin he EMRS hi a lo kalpui a ni a, zirna senso zawng zawng hi a free vek a ni. Tin, hostel chenna nuam tak te an nei a ni. A hmunhma zawng zawng hi *Article 275* kaltlanga sak a ni thin a, chutah chuan duhsak bik an awm lova. Mahse, a seat hi a tlem thin avangin, entrance test erawh chu an awm thei a ni.

Pu Speaker, Pu Ramthanmawia zawhna ka chhanna chu - Khawbung hi a hmunhma tihfel tawh a ni a, construction hi tih thuai tum a ni a, a satu turte pawh thlan fel tawh an ni. Chu chu, Lungsen leh hmun dangte nen khan tan thuai theih turin a *master layout* te pawh plan fel tawh a ni e. Ka lawm e.

**HON. SPEAKER** : *Starred Question No. 266*-na zawt turin Hachhek Bialtu, Member zahawmtak Pu Robert Romawia Royte.

*Starred Question No. 266 - Thlaithar lei tura thlan zingah Kuhva.*

**PU ROBERT ROMAWIA ROYTE:** *Starred Question No. 266*, Agriculture Minister zahawm tak chhan atan –

“Sorkar-in thlai thar lei tur a thlan bikah hian kuhva a tel ve em?”

**HON. SPEAKER** : Chhang turin Agriculture Department changtu Minister zahawmtak Pu PC. Vanlalruata ilo sawm ang.

**PU PC. VANLALRUATA, HON. MINISTER:** House Member zahawmtak Pu Robert Romawia Royte zawhna chhanna chu hei hi a ni e –  
Sawrkar-in thlai thar leitur a thlan bik ah hian kuhva a tel ve rih lo.

**HON. SPEAKER** : *Zawhbelhna - Zawhna* neitu Pu Robert Romawia Royte.

**PU ROBERT ROMAWIA ROYTE:** Pu Speaker, kan Sawrkar-tharin thlaithar thlan bik pali (4) a nei a, kuhva hi a tel lo phawt a, kuhva chingtu tam tak te tan hian a hrilhhaithlak khawp mai. Kuhva hi *commercial crop*, sum tam tak lei theihna thlai a ni a. Mizoram-ah hian thlai malah chuan kuhva aia sum lalut tam a awm lovin ka ring a; ‘a tam’ tih mai ni lovin, a tam fal nalhin ka ring a. Mizoram hmun hrang hrangah kan uar zel a, hei hi ‘guarantee’ sawrkarin thlaithar thlan bik a neihah hian thlan hmasak bera tang awm a ni a. Mahse, Ni e! ngaihtuahna te a inang lova, a thlangtute zingah hian tel ila, kuhva hi ka thleng tel ngei ngei ang. Ka tel ve lova, an han thlang ta lova.

Engpawh ni se, kan sawrkar hian ngaihtuahna zau zawk te hi a hmang zel turah ka beisei a, hun tharah, sum leh pai dinhmun te pawh ni se Covid-te a han reh chhova, dinhmun pangngaiin kan han kal chho leh tan dawn mekin a lang a ni. Hengah hian kuhva hi *support* bik tur thlanchhuah zingah a tel loh chuan ‘kuhva chingtute lakah hian justice kan pe tawk lo a ni ang em’ tih thlengin, Mizoram tana an contribution hrang hrang ngaihtuah hian a dikin ka hria a.

Chuvang chuan, kuhva hi ‘ngaih pawimawh ni teh se’ tih zawh pahin, tun financial year tharah a tel hman lo a nih pawhin, financial year thar lehah te chuan telh ve ngei theih a ni em? Ka lawm e.

**HON. SPEAKER** : Kan Hachhek bialtu pawh zawhna zawh a ze i ta khawp mai; a sawi kual duah bik tawh lo a nia.

*Zawhbelhna:* Hrangturzo Bialtu, Member zahawmtak Pu Lalmuanpuia Punte.

**PU LALMUANPUIA PUNTE:** Pu Speaker, ka zawhbelhna chu - ZPM chuan inthlan hma khan thali-thar leitur 4 kan telh a, kuhva hi a tel hauh lova. Hachhek bialtu khan “mipui an hrilh hai” a ti a; kan Minister hian ‘mipui an hrilh hai tak tak’ tih min hrilh thei em?

**HON. SPEAKER** : A chhang turin, a chhangtu Minister Pu PC Vanlalruata ilo sawm ang.

**PU P.C. VANLALRUATA, HON. MINISTER:** Pu Speaker, thlai-thar lei kan han sawi a, i veilama mite hian an rawn ngaipawimawh thar ve hi a lawmawm hle mai a. Zawhna neitu, member Pu Robert-a te pawh khan kum 5 chhung khan lo thlang ve se tha tur a ni a; an lo thlang lo laklawh tawh a.

Helai hi Pu Speaker, i phalnain tlem han sawi belh ka duh deuh a. ZPM hian policy kan nei a, thlai-thar lei kan han ti mai a, a nihna takah chuan sawrkar hian a va lei tak tak dawn kan tihna aimah chuan, ‘sawrkar hian a pawp a hnawh dawn’ tihna ang a ni. Sawhthing kg ah 50/- kan han ti a, tunhma zawng khan sawhthing rate a mumal lova, 20-30/- te a ni a, a chhang leh a tlathla leh a. khatiang reng reng kut-hnathawktute an thlai-thar hralhna tur assure an nih loh thin avangin, sawrkar tharah hi chuan ‘kut-hnathawktute hian a rate hresain hna thawk ve tawh se’ kan tih avangin kan tlangau thin a.

**HON. SPEAKER** : Khawngaihin; hei, dar 12:30 a ni a, *Zawhna & Chhanna* hun a lo zo a, kan Minister hi kan chhan zawh tir law law mai dawn em ni ang? (*House-in chhan zawh tir a remti a...*) Aw le, chhang chhonzawm rawh le.

**PU PC. VANLALRUATA, HON. MINISTER:** Chutia kan tlangaunaah chuan, ‘minimum support price kan pe ang’ kan ti a ni. Tunah sawhthing te pawh Kg-ah 40/- in sumdawngin lo la ta se emaw, khami inkar hnawhkhah nan khan ‘sawrkarin support price kan pe ang’ a ti a. Chutiang zel chuan hmarcha, aieng, hnunphiah te pawh a ni a, chu chu tuna kan han dah crore 110 te pawh kha a ni a. A hranpain sawrkar kha va inrawlha, sawrkarin buara a va dawh ve ngawt thu a awm lova. Society khaw tinah kan din dawn a, society te kha a taka a leitu turah kan siam ang a. Amaherawh chu, chulaiah

chuan kut-hnathawktute'na mumal nei zawk taka thlai an hralhna turin minimum support price kan pe dawn a ni.

Chutiang chuan, a zawhna neitu Pu Robert-a zawhnaah pawh khan, kuhva hi kan ngaipawimawh lo a ni lova, kuhvaah hi chuan a chingtute an buai vak lo; a rate a tlawm em mai; 'kan hralh theilo' tih hi a awm vak lova. Vai hovin an ti a, an huan kalin an han en a, 'chuti zat chu aw; ka pu, nuai 20 – 30 in aw" an han ti a, lungawi takin kuthnathawktute khan an hralh mai a ni. Amaherawh chu, kan buaina zawk erawh chu, kuhva te hi ti hian an rawn dawn a, vai hovin, an duh duhin an rawn ti a. Chumi venna tur erawh chuan sawrkar chuan a ngaihpawimawh chu - a processing a ni. a skawp-na tur te pawh hi *Ban-kaih Policy* hnuaiiah hian kalpui kan tum dawn a. Chutiang chuan, a hlawk zawka an hralh theihna turin a tihro dan tur te pawh hi kan dappui dawn a ni. Man man zawka an hralh theihna turin sawrkar chuan *Hand-holding Policy* hnuaiiah te pawh kalpui a tum dawn a.

Tuna Pu Muanpuia zawhna – 'A hrihhai thlak an ti em?' tih kha chu, an hrih a hai vak turah kan la ngai lo a ni.

**PU ROBERT ROMAWIA ROYTE:** *Point of Clarification* tawitein –

SEDP hnuaiiah khan kuhva chingtute tanpuina tur kha chhungkaw tam tak thlan an ni a, kha SEDP pawisa cheng nuai 11,000 lai kha 'cancel' kha in ti si a, khata kuhva chingtute tal kha pek hram dan a awm lo em ni? Tun financial-ah in hmang hleithei chuang bawk si lova, a chingtu tura thlan chhuah ho kha an hming list nen, an sum dawn tur nen khan a awm vek a ni a, finance expenditure sanction te, engkim kha a awm tawh bawk si a.

**PU PC. VANLALRUATA, HON. MINISTER:** Aw le; cheng nuai 3 kha a tlahniam deuh hlek a, ₹25,000/- ah a tlathla ta a, a tla nasa duai duai khawp mai a. 'Family oriented' te kan lo ti a, amaherawh chu a tawp lamah kha chuan *MLA-election oriented* deuh khan an kalpui tak avang khan, mumal nei takin tunah hian a kal theih tawh lova. Tin, inthlan te a lo ni a, sawrkar thar te a lo pian takah chuan, SEDP kha ZPM-Policy a lo nih ve ta lova, policy thar kan neih avangin keini chuan kan policy thar angin kalpui kan tum tawh zawk vang a ni e. Ka lawm e.

**HON. SPEAKER** : Aw le, *Zawhna & Chhanna* hun kan zo ta a, business dangah kan kal tawh ang a.

**LEGISLATIVE BUSINESS:**

*Legislative Business*-ah kan kal ang a. vawiinah hian bill 5 ngaihtuah tur kan nei a, tunah hian bill 4 kan ngaihtuah dawn a ni. A copy chu Member-te hnenah khan sem vek a ni tawh a, chungte chu -

1. The Mizoram Salaries and Allowances of Speaker and Deputy Speaker (Amendment) Bill, 2024;

2. The Mizoram Salaries and Allowances of Ministers (Amendment) Bill, 2024;
3. The Mizoram Salaries and Allowances of Government Chief Whip & the Deputy Government Chief Whip (Amendment) Bill, 2024;
4. The Mizoram Salaries, Allowances and Pension of Members of the Legislative Assembly (Amendment) Bill, 2024.

Heng bill 4-te hi a hrang theuh ni mahsela, a hmasa 3-te hian a 4-na ami “The Mizoram Salaries, Allowances and Pension of Members of the Legislative Assembly (Amendment) Bill, 2024” chhunga mi housing loan chungchang te, pension chungchang te, death gratuity chungchang leh family pension chungchang te hi an tawmpui avang leh, he bill 4-tea *salary* bik atana proposed amount te hi a inan tlan vek avangin, bill 4-te hi a mal mala take-up lovin, a ruala lak mai a thain a lang a, House-in rem a tih chuan, a ruala take-up mai ni ta se; chutianga kalpui chu membrete’n a tha kan ti mai em? (*Member-te’n tha an ti a...*) Aw le, a lawmawm e.

House-in rem a tih angin heng bill 4-te -

1. The Mizoram Salaries and Allowances of Speaker and Deputy Speaker (Amendment) Bill, 2024;
2. The Mizoram Salaries and Allowances of Ministers (Amendment) Bill, 2024;
3. The Mizoram Salaries and Allowances of Government Chief Whip & the Deputy Government Chief Whip (Amendment) Bill, 2024;
4. The Mizoram Salaries, Allowances and Pension of Members of the Legislative Assembly (Amendment) Bill, 2024

te hi a bill neitu Parliamentary Affairs Minister zahawm tak Pu Vanlalhlana House-a introduce phalna dil turin ilo sawm ang u.

**PU VANLALHLANA, HON. MINISTER:** Pu Speaker, ka lawm e. Mizoram Governor remtihna leh i phalnain, he House zahawm takah hian, heng bill 4-te -

1. The Mizoram Salaries and Allowances of Speaker and Deputy Speaker (Amendment) Bill, 2024;
2. The Mizoram Salaries and Allowances of Ministers (Amendment) Bill, 2024;
3. The Mizoram Salaries and Allowances of Government Chief Whip & the Deputy Government Chief Whip (Amendment) Bill, 2024;
4. The Mizoram Salaries, Allowances and Pension of Members of the Legislative Assembly (Amendment) Bill, 2024

hi he House za hian introduce phalna ka rawn dil e.

**HON. SPEAKER** : Aw le; tunah chuan a bill neitu Parliamentary Affairs Minister-in House-ah introduce phalna a rawn dil a, kan phalsak em? (*House-in a phalsak a..*) Kan phalsak chuan introduce-in, sawiho turin rawn move nghal bawk sela; i lo sawm ang u.



**PU VANLALHLANA, HON. MINISTER:** Pu Speaker, i phalna leh he House remtihhnain -

1. The Mizoram Salaries and Allowances of Speaker and Deputy Speaker (Amendment) Bill, 2024;
2. The Mizoram Salaries and Allowances of Ministers (Amendment) Bill, 2024;
3. The Mizoram Salaries and Allowances of Government Chief Whip & the Deputy Government Chief Whip (Amendment) Bill, 2024;
4. The Mizoram Salaries, Allowances and Pension of Members of the Legislative Assembly (Amendment) Bill, 2024

te hi he House zahawm takah hmaah hian ka rawn introduce e.

Tichuan, Pu Speaker, kan hriat angin, kum tawp lamah general election kan nei a, chutah chuan party hrang hrangte inthlannaah manifesto nen mipui hmaah kan inzuar a, ZPM pawhin *manifesto* te kan nei ve a, chung kan manifesto-ah chuan, tunhmaa an lo practice thin – ‘*MLA car a thlawna leisak*’ tih te a chuang a, chu chu thil tha ber nia kan ngaih loh avangin, ‘kan lo sawrkar ve a nih chuan, kan ti tawp ang’ tiin mipui hmaah te kan inzuar a. Tin, *household attendant* te pawh kan mamawh aia tam hi kan nei deuh ni tein kan inhria a, mipui hmaah tihtlem te kan intiam a. Vanneihthlak takin inthlannaah sorkarna siamtute kan lo ni ta a, kan manifesto-te bawhzuiin he bill pawh hi a lo piang ta a ni.

Pu Speaker, i hriat angin, kumin January Ni 8 leh February 14 khan GPC meeting neih a ni a, GPC meeting-ah chuan Speaker te, Deputy Speaker te, Minister te, Leader of Opposition te, Deputy Chief Whip te leh Member-te *facilities* hrang hrangte ennawn a ni a, chung a han langsar zualah chuan - Chief Minister-in household attendant 6 a nei a, ‘*Year of Consolidation*’ te kan tih avangin, committee chuan kan titlem ta a; household attendant 6 atangin 4-ah kan tla a. *Speaker* pawh, i hriat angin household attendant 6 nei i ni a, 4-ah kan titla a, Minister of State-te, Cabinet Minister-te pawh household attendant 4 nei thin kha, 2 ah te kan lo titla a; chutiang chuan *household attendant* kha tihtlem a ni a.

Tin, chubakah, MLA-te a thlawna *Car* leisak awm a, kha kan titawp bawk a ni. Amaherawhchu, MLA ten vah velna leh mipui rawngbawlina atan motor an mamawh a; chuvangin, a thlawna sawrkarin *va leisak tawp* ni lovin, ‘puk ve rawh se’ tihin thu tihtluk a ni a. Chutiang chuan, motor 40 kan lei loh atanga kan help turte, household attendant kan tihtlem atanga kan hlep tur zawng zawng kan han ngaihtuaha kan han chhut khan, term khatah crore 8 chuang tun sawrkar hian pawisa a hum thei tih kan hria a, thil tihtlak tak pawh a niin kan hria a.

E-Bill hi GPC-ah kan ngaihtuah a, chutah chuan party hrang hrang represent-te awmin, lungrual takin kan pass a, tichuan, he House-ah pharh theihin a awm ta a. Chuvangin, Pu Speaker, he Bill 4 kan han move te kha he House hian lungrual taka min pass-pui turin ka rawn sawmin, ka rawn move bawk a ni e. Ka lawm e.

**HON. SPEAKER** : Kan Minister zahawmtakin Bill chungchanga sawi turte sawiin, a putluh chhan te min hrilh ta a; tunah kan sawiho ang a. Tunge sawi hmasa ang le?

Aw; tunah Leader of Opposition, Pu Lalchhandama Ralte ilo sawm ang.

**PU LALCHHANDAMA RALTE, OPP. LEADER:** Pu Speaker, Parliamentary Affairs Department changtu Minister-ina Amendment Bill pali a rawn putluhte he House-ah kan sawi thei hi lawmawm ka ti a. *Pre-Legislation General Purpose Committee*, party zawng zawngte kan telnain kan House, kan Chief Minister hova kan sawiho tawh leh kan inlungual tlanna a ni a. Chuta inlungualna kan neih, party zawng zawng kan inlungual tlanna chu kan sawrkar laiin *Year of Consolidation*-ah te puanga sum renchen tura hmalakna kan neih chhoah hian, keini mipui thlantlinte, ram hruaitute hian ‘a bul itan ang; kan *facilities* te hi titem ta ila, chumi hnuah chuan sawrkar - government officials-ah a ni emaw, public-ah kan chet velnaah te pawh kan tihitem dawn pawhin keimahniah bul itan ang hmiang” kan ti tlang a. Chumi ang chuan lungual taka kan sawiho tawh angin, he Amendment Bill lo lut hi a chhungah content hrang hrang - a tlangpui tur chu kan PAD Minister khan kan facilities tihitem te, a thlawna kan dawn thin te ‘loan system in kal tawh rawh se’ kan tih ang chite a rawn sawi kha a ni a.

Chuvang chuan, vei lam atanga kan han ngaihtuahnaah chuan, hei hi chu, lungual taka party zawng zawngte’n, ‘kan ram kal zel tura tan a tha ang a..’ kan tihlan a nih avangin, kan sawihona hi i veilam aiawhin kei hian ka sawi a ni a. Rem i ti a nih chuan, ‘kan Amendment Bill neitu hian adopt dil nghal mai se’ tiin ka rawn rawt nghal a ni e.

**HON. SPEAKER** : A lawmawm e. A tha kan ti mai em? (*Memberte’n tha an ti tlang a..*)

Awle, a lawmawm e. Tunah chuan Minister zahawm tak khan a Bill-te wind up-a, House pass-pui rawn dil nghal turin ilo sawm ang u.

**PU VANLALHLANA, MINISTER:** Pu Speaker, heng Bill 4 te -

- 1) The Mizoram Salaries and Allowances of Speaker and Deputy Speaker Amendment Bill, 2024 te;
- 2) The Mizoram Salaries and Allowances of Ministers Amendment Bill, 2024 te;
- 3) The Mizoram Salaries and Allowances of Government Chief Whip and The Deputy Government Chief Whip Amendment Bill, 2024 te;
- 4) The Mizoram Salaries, Allowances and Pension of Member of the Mizoram Legislative Assembly Amendment Bill, 2024 te hi House-in min pass pui turin ka han ngen e.

**HON. SPEAKER** : Kan Minister zahawmtakin heng Bill:

- 1) The Mizoram Salaries and Allowances of Speaker and Deputy Speaker Amendment Bill, 2024 te;
  - 2) The Mizoram Salaries and Allowances of Ministers Amendment Bill, 2024 te;
  - 3) The Mizoram Salaries and Allowances of Government Chief Whip and The Deputy Government Chief Whip Amendment Bill, 2024 te;
  - 4) The Mizoram Salaries, Allowances and Pension of Member of the Mizoram Legislative Assembly Amendment Bill, 2024
- te chu House pass pui turin a rawn dil a.

Pass remti apiangin, ‘Remti’ ti rawh u le. (**Memberte:** Remti). Remti lo kan awm chuan, “Remti lo” ti ula. (*Remti lo an awm lova.*) A lawmawm e.

Heng Bill 4-te:

- 1) The Mizoram Salaries and Allowances of Speaker and Deputy Speaker Amendment Bill, 2024 te;
- 2) The Mizoram Salaries and Allowances of Ministers Amendment Bill, 2024 te;
- 3) The Mizoram Salaries and Allowances of Government Chief Whip and The Deputy Government Chief Whip Amendment Bill, 2024 te;
- 4) The Mizoram Salaries, Allowances and Pension of Member of the Mizoram Legislative Assembly Amendment Bill, 2024 te chu House-in lungrual takin a pass a ni. (**Pu Vanlalhlana, Minister:** Pu Speaker, ka lawm e)

### **FINANCIAL BUSINESS:**

Tunah chuan *Financial Business*-ah kan kal tawh ang a. Vawiinah hian Minister zawhawm tak takte pahnih - Pu Lalnghinglova Hmar leh kan Chief Minister Pu Lalduhoma te Demand kan sawiho ang a, pass nghal kan tum dawn a ni.

Hun kal taa kan tih thin angin, Minster pahnihte Demand hi a rualin kan la mai ang a. Tunah Minister zawhawm tak Pu Lalnghinglova Hmar sawm ila, House dawhkanah a heng a Demand-te submit-a rawn move nghal turin ilo sawm ang u –

<i>Demand No.</i>	<i>Purpose</i>	<i>Amount (in ₹)</i>
7	Excise & Narcotics	54,56,93,000.00
22	Sports & Youth Services	25,71,20,000.00
28	Labour, Employment, Skill Development & Entrepreneurship	31,75,42,000.00
<b>TOTAL</b>		<b>1,12,03,55,000.00</b>

**PU LALNGHINGLOVA HMAR, HON. MINISTER:** Pu Speaker, Mizoram Governor recommendation leh i phalnain, heng ka Demand-te –

<i>Demand No.</i>	<i>Purpose</i>	<i>Amount (in ₹)</i>
7	Excise & Narcotics	54,56,93,000.00
22	Sports & Youth Services	25,71,20,000.00
28	Labour, Employment, Skill Development & Entrepreneurship	31,75,42,000.00
<b>TOTAL</b>		<b>1,12,03,55,000.00</b>

te hi kum 2024-2025 chhunga he ka department chante inrelbawl naa hman atan he House zawhawm takah hian ka rawn submit a, sawiho turin ka rawn move nghal e. Ka lawm e.

**HON. SPEAKER** : Tunah chuan, Chief Minister zawhawmtak Pu Lalduhoma, House dawhkana a Demand-te:

<i>Demand No.</i>	<i>Purpose</i>	<i>Amount (in ₹)</i>
1	Legislative Assembly	47,44,15,000.00
2	Governor	30,60,000.00
3	Council of Ministers	7,37,45,000.00
4	Law & Judicial	47,73,44,000.00
5	Vigilance	7,11,46,000.00
9	Finance	34,38,13,62,000.00
11	Secretariat Administration	1,20,32,60,000.00
14	Planning & Programme Implementation	1,20,27,41,000.00
15	General Administration	1,05,30,67,000.00
<b>TOTAL</b>		<b>38,94,01,40,000.00</b>

te submit-in, sawiho tura rawn move nghal turin ilo sawm ang u.

**PU LALDUHOMA, HON. CHIEF MINISTER:** Pu Speaker, kan Hon. Governor-in a recommendation a siam ang leh i phalnain, heng:

<i>Demand No.</i>	<i>Purpose</i>	<i>Amount (in ₹)</i>
1	Legislative Assembly	47,44,15,000.00
2	Governor	30,60,000.00
3	Council of Ministers	7,37,45,000.00
4	Law & Judicial	47,73,44,000.00
5	Vigilance	7,11,46,000.00
9	Finance	34,38,13,62,000.00
11	Secretariat Administration	1,20,32,60,000.00
14	Planning & Programme Implementation	1,20,27,41,000.00
15	General Administration	1,05,30,67,000.00
<b>TOTAL</b>		<b>38,94,01,40,000.00</b>

te hi he House-ah hian ka rawn submit a, sawiho turin ka rawn move nghal baw k e.

**HON. SPEAKER** : Sawihona kan tan ang a, member pakhatin engtia rei nge sawi se kan han tih ang? *Minute 10* tha kan ti mai em? '*Minute 7*' tih rawtna thar a awm tlat mai a. Aw le, '*Minute 10*' an rawn ti leh si a. *Minute 10* ni rawh se. Member ten minute 10-ah khung len kan tum ang a, minute 9-ah warning bell kan rawn tiri ang.

Tunge han sawi hmasa ang le? Pu Lalramliana Papuaia, Lunglei South bialtu zahawm tak ilo sawm ang.

**PU LALRAMLIANA PAPUIA:** Pu Speaker, ka lawm e. Kan inngaihchan chhungin hun a liam zel a, nakinah hun kan duhthawh leh dawn a, chuvangin ding hmasaa han tan mai kha a thain ka hria a.

Vawiina kan Demand sawi tur Minister pahnih chan - a bik takin Finance lam chan hi chu sawi tur ka hre tam lem lova; Excise & Narcotics School Boards leh LESDE lampang hi tlem tarlan ka han duh deuh a, hun bawhpeloh loh hram tum bawk ila a tha ang e.

Demand No.7-na Excise & Narcotics chungchangah hian tun sawrkar hian ruihhlo do beihpui thlak tura inpuahchahin hma an la mek a ni a. Excise & Narcotics Department hi kan hman tangkai tur em em department anih avangin, hei hi theih tawpa sawrkar pawhin a thum chaka hma a lak a tul hle dawnin ka hria a Chutih rualin, ruihhlo do kawngah hian a hmatawng ber tur annih avangin, a thawktute zingah pawha ruihhlo kaihnhnawiha buaipui ngaia awm an awm pawh hi a rem dawn lo niin ka hria a, hemi kawngah pawh khian kan Minister hian *strict* takin hma a la chho zel niin ka hria a, a lawmawm pawh ka ti hle a.

Tin, ka han tarlan duh chu - a thawktute hi indaih tak tak theih a ni lova, *ruihhlo-do* beihpui han thlak tur tak tak hi chuan. Chuvangin, hemi kawngah hi chuan NGO - kohhrana kan thalaite leh tlawmngai pawl hrang hrangte pawh thawkho-za thiam, he department tanpui tur hian hma kan laka kan pen tlan hi a tul hle dawnin ka hria a; chutiang tur chuan kan Minister pawhin hma a la chho mek niin ka hria a. Hma lak dan turte pawh a bul atangin a fuh chhovin, *a-kaida* a inman chho viauin ka hria a, l'awmawm ka ti hle a ni' tiin comment ka han pe duh hlek a ni.

Awle, Sports & Youth Services Department lam hi; kan sawi a, kan ngaithla thin a, 'Sports hi *industry* a ni; *entertainment* a ni ringawt lo e' te kan ti a. *Industry* a nih angin, product hlawk tak nei tur leh investment atana kan hmang dawn anih chuan, he department hi a grassroot level atanga tuna kan kalpui aia nasa hian kan inhrut a tul hlein ka hria a. Hei hi keimahin ka hmuh phak tawkah pawh, comment ka han pek duh a ni a.

Nizan lama ka inbuatsaihnaah Sports & Youth Services Department website te ka han thlir kual ve thuk thuk a; "Know your coach" tih section lampang te ka han enin, ka han bih a; Teakwondo, Wushu, Cricket, Boxing, Archery, Table Tennis, Weight lifting,

Yoga leh Basketball coach-te hming intlar thla diat diat ka han hmu hlawm a. Kha bakah pawh khan Mizote'n kan uar leh kan ngainat em em - Football, Badminton leh Hockey-ah te pawh *coach* chu kan nei ve ngeiin ka ring a. Hengah te pawh hian (ka han sawi tum chu) coaching mumal tak, a grassroot level atanga uar taka kan kalpui hi he kan sports industry hmasawna atan hian a bulthumah a pawimawh a ni.

Naupangte coaching mumal taka kalpui hi a pawimawh hle a, kan hmuh leh hriatthiam phak tawh chinah keini ang veng te tak te ah pawh sawn khawtlanga mawhphurhna kan chan ve laiin Sports Association te nen coaching te kalpuiin kan han ruahman ve thin a, a rah duhawm tak tak kan hmu a ni. Table Tennis-ah te, Boxing-ah te, Hockey-ah te national level-ah te lang pha khawpin naupangte an han zir chhuak chho ve kan han hmuh te khan lawmawm kan ti a. Keini angina ruahmanna kan lo siampui beitham te atanga khatianga rah duhawm tak a lo lang a nih kha chuan, sawrkar hian naupangte atang hian tih tak tak hian bul han tan chho sela, hmabak eng tak kan nei thei turah ka ngai a.

Tin, kan sports infrastructure neih te hi tunah hi chuan practice nan kan hmang deuh ber a ni mai a, tournament khelh nan te. Ka han sawilan duhna chhan chu - *regular coaching* an neihna hnuhma hmuh tur hi a tam lo a ni, kan infrastructure-ah te hian. “Chumi vengah chuan; chumi stadium-ah chuan; chumi chawlhkar apiangah te hian naupang coaching an kalpui thin a ni” tih thawm hriat tur a tam lo khawp mai a, hengte pawh hi kan uar chhoh a tulin ka hria a. Badminton ground te, Futsal ground te, Football ground te tha tak tak kan nei a, hengte pawh hi ‘entertainment atan te, exercise lakn a tan te kan la hmang deuh tlangpui em aw’ tih tur a ni a. Chuvang chuan, heng kan hmunhma neih thatte pawh hi a grassroot level atanga coaching uar zawka kalpuina hmun atan te pawh kan reserve saka, hmun kan pek thiama, ruahmanna kan siampui a tha hlein ka hria a. Chung chu ka rilrua ka vei, ka han sawilan duh a ni a. Patling-thankin tawh tena exercise lak nan te leh entertainment tihna atana hun tam zawk an hman ai hian, naupang tan hian hun pe tam ila kan ram hian a hlawkpuiin, kan future atan hian a tha berin ka ring a ni.

Aw le; department dang sawi tur a awm si a, hei hi chu kalsan leh ta mai ila. LESDE chungchang lampang hi han luhchilh leh deuh hlek ka duh a.

Youth Services nge LESDE lam zawk; khawi zawk chan nge ka hrethiam chiah lova, foreign lama kan thalai thenkhatte hna-tha zawnga inbuatsaih mekte tanpui dan kawng hi a ni. Kan thalai zinga hetiang kawnga hna-tha zawnga India ram pawn thlenga beng chhia, mit lena hma la an awm mek a; chungte chuan tuna an harsatna tawh thenkhat chu an rilrua itin, chak mahsela, an sumpai dinhmun ten a tlin loh avangin harsatna an tawh mek a ni. Kan thalai zingah hetiang harsatna tawh hi keipawhin tun dinhmunah pawh hian ka hmachhawn mek bawh a, ka hriatpui chinte pawh an awm a. A then chu British Army-ah tunah hian test tura koh mekte pawh an awm a ni. An chak em em leh an rilrua an lo dreams te pawh a ni ve a. Amaherawhchu, khata han kal tur khan an sum dinhmun khan a tlin lova; tih ngei an duh bawh si a, hengte hi ‘sawrkar lam atang hian

tanpui dan te hi a awm em le?’ ka ti a. Tin, *a-loan* ang tal pawhin, ‘nakina hna an thawh theih huna an la rulh leh theih tur ang te pawh hian an tan kawng kan hawn sak thei em le?’ (Sports & Youth Services lampang chan te pawh a ni mah awm zawk tak e..) tih te pawh kha ka han sawilang duh a ni.

Tin, LESDE hnuaiah hian Mizoram-ah industrial institute ‘ITI’ kan tih pathum - Aizawl, Lunglei leh Siaha-ah kan nei a. Lunglei lam saw (mahni veng chhunga awm ta chu) tlemin kan han belchiang deuh a; Lunglei-Salem Veng-ah sawn ITI hmun a awm a, sawng te pawh saw tihchangtlun a tha khawpin ka hria a. Kan hmuhpuia kan hriatpuia, a tangkai a ni; kan thalai, kan naute ngei ngei pawh sawta tanga chhuak leh anmahni self-employment nei theia sum hailut leh ei dap an awm mek a ni; a hlawk thlak ka ti a. Hengte hi ngaihsak an hlawh deuh deuh loh chuan a tlabal chho zel a, a hmunhma te, a building leh a staff te pawh thuam-that an tul tak meuh meuhin ka hria a.

Heng ITI pathum kan neihte hi nizan lamah khan department website lam atang khan ka han en thuak thuak a. Ka hriatchian deuh chinah chuan, Lunglei lampangah sawn instructor te pawh saw an indaihlo em em mai a, tunah sawn regular deuh pheih chu *pathum* an awm a, guest hian pahnih nge, pathum vel hi an awm bawkin ka hria a. Chutih laiin Aizawl lamah chuan instructor/instructress ringawt pawh 27 bawr vel an awm a. A trade te chu a in tam-hleih a ni thei e; hmabak pawh a ko a ni thei e; hengah te pawh hian an indaihlohna leh a tul dan te sawihoah, semzai te pawh hi a tul em aw? Principal tur, tunah hian pahnih result nghah mek awmin ka hria a, Principal awm mumal neilo deuh vek niin ka hria a; Lunglei-ah sawn pakhat chu a awm ngei ngei a ngai a ni. A changtu minister hnenah pawh, ruahman-sa awmin ka hria a, khang te kha ka han sawi lang tel bawk a ni.

Awle hun a kal a, a tawp mai dawn a, a hnu kharna lampang ka han sawi mai ang e. Kan Finance demand ah hian tawi te kan sawi lan duh chauh chu - Demand No. 1 - Assembly ah khan, House chan deuh, kan Legislator Home khi en that a tul hle mai. Ram roreltute khawsakna, a bik takin Aizawl pawn lama kan MLA-te inkulhna ber a ni a, a tawpin, a tlabal tawh em em mai a. Khi khi, a theih pheih chuan naktuk zing karah te pawh (session kan zo tawh bawk a) ‘kan Speaker hovin han enkual thuak thuak ila’ tih te kha rilruah chuan a awm a. Khi khi kan sa mai dawn lo a nih chuan, han tuaihnua, han enkawl that ve deuh a tul a ni.

Aw le, Pu Speaker, vawiina kan Minister pahnihte demand kan sawi mek Pu Lalnghinglova Hmar chan department-te enkawl na tur - Demand No. 7, 22 leh 28 bakah kan Finance changtu CM department chan - Demand No. 1, 2, 3, 4, 5, 9, 11, 14 leh 15 te hi lawm takin ka pawmpui a, pass ngei tha ka ti e. Ka lawm e.

**HON. SPEAKER** : Tuipui ‘E’ Bialtu zahawm tak Pu Ramthanmawia ilo sawm ang.

**PU RAMTHANMAWIA :** Pu Speaker, ka lawm e. Vawiin ah kan Minister zahawm tak Pu Lalnginglova Hmar leh CM Pu Lalduhoma te Demand kan sawi ho thei hi lawmawm ka ti hle mai a. Demand No. 7 - Excise & Narcotics Department hi han sawi hmasa ila.

Pu Speaker, ruihhlo-dotu Narcotic Department hi lian lo tak mai, kan ram tana pawimawh tak si a ni a, a thawktute pawh kan fuih thar zela, an thiamna leh finna tangkai zawka an hman theih nan theih ang anga hmanrua leh tul dangte pawha kan thuam that a tul hlein ka hria. District hrang hrang a Narcotic Cell te pawh kan tihchak chhoh zel a ngai a ni, Pu Speaker.

Nikum kum 2023 khan ruihhlo avangin mi 76 - mipa 64 leh hmeichhia 12 an boral a ni a. Ruihhlo a vanga thi hi kum 1984 atang khan chhinchiah tan niin, mi 1812 lain nunna an chan tawh a. Ruihhlo leh a kaihnawih avanga thi sawrkar record lem loh pawh an awm nual ka ring a. Kuminah hian ruihhlo avangin engzat nge kan chan leh ang; kum lo kal leh zel turah engzat nge kan chan ang tih hi ngaihtuah thui a har khawp mai. Ruihhlo do tur hian kan puan ven te sawichhin a ngai tak zet a. Sawrkar lo awm tawh te pawhin theih tawp an lo chhuah tawh chungin, ven leh khuah khirh sen a har zia kan hre vek a; sawrkar mai ni lo, NGO lam te nena kan tanho a ngai tak zet zet a ni.

Demand No. 22 - Sports & Youth Services Deptt. pawh hi department lian lo tak ni mahse, a pawimawh hle mai a. Kan thalaite tan hian an hlu lehzuat a ni. A hma chiaha ka sawi, ruihhlo-dona tha tak mai chu *Sports* hi a ni, sport lama hmasawn tum tak tak chu ruihhlo lakah pawh an fihlim thin, kan Minister hian a bikin kan thalaite zingah ruihhlo a tlem deuh deuh theihna'n nasa zawkin hma han la se a duhawm khawp mai.

Pu Speaker, kan Sports Minister khan a thusawinaah khan infrastructure lamah a kal nat vak dawn loh thu kha a sawi a, ka hriat sual a nih loh chuan. Keini thingtlang lam bial hmunhma la nei tha lo tan chuan min kal kan rih lo se ka duh khawp mai. Hmun thenkhat - Aizawl leh a chheh velah te chuan infrastructure hi an nei tha deuh pawh a ni mai thei, mahse keini bial lam te hi ngaihtuah kan la ngai khawp mai. Tunah ka bial chhung - Hruaikawn leh Vangchhia te hian field puitling an la nei lova, a veiawm khawp mai a, kan Minister hian min lo hriat sak se ka duh a. Heng mai bakah hian khaw hrang hranga kan playground te hi chei that an ngai hle bawk. Ka bial hi '*infiamna ngaihsang ber bial*' ti ila, a sual awm lo e; nikum khan chawl lova tournament upa ber, Tuipui-ral kum 50-na pualin phullem te kan phah nghe nghe a. Football chawisanna leh ngaisanna bial kan nih angin '*Khelo India*' emaw, eng emaw atangin kan bial chhungah hian phullem phah a nih theihna'n hma min lakpui turin kan Minister hi ka ngen bawk a ni.

Demand No. 28 – LESDE hi, a changtu minister hi a chhuanawm hlein ka hria. Special project hmanga mi 10,220-te tana hna training theihna vaibelchhe 31 zet mai central atanga sanction a zu sawichhuak kha a lawmawm khawp mai a; Jail-a tang te thlengin



a huam dawn leh nghal a, a tha dawn hlein ka hria. Vaibelchhe tam tak hi a luanral mai mai loh nan uluk tak leh fimkhur taka thlan ni se a that ka ring a, Pu Speaker. Skill development hi nasa leh zuala kan kalpui a tul a, zirna tluang atang ringawt hi chuan kan thalai lehkha thiamte'n hna an hmu vek dawn lova, BA, MA, thiam thei bikte tan lo chuan hna a vang taw em em a ni. Mahni kea ding tur chuan thiam thil bik neih a ngai a ni. Thalai tam takte tana hna leh eizawna pe turin skill development lamah tan kan lak a ngai hle a ni, Pu Speaker.

Demand No. 15 – GAD, kan House Leader leh CM ni bawk, demand-ah hian lut ila. Tuna kan sawrkar tharin *Bio-metric system* thar a rawn hmang hi tha ka ti hle a, sawrkar pawh khauh takin kal zel se, hei hian hmasawna ropui tak min thlen chhoin ka ring. Pu Speaker, ka sawi duh pakhat chu - kan *file system muang lutuk* hi a ni. Sawrkar kal taah pawh khan kan sawi thin a, office hna chak zawka a kal theihna'n leh file process awlsam zawka a kal theihna tur hian ngaihtuahna hman ni se a duhawm hlein ka hria. Kan House Leader hian a sawi ka hre tawh a, he thil hi a vei hlein ka hria, file kalmuang lutuk thin a hi; a chinfel dan kawng pawh a hriain ka ring a ni, Pu Speaker.

Demand No. 9 na Finance Department-ah hian han lut leh ta ila. Pu Speaker, wawiin chu kan Session tawp ni a ni a, kan House Leader hi a tuang te pawh lo tichhah ve deuh turin kan ngen duh a ni. Pu Speaker, finance hi kan sum-bawm pui ber a ni a. Tunah hian sum kan dah hnem hle mai a, vaibelchhe 34,38,13,62,000 dah a ni a, nikum 2023-2024 ai khan tuna sum kan dah hi cheng 1,13 ,38,83,000 laiin a pung a ni, Pu Speaker. Hei hi CM intlawnsiak theihna tur a nih avangin 'Finance-a sum dah vak hi a tha lo' tia term hmasa lama kan lo aupui fo thin kha kan la hria ang a. Nikum lam aia sum tam zawk dah hi he sawrkar thar hian an duh loh an aupui thin kha, 'an duh leh ta em ni?' tih kha nakin wind-up hunah min hrilh se a lawmawm khawp ang.

Pu Speaker, heng kan sawi lai hian thil dangah peng lawk ila. Home Minister demand sawi nia kan House Leader ni bawk kan CM-ina kan IR pahnih te a sawi IR battalion kan din hi kan ramn kan tihsual lianpui anga a sawi leh "mi fahrawn enkawl ang kan ni; mi fa kan chawm reng a ni" a ti mai kha a paw ka ti khawp mai. Pu Speaker, kan IR battalion te hi ramri buai kan neih chang te, hripui leh thil dang dang a lo thlen chang pawha kan ram leh hnam a himna tura rim taka thawk thinte kha an ni lo em ni, Pu Speaker? An tangkai zia mipuiin kan hre vek a, kan tihsual lianpui ang leh fahrawn hrawn ang tih a hlawh ta mai kha paw ka ti a. Kan zavai hian kan IR-te kan tangpui zia leh hlut zia hi hre thar leh vek ila tha ka ti khawp mai, Pu Speaker.

Tin, Pu Speaker, kan House Leader-in kan police-te chungchang a sawi laia "kan police te hi an thlamuanawm lo; thla an timuang lo; an fit lo, kut vung ber bur, ke vung ber bur" tia a sawi te kha a mak ka ti khawp mai. Ni e, kan police te zingah fit lo deuhthe chu an awm ngei ang; chung fit lo deuhthe avang ngawt maia an vaia 'an thlamuanawm loh' kan han ti duh mai kha a zia lo ka ti. Aizawl khawpui-ah ngei pawh hian kan police te hi

kan thlamuanpui viau a ni lawm ni Pu Speaker? Heti khawpa kan ralmuan theihna chhan, pawikhawihna leh thil sual tihna a thlen chang pawha kan inngahna, min thlamuantu leh thil tam tak min chin fel sak thintu kan police te hi “kei chuan ka thlamuanpui a, ka ring tawk bawk a ni” tih he House-ah hian ka sawi tel duh hram a ni, Pu Speaker.

Pu Speaker, kan ram hi hun kal tawh Pu Ch. Chhunga te hunlai atangin ram hruaitu hrang hrang kan lo nei tawh a, ram hi an lo kaihruai tawh thin a ni. An hunlaiin an theihna zawng zawngin hmangaih takin he ram leh hnam tana tha tur an lo ngaihtuah a, hna an lo thawk a, an lo ti tawh thin. An hunlaiin thil tha zawng zawng chu an ti thei bik lo; tih fuh loh leh tih dik tawk loh chu an lo nei ve ngei ang; amaherawhchu, kan hruaitu kal tate engmah ti lo ang leh engmah thawk lo, ram ti chhetu ang hial dawna sawina te hi kan ngaithla thin a, hei hi chu kan hresualin ka hria. Vawiina Aizawl khawpui leh Mizoram - *Zofate Jerusalem* a lo nih theihna hi chawp leh chilha lo ni thut thei a ni lo; hun kal tawha kan ram hruaitu chi hrang hrangte'n an hun laia theih tawpin, hmangaih takin an lo enkawl a, thahnemngai taka he ram an lo kaihruai avanga vawin thleng thei hi kan ni. Chuvangin, kan inzirtirna thin - hun kal tawha mite engmah lova kan chhuah thin hi, zirtirna him lo niin ka hria. Pu Speaker, fimkhur a ngai hlein ka hria. Kan Bible chuan mahni aia midangte tha zawka ruat turin min chah a. Vawiina kan inzirtir dan hi chu Bible kalh a niin ka hria a, hei hi chu kan sim pawh a thain ka hria. Tumah fel famkim chu an awm lo; kan awm lo, kan zavaiin. Mahse, thatna leh felna an nei vek a ni, kan ram hruaitute khan. Chuvang chuan, keini hi chuan heng hi chu ti tawh lo ila, sawi tawh lo ila, tuna kan ram hruaitu ni mekte, i dinglama mite hian khang zawng zawng kha hriain a fel lo lai leh tha lo lai zawng zawng hriain, chu aia tha leh fela dik taka rorel turin mipuite'n kan thlang tling a ni. Chutiang a thalo lai zawng zawng leh a tha laite chhawm nunga, bawh zuia, hmasawna hmel thar kan hmuh theihna turin hma an hruai ngat chuan, keini i veilama mite hian “theihtawpin kan thlawp tlat dawn a ni” tih erawh chu ka sawi duh a ni, Pu Speaker. (**Hon. Speaker:** Minute 2-in i pel ta e; i zo thei dawn tawh em?)

Pu Speaker, kha kha ka sawi duh a ni a. Sawi tur tam tak awm mahse, vawiina kan sawiho, kan Minister zahawm tak takte pahnih Pu Lalnginglova Hmar leh kan Chief Minister zahawm tak Pu Lalduhoma te demand hi pass turin karawn support a. He sum hi dik tak, fel tak leh rinawm takin, a nihna tur ang taka an hman theihna turin duhsakna ka hlan a ni e. Ka lawm e.

**HON. SPEAKER** : Tunah sawi turin Lunglei West Bialtu, Member zahawm tak Pu T. Lalhlimpuia ilo sawm ang.

**PU T. LALHLIMPUA** : Pu Speaker, ka lawm e.

Kan tawngtaina te Pathian-in min chhang a, Pu Lalduhoma kaihruai sawrkar chuan kumin 2024 Budget Session hun chu a hun tawp vawinah kan thleng ta reng mai a; a

bik takin i kaihhraina hnuaiyah hlim takin hun kan hmang zo thei dawn ta niin ka hria a, ka lawm hle a. Vawiinah he Budget Session chhung hian i lairil pawh a lang tanin ka hria a; i dinglam leh veilama thute pawh hian i zarah hun nuam tak kan hmang a, kan potential te pawh kan hmang chhuak chho zel niin ka hria. A lang reng chu - khawvel thiamna thang zelah i dinglama mi leh veilama mite pawh hmasawn kan tumin ka hria a. Kan hmaa tablet te pawh kuai kun ngui lovin he *Surfaces-Pro* nuai khat chuang man hi kan hmang tangkai sawt hlein ka hria a, vawiinah pawh an hnenah lawmthu ka sawi a. ‘Hmang tangkai zel turin hma la ta ila’ tih kha kan sawi ve a nih chu.

Vawiinah hian kan Minister pahnihte demand kan sawi a, heti hian a bulungin sawi leh tawp tawp mai ila a thain ka ring a, ka han kal pawp pawp mai ang a.

Sports Department-ah hian lut nghal ta ila. Sports-ina *theme* a neih hi a mawi ka ti a. ‘*Fit people make fit Nations* - Mi fit-te’n ram leh hnam-fit an siam’ tih kha a ni a. Sports investment Mizoram chhungah hian han ngaihtuah ta ila. A khaikhawmnaah hian ‘negative investment a ni e’ pawh ti ila, kan sawisual lo ang a. State kan nih hnuah Sports Department hnuaiyah hmalakna han thlir leta, han ngaihtuah let hian, ‘a va hlawk lo ve’ te pawh a tih theih ni awmin ka hria. Nimah sela, a *quality* erawh chu kan ngaihtuah a tulin ka hria. Vawiinah hian infrastructure emaw, sports goods emaw, quality ringawt lo deuh hian he Sports Department hian quality kan achieve tur hi ngaihtuah a tulin ka hria a. Kan Sports Minister rem hre tak a awm a, step thar a lak dan tur hi ‘engtin nge ni ang aw’ tiin beng sikin keipawhin ka ngaihtuah ve a. Sawrkar hmasaah ‘Sports-goods te Sports Department atangin a lak theih’ tih kha kan hriat chhun a ni a, a quality leh quality loh chu a dawngtute’n kan hre tho a. Kan Minister tan pawh hian he department enkawl hi a challenging dawn riauin ka hria.

Education leh sports lama investment kan neih that theih dan hi a inanna lai a awm rualin, inanlohna lai pawh a awm a. A bik takin *Sports* hi chu dawm ngaihna lai hi a tam hlein ka hria. Tunah pawh kan senso ngaihtuah ila, Zoram dung leh vangah kan hmu a, kan hria a. Zawhna tam ber chu - Sports infrastructure siamna zawhna a ni. Kan sum luan ral tam zia ngaihtuah hian, a return erawh chu ‘a positive em?’ tih erawh ngaihtuahawm hlein ka hria. Vawiinah hian heng zawng zawng hi, a sum lam ringawt ni lo hian, a return hi *physical* ni lo hian, *intangible* - hmuh theih loh, invisible-ah hian ngaihtuah zawk hi a tulin ka hria a. Tunah Mizoram chu kan hria a, ruihhloin min run mek a, mi fit lo kan tam a. Kan CM-in hmannah khan a sawi a, ‘*kut vung ber bur, ke vung ber bur*’ ti khan a sawisual nuai phah kha. Chungte chu kan dinhmun a ni a, Sports hmang hian department-te leh thalai pawlthe, rehab-centre te pawh hi hma kan lakpui theiin ka hria a.

Vawiinah sports hmalakna tur hian veng leh khua-in environment kan neih thatna tur te, mi nunna pawhsei leh hriselna tur te hian physical chuan teh dawn ila, teh tur a awm

kher lo mai thei. Amaherawhchu, physical lo khan ngaihtuah ta ila, a man hi ‘pek a ngai a ni’ tih hi rilruah a awm a, ka han sawi hmasa duh a.

Ka tarlan leh duh chu - District Sports Committee set-up thar sawrkar hmasain a siam kha ennawn leh tulin ka hre deuh a. District tinah hian buaina-tenau deuh kan nei theuh a ni. Kan Minister pawh khan khawngaihin min lo chhinchhiah sak sela - DC Chairman-ah kan hmang a. Districts Sports Committee awm a thatna laiah a awm chungin, he *Chariman* a nihna hi applicable lo eng emaw zat a awm a ni. A then chu hnamdang an lo ni a; MCS thenkhat leh IAS thenkhat chu sports ti miah lova DC te pawh an awm a ni. Chumi te’na Districts Sports Committee an kaihhruai hi ‘a tha ber em?’ tih hi ngaihtuah a tulin ka hria a. Tin, Secretary-ah DSYO kan neiin ka hria a, a tharah khan; chutah te pawh chuan a changin district-in a kan neih loh changte pawh a awm a ni. Tunah pawh hian Lunglei hian kan nei lo mekin ka hria a, ka sawi sual loh chuan. Chutah chuan, ‘tuin nge committee ko ta ang?’ tih kha ngaihtuah-tham a ni. Chuvang chuan, kalphung tha zawk hi kan duan a tha zawkin ka hria a.

Tin, ka bial - Lunglei West-a sports hmalakna thenkhat han tarlan hram ka duh a, *a-nek*, *a-nawk* ang chi - volleyball, TT board, badminton court leh carpet vel te chu sawi hman loh turah ngai ila. A bikin Lunglei West tan kan Minister kha chu ka han tlawn zeuh ang a, tihdan a awm mai turah ngai ila a tha maiin ka hria.

Pakhatnaah chuan, ‘*Buarpui basketball court, with viewing gallery*’ tih hi PMJVK funding hnuaiah... (**Hon. Speaker:** khawngaiin, kan inthlak lawk ang e.) Ka vannei thei khawp mai; ka sawi lai chiah hian in-inthlak chiah zel a, in-inthlak lai kha, wawiin chu hun tawp a ni baw a Pu Dy. Speaker, min paih sak ve a ni ang chu.

Tichuan, cheng nuai 107.11 a construct a ni a, Ni 11.7.2022 ah khan tanin kumin Ni 11 January khan sa zo tawh anga ngaih a ni a. Amaherawhchu, a chhuat plaster miah lovin a awm a ni. A satute khuan ‘engtin nge mahni in chhuat pawh plaster lova an luah duh ang aw’ tih ka ngaihtuah a. Tin, completion report te pawh ‘VC lam atangin dalna a awm lo’ tih te pawh a khua ten an sawi a, hei hi en that a tul hlein ka hria a, kan Minister te pawh kan ngen a.

A dawt lehah chuan, Rahsi Veng - Sports Complex awm turah hmalak tawh a ni a, eng emaw chen chu kalpui tawh a ni a, tunah hian SASCI atangin cheng nuai 100 bawr velin basketball court tur bawk thawh turin kawh leh a ni a, tunah hian hna an tan leh chiah a. ‘Plan mumal awm lem lovin he mini sports complex hi hma an la a ni awm mang e aw’ tih theih a ni a. Chuvang chuan, department lam leh kan Minister te pawh ka ngen a, hei hi enpui kan ngai hle baw a ni.

Tin, wawiinah hian ka bialte ka chhuan em emna chu - khua leh veng te hi an rualawt em em mai a, an rualawhna avangin veng thenkhat, *entirnan* - Rahsi Veng chuan

basketball court an neihna tur YMA ang tea hma lain, anmahniin an inlaih ve tawp mai a ni. 'Engtin nge funding a nih ang' tih pawh an ngaihtuah ve chiah lova; Ngaihtuah dan te pawh an ngaihtuah ve te pawh a ni mahna le. Chutiang te chu a ni a, midangte pawh an ni a. Vawiinah hian chung te pawh chu he House zahawm takah hian ka sawi duh a. Sports infrastructure-ah Lunglei khawchhung hi hmun a tlem avangin hmasawna kan hmu tlem si a, heta hmalakna hi puih kan ngai hle a ni.

A dawt lelah chuan, Pu Dy. Speaker, Youth Services hnuaiah hian NSS han sawi hram ka duh a. 10+2 chunglama motto an neih chu - '*Not Me, But You* - Mahni ni lovin, midangte tan' tih a ni a, regular activities ah cheng 400/volunteer/annum an nei a, special camping fund-ah cheng 700/volunteer/consecutive years an nei bawk a. Tin, NCC hi a awm bawk a, student nungchang inthunun leh hnam leh ram anga mahni inthunun te an motto a ni a. Hei hi kan Minister rem hre tak hian a hnuaia department enkawl na kawngah hian sports leh excise kaih kawp theihna lai a tam hlein ka hria a. Chutah chuan NSS leh NCC te pawh an regular activities bakah special camping atana hma an lak theihna hi nasa tak awmin ka hria a. Chutah chuan *Mizoram issue* kan neih mek *entirnan* - tui chungchangah te, drugs chungchangah te team neiin an kal thei niin ka hria a. Kuminah hian chutiang zawng chuan NCC leh NSS te hi theme nei hian kal bik thei ta sela, 10+2 chunglam te hi. Chutah chuan 'Youth and Water Conservation Programme' tih te, 'Youth Against Drugs' tih ang chi te hian special camping leh regular activities te hi nei thei ta sela, thalai pawl - YMA, MHIP, MUP bakah hian regular fund nei sawrkar hmalakna hian kawngro a su ngei ang.

Pu Dy. Speaker, khawngaihin vawiin chu a tawp hun a ni tawh bawk a, hun hmang dik pawl tak niin ka inhria a, churang chuan ka tawp tep e.

Heng bakah hian kan Minister enkawl Excise leh LESDE te hi a huhovin hmalak theihna lai tam tak a awmin ka hria a. Heng department-te hi pawh khawmin hmalak tawn theih niin ka hria; chungte chu Lunglei-a ka bial chhung *entirnan* - Bethel Centre naupangte'n an mamawh ang chite pawh Sports atangin thil a tih theih a. Tin, LESDE atangin skill development te pawh a tih theih a. Chutiang chuan, TNT - Hrangchalkawn-ah te pawh, chutiang chuan programme a provide theih a, infrastructure te pawh a ngaihtuah theih a. Chutiangin, Pukpui - Rescue Centre-ah te pawh khang thil kha a tihtheih a.

Tin, a tawp berah chuan, Pu Dy. Speaker, VDP inkaihhraina hi a hma thei ang bera siam hi a tul hlein ka hria. Lunglei-ah chuan (hmannia ka sawi tawh ang khan) VDP Lunglei coordination committee an ding reng tawh a ni. Chutah chuan he sawrkar tharah hian Zoram-hmangaihtute hian volunteer-in thawh an chak a ni. Churang chuan, heng tan hian platform hi kan siam thui thui a tulin ka hria.

A tawp tak takah chuan, naktukah hian kan Dy. Speaker ho hian House Committee kan nei dawn a, chutah chuan MLA Hostel leh Assembly-ina kan thil neih zawng zawngte

pawh enho te kan tum a, kan CM, kan Finance Minister-in a hriata tan MLA hostel te pawh hei aia tha leh hlawk zawka sak theih dan, tih that dan te hi ngaihtuah a tulin kan hre ve a. MLA-te pawh hi tunah hian quarter nei lo, luah tur nei lo eng emaw zat kan awm a, chutiang chuan a rem remah kan invawm ve a. Hostel renovation emaw, heng thil ang chi hi ngaihtuah tul ve niin ka hria a; chungte chu ka han tarlang zawk a ni.

Tichuan, Pu Dy. Speaker, vawiinah hian kan Ministerte pahnih Demand hi (a zat pawh ka sawi tawh lo ang a) he House-ah hian pass-pui turin ka rawn thlawp a ni e. Ka lawm e.

**HON. DEPUTY SPEAKER:** A tawp dan i thiam hle mai. Tunge sawi leh ang le? Aw le, House zahawm tak Member Pu TBC Lalvenchunga, Aizawl West-I Bialtu i lo sawm ang.

**PU TBC LALVENCHHUNGA:** Pu Dy. Speaker, ka lawm e. A tawp ni a ni a, kan chau deuh nge ni, kan inkian deuh thup mai a. Kan Minister pahnih te chanpual - kan House Leader leh kan Sports Minister te budget allocation enin (a tawpna ni a ni bawk a,) sawi tur tam em em loh ruakin leh inhne deuh deuh a nih avangin, keima rilrua awm leh ka lo ngaihpaawimawh em emte heng department-ah hian a tel avangin han sawi ve ka duh a. A bikin Excise & Narcotics Deptt. te, Sports & Youth Services Deptt. te, Labour, Employment, Skill Development & Entrepreneurship Deptt. te Zoram khaihhuahna tura department pawimawh tak takte vawiin niah sawihona hun kan han nei dawn a.

Kan sawi duh chu, a bikin ruihhlo hian min tibuai a, kan sawi nasa a. Mak deuh mai chu - a man pawh kan man hnem, sawrkar tharah pheih chuan thla hnih chhung lekin nikuma kan man aia tam No. 4 te pawh kan man tawh ni khan ka lo hria a, report leh chanchinbu lamah te pawh khan. Kan mana te hmel han en ila, 'vaibelchhe-tel keng thei an ni lo' tih hi a lang reng mai si a; an history han chhui ila, 'khawi lai mah an thleng dawn' tih hriat loh te. Amaherawhchu, a investigation lamah hian a mawhphurtu lian tham deuh hi vawiin ni thleng hian man kan la nei thei lo hi a mak ka ti a. A hnarkaitu hi chu an awm turah ka ngai a, a reh leh mai thin a. Vaibelchhe sawm-tel man te thawk leh khatah an han man a, an mana te hmel han en ila, khawi atang mahin khatiang procurement kha an nei thei dawn lo tih hriat reng ni si kha, an kaikuang leh an thlunzawmate hian sawrkar lamah emaw, 'thil tithei deuhte ah hian zawm an nei em maw ni chu aw' tih dan hi enge maw chenah a awm thin a.

Champhai-chhuak kan ni a, Champhai-pa ka ni a. A hnarkaitu deuh te pawh a han ni a, khing laiah te pawh kan thlir a, kan zawng nasa a. Pawi deuh maia te chu - kan han man ve ang chhun chhunte pawh hetah Law & Judicial te nen an lo inkaihhnawih leh zel mai a, 'prosecution lamah hian kan fail em aw' a tih theih a. Government advocates hote, public prosecutor hote, narcotics chang bikte titi tlang thang kan han hriat hian, awm nuam ti deuh bik te, thil tithei deuh te pawh kan awm fo ni te pawh hian a lang a, hei

hian kawh zawn thui tak a nei niin a lang a. Kan prosecute hleithei lova, jail kan tantir hleithei lova, a kaikuang kan chhui hleithei bawk si lova. Zu-ah hian kan han inburbun a, a tha a. Zu hi a tha lo tak zet a, mihring hriselna atan pawh ni sela. Amaherawhchu, duh loh chuan awmzia a nei lova. Sipai bang kan ni a, quota kan nei a. Vawiin ni thlengin kum 10 dawnah lak pawh kan la chuang lova. Amaherawhchu, chutih mek lai erawh chuan mahni inchungah te pawh kan kawl ve furin ka ring a, ruihhlo avanga harsatna; keini ngei te pawh kan ni.

Kan thalai lo kal leh zel turte hi eng anga tha infrastructure pawh han duan en-un mah ila, a luahtu tur leh a hmang tangkaitu tur thalai kan neih loh ni hi a thleng thuai dawnin a lang a. Hei hian ram rorelnaah, wawiinniah helai hmunah ngaihtuahna a ti thui em em mai a. Kan Chief Minister pawhin a vei em em mai a, helai House-ah pawh wawi tam tihrik a ni a.

Zu kan han sawi hian thil dang zir chianna kan neih hote kha; Synod-Social Front zirchianna kan en tak tak chuan, *opioids* ho a punna leh zua ti tharte punna kha a inthlau em em mai a, a let li chuangin opioids hote kha a pung a ni; thalai zingah a hluar a ni. Amaherawhchu, khawtlang leh kohhran ang pawha kan ngaih pawimawh zawk chu - *Zu* a ni tlat mai a. Khalaiah khan ngaihtuahna; wawiin nia heng department-te hian a huam tel miao avangin ka rawn sawi lang duh a. Kan Minister hi, a bik takin ka bial chung nen a inhnerem bawk a; Aizawl West-I Bialtu ka ni a, kan bialah khuan zoram ina a buaipui vut vut hmingthang tham te kan awm a. Khung te khu kum 5 chhunga transform dan ngaihtuahin kan hmanhlel ve em em mai a. Ani pawhin min veipui bawk a, heng a department chante atang hian, heng a sum neih leh hmuhte tangkai taka a hman theihna turin leh kan bial chung ngei atan pawh khian. Lehlamah chuan, hautak deuh mai awm chu - ka campaign lai pawhin pakhat chu a rawn kal a. “A buaithlak em mai; ka naute an tang zing lutuk a, ka khawngaih deuh tawh. An man leh hun chu keimah ka han tang ve tawh teh ang” a ti a.

Khang ang ngawt kha kan ni a; tan hi kan hlau hran lem lova. Chuvang chuan, alternate-a hi engtin nge ni ang? An livelihood te, an eizawna te, an nitin inkal pawhna te pawh ngaihtuah a ngai hle mai a. Heng hi skill development leh entrepreneurship lamah te pawh hian kan bialah pawh kan mamawh ve hle dawn bawk a.

A mimal pawhin ka hrilh tawh a, ani pawhin min tuipuiin, min ngaihvenpui em em mai a. Khulai Vaivakawn-Zohnuai atanga RV inkar ringawtah pawh *Zombies* kan ngah tawh zia te, lut-chhuak reng nih chuan ‘Zombies’ ka ti mai a; chhun engah pawh meng hlei thei lo, che hlei thei lo, kalna pawh hre mang lo, motor-a kal chuan kan hmu vekin ka ring. Khu khu kan chhuah-ka a ni a. Khung te khuan kan ram dinhmun hi a pholang Chiang hlein ka hria, kan luh-chhuah-ka a nih avangin. Vawiin niah heng department atangte hian heng chhanchhuah hna hi ‘a thawh theih’ tih kha ka han sawi tel duh a; mal malin ka thlur lo ang a.

Tin, ka han sawi tel duh leh chu, hun bawhpelh loh kan intiam bawk a, a zatve chungchuan kan zo hman turah ngai ta ila. Kan thil inchuh leh lek lek hi a awm thin a. Covid chungchanga kan sum hmuh leh hmuh loh chungchang te kha ka sawi tur a ni em phei chu ka hre lova. Amaherawhchu, ka rilruah a awm miao avangin leh budget allocation te, kan sum hmuh te kan lo thlir ve thin avangin thil dik tawk lo deuh hi a awm ni hian a lang a. RTI chhanna hmasa te, tin, budget tak tak hmuh chian hma leh *reappropriation* te a nih hmaa kan dawn atang te kan ziah thin avangin thil pahnih chauh - a bikin Finance Department bik te kha thlur ta ila, a danga kan hmuh pawh kha sawi theihin a awm nual mai a.

Hemi bakah hianin kum 2019-20 atanga 2020-23 bik chauh te kha han thlir ta ila. Ka lo en mai mai a, ka han chhut nawn leh ngial a, kan budget bu atangin actual awm vek tawh a nih avangin a tak tak chin kan hmuh atang hian 2019-20-ah hian ₹3,885 crore tax devolution, kan State Share bikah hian beisei a nih laiin ₹3,017.80 lakh chiah kan hmu a. A inthlauhna kan dawn kim lohna hi ₹867.39 crore a ni a. 2021-ah hian ₹3,967.96 crore hi kan beisei a nih laiin actual-a kan hmuha hi ₹3,010.55 crore a ni leh a. Hemi kuma kan hmuh lohna hi a tam angreng viau a, ₹957.41 crore a ni a.

Amaherawhchu, heng compensation hi next year-ah a rawn lang chho ta a. Kan beisei aia tam, 2021-22- ah hian beisei hi ₹3,327.82 crore *original estimate* kan neih laiin, actual-a kan dawn hi ₹4,222.87 crore a ni a, hei hi ₹895.5 crore-in a tam zawk a ni. Chutiang bawkin 2022-23 -ah hian Central Sawrkar beisei a han pun avangin state-share hi tax devolution bikah hian ₹4,083.24 crore kan beisei a. Hei hi actual-ah a lo chhuah khan, 2022-ah khan ₹4,745.25 crore kan hmu a. Chu chu kan beisei aia kan hmuh tamna hi ₹662.1 crore a ni. Heta tanga kum 4 chhunga tax-devolution ngau ngaua kan hmuh kim loh hi ₹267.79 crore a ni. Hei hi a hmaa RTI chhanna kan based fo avangin, budget document ngei atanga lakchhuah, figure dik vek a ni a. Hei hi actual chin chauh, estimate leh revised estimate tel lo a ni a. Actual-a awm chin vek a nih avangin, kha kha ka rawn tarlang duh a.

Heng hi Finance Commission Grant-ah khan kan hmu lo nual anga a lanna chin a awm a, enge maw tihsual te pawh awm thei nia ngaihdan a awm thei a. Financial Year 2019-20-ah khan ₹2,770.78 crore kan beisei laiin, actual-ah a first year-ah hian ₹2,778.72 crore kan hmu a. Chu chu ₹794 crore-in kan beisei aia tamin 2019-20 kumah khan kan hmu a. 2020-21-ah khan ₹2,153 crore kan beisei a, actual-ah hian ₹1,725.48 crore kan hmu a, ₹427.52 crore-in kan hmu tlem a. 2021-22-ah khan ₹1,940 crore beisei a nih laiin, actual-ah ₹1,910.29 crore... (ka zo tep a, tlar hnih-thum a la awm e.) kan hmu a, ₹29 crore-in kan hmu tlem a. 2022-23-ah khan ₹1,801 crore beisei a nih laiin, ₹1,722.10 crore a ni a, ₹79.9 crore-in kan hmu kim lova.

Finance Commission Grant bik a kan dawn kim loh anga lang, hemi State-share bik ngau ngaua hi vaibelche 528.38 a ni. Hei hi engati nge a chhan kan tih chuan, a



indaihlohna pumpui hi 2,300 emaw, 2,600 emaw ni lovin, hemi kan sawi dan hi budget bu atanga rawn lang a ni a, enfiah theih vek a nih avangin actual figures lang chin a ni. *Audited Report* atanga rawn lang chin a nih avangin hei hi kan sawi sual a; kan inchuh fo nia a lan avangin han sawi fiah fel deuh ka han duh a. A hunlai leh tunhnu a inang lo a.

Heng piah lamah hian neuh neuh a han dawn te hi chu kan ngah khawp mai a. Pu Deputy Speaker, nangmah kaltlangin Lawngtlai West Bialtu zawhna, Assembly question te, tin RTI-a mimal chhanna te social media-ah kan hmu a. A hunlaia actual figure rawn lan hma a mite nen kan khaikhin nasa em em mai a. Helaia hi actual figure awm chin atanga rawn tarlan a ni a. Khami piah lamah khan heng - tax devolution bik leh FC grant piah lamah hian SASCI atang hian 2020-21-ah khan vaibelchhe 200, a kum lehah 300, a kum lehah 497, nikumah phei chuan 725 beisei a ni. Khatianga 500 lek indaih loh lai khan, vaibelchhe 1500 chuang teh meuh mai kan han puk piah lamah khan a hunlai khan NEC atangin vaibelchhe 3 (nuai 300) kan hmu a. Chumi hnuah NECIS atangin covid outbreak dona atan khan vaibelchhe 16.16 kan hmu baw k a. Khami piah lamah khan *Chief Minister Relief Fund*-ah ringawt pawh khan vaibelchhe 31 chuang kan hmu a nih kha.

Khami piah lamah khan a mal te tea han sawi dawn chuan a tam ang reng khawp a, NEC atang khan a hnu lawkah nuai 380 kan hmu leh baw k a. Hei pawh hi he House zawhna atanga rawn lang a ni. Hengte avang hian leh NECIS atang te, DoNER leh heng atanga kan hmuh hrang hrang en hian kan sawi thina hi, khang kan la indaih lohna fo pawh kha a let tam tak puk chungin kan la kalpui zawk a nih laia covid harsatna chhuanlama kan hmang leh fo thin kha, covid avanga hmasawwna thuanawpna kha kan hai lo a ni miah lova, kan hmu lo thin. Amaherawhchu, khang a nih avanga *hmasawwna awm lo* kan ti a ni lova, kan sum hman dana kha kan titem hauh lova. A covid atan ngau ngaua kan hmuha chu a mal te tea rawn tarlan dawn pawh hian a la tam viau mai a.

AYUSH te pawhin nuai 100 chuang hman min han phalsak a, special allocation hmu lo mah sela. Ministry of Health & Family Welfare Union atang pawhin vaibelchhe 7 tum hnih hman min han phalsak a. 35% *re-appropriation* te min han phalsak a. Khang zawng zawng en khan Covid avanga chhuanlam tam tak kan neih erawh hi chu, a figure hi kan en duh tak tak a nih chuan kan budget bu kha thlir kir leh vek ila actual figure a awm a, CAG - Audit Report a awm a. Chu audit report atang chuan kan hmuh leh hmuh loha kha inhnia na helai bikah hian a awm thin avangin, a actual figure china kha ka rawn tarlang mai a ni a; *belh* leh *paihin* actual hmuh theih a nih tawh avangin. Recovery Mode-ah 2021-22-ah an awm tawh laia kan la negative chhan te. Supplementary Demand vaibelchhe 6020 chuang ngawt te kan han nei a. Original Estimate pawh 40% pawh hmang pha mang lo department kan neih thin lai kha kan hrethiam lo a ni lova. Amaherawhchu, covid vang ngau ngaua engkim hrisehah, kan hmasawwna leh kan harsatna tithuanawptu nia kan ngai hi chu 'a dik famkim lo a ni' tih kha ka rawn sawi tel hram duh a nih chu.

Aw le, Pu Deputy Speaker, wawiin nia heng Demand - Excise & Narcotics, Sports & Youth Services, Labour, Employment, Skill Development & Entrepreneurship atana ₹1,12,03,55,000.00 leh, Chief Minister zahawm tak Demand No.1, 2, 3, 4, 5, 9, 11, 14, 15 atana ₹38,94,01,40,000.00 te hi tangkai taka leh a nihna ang taka hman a niha, he ramin a lo thatpui ngei theihna atan pass-pui ngei turin ka member-puite pawh ka rawn sawm nghal a ni e. Ka lawm e.

**HON. DEPUTY SPEAKER:** A tha e. Han tih tawpna mai lai tur pawh kha a inmar tha em a ni.

Ni e, ka vei ber pakhat a ni a, *ruihlo* a sawi kha. Ka sawi hun chiah a ni pawhin ka hre chuang lova. Ruihlo hi kan buaipui khawp mai a. Ka bial chhungah pawh ka rin loh tak tak kan Tuikuk unau rap in leh dap chhuata awm ten a vaibelchhe tel man te an lo kawl a. An han man sak a, lo hralh thei teh reng pawh ni se, a pawisa pawh chuan pe se an chhiar thiam dawn em ni, a chheha an chheh sak te anih ngawt loh chuan tih turte. Khatiang kha tuartute an han ni a, a case lah a sang bawk si a. Anmahni hi chu ‘a *kaikuang ber* chu an ni lo maw le’ tih hi chu a lang a. Bail tur te hian mi hi an rawn ti thin a, mahse thil khirh tak a ni bawk si a. Hei hi chu ngaihtuah a ngai nasa khawpin ka hria.

Tunah sawi turin Pu C. Ngunlianchunga, Lawngtlai West Bialtu ilo sawm ang u.

**PU C. NGUNLIANCHUNGA:** Pu Dy. Speaker, ka lawm e. Vawiin kan session tawp niah hun kan hmangtlang thei a, lawmawm ka ti khawp mai. Hun a tlem si a, sawi zung zung mai ang.

Demand No. 7 - Excise & Narcotics Department-ah hian sum nikum aiin salary-ah eng emaw zat a pung a, a lawmawm ka ti a. Hei, kan vei tlang theuh a; ruihlo hian min chiah hneh em em mai a. Home Department kan sawi tum khan he sawrkar tharah hian ruihlo man kha ka hma ami chiah member zahawm tak Aizawl West-I Bialtu khan a sawi a, an man tam khawp mai a. Hei hi, sawrkar hi an ngam ta deuha, a rawn nasa nge ni a, sawrkar hi a tang nge ni; a eng zawk nge hriatthiam a har khawp mai a. Kha, kuhva te pawh, kan han man a, a tirah chuan. Tunah chuan ‘Bilkhawthlir Kuhva Ching Association in an man’ tih kha a ni leh ta a. Kan gate te kha an kaltlang leh a, sawrkar hmasa khan ‘kan mit kan siai a lawm le’ an tih kha; kan Home Minister hian a mit a siai ve leh ta deuh nge ni? khatiang deuh khan ruihlo pawh a tam hle mai a. Kan Zoram future en hian a mangan thlak ka ti a.

Chuvang chuan, Excise & Narcotics Department-ah manpower indaihlohna te a nasat zia kan hria a. Tun sawrkar hian a ngai pawimawh ni ngei tur a ni, sum leh paiah pawh eng emaw zat a rawn pung chho hi lawmpui awm ka ti a. Tha taka hmanga, kan fate leh thangthar lo kal turte tan he sawrkar hian ruihlo kan do hneh a pawimawh. Kan Chief

Minister leh Finance Minister speech-ah khan, ‘*hlemhletna hi kan hmelma kumhlun*’ a tih kha; ‘*ruihlo pawh hi kan hmelma kumhlun ve tho mai a ni*’ tih laia hi rilruah a lian a ni.

Tichuan, Demand No. 22 - Sports & Youth Services-ah hian hei, lehkha min lo thawn a; Pu Dy. Speaker, chhiarchhuah a ngai a, min react ngei se ka duh bawka –

Ni 4.5.2023 khan Sangau-ah sawrkar hmasaa kan Minister zahawm tak khan cheng 10 lakh a hnathawk turin a lo ti ni tur a ni; Managing Board te indinin hna hi thawh a ni a, cheng nuai 10 hman zawh vek a ni a. Amaherawhchu, vawiin ni thleng hian cheng khat mah an la hmu lo tlat mai a. Hei hi Sports & Youth Services Department nge Sports Council atangin; Chawnhu, ka bialah khan khatiang kha a awm a. “Engmah department-in kan hriatpui lo” tih kha a ni a. Khatiang tho kha a lo ni ve leh palh em ni? A lo ni palh anih pawhin, khatiang miin hna an thawh tawh chuan pek hram dan ngaihtuah a va tha ve, Pu Dy. Speaker. Kan Sports Minister zahawm tak react atan ka sawi chhuak duh a.

Tin, zawhnaah pawh khan ka zawt tawh a. Demand No. 28 - Labour Employment, Skill Development Entrepreneurship Department hi Lawngtlai a awm ve a. IV Grade pahnih an awm a, pakhat zawk kha tlemin a changkang deuh a. Chu chuan thiam leh thiam lovin computer chhe zet mai hi a khal ve a ni. Hei hi sawrkar ang pawhin a zahthlak; a fel lo ka ti a. Officer pui pui kan dah thei lo deuh a nih pawhin, tlema changkang deuh hlek, sawrkarin labour in-register tur eng eng emawah pawh. Hei, kan sorkar hi a fair dawn hle niin kan hotute, kan Minister zahawm tak takte tawngkam atangin kan ngaithla a. Hna lak chungchangah pawh ‘*Bhavan list emaw, Hnam Run list emaw, ZPM list emaw* kha a awm ve dawn lo a ni’ an ti a. Khami tur atan khan advertisement te pawh siam a ngai ang a, Lawngtlai District bik tan chuan a manganthlak a ni. Chuvang chuan, he Labour Employment, Skill Development Entrepreneurship Department Lawngtlai a awm ve saw tun aia ngaihsak deuh a va tha em. Mizo tawngin “*Sa-tahchhuak pek*” tih ang vel dinhmunah kan ding tlat mai saw a pawka ti a.

Chuvangin, Lawngtlai District hian CADC kan unaute nena enkawl kawp kan ni a, Mizoram district zingah hian a lian pawl tak pawh kan ni ve a ni. Chuvang chuan, a pawimawh si a, *entirman* - Labour cess chungchangah te, labour hote’n eng emaw damloh leh accident an tawha an claim vena tur han in-register dawn pawhin Grade-IV pahnih ringawt maiina district office luah mai saw chu a vanduaithlak a ni. Sawrkar hmasaah pawh khan ka lo sawi tawh thin a, kan sawrkar lai pawhin kan sawi tho a. Kan sawrkar lai kha chuan UD-in a la awp ve a, a la zia deuh a. Tunah chuan Grade IV pahnihin an han luah laia saw a pawka khawp mai, Pu Dy. Speaker. Hei hi kan Minister zahawm takin min react sak se, *react* mai ni lovin, hma min laksak se ka duh tak zet a ni.

Tichuan, kan Chief Minister (kan Finance Minister ni bawka) budget kan han sawi dawn a ni a. Sawrkar hmasa lamah pawh khan kan lo sawi tawh chu – “kan Chief Minister

(Finance Minister ni baw) department chanah hian engah nge heti em ema pawisa hi a tam bik?" kan ti a. Sawrkar hmasaa kan Finance Minister kha chuan hming a phuah a, 'A-khawnpui' a ti a ni. A-khawnpui-ah khan an dahkhawm teuh mai a, kha kha minister-te, MLA ten theih ang angin an dil a. Keini lam atang pheh chuan "Financial Dictator-Sawrkar a ni" kan ti a nih kha. Vawiin nia kan Finance Minister, (kan House Leader) ngei pawh hian he lama a thut lai khan a zawt pawl leh a sawi pawl kha a ni ve a. Kei pawh Doordarshan-a budget thlir letna-ah pawh khan congress party aiawhin ka tel ve a, kha pawh kha ka sawi chhuak a. Vawiinah hian, "A pa-in hlei hlei a hawn" tih ang maiin sawrkar hmasa aiin a rawn pung chho a. Finance Minister in a kuah khawm vek a, a duha chhuah a, a duha a chhuah lo hi, a kalphung hi a lo tha reng em ni?" tih lai hi Pu Dy. Speaker, ka sawi duh lai a ni a.

*Demand for Grant* bu, pheh 69 ah a total kha a lang a, nikum aiin cheng vaibelchhe 306,38,62,000 lai maiin a pung a. Tin, nikum lamah pawh kan lo sawi tawh chu – Healthcare tan kuminah pawh hian crore 20 dah a ni a; enga ti nge Finance-ah dah lo hian Health Department-ah kan pek mai loh? Sectoral allocation kan siam lai khan Health Department ta tur a ni a, nakina release leh tur, kum tawpa supplementary demand-a ziah luh leh mai tura kha; a tulna a awm em ni? Health Department-ah khan pe mai ila; Healthcare kha Health Deptt. hman tura pek tur a ni a, Finance-a pek tur pawh a ni lova. Finance atangin kan release ang a, GPF te, pension pawisa te finance atangin a chhuak a, treasury-ah control a ni leh tho a ni a, Treasury officer te chhuah turin. Kha kha finance hotute tel lo chuan a chhuak leh chuang si lova, 'keimahni leh keimahni hi kan inbum kual mai mai em aw', tih te pawh hi; kan kalphung hi a dik lovin ka hria a ni.

Tin, chutiang chuan nikum lama lang lo, kan hriatthiam loh deuh chu - Demand for Grant, pheh 66 (sub-Head 99) a - 'Capacity development for FMU/FMC' tihah hian, physical management unit atan nikum lama lang lo cheng vaibelchhe 10 dah a ni a. Chutiang chuan, kan budget te kan lo thlir ve a, kum hlui lam te nen kan lo compare a, *kalphung-thar* ah hian a dang ta deuh nge ni, ka hrethiam chiah lova. Tin, pheh 67, major head-a *Other expenditure* tiha sub-Head 2 a 'counter funding' tihah hian, *Other capital expenditure* ah vaibelchhe 25 a awm a. Tichuan, kha kha sub-head 2-na a ni a; sub-Head 3 - *Other expenditure*-ah vaibelchhe 20 a awm leh a. Tichuan, NABARD ah hian *Other expenditure*-ah vaibelchhe 15 a awm a, tikhan a inthlauh thla nguai mai a. NABARD pawh, loan kan lo la dawn a nih chuan kan House Leader (Finance Minister ni baw) khan "budget kan Minister-te'n mahniin an siam ang a, road map kan Minister hmain kan siam vek tur a ni" a ti a. NABARD loan kan lo la dawn a nih pawhin, budget thut hmain sectoral allocation - department hnenah sectoral kan locate tur a ni dawn lawm ni? Chuti ni lova, finance-a khung khawma dila pianga, 'ka pu, min pe ve rawh' tihin, 'intlawn-siak' kan tih thin kha, 'a han la' a va ni mai awm ve; kan budget thlir hian a ni tlatin a lang a ni.

Tichuan, Pu Dy. Speaker .... (kan inhnaih em kha, thenawm kan ni a, minute 2 lekin .. Congress ai ka aw h ve a, helama kan hotupa hi minute 15 in pe a, kei hi minute 10 ah min hrek zel a). Tichuan, major head 800-a *Other expenditure* tihah khan, object head 60-ah capital expenditure vaibelchhe 50 a awm leh a, nikum lamah khan a awm lova. Tin, '*Implementation of IFMIS*' tihah *Other capital expenditure* crore 10 a awm leh a; chutiang chuan, *Scheme under SIDBI* ah vaibelchhe 30 a awm leh a; *sub-Head 13-naa Scheme under UIDF-a Other expenditure* ah crore 25 a awm chho a. Chutiang chuan nikum lama lang lo, mahse kumin lama a thar vaibelchhe tel tela rawn dah hi a tam ta khawp mai a.

Tin, *Hand-holding policy* te pawh an han ti a, vaibelchhe 20 a awm a. *Hand-holding policy* te pawh a lawmawm, a tha. Amaherawhchu, 'Han-holding policy' tih pawh hi kan hotupain an sawrkar hmaa a lo sawi, "kan Minister-te chuan thut hmain route map an lo nei vek tur a ni" tih a nih si chuan, department tinte'n hand-holding kan kalpui dan turah pawh, 'nangni heti zat ni se, hei hian hma lo la rawh u' tiin. Tunah pawh thlai thar kan leina turah cheng vaibelchhe 11 kan dah a, a thar kan dah belh baw k a. Chutiang chuan *hand-holding* atan pawh hian 'finance atangin a dil thiam thiamte'n kan Finance Minister kha kan intlawn siak leh dawn ta em ni ang', tih lai hi ngaihtuahna a tithui khawp mai a.

Pu Deputy Speaker, hei hi a serious-in ka hria; sawrkar hmasaah pawh khan kan lo aupui ve nasa tawh a; hei hi chu a dik lo a ni; '*financial dictator*' a ni; hotupa berin a *khawnpui*-ah dah tlat mai a. "Ka pu, Sir, Sir, Sir," va tithiam deuhina an hmuh tam tura hi chu a fel lo a ni. 'Supplementary-ah a rawn lang leh thawt dawn si a', kan ti a, chu tak chu, passed tawh sia kha nakum budget-a Supplementary Demand-ah a lang leh dawn si; Supplementary Demand bu chhah taw k a rawn chhuak leh dawn. Engvangin - Tuna kan pawisa dah danah hian. Hei hi Supplementary Demand a 'regularise' a ngaih leh dawn avangin (**Hon. Dy Speaker:** A taw k taw h e.) Pu Dy. Speaker hei hi a fel lo deuhin ka hria a. Kan House Leader (kan Finance Minister ni baw k) khan 'khatianga sum park khawma kha a lo tha ber reng reng em maw ni le?' tih kha sawifiah se, amah pawhin a lo zawh tawh kha a ni a, Pu Dy. Speaker.

Khi, a laklawh a baw k si a, Pu Dy. Speaker, ti law law ila. Aw le; kan Minister zahawm tak Pu Lalnginglova Hmar Demand No. 7, 22 leh 28 te; kan Chief Minister (kan Finance Minister ni baw k) Demand No. 1, 2, 3, 4, 5, 6, 9, 11, 14, 15 te hi ram tan, hnam tan, he Zoram tan tangkai tak leh dik tak, thlei bik awm lova hman a nih theih nan ka support e. Ka lawm e.

**HON. DEPUTY SPEAKER:** Hei, kan hun te kan han bawhpel h deuh thin a, chuvangin hun te a lak lawh a. 'Dar 1:00 PM-a chawlh' tih kha, hei minute 3 vel a la awm a, kan chawl tawh mai dawn em ni ang? Aw le, a nih leh dar 2:00 PM ah kan tan leh dawn nia aw.

(Recess at 1:00 PM)

**2:00 PM**

**HON. SPEAKER** : Aw le, kan kan Minister zahawm tak takte pahnih Demand kha kan sawiho kha a ni a. Tunah tunge han sawi leh ang le? Aw, Dampa Bialtu zahawmtak Pu Lalrintluanga Sailo ilo sawm ang.

**PU LALRINTLUANGA SAILO:** Pu Speaker, ka lawm e.

Vawiina financial business - kan Minster-te pahnih Demand kan sawihonaa sawi hmasak ber ka duh chu, Demand No. 22 - Sports & Youth Services Department hi a ni a.

Hei, kan enchiang a, nikum Sports Minister hmasa budget ai khan a punna hi nuai 34 dawn a ni a, ka lawmpui viau a. Chutih rual chuan sports chungchangah hian, eng emaw chen kan lo inhmang ve tawh thin a ni a, vawiinah hian ‘a then kan kalsan thui deuh em aw’ tih te ka ngaihtuah a; individual items lamah hian kan hnufual ta deuh hlekin ka hria a. Keini ang ho High School te kan kal ve lai chuan heng individual items - shotput te, javelin throw te, discus throw te hi kan uar em em thin a ni a. Vawiinah hian Mizogames ang chi deuha kan neih hi kan kalsan ta deuhin ka hria a, chuvang chuan, ‘ka ngaipawimawh hle a ni’ tih kha he Sports demand kan sawi lai hian ka tarlang duh a.

Chutihrual chuan, mimal talent hi kan phochhuah zel a thain ka hria a. Swimming lamah te hian kan hnufual hle mai a, hengah te hian tan lak a ngaiin ka hria a, ‘ka ngaipawimawh a ni’ tih kha ka sawi duh a.

Tin, zawhna chhannaah khan kan Sports Minister zahawmtak khan heng sorkar hmasain infrastructure ropui tak tak a lo kalpuite enkawl zui zelna kha a mangang deuh te pawn ka hria a, out-source turin kan House Leader zahawmtak pawh a dil thu te, tin, intertate lamah te pawh khatiang kha a kalpui deuh hlek dan te pawh a sawi a. Vawiinah hian ka advise duh mai mai a awm a - Hei, Kohhran ho hian Pastor-bial tinah English Medium te kan nei a, keini Presbyterian Kohhran ho phei chuan *entirnan* - Lawngtlai lamah te pawh hospital te kan han din a, kan House Leader hi Kohhran-Upa a lo ni bawknen hengah hian kan out-source a nih pawhin, khatiang zawng kha ngaihtuahnaah kan neih tel a tha khawp mai. Chuvang chuan, a huphurhawm loh hlein ka hria a. Sawrkar hmasain tihtak zeta a lo thawh tawhna - heng kan *sports school* tih ang chi te pawh khatiang zawng khan Kohhran ang tea enkawl a nih chuan, ‘engkim mai hi a felfai thin a ni’ tih te pawh kawng engkimah kan hria a ni.

Chutih rual chuan, Pu Speaker, vawiinah hian peih lo chungah kan awm fal ve hlekna a awm a. I mi sawmna angin vawiin kan session tawpna ni ah hian dinner te pawh i

buatsaih tih ka hria a, keipawhin kil ngei ka duh a. Amaherawhchu, hriselna te pawh a inchen lova, han haw san zawk che u pawh ka duh maithei a ni.

Chutih rual chuan, kan Chief Minister Demand-ah hian a tel thei thovin ka hria a. Pu Speaker, i remtihain - vawiinah hian Govt. Notification kan hmu a, chuta tan chuan Pi C. Lalchhandami, *Chairperson*, Mizoram State Commission for Women-a ruatna ka hmu a. Hetah hian chiang deuh maiin a order-ah hian a awm a, Pu Speaker, i remtihain kan chhiar ang a –

“The Mizoram State Commission for Women Rules, 2018 for a period of three years or till she attain the age of 65 years whichever is earlier” a ti a. Kum 65 chung lam a nihna hi ka tarlang duh a. Hei hi amah AMC a in candidate-naa a declaration kha a ni a. Sawrkar hmasa khan thil tihsual kan nei a, kan MLA zahawmtak Pu Zothantluanga MLA a lo nih khan Youth Commission *Chairman*-ah kan ruat a, amaherawhchu, a kum kha a lo over hlauh mai a. Kan han sawiho a, kan in resign tir leh a. Vawiinah hian House document atan khawngaihni ka pe ang che u; hei hi ‘Born on 31<sup>st</sup> March, 1956’ tih a ni, Pi C. Lalchhandami hi. Chuvang chuan, hei hi kan House Leader hriatpuina ngei te pawh a nih ka ring a, sawrkar kal chho zel turah pawh sawrkar mualphona awm thei a ni a. Tin, a order, ‘*notification* hi kan chhiar chiang lo nge, amah hi kan zawt chiang lo aw’ ka ti a, pawl ka ti khawp a. Hei, kan Member zahawm tak, nula-hmeltha tak leh bright em em mai te pawh kan nei a, henge han thut nan te pawh ka itpui deuh a ni.

*All-in-All* a ni a, kan Chief Minsiter zahawmtak hi. Chutih rual chuan, vawiinah hian kan House Leader hi Mizoram Legislative Assembly kum 52-na kal mekah hian Kohhran-Upa kan neih hmasak ber a ni a, kan thlamuan tehlul nen; hei hmannah, kei phei chuan in lamah ka hawsan che u a. Pu Speaker, i remtihain - Home Minister Demand sawi niah khan sawisual palh a neiin ka hria a, ka lo tawngtaipui ve a ni kei pawhin, in lam atangin. “kut vung ber bur, ke vung...” tih a sawi kha a tawng fuh thei miah lova. Mizo zingah hian Mizo-tawng thiam pawl a nih ka ring a. Chuvangin, khatianga IR Battalion chungchang a sawi kha House record-ah hian, Pu Speaker, awm lo se ka duh a ni. Nakin zela tan thil thalo a niin ka hria a. Tin, amah pawh hian khawngaihni huat lamah la lo sela, nakinah windup-naah kha laia tawng kha House-ah hian record awm lovin, eng emaw han sawfiah deuhhleknani sela thain ka hria a.

Kan Police, kan IR te hi Batallion 5 kan nei a, kan hriat angin. Mizoram State ta liau liau kan neih hi MAP Batallion 3 a ni mai a. Vawiinah hian gunda-rual lo kalin, IR hi nei lo ta ila, min timit vek thei ang; chutiang khawp chuan kan manpower hi a chhe em em a ni. Central-in a remtihna anga IR Batallion 5 kan neih hi a neitu (owner) chu state-sawrkar kan ni. Election Commission-in min dil pawhin kan duh ang chin kan thawn thin, sawrkar hmasa lamah. Tin, ramri buai lai pawh khan Bihar lam inthlanna tur atan anrawn tih pawhin kan sawrkar kal ta khan ‘ramri buai kan nei a, kan indaih lo’ a ti a, a lo hnawl mai a. Chuvang chuan, hei hi a nihna takah chuan - a neitu kan ni a, 50-50

in a hlawh hi central leh state-ina kan tum kha a ni a. Heng lamah hian Adviser a ngah tehlul nen, advise awm tak a ni a, ‘finance lama intlansiak tum ang zawng hian kan tlan mah mah em aw’ ka ti deuh a.

Chuvang chuan, kan House Leader zahawm tak (kan Chief Minister ni baw) hi *mihring* a ni a, mi *perfect* a ni bik lova, sawi sual ve thei a ni. Vawiinah hian ka khawngaih khawp mai a. Pathian-in a remti lo niin ka hria a. A han sawi chho a, ‘kut vung’ tih leh ‘ke vung’ a ti te kha ka lo khawngaih em em a ni. Chuvang chuan, ‘House record atang hian pah ni sela ka duh a ni’ tih hi, a demand sawi niah hian ka sawi duh a ni.

Tin, Demand No.1 - Legislative Assembly hi, sawi ka duh leh lai chu - in inpekna, Pu Speaker, i hovin, hei kan Commissioner te nen a nasa hlein ka hria a. A chang chuan kan lehkha lo kal hi a tlai khawp mai a, kan business, naktuka mi ang hi zan dar khat vel angah te, keini, Aizawl-ah pawh veng tlahnuai deuha awm tan pheih chuan lo men peih loh khawp te a ni a. Amaherawhchu, tlin takin hna in thawk a, a ropui ka ti a. Chuvang chuan, nang leh Commissioner & Staff ho chungah lawmthu ka sawi a. Heti khawpa inpekna nasa hi department dang hian entawn sela, kan rama harsatna tam tak hi kan chin fel theih ka ring a ni.

Chutihrual rual chuan, Demand No.15 - General Administration-ah hian tawite han sawi ka duh a. Damlohna avang emaw, family thilah emaw kan zinin Mizoram House hi Mizo zawng zawng hian kan beisei tlangpui a ni; businessmen (sumdawngte) pawhin. Hengah hian kan House administration te enfiah a pawimawh hlein ka hria a. Pu Speaker, *Ruling* nih hian mit a del duh angreng viau mai a, House-a kan sawi hi *Vai* (hnam dang) an ni tlangpui lo thei lova. Ngaih pawimawh leh ngaih pawimawh loh tur hi an hre khawp mai a. Min biak that viau chuan, *ruling* kan lo ni a, min biak that loh viau chuan, *opposition* kan lo ni thin kha a lo ni a; an thliar hrang thiam khawp mai a. Heng thleng hian kan ngaihtuaha kan enzui a thain ka hria a ni.

Tin, Demand No. 7 - Excise & Narcotics hi ka ngaipawimawh hle mai. Kan Minister-te pawhin an ngaipawimawh a, kawng hrang hrangin. Amaherawhchu, hnathawh an la nei lova, vawiin niah hian suahsualnain min run a, chhungkaw tin kan rum a, chhungkaw tinah hian kan fate zingah pawh *black-sheep* kan nei deuh theuh a ni. Chuvang chuan, kut-ke vung tam tak awmna ram kan nih mek lai hian, tu family mah hi felfai kan awm lo. Chuvangin, heng hi kan thuam chak a ngai hlein kan hria a. Vawiina kan manpower neih angah chuan tihngaihna a awm lova. Ka bial - West Phaileng-ah pawh nasa takin kan buai a; Tripura te, Assam leh Bangladesh atang tein ruihhlo a lo lut a ni. Khi lam ringawt khi emaw kan ti thin a, a ni lova; khulamah te pawh khuan kan hawi zau te pawh a ngai a ni.



Tichuan, he kan budget, vawiin nia Pu Lalngthinglova Hmar Demand No. 7, 22, 28 leh Hon. Chief Minister Pu Lalduhoma Demand No. 1, 2, 3, 4, 5, 9, 11, 14 & 15 te hi lungrual taka kan ram tan kan pass ve hi ka recommend a ni e. Ka lawm e.

**HON. SPEAKER** : A lawmawm e. Champhai North Bialtu, Member zahawmtak Pu Ginzalala ilo sawm ang.

**PU H. GINZALALA** : Pu Chairman, ka lawm e. Hei, vawiin ni ah Demand pawimawh tak tak kan sawiho dawn a ni a, Demand No. 7 - Excise & Narcotics atang hian ka han tan ang a.

Hei, kan ram economy chawisanna tura tan tunah hian Horticulture lamah hian hma kan sawn chho zel a. Horticulture product he tia *raw* lutuka han hralh tawp ai chuan a-juice zawng te leh alcohol tlem ang chi 'fruit beer' kan tih ang chi tea kan tih a thain ka hria a, thil pawl lutuk lem lo te pawh a niin ka ring a; Excise Minister hian min lo chhinchhiah sak se la. Fruit Beer ang zawnga kan tih mai loh chuan a market lamah te buaina a awm thin a. Chuvangin, khatiang zawnga approach nei kha a thain ka ring a ni.

Demand No. 7, 22 leh 28 te hi a inang deuh thup maiin ka hria a, ka han khaikhawm deuh mai ang a.

Kan ramah hianin ruihhlo a hluar em em mai a ni. Tunah hian Excise force te han tichakin, staff-te han tipung viau pawh ni ila, 'awmzia lutuk hi a nei lem lo mang e aw' tih chang te pawh ka nei a, a buaithlak khawp mai a. Hei hi 'a chhan leh vang te pawh hi kan ngaihtuah a ngai ka ti a; technical deuha kan ngaihtuah a ngai ta a ni.

A chhan leh vang tam tak a awm theiin ka ring a, pakhatnaah chuan - kan ramah heti tak maia ruihhlo a hluar chhan nia ka hriat chu, under-employment kan nih vang te, employment a awmluh vang te a ni. Tin, economic ah hian development a hniam luat vang te a ni bawk a ni.

A dawt lehah chuan - kan *tribal-nihna* hi a awm ve a, tribal-zia a ni a. Tribal-te hi ruihhlo hian a run nasa em em a ni. Keini chauh pawh kan ni miah lo a nia. Hemi kan *tribalism* hi tlem tlem kan kalsan zel ang a, advanced-nation kan ni chho zel ang a, zawi zawiin he ruihhlo hian min tibuai tawh dawn lova, kan buai a nih pawhin, a zia dawn ta a ni. Zu leh thil dang dangte pawh a hman dan kan thiam lohna hi kan *tribalism*-ina a ken tel a ni a. Chuvangin, a pawimawh ber zawk tura ka rin chu, economic ah hian in stress-a employment kan create a ngai a ni. Chuvangin, helama kan tuan rual rualin Labour, Employment, Skill Development lamah te *convergence* a kal a ngai ta a ni. Helamah hian tam thei ang ber employment kan generate a ngai tel a, kan thalaite hi kan divert a ngai ta a ni.

Tin, mithiam zawkte'n an sawi thin a, 'Early intervention' te an ti a ni. Nausen an nih atanga kan intervene vata, thiamna sang zawk nena kan inrawlh vat a ngai a ni. Tin, School Education-ah pawh hian professional counselling kan rawih a ngai. Professional Counselor hi tamtak kan siama, School Education-ah kan deployed vat a ngai ta a, chu chuan drugs leh thil dang hman sual kawngah hian kan thalaite hi a veng nasa dawn a ni. An sawi dan chuan, kum 5 vel an nih atanga kum 10 inkar bawr vel te, Pawl 8-9 vel an nih thlenga kawng dika naupang kan kalpui chuan, a bak chu free takin dah mah ila, ruihhloah an buai tawh lo; hei hi *technical* deuh a ni.

Hei, ka han zir chiang deuh a, kan Bible-ah hian engkim hi a lo chuang a, Bible-ah hian kan let a ngai, he House hi. Kan Bible chuan - "Naupang chu a kalna awm kawngah chuan zirtir la, a upat hunah pawh a thlah lo ang" a ti a ni. Chuvangin, *early intervention* scheme kan neih a tul zia he House hian min hriatpui se ka duh a ni; hei hi thil pawimawh a ni. *early intervention* mai ni lo, nulat-tlangval atanga kan counseling an ngai a ni, kan thalaite hi. Fa an neih huna an fa enkawl dan tur hi sawrkar anga kan zirtir a ngai; a nih loh chuan, tun bak hi kan pel dawn lo. Excise & Narcotics Department tih changtlun ringawt kha a solution a ni lo; chu aia pawimawh hmasa hi a awm a ni.

Tin, ka han sawi leh duh chu, ruihhlo a tam em emna chhan chu - kan social life hian a promote ve a ni. Hei, kan tet laia meizial zute, zu ruite kan hmu thin ta a, nausen-nikhua kan hriat atangin kan environment a ni tlat mai a ni. Meizial zuk te, tuibur hmuam te, zu in pai tuang tuang, kal ngil thei lote kan hmu kan hmu mai a ni. Heng hian kan hriatloh hlanin kan thisenah hian *chi* anga tuh a nei a ni. Chumi environment atanga rawn seilian a nih avangin, kha naupang kha chuan a rawn practice ngei ngei a ngai ta a ni. Chuvangin, *early intervention* hi a ngai khawp mai a, a bul thumah hian kan focus a ngai ta a ni. Chuvangin, he House, he sawrkar hian, "engtin nge kan society kan reform theih ang?" tih hi kan ngaihtuah a ngai tak zet zet a, policy-ah pawh kan khung a ngai a, budget-ah pawh kan dah a ngai a ni. Chuvang chuan, Professional Counselor hi kan mamawh ani.

Hei, keima capacity-in thingtlang khuaah ka chhawr ve a, a khaw hming chu ka sawi lo mai ang a. Khaw 4-5 tuam turin Professional Counselor ka ruai a, a result chu a lang vut vut lo; mahse, kum 5-10 hnuah a lang dawn chiang lutuk a ni.

Thahnemngaihna ka han sawi kai zawk ang a - Khaw pakhat chuan khatiang zawng khan an lo bei vak mai a, 'generation khat dawn kan bei thei' an ti a, ruihhlo reng reng an control fai vek a. Tichuan, kum 15 hnuah kha khuaah khan sipai ringawt pawh 14-15 an rawn awm thei a ni. A chhan leh vang han ngaihtuah khan, an village hi in 60-70 vel lek an ni a, "kha policy an lo kalpui avang khan kum 15 hnuah achievement ropui tak an lo nei thei" tih thu kha an sawi a ni. Chuvangin, research-based deuh hleka kal a ngai niin ka hria a, he thil hi. "Kan Bible min zirtir angin he House hi kan kal a va ngai dawn em" tih lai kha ka sawi duh a ni.

Tin, a dawt leh ah chuan, Planning lam ka han sawikai duh deuh hlek a. Planning & Programme Implementation kan kalpui dana hi tlemin kan ennawn deuh a ngai em aw ka ti ve deuh a. Planning & Programme Implementation-ah hian ‘eng programme nge an implement’ tih ka hrechiang chiah lo nain, ‘Planning & Co-ordination Department te pawh hi han ti zawk ta ilara a dik zawk ang em aw’ te hi ka ti ve deuh mai mai a. Kan ramin a mamawh chu - *Planning & Co-ordination* a ni, state level-ah hian. Tin, state level mai ni lovin, district level-ah pawh chu bawh chu kan tlakchham chu a ni ta a ni. Tin, block level-ah pawh chu chu kan tlakchham a ni ta a, village level-ah pawh chu bawh chu kan tlakchham a ni a, mahni kal kalin kan kal suau suau mai a ni. Ka tehkhin bera chu - Hmanah pawh ka sawi tawh a, fanghmir ho hian chaw an han zawna, a then a chungah an chuang a, a then chhimlam hawiin an pawt a, a thenin hmar lam hawiin an pawt a, khatiang khan mahni zawn zawnah chuan thahnem ngai tak chuan an bei a ni. Amaherawhchu, hma an sawn chak lo khawp mai a, thahnemngai tak si khan an kal chak hlei thei lo a ni.

Khatiang khan, development kan kalpui danah pawh hian, department tin chuan theihtawp chu kan chhuahin ka hria. Amaherawh chu, ‘*planning* kan nei chau deuh hlek em aw’ tih chang ka nei a. Tin, Co-ordination pawh kan nei chau a ni. Hei hi a nih avangin, tun sawrkar hian state level-ah a ni emaw, block level-ah a ni emaw, district level-ah a ni emaw *convergence* nasa taka kalpui kan tum a. Chutah chuan, development committee hrang hrang kan din chhoh tur hian hei hi a rawn take-care turah kan ngai a, thil lawmawm tak niin ka hria a. Chuvangin, hma kan sawn viau dawnin ka hria a, a taka kan hman tangkai hi a pawimawh khawp mai a.

Hei, MLA-te phe chu Planning level-ah hian an involve lo lutuk a ni. MLA zawng zawng pawh hi kan ni deuh vekin ka hria. JE ten an duh duh an lo ziak a, (tawng mawilo ni lo sela) official-ten, ‘hei hi ni zawk rawh se; hetah hian retaining wall rem mai ang’ tih ang mai mai te a ni ta a; co-ordination a awm lo reng reng. MLA pawh a involve lo a ni. Amaherawh chu, tunah chuan MLA te’n kan bial chhunga development activities reng reng hi khaikhawm thei ilara a that ka ring a ni. Tum kan nei ang a, priority sector hi state level-ah kan hotute’n ruahmanna rawn nei sela, ‘kuminah hei hi prioritize tur’ rawn ti sela, chumi zawnah chuan convergence engtin nge kan kalpui ang? ‘Nangni department-in hei hi rawn ti ula, hei hi rawn ti ula’ tia co-ordination kan neih hi a ngai ta ni. Khatia kan tih theih kha chuan village level-ah, block level-ah kan khaikhawm ang a, district level hian a lo filter ang a, a lo examine ang a; tichuan, state level-ah a kal leh ang a, awmze neiin kan kal dawn ta a ni. Khatia kan kal loh chuan, development hian awmzia a nei tak tak dawn lo a ni.

Pu Speaker, i remti a nih chuan, a tawpna tan, ‘Village Clustering Policy hi neih a va han ngai em’ ka ti a ni. Ka tih awmzia chu - khaw pakhtah, (a khaw hming chu ka sawi lo ang a) an khaw luhka pakhtah khan name plate - sign board a lo intar a, chutah chuan, kalkawng siam man, an siamzat kha a lo intar a ni. In 60 vel lek an ni a, ‘km

chuti zat tan' tiin, crore 70 kalkawng atan ringawt expenditure a lo inziak a ni. Kan han sem a, intinah nuai 20-30 in a insem theih a ni. Chutiang chu a ni a; sawrkar anga service kan deliver-naah hian kalkawng chauh a ni lo, education-ah, health sector-ah, administration-ah, road-ah, water supply-ah, electricity-ah sawrkar anga service kan deliver man hi a sang lutuk a ni. Chuvangin, theih chu ni se, thingtlang khua tereuhte thenkhat hi clustering policy kan neih a ngai tawh.

Tunah hian kan ram damna tak tak tur chu *Urbanisation* a ni. Vawiin niah Mizoram kan vannei khawp mai a, 'kan hmasawna chhan chu urbanization level lo san vang a ni' tih hi kan hmuchhuak a ni. Mizoram urbanization level hi tunah hian 56% a ni a, hei hian hmasawna nasa tak a keng tel a ni. Kan future pawh urbanization level-ah hian a inngat dawn. Urbanization a sang ang a, chutah chuan service sector kan lut chiah ang a, Forest, Environment Department-ah te hian hma kan sawn khawp ang. Mi khawpuia an luh tawh chuan, tumahin leipui an vat peih tawh lo a ni. Chuvangin, kan kal dan hi holistic deuh hleka kan kal a ngai tawh a, chu lai chu kan sawi tel duh a ni. Aw le, Pu Speaker, hun min pek belh avangin ka lawm e.

Tichuan, kan Minister Pu Lalnghinglova Hmar Demand - vaibelchhe 1,12,03,55,000/-, (hei hi 'tluk leh dingawn' te ka han ti a, tumahin min tihpui ve duh mang si lova, ka han 'vaibelchhe' ve ta mai a ni a); Pu Lalduhoma Demand - vaibelchhe 38,94,01,40,000/- te hi 'he House hian pawmpui ngei ila' tih hi ka duhdan a ni e. Ka lawm e.

**HON. SPEAKER** : Aw le, Aizawl West-III Bialtu zahawm tak Pu VL Zaithanzama ilo sawm ang.

**PU VL. ZAITHANZAMA:** Pu Speaker, ka lawm e.

Vawiinah kan Chief Minister leh kan Minister Pu Lalnghinglova Hmar te demand kan sawiho turah hian kan tui tlang hlein ka hria a, ka theih ang angin kan sawi ve dawn ang e. Demand No. 7 - Excise & Narcotics-ah hian ka han lut hmasa ang a.

Kum 2023-24, February 8 thleng khan Excise & Narcotics Department hian cheng vaibelchhe 2 chuang zet mai sawrkar sumbawmah a chhunglut a, ruihhlo man kawngah 'an che tha tak zet' tih sawrkar sum bawma an chhunluh atang hian a hriat theih a ni. Ruihhlo man tam hi nuih tur nge tah tur, ka hrethiam chiah lova. Pu Speaker, a lawmawm; hna an thawk tha tih chu a chiang. Excise & Narcotics Department hian ruihhlo man kawngah hna an thawk tha a, a lawmawm em em a ni. An man tam dan pawh an sum chhunluh atang hian a hriat theih. Amaherawh chu man tur tam reng hian ruihhlo tawlhute chhiatna khawp kan man lo nge ni, ruihhlo tawlh zel turin a tawlhute hian hlawkna an la hmu pha tih erawh chu ka va hrethiam pha chiah tawh lova; nge ni a, ruihhlo tawlh nan hian kawng dang an hre lo, tihte ka rilruah a awm a ni.

Vawikhat khawchhak kan zin tumin Champhai jail kan tlawh a, jail tangho tamtak khi ruihhlo case an ni deuh vek mai a, kan kal lai chuan. Chuvang chuan, ‘ruihhlo hian bu a lo khuar nghet hle tawh’ tih a hriat theih a. Tin, ruihhlo tawlhute zingah hian hnamdang an tam hle an ti a, hei hi a dik a nih chuan, he sumdawnna hi a lian hle tawh tih a hriat theih a ni. Chuvangin, he sawrkar hian beilet turin Excise & Narcotics Department hi tihlen, a tihchak a tul em? Nge, sum tamtak sem belh vak loh hian police-te hi he department pui nasa leh zual tur hian hmang tangkai dan kan zawng dawn? Tunah pawh kan hmang tho a, kan hmang tangkai lo tihna ni lovin.

Beihpui kan thlak dawn chuan ka rilruah thil tamtak a lo lut a; department thuam chak chu a tul ngei mai, Police, Assam Rifles-te leh NGO-te nen fel taka inthlunzawmna kan neih that a tul hle dawn a, chu chu kan Minister zei zawng tak hi ni turah kan ngai a, kan huphurh lo deuh ngawt a ni.

Nichin khan Aizawl West-I bialtu khan khulam, Rangva-mual lam te kha a sawi a, a dik a, a lar em em mai a. Amaherawh chu, hmun dang pawh hi kan him chuang lo a ni. Keini Aizawl West-III lamah pawh Reiek kawng te saw, *Rangva-mual No. 2* hi a piang mai ang tih hlauhawm khawpin. Eng emaw lai phei kha chuan YMA te nen committee-in kan duty a, a hautak tham viau tawh a ni. Chuvangin, sawlam pawh saw kan Minister pawh hian min rawn ngaihven ve se, khulam an ngaihven dawn chuan tiin ka han phut ve deuh a ni.

Tichuan, inthlan dawn khan vawikhat ka thusawiah, “*ramri ngaipawimawh tak ve thin khan, ka ngaipawimawh vak ta lo e*” tih lai sawi chiaha cut khan, a dawt leha ka sawi tilang tawh lo khan min bei a, a dawt leha ka sawi chu, “*Ramri kha ka ngaipawimawh thin a, tun hmaa Brig. T. Sailo thuihruaia mi kha ka ni a, ngaipawimawh tak ka ni. Amaherawh chu, a chhunga chengte kan him a pawimawh zawka ka hriat tak hnu hian, ramri kha him mahsela, a chhunga chengte kan him loh hi chuan awmzia a nei lo. Chuvangin, ramri kha ka ngaipawimawh lo thut ni lovin, a chhunga chengte himna hi a pawimawh zawk. Ramri kha him mai ni lovin, zauh zel mah ila, a chhunga chengte kan himloh chuan awmzia a awm lo a ni*” tih kha ka sawi dan zawk chu a ni.

Khawvelah hian hnam tam tak ral an awm tawh a, ‘*ral*’ ti ila, ral chiaha chu a ni lo ang a, American - Red Indians te, Australia leh New Zealand Maori ho te; kan bul lawkah pawh Kachari ho te kan hmu a, ram zau tak neiin ropui takin awm mahse, zawi zawiin an ral a ni. Chu chu keini pawh hian kan hmabakah hian a awm mai ang tih a hlauhawm a. Kan pun chak loh dan te, ruihhlo-ina min tih buai nasat dan te ngaihtuah hian, heta tanga kan inchnanchhuah loh chuan, kan hmabak hi a eng lo a ni.

Nichin khan Champhai North Bialtu Pu Ginzalala khan, kut hnathawktute khaichhuahna tur thlai hrang hrangte kha a rawn sawi chhuak a grape-wine chauh hi siam phal a ni a, tunah chuan. Amaherawhchu, thlai dangte pawh hi an pawimawh

khawp mai a. Grape mai ni lo, thlai dang - balhla, sawhthing, lakhuihthei, sunhlu, dragon-fruit te pawh hi grape anga juice-a kan siam chhuah theih chuan, hralh dan a awmin a hlawk zawk ngei dawn a; khang lam te pawh kha kan hawi a tul maithei a ni e.

Demand No. 22 - Sports & Youth Services ah hian ka han lut leh ang e. He Department hi, ka rilruah thil pakhat awm chu – ‘*Sports*’ tih lai hi kan la vung a, ‘*Youth Sevices*’ tih lai hi a lar lo hle mai a, tih lar ve dan te pawh kan Minister chhuawnawm tak hian a thiam turah ka ngai a. *Sports* ringawt lo deuh hian kan la lut chho zel turah ngai ila.

Sports-ah hian han sawi duh ve ka nei nual mai a. Kan bial - Mission Vengthlang-ah sawn *Sports Authority of India Training Centre* (SAI) saw kan nei ve a. Saw saw discipline 7 vel atana siam a ni a, tunah hian hma kan sawn lo hle mai a. Discipline 4 vel chauh tunah hian training an awm tawh a, training te pawh an tlem telh telh mai a. Tunhma chuan Mizoram tana medal min kawlsaktu ber an ni thin a. Tunah hian, ka sawi ang hian discipline 7 vel atang 4 velah a tla thla ta a. Ram pawna kan Sports-persons te an feh chhuah pawh hian medal kan hawn tlem telh telh niin ka hria a, pawl ka ti hle a. Khu khu han tuai thar leha tihchak a tul tak meuh meuh a ni. A hmunah khuan in la kal lo mai thei a, training center leh hostel inkar te khu a hla khawp mai a, km 2 lai a ni. Vawi khat ka tlawh lai phei kha chuan, naupangte zingah training-in an han kal a, hostel-ah zuk haw leha school kal tura han insiam tur kha chuan hunin a daih lo a ni. Chuvangin, chaw ei mang lo tein school an han kal thin a, naupang tan a pawl hle a.

Amaherawhchu, tun hnaiah ka han zawh kualin, Training Center-ah eitur an lo pe tawh a, khu khuan eng emaw chen chu a chhan tawh tih ka hria a, ka lawm hle a ni. Tunah hian khu training center khu Manipur hnuai a awm a, chu chu kan Minister chhuawnawm tak hian Guwahati hnuai a awm kha a sawiin ka hria a, kha kha kei pawhin tha ka ti a. Guwahati hnuai a kan awm hunah chuan tun aia hma kan sawn theih pawh a rinawm a ni.

Ka rilruah, ‘training center puitling neih dan te a aw em em?’ tih ka ngaihtuah a, tunah chuan a hun ve tawh hlein ka hria a. Tuna kan training center khu chu a la te deuh a, kum 18 hnuai lam training-na a ni deuh ber a, engemaw bik takah chuan kum 21 thleng te pawhin a awm theih a; a tlangpuiin kum 18 a ni a. (Pu Speaker, tawitea ka han sawi lawk ang e; a dangah chuan ka lut tawh lo mai ang) Tunah chuan ram aiawha chhuak pha ho bik tan chuan kum 21 thleng a awm theih a ni. Tuna a lan dan chuan, Academy-a naupangte kan enkawl loh chuan state dang kan elpha ta lo niin a lang a ni. Sihphir leh Zuangtui lamah te hmanah khan Academy atana remchang kan zawng khan ka hria a, ‘chanchin thar sawi tur a awm chuan min hrilh se la’ tih kha ka han zawt bawk a. State-sawrkar a inhawn chuan thil har a niin ka hre lo a ni.

Nichin khan Lunglei West Bialtu, MLA zahawmtak Pu T. Hlimpuia khan, District Sports Committee chungchang a rawn sawi a, hei hi ka han sawi ve hlek ka duh a.

Tun hma khan District Sports Committee-ah hian DC te *Chairman*-ah kan hmang tawh a, tha kan ti lova, kan hmang lova. Tunah hian kan han hmang leh a, a takin ka tawh a. District hming chu sawi lo ila, an budget pawh hmang mang lote an awm a ni. Kan dinhmun a in ang lova, DC-te kha an lal hle mai si a, committee ko tur pawhin an lo tur ngam vak lova. Chuvang chuan, DC te hi Sports lampang ngaihven lo tak an awm fo avangin, ‘DC nilo, anmahni ngeiin thlang se’ tih hi ka duh dan a ni.

Kan bialah field chhete kan nei ve a, MLA fund tein ka chei a. Mi veng tih loh ang deuh ka han sawi duh chu - YMA leh Local Council-te nen Lawipu field kan buatsaih a, phullem phah kan phal ve dawn lo a ni. Phul lem phah lovin discipline hrang hrang tan duh duha an hman theih turin khu khu chu vawn him kan duh a ni. (**Hon. Speaker:** Minute a liam dawn ta e; i zo thei dawn tawh em?) Zo thei dawn tawh e.

A tawpna atan tak tak - Mizote hi lung thalo, zunthlum te, thisen sang te, cancer te kan tam hle mai a, doctor ten hei hi ‘taksa chet tlem vang’ an ti a. Chuvang chuan, kan taksa hi a chet tam loh chuan kan hrisel lova, kan economy-in a tuar a. Chuvang chuan, thil dang daihah Pu Speaker, ka han sawi ang a – ‘kawng-chhawng’ kan han ti a, ‘field-chhawng’ te kan ti a; kawng-chhawng ve tho ka rawn rawt a ni. Kea kan kal tam theih nan Aizawl khawpui-ah hian kawng-chhawng, kea kalna; “a tam thei ang ber kea kan kala kan hrisel theihna tur siam ni se, a va tha tehlul dawn em” tih kha ka han vawrh chhuak ve a ni e. Pu Speaker, ka lawm e.

Hei, vawiinah Pu Lalnginglova Hmar, Minister leh kan Chief Minister Pu Lalduhoma demand kan sawiho hi, ‘ram tan hmasawna a nih ngei theihna turin he House hian pass se la’ tiin ka rawn ngen ve a ni e. Ka lawm e.

**HON. SPEAKER** : Tunge sawi leh ang le? Aw le, tunah chuan Serlui Bialtu zahawmtak, Pu Lalrinsanga Ralte ilo sawm ang.

**PU LALRINSANGA RALTE:** Pu Speaker, ka lawm e.

Vawiin niah kan Minister leh kan Chief Minister-te demand kan han sawi ho leh dawn a ni a, sawi tur a tam khawp mai a. Amaherawhchu, kan sawi vek seng dawn lova, ngaihpawimawh zual tlema zawng han sawi ka tum a. Tin, thuawih deuh ber thin kha ka ni a, hun kha ka hmang dik tlangpui a, tun tumah pawh hian hman dik leh ka han tum dawn a ni.

Pu Speaker, a hmasa berah chuan, Demand No. 1 - Legislative Assembly hi han sawi ka duh a. A lawmawm hlein ka hria a. Tun kan Session chhunga kan Assembly inbuatsaihna a ropui ka ti a. Kan Speaker te, Dy. Speaker leh Commissioner leh Staff te, Secretariat-a thawk zawng zawngte chungah hian lawmthu ka sawi duh a ni. Zanrei tak tak, tlaivar thuak thuakin hna in thawk a, hah pawh sawi lovin, hmel him tak nen a tukah kan inhmu leh thin a. In thawhrimna hi a lawmawm a, ka fak tak zet che u a.

Tin, Pu Speaker, (midang tan ngaihthlak lo hrehawm lo ta se) Mizoram sawrkar hnathawkah hi chuan Assembly staff-te hi in efficient a, in entawntlak a, in sincere bawk a. Department dang zawng zawngte pawh hian entawn thei che u se la tha ka ti a. In thawhrimna, in inpekna zawng zawngah hian lawmthu, a hmasa berah ka sawi duh a ni. Tin, Demand No. 9 -a Finance Department hi han sawi ve ka duh a. Finance Department han sawi hian term hmasa kha, lehlam pang pawhin, Pu Speaker, an sawi thin a ni a; sawrkar hmasa hunlai khan finance-ah pawisa tam tak a awm thin a. Sorkar hmasa hunlai khan finance ah pawisa tam tak kha CM intlawn siakna, a lalna, a thuneihna a kenkawhna leh amaha thuneihna engkim dah tumna anga indemna a awm thin a. Vawiin niah hian sawrkar hmasa ang chiah khan kan han kal chho leh ta a ni a, sawrkar hmasa kha a lo tha hle niin kan ring a. Vawiin niah pawh kan Finance Minister, (kan CM ni bawk) in Finance Department-ah pawisa tam tak a han enkawl chho ta mai hi, kan Minister-te hian Finance Minister in biak that chuan, in department ah khan hmasawna a awm turah beisei ila, theih tawp chhuah ula thain ka hria.

Tin, Pu Speaker, inthlan hma khan campaign-naah *Au-hla* chi hrang hrangte kan nei thin a. Vawiin nia i dinglama thu tate hian “Sawrkar-hnathawkte tan an GPF withdraw awlsam takin kan ti ang; anmahni pawisa dah a ni a, an duh hunah an mamawhte pek chhuah nghal an ni ang” tih te, sawi a awm thin a ni. Vawiin niah hian sawrkarna an lo chang ta a, a lawm pawh kan lawmpui tak zet a. Kan sawrkar-hnathawk tam takte’n damlohnaa an hman tur te, insak an duh hunah an hman tur te, an fate dammawh-harsat thilah an ta ngei, GPF pawh hi an ta a ni a; mamawh an neih hunah an ta a nih anga an lak chhuah theihna tur kan lo sawi thin angin vawiin niah hian kalpui turin kan han beisei a ni a. Chutiang tur pawh chuan theihtawp chhuah se a thain kan hria a ni.

Tin, Pu Speaker, Finance hian engkim a huam avang hian han sawi leh ka duh chu - ka bial khu ramri, Assam nena inri chhuak deuh vek mai kan ni a, sawrkar hmasaah harsatna namen lo kan tawk a. Kan CM (Finance Minister ni bawk) khan “ramri venhimna tha ber chu, ramri hnaih khuatea development thlen tir a ni” tih hriain, theihtawp chhuahin hma min lakpui a, kan lawm takzet a. Vawiin niah hian kan hmalakna kha kum hnih - thum chhung, 2021 buaia hma kan han lak chhohna kha, tunah khuan nasa tak a hmuh theihin a lang a ni. Chuvang chuan, tuna kan Finance Minister (kan CM ni bawk) hian khawngaih takin ‘kan ram leh kan hnam tan a ni’ tih hriaa department thenkhatte ramri lamrawn hawia, ramri tana dilna anrawn siam sakte hi chu min ngaihtuhsak thei hram se kan duh a ni.

Kan Hon. Home Minister pawhin ramrite tlawh kualin hma an la a, Saihapui-V ah pawh a kal tawh a, chumi a kalna kawngah chuan kan inkah hnu (term hmasa) ah khan motor chitin reng mai kan inluhchhuah a, motor lian pawh a kal vak lohnaah khan motor a luh tak a vang khan, *lei* kan neiha khu a tha lo em em tawh mai a. Hmanni lawkah pawh bike-a accident an awm a, a hand-railing te a lo chhe tawh a, motor lian te’n an lo tai thla a, a dilna pawh an lo thlen tawh a ni. Chu chu kan Home Minister chungah pawh



lawmthu ka sawi a; a ngaipawimawh khawp mai a. Hengte hi Finance lam atangin min siam sak theih chuan a lawmawm ngawtin kan ring a.

Kan ram leh hnam tana sawrkarin a tih theih, ramriah buaina leh harsatna awm lova, ramri kan venna tha ber chu ‘ramri-dep khuate tih hmasawn a ni’ tih hriaa min duhsak turin ka ngen bawk a ni.

Tin, (nichin khan kan member thenkhat ten an rawn sawi tawh a) kan House leaderin IR chungchang a sawi dan kha chu ‘a fuh lo deuh em aw’ ka ti a, ‘IR-te tel lo hian kan Home Department hi an kal thei em’ tih hi ka rilruah a awm a. He kan IR pangate tel lo hian kan *Law and Order* hi a fail viau mai lo ang maw? Chuvang chuan, tute fahrin leh fahrawn anga kan sawi te, kut vung ber bur, ke vung ber bur anga kan sawi te; ‘an vaiin an tha, an fel vek e’ kan ti lo. Amah erawh chu, mifel tam tak kara mi-tha lo tlema zawngte lachhuak a, an vaia hmaa mi-tha lo anga kan sawi hi chu, House Leader ber tan chuan a fuh lo deuh em aw? Vawiin niah hian opposition leader group ni lovin, ramnu leh pa, Mizoram-a kan hotupa ber a nih avangin kan tawngkam te pawh hi ‘kan fimkhur tlan a tha awm e’ tih kha ka rilruah a awm a, ka han sawi lang tel bawk a.

Tin, *Hand-holding Policy* ah cheng vaibelchhe 200 chauh mai dah hi ka sawi nawn leh duh a, Pu Speaker; a tlem deuh chuan ka hria. Zawhna ka zawh minrawn chhannaah chuan – Beneficiary-wise a kal tur a ni leh nghal a. Chuvang chuan, ram puma *family-oriented* ang zawnga he hand-holding policy hi a kal a nih pheichuan, an inchan lo viau ang. Tin, kut-hnathawk, miharsate tana vaibelchhe 200 kan dah hi a tlem lulai deuhin ka hria a. Sawrkar lo kal tawh reng rengin *policy* kan nei thin a. Congress-in NLUP, keini MNF-in SEDP; chutiangin kan flagship programme ah pawisa kan han dah thin a ni a. Sawrkar lo kal tawhte nena khaikhin pawhin, tuna kut-hnathawktute tana tha ber, fel bera inzuar leh insawite hian kut-hnathawktute tan sum kan dah tlem ber a ni. Chuvang chuan, hei hi ruahman belh leh theih dan te a awm chuan a lawmawm ngawt ang.

Vawiin niah hian Finance a nih avangin sawikai duh ka nei a Hmunphiah chungchang hi sawi leh lawk ka duh a. Kan House Leader-in ‘hmunphiaha invuak loh tur’ a ti a. Vawiin niah hian hmunphiahin ka vaw dawn miah lo che u a, helaiah hian hmunphiahin, a thehin ka rawn theh pheizueh dawn a ni. Vawiina kan sawrkarna tura kan sawi thinah, hmunphiah rate kan zavaia hriatah hian sawi nawn leh ka duh a. Hmunphiah-ro rate kan siam chhung hi chuan, hmunphiah-ah hian kan fail ang. Hmunphiah kg 3 hian a ro kg 1 a siam avangin, hmunphiah hring zawk rate hi siam ila, a ro rate a rawn chhuak mai ang.

Vawiin niah hian ‘cheng 100 aia tlawm lovin hmunphiah kan la ang’ kan ti a, a thu chuan a ropui. Mahse a practical-in a tihtheih tlat loh a ni. Kan thlang lamah khuan vai fing tak tak, sumdawna thiam tak tak an awm a. Sawrkarin a rate fix kan neih aia tlawm ngar ngara lak kha an tum tawh avangin, ‘ a hring rate hi 40/- ah tal bithliah ila, a ro hi buaipui ngai lovin kan hralh zel thei ang’ tih kan sawi duh a. Tin, hmunphiah-ro hi khaw

tam takah hian a processing-khawl kan la neih that loh avangin, hralh tam bera hi a hring a ni a, a hring rate hi buaipui thei ila, hei hi hand-holding policy-ah a rate siam that-enthat leh hunah pawh hre tlang ta ila thain kan hria a ni.

Pu Speaker, Demand No. 7 - Excise Department hi tawite han sawi ve leh ka duh a. Staff an indaihlo viau mai a, Excise Department hi an khawngaihthlak a, ruihhlo leh eng emaw thilah dem an hlawh leh thin a. Chuvang chuan, duhsak an ngai hlein ka hria a. Tin, “Mizoram sawrkarin zu-zawrh a tum em? Mizoram sawrkar dinna chiang tak min hrilh thei em?” tih, ka zawhnaah pawh ka zawt a, zu zawrh tum a nih loh thu kan han hmu a. Kha zawhna kan han zawh pawh kha, kan House Leader-in media hmaah, ‘Zu-zawrh hi ennawn leh a ni ang’ a han tih deuh zuk avang khan kha kha zawt ka ni a. Zu zawrh kan tum lo te kha a lawmawm hlein ka hria.

Tin, Demand No. 22 - Sport & Youth Services ah hian han sawi leh lawk ka duh chu – Sawrkar-hmasaa kan Sports Minister kha fak duhna riau ka nei a; Mizoram-sawrkar lo kal tawhah sport-policy min siam saktu hmasa ber leh, a awmchhun a la ni a. Vawiin niah hian ZPM party te an sawrkar theihna tura SDRP an dahah, ‘sport policy siam a ni ang’ tia an rawn ngai pawimawh leh hi a lawm awm ka ti a. Kha *sport-policy*, MNF sawrkarin a lo siam tawh kha, a thatlohna lai te, kha aia funkim thei zawk leh tha zawka an ennawn leh thei dawn a nih chuan a tha hlein ka ring a.

Tin, sawrkar hmasaah khan State Games ropui takin kan nei a, kan hlim tlang a, nuam kan ti a. Thingtlang infiam mite Aizawl khawpuiah kan kalkhawm a, nuam kan tiin kan lawm tak zet a ni. Vawiin nia SDRP bu ah khan “kum 3 danah *Zofa Olympic* siam kan tum” tih a ni a, heng te hi kaltlang thei ngei se a lawmawm hlein ka hria a. Nakumah hian siam thei phei ila, a kum leh chiah, inthlan kumah kan siam leh thei ang a, “thalaite tan a van hlimawm dawn tak em” tih kha ka han sawi duh baw a.

Tin, hnam zia-rang tilang thei elementary school atanga kalpui kan tum te hi a lawmawm tak zetin ka hria. Hei hi tihlawhtling thei ila a lawmawm khawp ang.

Tin, Pu Speaker, pakhat chiah ka han sawi leh duh chu, Demand No. 28 - LESDE hi. Hei hi department pawimawh tak a ni a. Hun kal tawhah khan department hi a thi deuhthaw tawh a, a department kan hriat dan pawh kha ‘Labour & Employment – Lekhathiam-hna hmulo in register-na’ ang deuh chauha ngaih te kha, hun rei tak a ni a. Sawrkar hmasaa kan Minister Pu Lalchhandama Ralte khan theih tawp chhuahin a han enkawl a. Tunah chuan sawrkar hmasa te theih tawp chhuahna te chuan rah-tha a rawn chhuah a, *Thalaite-Department* atan vawiin niah hian a rawn inchher-chho leh ta a ni. Tin, sawrkar hmasaah pawh thalai thahnem tak lekhathiam-hna hmulote ram dangah hnathawk tura thawnchhuah an ni te kha a lawmawm hlein ka hria.

Tin, ‘Workers Welfare Board’ kan tih hi kut-hnathawktute tana board pawimawh tak kengkawhtute an ni a, hengte hi tha leh zuala kalpui thei turin leh, hemi ‘LESDE’ kan tih te leh Excise & Narcotics leh Sports & Youth Services te hi kan sawrkarin thahnem ngai taka kan thalai ruihhlo ngaite tan pawha department pawimawh tak a nih avangin, ‘duhsak thei hram se’ tih kha a tawpna atan ka sawi duh a ni e.

Pu Speaker, heng kan Minister leh Chief Minister te demand hi a tha ka ti a, ka rawn thlawp a ni e.

**HON. SPEAKER** : Siaha Bialtu zahawm tak, Dr. K. Beichhua ilo sawm ang.

**DR. K. BEICHHUA** : Pu Speaker, ka lawm e.

Vawiina kan demand sawi tur Pu Lalnghinglova Hmar, Minister of State demand, Demand No. 7 - Excise & Narcotics hi tun kum kal mek, 2024-2025 budget estimate-ah hian a pung chho a, hei hi a pawimawh hlein ka hria a. Kan ram dinhmun kan sawi fo a, kan rama ruihhlo tam zia namen lovin kan sawi a. Chunga kan rilrua awm tlat tur chu - *supply reduction, demand reduction* leh *harm reduction*-te hi kan rilruah awm tlat se. Tun dinhmunah hi chuan thil reng reng ban awlsam han ban mai hi kan ti thin a ni. Puitlingte pawhin a remchan chuan, ‘khawi maw, ka lo hmuam teh ang; khawnge ka lo ei teh ang’ tih mai hi thil awl tak a ni a.

Tun dinhmuna kan ram hi ngaihtuahin, Excise & Narcotics lama kan enforcement hi a tlem lutuk a ni. Hun kal taah khan theitawp kan han chhuah a, kumtin ‘enforcement 50 tal ila ang u’ tiin kan han kal a; advertisement kan han chhuah a, recruitment tur khan. Mahse, Covid-lockdown te kha a rawn ni chho a, vawikhat chiah kan la hman a. Chuvangin, sawrkar pawh hian hetah hian theih tawp chhuahin budget estimate te pawh a tihpun chhoh avangin, enforcement lam tihchak hi a tul hlein ka hria. District 11 kan awm a, hengah hian Excise awm lohna a awm nual mai a ni. Chu lovah pawh sensitive area-a dah tur enforcement kan awm lova, chuvang chuan, enforcement lam tihchak hi a pawimawh hlein ka hria.

Demand No. 22 - Sports & Youth Services lamah hian sawi tur tam tak awm mahse, rilrua ka vei chu, Pu Speaker, - ‘Huapzo’ sports services hi kan neih a ngaiin ka hria. Vawiinah hian boxing-a tha tha te chu thingtlang mite an ni. Chutiang chuan, heng kan thalaite talent haichhuahna lama theihtawp kan chhuah hi a pawimawhin ka hria.

Tin, Sports hi department te takte angin lang mahse, ‘thalaite tana department pawimawh ber’ ti ila kan sawi sual ka ring lo. Chuvang chuan, he department pawh hi tih len ni se; a budget estimate te pawh hi a pung chho a a lawmawm hlein ka hria a. Helama hma kan lak that chuan, ‘manpower development-ah nasa takin hma kan la a

ni' tih hria ila. Manpower development-ah thalaite kan develop chhoh chuan, chu chuan 'ruihhlo pawh a do tel a ni' tih hi ka hmuh dan a ni a. Sawrkar hmasa lama sports policy an lo duan kha, (ka lo hmuh ve danah chuan) a tha tawkin kan hria a. 'Kha kha an tih a ni' ti mai lova, thalaite tana hman chhunzawm kha a pawimawh hle bawkin ka hria a ni.

Tin, Demand No. 28 - LESDE hi han sawi leh ta ila. Industrial Training Institute hi kan nei a, heng hi upgrade a tha hlein ka hria a ni. Degree em pe thei lo mahse, eng eng emaw thiamna nei tura course nei mek te pawh upgrade a tul hlein ka hria, State dang dinhmun kan en hian Skill Development & Training Institute tha tak tak an sign board-ah kan han hmuh te hian rual-awh a na a ni. Chuvang chuan, helamah hian sawrkar hian theihtawp a chhuah a pawimawh hle.

Tin, MYC hian IAS coaching centre hi district eng emaw zatah khan kan dah a ni. Khang IAS coaching kan dahah khan furniture te, in luah tur leh hlawh pawh kha MLA fund atanga kan tum sak kha a ni. Kan bialah te pheii chuan tun thleng hian kan la tum char char. Hei hi engpawh nise, 'department hian tum ve thei tawh se, kumina kan kalchhohna turah hian' tih hi ka ngen bawk a.

Tin, kan CM zahawm tak, Pu Lalduhoma demand hi tawite tein sawi leh ta ila. Legislative Assembly ah hian kumina kan budget tur chu a pung chho ve deuh a, a lawmawm khawp mai. Legislative Assembly-a kan hnathawktute ang hian kan ram department zawng zawng hi thawk ta se, Mizoram hi '*Model State of India*' ah kan siam theih ka ring a ni. An chungah vawiinah hian, nangmah kaltlangin lawmthu ka sawi a, 'Zoram-mipui pawh hian lo hria se ka duh hle a ni. An taimakna te, an efficiency te leh an punctuality te hi 'i kaihhruaina hnuaiah hian thang chho zel se' tiin duhsakna pawh ka hlan tel bawk a ni.

Tin, Demand No. 4 - Law & Judicial hi, department induan danah hian inkalh a awm lek lek thin a, hemi kawng hi fimkhur taka kan en a tha hlein ka hria a. Department dang te'n *vet* tura an rawn thehluh hian uluk taka lo zirchiang leh zual turin Law Department ka ngen bawk a, a changtu minister pawh hian hei hi a lo enzui a pawimawh hlein ka hria.

Pu Speaker, Demand No. 9 - Finance ah hian, kan Finance Minister-in Ni 11.3.2024 Session Hall-ah he House ngeia a sawi UD & PA hnuaiah 25 crore Union Finance Minister-in a pek mai tura a sawi kha khami zan khan thawn thlak hman a ni ta em? thawnthlak hman ni ta se, Union Finance Minister approval kha kan hmu tawh em? Kan CM hian hei hi a wind-up hunah min han chhang turin ka request bawk a. Tin, crore 26 dawn tur a sawi pawh kha, signatory chuan a sign ta em? Tin, 'a pawisa hi rawn sanction theih a ni tawh em?' tih lai pawh kha ka rawn zawt tel duh bawk a.

Tin, Pu Speaker, sawrkar-hnathawk ten kan GPF keimahni ta ngei, kan hamthatna tur, kan security atan kan han dah a, a then pheii chuan an hlawh atanga percent tam tak te

pawh an han dah a. Mahse, kan mamawh hun, an damloh nikhuaa withdraw hleihthei lo te hi he sawrkar-tharah hi chuan awm tawh lo se a tha hlein ka hria. Tin, beiseina sang tak, in hmalakna atang hian kan nei a ni.

Chumi piah lamah medical reimbursement te hi kan minister ve lai pawh khan Finance Commissioner hnenah ‘engpawh ni se’ tia chit kan ziah kha a tam a ni. Heng hi anmahni rights a ni a, henge pawh hi en that ni se a tha hlein ka hria. Tin, pensioner hovin an pension benefits la hleihthei lova, district hrang hrangah an han awm a, a bik takin Education Department hi staff ngah an nih angin, pensioner pawh an ngah a; an khawngaihthlak a ni. Henge hi an rights ngawih ngawih a ni a, tun sawrkarah chuan awm tawh lo hram se. Tin, kan TA-DA te pawh a hun takah hian pek ni thei hram se a lawmawm hle ang.

Pu Speaker, State-own Non-Tax Revenue-ah hian 2024-2025 atana thil interesting deuh ka hmuh chu, Civil Aviation - Polls on Road-ah hian ₹12 lakhs dah a ni a; hei hi a amount a tam vak lo chungin 2023-2024 a kan hmuh loh thil a ni a. Hei hi “engtia lo lang ve nge nia, engtiangin nge hmalakna hi kalpui tum a nih?” tih hi a changtu Minister hian nakinah min hrilhfiyah thei se a tha hle ang.

State-own tax Revenue hnuaia ‘Other Taxes on Goods and Service Centres’ tihah hian, goods tax-ah hian kum 2023-2024-a kan hmuh cheng nuai 396 let deuhthaw cheng nuai 620 hmuh kan inbeiseina lai pawh hi, engtia tih nge kan tum? ‘Tax hi sawrkarin tihsan a tum ta em ni’ tih rilru te pawh a put theih a. Chuti a nih loh chuan, “tax collection-ah hian nasa taka hmalak a tum nge?” tih te pawh ngaihtuahna min siam a ni. Chuvang chuan, hei pawh hi min hrilhfiyah thei se tha hlein ka hria.

Demand No. 14 – GAD hi, Pu Speaker, sawi tur tam tak a awm nain, Congress sawrkar lai khan New Latawh tlangdung saw airport atan Wing Commander nen kan pahnihin aerial survey te kan va nei a. Aerial survey kan neih hnuin Mara Autonomous District Council sawn nuai 68 sengin jeepable road a tlang chhip thlengin kawng an siam a ni. Airport turin preliminary survey pawh kan zuk en vek a, kar hnih kan zuk cham chillh a ni. Kan team-leader kha vanduaithlak takin a boral a, keimahni MNF sawrkar-ah khan (frank taka sawi chuan) kan Chief Minister khan min tuipui tlat lova, ka han sawi pawh khan, ‘a theih loh’ a ti tlat zel a.

Hmanni khan zawhna ka siam a, “survey report ang chuan tihtheih a ni lo; filling tur, chulai, khalaiah a tam...” tih kha min chhanna a ni a; a dik lo a ni. Keimah ngei pawh a hmunah ka zuk kal a, kan engineer-te nen kan sawiho vek a; ‘thlawhna tum hmun hi Lengpui atanga distance chuti zat tal a ni tur a ni’ tih te a awm a, a hnaih lutuk chuan a theih lova.

*Entirnan* - Kawmzawl te pawh saw runway turin a tlin lova, chu mai piah lamah air distance a hnaih lutuk avangin thil theih loh tlukin mithiamte'n an sawi a ni. New Latawh ka sawi saw chu air distance atang pawhin a tlin a ni. Category pathumah then a ni ta a - thlawhna lian category 1, a dawt category 2 leh category 3 hi a lian ber a tum theihloh pawhin, a dawt tala siam theih a ni tih kha an team leader hmuh dan a ni a, Team leader kha mi taima tak, engineer thiam tak mai a ni a, vawiinah chuan he khawvel atangin min chhuahsan tawh a, a pawh hlein ka hria. Hei hi tun sawrkar hian a bul atangin hma min lak sak se' tiin Pu Speaker, ka ngen a ni.

Pu Speaker, minute khat chauh. Demand No. 11 - Secretariat Administration hi ka ngai pawimawh a. Pu Speaker, kan file kal dan hi *kalphung-thar* sawrkar hian a tharin siam thei se a chakawmin ka hria a. Under Secretary atanga Secretary han thleng tur hian kawng a thui lutuk a; chutah, minister-ah a lut a, minister atangin a rawn chhuak leh a, kawng ngai bawh a rawn zawh thla leh a, a kawng a thui lutuk a ni. Tunlai 'digital-khawvel' leh 'computer-age' kan tihah hi chuan a short-cut dan sawrkar hian ngaihtuah ngei se a thain ka hria.

Han sawi zel pawh a chakawm hle lain, Pu Speaker, hunin a daih tawh lova, kha kha ka sawi theih tawh ni se. Vawiina Minister pahnihte demand kan sawiho - Pu Lalnghinglova Hmar, Minister of State demand leh kan Chief Minister zahawm tak Pu Lalduhoma demand te hi he House zahawm takah hian pass ngei ni se tha ka ti a ni. Pu Speaker, ka lawm e.

**HON. SPEAKER** : Tunah chuan, Tuichawng Bialtu Member zahawm tak Pu RM Chakma ilo sawm ang.

**PU RASIK MOHAN CHAKMA:** Pu Speaker, ka lawm e.

Vawiinaah Minister zahawm tak Pu Lalnghinglova Hmar demand leh kan Hon, Chief Minister Pu Lalduhoma demand te kan sawiho a. A hmasa berah Demand No. 28 hi tawitea sawi ka duh a; 'sawi' han tihah, thil zawhfiah a ni mai a.

Labour, Employment, Skill Development & Entrepreneurship hi, Chawngteah khuan Sub-Divisional, Employment Exchange Office hi kum 1994 atang khan a function tawh lova, office building chu a awm a, tuma luah lohin a la awm ngar ngar a ni. Enkawltu a awm loh avang khuan a chhe tawh khawp mai a, a tluk palh chuan accident thleng thei a ni a, mi-nunna pawh chan theih a ni a, harsatna pawh thlen thei a ni. Sub-Divisional Employment Exchange Office hi hawn reng reng in tum tawh lo em ni? A office building pawh in enkawltu tawh lo a! A tul tawh lo a nih chuan, a ram khu surrender ni sela, thil danga tan kan mamawh a. Khutianga a awm khu chu a awmzia lo a ni.

Hmanni *Question Hour*-ah khan ITI chungchangah ka lawm khawp mai a, kan Minister of State-in ziakin chhanna min pe a. ITI - skill development lam kha kan mamawh lutuk a, MSDP tana kan sak ni mahse, DC te pawh helamah report turin ngenna ka siam tho ang a; ‘hawn theih dan awm hram se’ tih hi ka ngen a ni. Kan mamawh tak zet a ni, sawlamah ITI hi. District Council 3 kan awm a, Siaha leh Lawngtlai-ah pawh a awm a. ‘Chawngte-ah pawh hian awm ve thei hram se’ tih hi ka ngenna a ni.

Pu Speaker, Finance Department-ah ka sawi duh chu - 15<sup>th</sup> Finance Commission hian post-devolution revenue deficit grant a recommend dan hi decrease zawngin a recommend a, hei hi sawrkar kal dan phung a ni em? Mite chu kum kal zelah expenditure hi a tam chho zel kha a ni a; chutih laiin ‘a decrease zawnga recommend hi a kal dan phung a ni em?’ aw ka ti a. Hetiang hi kal dan phung a nih loh chuan, 16<sup>th</sup> Finance Commission tunah an constitute tawh a, hetiang ni lo deuha kan nawr luh chuan nakinah sum leh paiah harsatna namen lo kan tawh leh ngei dawn niin a lang a. Sawrkar kal taah khan Finance Minister, (kan Chief Minister ni bawh) kha a fakawm ka ti riau mai a, post-devolution revenue deficit grants a decrease zawnga kan hmuh chung leh covid vanga khati zozai pawisa kan hmu thei lo chung pawh khan finance hi a enkawl thiam ka ti a, a thiam dan kha *mak* ka ti zawk mah mah a, fakloh theih loh a ni. Kan party a nih vang pawh a ni lo; a thiam kha chu, ‘thiam’ tih mai tur.

Pu Speaker, tuna kan House leader pawh nise, chutiingin party ruihchilh zawngin ka ti lova, thiam chu, ‘thiam’ ka ti tho ang. Hmannia *Zawhna & Chhanna* ah khan, excluded area grant hi vawikhat chiah kan hmu a, 15<sup>th</sup> Finance Commission chhung khan. Kan Minister khan ka zawhna kha a man chiah lo a ni ang a, excluded area grant hi District Council-in an hmu thin. 15<sup>th</sup> Finance Commission recommend-na kan en chuan, (hmuh tur a la awmin kan hria) engatinge tun thlenga kan la hmuh theih loh chhan kan Finance Minister-in min enfiah sak se. Hmuh tur a nih chuan, requisition tih dan a awm em? ‘Engatinge hengte hi kan hmuh loh?’ tih kha ka ngenna a ni.

Planning & Programme Implementation Department hi, planning kan tihdan hi dawhkan atanga tih a tam lutuk a; Pu Speaker, a amount leh estimate te pawh a inmil thei lova, contractor tam tak kha contract dil tura an kalin, ‘estimate a awm lo’ tih a ni fo mai a, dawt em em chu a sawi lo turah ngai ila. A hmunah ena school emaw, hall emaw sak dawn khan a hmunah enin estimate siam theih dan awm se; hetiang a awmlah avang hian work quality khan a tuar ve a ni. Block level, district level-ah planning committee awm se ka ti ngawih ngawih a ni. Kan district chhungah chuan department hrang hrang hnuaiah central sponsored scheme a awm a, DC atangin eng emaw rawtna an siam thin a, concerned department khan an hre lo.

Hmanniah pawh ka sawi tawh ang khan Health sub-Centre an sa a, Health Department-in an hre miah lo; work order kha DC atangin a awm daih! Elementary Education hi district council hnuaiah a ni a, khawi khawi emaw atang khan project-ah an thun a, a

neitu District Council khan middle leh primary-ah a thlen kan hre lo. Contractor Aizawl leh Lunglei a mite'n a tlangpuiin contract hna an hmu deuh ber niin a lang a. An va kal a, District Council-te rawn miah lovin kan school awmsa te min thiah sak a ni; khatiang em em kha chu a dik lo. At least, department neitu khan hre rawh se, a department neitu khan tul an hria a ni. Chawp leh chilhin an kal a, tam tak chuan a dinhmun dik tak hre lovin dawhkan atangin an tih avang khan school building tha deuh pawh kha new construction atan an propose ve tihna a ni.

Tul lutuka sak ngai em em tam tak a awm chung khan, khatiang kha a awm fo a ni. Hei hi practical experience a ni. Chuvangin, District Council ah hian Planning Board hi awm thei hram sela, “Board khan District Council atang khan eng hna nge thawh ngai; department hrang hrangin engnge a thawh dawn; scheme hrang hrang atangin eng hna nge thawh tur awm te proposal kha, a DC khan hre rawh se, duplicity a awm loh nan” tih hi ka propose duh a.

Tin, Demand No. 15 - General Administration-ah ka sawi duh chu, sawi leh sawi hnu Pu Speaker, Chawngte khawpui khu ‘kan khawngaihthlak a ni’ tih kha min pawmsak rawh u. Sub-Divisional Headquarters a ni a, Block Headquarters a ni bawk a, District Council Headquarters a ni bawk a. Kan khawlai kawng saw a ni lo lutuk a ni; ka sawi uar miah lo. Furah pawh khawchhungah motor nam ngai khawpin a chhia a ni. PWD hian an ti thin a, mahse, sumin a daih lova. Chuvangin, additional resource UD&PA atang khan awm thei sela chuan tlemin a zia deuhin ka ring a. Notified town-a declared a nih avangin Urban Development sum hmang thei tur khua a niin ka hria a, chuvangin, he kawng hi min siamsak hram turin ka ngen a.

Tunah census kan nei dawn a, officer-te min hrilh danah chuan, census dawnah kan rawt loh chuan ‘a theih loh’ an ti ang a, declare a nih loh chuan. Town declaration hi GAD subject ni deuhin an sawi a, Urban & Poverty Alleviation subject ni lovin. Khatiang a nih chuan, kan House leader - Hon. Chief Minister hian hei hi min ngaih pawimawhsak turin ka ngen takzet a ni.

Pu Speaker, ka hmang tam lova. Kan Minister pahnihte demand hi a tha ka ti a, Mizoram mipuite tan tangkai taka a hman theih ka beisei avangin ka thlawp e. Ka lawm e.

**HON. SPEAKER** : Tunah chuan, Aizawl South-II Bialtu, Member zahawm tak Pu Lalchhuanthanga ilo sawm ang.

**PU LALCHHUANTHANGA:** Pu Speaker, ka lawm e. Demand No. 22 - Sports & Youth Service atang hian han sawi ila.

Ka bial Aizawl South-II hi sports lamah hian potential nei tha tak mai kan ni a, RG stadium te kan nei a, R. Dengthuama Hall kan nei a, Lawibual-ah khuan Aquatic hmun



tha deuh mai - swimming pool te, diving hmun te a awm a. Khu khu kum kal ta (term hmasa) ah khan hman tangkai a ni lova. Budget Session kan neih apiangin Demand ah te ka au-chhuahpui thin a, amaherawh chu, ngaihsak a hlawh lova, a pawl khawp mai a. Khung kan swimming pool te khu a tha em em mai a, international standard Mizoram-a kan neihchhun a nih bakah northeast ah pawh a tha ber ber te a tling a.

Chung chu tunah hian kan Sports Minister chak tak hian a rawn ngaihven em em a, hmanni ah amah nen kan en dun awlin a phur hle a, hmalak dan tur te a ruahman a, hma chak takin kan la dawn niin kan hria a, a lawmawm tak meuh meuh a. Khu khu kan neih chuan, khulai veng mai bakah Aizawl South-II mipuite leh khawpui chhunga kan thalaite tan pawh inzirna tha tak a ni dawn a. Tui tla awm changa Sairang tui hleuh thiam tui li luh ang chi te kha kan mamawh tawh dawn lova. Khung atang khuan kan thalaite'n inzirna tha tak kan hmu thei dawn a, a lawmawm khawp mai. Chu chu kan Sports Minister hian a hrechiang a, hma a rawn la chho dawn tur hi a lawmawm kan ti a.

Tin, RG stadium leh R. Dengthuama Hall khu kan hmang tangkai khawp mai a, khutah khuan harsatna kan nei thin a. A kalkawng - a chhohna kawng khu a zim deuh a, chuvangin traffic jam hi a nasa thei em em mai a. Hei hi kan Sport Minister hian min lo hriatpui bawh sela a thain ka hria.

Tin, Demand No. 28 - LESDE chungchang hi, sawi tak ang khan kan bialah hian ITI kan nei a, hmun tha deuh, compound zau tak nei a ni a, kan LESDE Minister Pu Lalnghinglova Hmar hian a rawn hrechiang khawp mai a, hmannah pawh a mah nen kan en dun a. Hei pawh hi Budget Session apianga ka au-chhuahpui thin a ni a, amaherawhchu ngaihsak a hlawh lova. A building te a chhia a, a then te phei khu chu luah tlak loh a ni a. Khung te khu senghawi vat loh chuan, a mualpho thlak dawn a.

Tin, khungah khuan kan thalaite tan skill development lama intuaitharna, eizawna atana intuaitharna tur trade hrang hrangte a awm a, khute khu han tih changtlun deuha, trade thar te pawh dil ni se. Chutiangah te chuan kan LESDE Minister Pu Tetea hian a ngaihna a hre dawnin ka hria a. Chuvang chuan keini Aizawl South-II te hi kan vannei dawn hlein kan hria a, kan lawm tak meuh meuh a ni.

Tin, kan CM chanah kuminah hian Local Area Development Fund cheng nuai 200 kan nei dawn ta a. Kum hmasa lamah khan nuai 150 kan nei a, nuai 50-a tihpun a ni a, a lawmawm khawp mai a. MLA ten kan bial chhungah development hrang hrangte kan khawih ve theihna a ni a; nuai 150 atanga nuai 200-a tihpun a ni hi a lawmawm tak meuh meuh a. Tin, kan fund te hi a theih chuan sanction hma theih thin sela MLA-te tan chuan a lawmawm khawp ang. Chu chu kan CM (kan Finance Minister ni bawh) pawh ka han ngen nghal a ni.

Tin, Demand No. 15 - GAD hi, han zin nikhuain sawrkar building hrang hrang - House ang chite hi an tlabal hlawm em emin ka hria a. Chuvang chuan, hengah te hian tan lak thar leh a tulin ka hria a. Ka sawi ang khan an furniture-te, parda-te leh engkim mai hi a tha tawh lo hlawm khawp mai a. Hengte hi kan CM hian (ama portfolio a ni bawk a) uluk leh zualin min enchiansak sela a lawmawm khawp ang.

Tin, SAD chungchang hi, SAD hi a lian khawp mai a, kan Secretariat inenkawl na a ni a. Hengah te hian sum tam tak hi dah a ni a, hengte hi tangkai taka hman a pawimawh dawn khawpin ka hria a. Kan Secretariat hmun-hmate pawh hi zahawm zawk, felfai zawk leh thianghlim zawka enkawl a nih hi kei chuan ka duh a, kan fund te hi tangkai taka hman a nih hi ka beisei a ni.

Tichuan, Pu Speaker, tuna ka thil sawi, pawimawh ka tih zual pahnih - Sports & Youth Services leh Labour, Employment, Skill Development & Entrepreneurship Department te hi kan Minister hian nasa leh zualin, Aizawl South-II a kan potential neih that tak takte hi uluk leh hmangchang hre taka min rawn enkawla fund-te tangkai taka hman a nih chuan, keini Aizawl South-II mipuite tan chuan a lawmawm dawn hle a. Aizawl South-II mipui mai bakah khawpuia thalaite tan pawh sport-a eizawna kawngah kan intuaihriamna hmanraw tha tak a nih theih dawn avangin pawimawh ka ti a, ka han sawichhuak ve a ni.

Tichuan, Pu Speaker, kan Minister-te pahnih - Pu Lalduhoma leh Pu Lalnghinglova Hmar-te sum ruahman hi tangkai tak leh tha taka hman a niha, ram tana ro-ting tak chherchhuah a nih theih nan, pawisa te hi a thlenna tur dik taka thlen theihna turin he kan budget hi ka thlawp a. 'Kan hmasawna rahbi pawimawh tak a ni thei ang' tiin beiseina sang tak nen kan lo thlir a ni e. Tichuan, support-a, kan pawm tlan theih ngei ka beisei baw e. Ka lawm e.

**HON. SPEAKER** : Tunah chuan Thorang Bialtu, Member zahawm tak Pu R. Rohmingliana ilo sawm ang.

**PU R. ROHMINGLIANA:** Pu Speaker, ka lawm e.

Tun sawrkar thara Budget Session hmasa ber tawpna ni kan lo thleng leh ta a. Keini ang he House-a vawikhat luhna atan pheih chuan inzir tur a tam hle mai a. Theih tawpin kan han ti ve thin a, kan thiam ang tawkin kan inzir ve a.

Tun sawrkar budget han en neuh neuh hian, mipuiin tun sawrkar thar lo awm hmaa kan lo beiseina a len em emna chhan pakhat chu - thingtlang lam hawi, thingtlang mite tan a ni a. A dawt lehah chuan - a mipui nawlpui lo deuh, tlema zirna lama sang deuh hoin an lo ngaihtuahnaah chuan, 'researcher-te research based-a he sawrkar hi kal tur a ni' tih lai kha an rilruah a lian em em mai a. Amaherawhchu, budget han en neuh neuh hian thil tam tak tha a awm rualin, kan researcher tam tak hian fail deuhna lai an nei niin a

lang a. Ph. D zo tawhte chuan an hria ang a, *course work* paltlang-lo ho hian research an bei ta em maw ni le; han fail deuh lai hi a awm fo em' tih, ka rilruahrawn lian deuh lai kha a hmasain ka han sawi duh a ni. Thingtlang lamah pawh an research tihna kha; hmunphiah chungchangah pawh thar hmasa berah kan han fail ta ringawt lai kha pawika ti hle mai.

Pu Speaker, Demand No. 7 - Excise & Narcotics chungchang kha han sawi ve zawk ka duh a. Ka bial, Thorang Bialah chuan Excise & Narcotics Department hi kan hmu ngai reng reng lova, ruihtheih thil hi a awm ve ta lo nge, a tul ve lem lo kan ti nge? Excise department ho inthuan dan pawh hre lo a tam zawk kan nih ka ring. Chuvang chuan, 'kan bial chungte khu chu a thianghlim viau nge, department te kan indaihlo viau zawk' tih zawng te pawh khan a kaihluh theihin ka ring a. Kan Mizote, tunhmaa kan pipute atangin zu hi *kan-thupui* em em a. Tichuan kan kal chho zel a, tun hunah chuan zu mai ni lo, ruihtheih thil chi hrang hrang a tam ta viau niin a lang a. Hengte hi keini kristian ramah phei chuan, a kristian-te hian a kohhran ang zawng te, NGO ang zawng te pawh hian he department hi (sawrkah hian duh ang tawka a tihlen theih si loh chuan) theih tawpa puih hi kan tih ve tur niin a lang a.

Chumi rual chuan, tunhnaiah pawh 'man a tam' kan ti a, ruihtheih thil chi hrang hrang. 'Kan Zoram hi ruihtheih thil kalkawngah a tang ta nge, kan Zorama hman tur ruihtheih thil a rawn lut tam' tih lai pawh hi department lam hian an chhui chian a thain ka hria a. Chumi rual chuan, a man tur hi eng vanga tam viau nge a nih? 'Ruihtheih thil a tam avanga man teuh teuh nge kan niha, kan Excise Department-te chak viau vanga man teuh teuh kan nih' tih lai pawh hi kan inchhut a thain ka hria. Tunah indaih lo chung pawha hetiang an han man teuh teuh thei laia erawh hi chu, a eng zawng pawhin a fakawmah ngai ta ila.

Tichuan, Sports & Youth Services-a *sports* lam bikah hian, discipline kan thlan thiam hi a pawimawh ngawtin ka hria. Nichin, chawhma lamah khan ka lo ngaihtlak sual nge, sports-a sum sen tam te kha kan ui deuh niin ka hria a; kan thalai te sports lamah kan vawrhshan hi a hun takzetin ka hria a. Chutiang ni lova kan ui a nih chuan, sports ah a man tlawm kha kan thlang thei a ni. Inhrui pawh te, lungden te ang ngawt kha a ni lem lova, khawvel huapa Mizoram a lan ve theihna tur chuan, sports lamah kan than a ngai viau a ni. Football-ah te pawh kan thang chak em em. Vawinah hian Mizoram Football Association te pawh hi an fakawm thlawtin ka hria a. Mizoram-a kan thalaite football-ah hetiang khawpa an promote thei te. Aizawl FC te pawh hi an fakawmin ka hria a. Mizo thalaite an promote dan en hian, helaiah an neih ang angin sum leh paiah pawh hlawh an pe a, an chherchhuak tha te tea, vai ram atangin man to tak takin an rawn lei chhuak leh thin a ni. Chuvang chuan, Sports lamah te pawh hian hma kan lak chhoh zel hi a pawimawhin ka hria a.

Tin, Pu Speaker, Sports lamah *incentive cash award* an han pe thin te hi, kan thalaite a chawp phur takzetin ka hria a. Tun sorkar-thar pawh hian hei hi uar leh se ka duh khawp mai. Nasa zawkin rawn pe thei sela a thain ka hria. Tin, sports discipline (nichina ka sawi tawh ang khan) kan thlan thiam rual rual hian, a hmun hi kan thlan thiam a pawimawhin ka hria a. Vai ram khaw-luma khel tur chuan Mizoram chhunga an practice-na pawh hi khaw-lum deuh te zawng ila, kan sports infrastructure kan dahna tur hmun te pawh hi thlang thiam ila. Tin, UK lamah te kan thawn thla dawn a nih chuan, khaw-vawt lam deuh te pawh hawi thiam ila; khatiang khan kan level-a zir zel khan kan hmun thlan thiam a pawimawh hlein ka hria a.

Tichuan, Pu Speaker, Demand No. 1 - Legislative Assembly chungchang hi tawite han tarlan ve ka duh a.

Hei, MLA thlantlin ka nih velah khan, ‘khawngge min enkawlto turte’ tiin Legislative Assembly Secretariat a thawktu zawng zawngte ka chibai chhuak vek a, “an va han smart em!” tih hi vawiin niah hian ka sawi chak tlat a ni. Vawiin nia i kaihhruaina hnuaiyah te, Dy. Speaker kaihhruaina hnuaiyah te he House-ah, keini a tharte pawh lungmuang takin duhtawkin thu te kan sawi ngam ve a, a lawmawm ka ti. Tin, he Assembly Secretariat-a thawk zawng zawngte an hah zia ka hria. Hmanniah Chapchar Kut kan hmang a, an hmang ve hman lo reng reng; a tuk Inrinni te kha chawlh an hmang hman lo reng reng; Pathianni ah te pawh an kal a ni. Chutiang khawp chuan he session hi smooth taka a kal theihna tur hian hna nasa takin an thawk a, an fak tlak a, vawiin ni ah hian ka han fak a ni.

Tichuan Pu Speaker, Demand No. 2-ah lut ila - Governor thusawi hi a ngaih-pawimawhawm hlein ka hria a, a thusawi sawi-khawmna, sawi-hawmna lawmthu sawina te pawh kan nei tawh a. Khata a thusawi kan bawhpelh a nih chuan, he House zahawmna hi a tlakhniam ka hlau hle mai. Chuvang chuan, a thusawi te hi kan sawrkar lam pawhin bih chiang sela, ennawn fo sela a thain ka hria a.

Tin, a thusawi pakhat sawichhuah leh duh ka neih chu – “khawpui lam hmasawmna leh thingtlang lam tih hmasawmna khairual turin theih tawp kan chhuah baw ang” tih a ni a, a lawmawm hle a. Chuvang chuan, thingtlang lam tea hawi nasat a ngaiin ka hria a, tun sawrkar hian. Hei, tun tumah MLA fund chungchangah pawh ka sawi ri tawh a; Aizawl-a MLA fund leh thingtlang MLA fund a inang reng; Aizawl-ah chuan Corporator ten *ward fund* te an la nei a, thil dang dang development a lut a ni. Thingtlang lamah hian hetiang hi kan nei tawh si lova, kan inchuh a, development tul tak tak a tam ropui mai si a. Tin, a khuate hi a inzat lova, hengte pawh hi nakinah tun sawrkar hian uluk takin bei chho zel sela thain ka hria a.

Tin, Planning & Programme Implementation chungchangah department tin ten plan tha tak tak an rawn siam chhuah rual hian, ‘a pawimawh an siam em’ tih laia hi, a priority

list-a awm thei tur ang chi hi ‘an ti tak zet em’ tih hi an thlur-bing a ngai hlein ka hria a, Aizawl atanga duh duh lo thliar kha a fuh lovin ka hria a. Block-level atangin uluk taka ngaihtuaha, district-level ah, chutiang chuan kan tih chhoh a pawimawh hlein ka hria a ni. Chutiang tur chuan MLA te pawh kan inrawlh peih viau a ngaih ka ring. Mahni bial theuhah inrawlh ila, a pawimawh chu (MLA te hi kan zin zing a, kan vak hnem a) kan hre viauin ka hria a. Chutih rual chuan Pu Speaker, *quality control* chungchang hi kan ngaih pawimawh tlan a pawimawh takzetin ka hria a ni.

Tin, Pu Speaker, district te alo piang chho zel a, GAD chungchangah te pawh hian ‘helaiah hian eng chin hi nge’ tiin; delimitation te pawh kan la hnaih leh ang a, hetiangah te pawh hian ngaihtuahna uluk tak kan hman chhoh te pawh a pawimawh hlein ka hria a; kawng kan siam dan te pawh kan ngaihtuah a ngaiin ka hria.

Hei, ka bial chhung entirna atan kan sawi leh lawk duh chu - Supply Department hnuaiah hian, ka bial chhungah Lunglei-in bial a nei a, Serchhip-in bial a nei a, Mamit-in bial a nei bawk a ni. Chutiang chiah chuan Electric Department ah pawh an ni tho a; inkal-thelh deuh deuh te pawh a awm a. Marpara lam atanga Lunglei kal tur chuan Aizawl an rawn thleng phawt a, chutah Serchhip District an rawn paltlang a, tichuan, Hnahthial District, chutah Lunglei - District Capital ah; khatiang kha thil awm thei a ni. Pu Speaker, pakhat leh chiah han sawi duh ka nei a, minute 2 khat lek khawngaihin min pek belh thei la. Finance hi sawi tur ka ngah tehreng nen, a hnunngah ka lo dah a, pawl khawp mai.

Kan Budget hi a pung chho zel a, kan lawm a; lawm tur pawh a ni. Budget pung lo a awm ngai ka la hre lova, (ka hriatna a tlem deuh nge) Budget hi chu a pung zel tur a ni. Chumi rual chuan, hei hi sawrkar-tha tehna ah pawh ka ngai lem lova. Chutih rual chuan leiba pawh a pun dana hi inenthiam a ngai zawk a ni. Tute emaw chhungkua leiba chu a tam vak lo pawh a ni mai thei e, a za-bi pawh a ni mai thei; chhungkaw dang chu a sang-bi pawh a ni maithei; a sing-bi pawh a ni mai thei; thenkhat chu nuai-bi pawh a ni maithei. Chuvang chuan, kan State sum kan hmanthiam hi a pawimawh a; kan hmanthiam rualin, kan leiba neih a te pawh hi eng level-in nge kan teh dawn? Hei hi uluk taka mipuite pawh hian kan en a tulin ka hria a ni.

Pu Speaker, a tawpna ber atan - RE Supplementary Bill sawi ho chungchanga hi, kan House Leader zahawm takin sawiho a duh thina kha, tun hma helai House-a kan luh ve hmaa a thusawi ka hriat renga chu - ‘hengte hi sawiho a tul a ni’ a tih, he House-ah ngei a sawi te kha tha ka ti em em a, a pawmnaawm ka ti a; tunah pawh kan han sawi tan ve ta chu a ni a. Chuvang chuan, heng te pawh hi zau zawka kan la sawi zel theih pawh ka beisei.

Tichuan, Pu Speaker, vawiin nia kan Minister zahawm tak, Pu Lalnghinglova Hmar leh kan Chief Minister Pu Lalduhoma te demand kan sawi hi lawm takin ka pawm e.

**HON. SPEAKER** : South Tuipui Bialtu, Member zahawmtak Pu Jeje Lalpekhlua ilo sawm ang.

**PU JEJE LALPEKHLUA:** Pu Speaker, ka lawm e.  
Tunah hian kan Chief Minister chhuanawm tak Pu Lalduhoma leh kan Minister Pu Lalnghinglova Hmar te demand kan sawiho thei tur hi a lawmawm ka ti takzet a, Pu Speaker, a hmasa berah chuan Demand No. 14 - Planning & Programme Implementation chungchang hi sawi ka duh a.

Kumin budget ah MLA tinte'n kan bial theuh hmasawna tura tan sum kan hman theih MLA - Local Area Development Scheme hnuaiah fund chu a pumpuia tihpun a ni a. Hun kal tawhah te cheng nuai 6,000 atangin tun sawrkar kumthar lo awm turah hian cheng nuai 8,000/-a tihpun a ni hi a lawmawm hlein ka hria a. A punna hi cheng nuai 2,000 a ni a. MLA te'n kan bial chhunga hmasawna hnathawhna tur sum kan neih belh tur hi thil lawmawm tak a niin ka hria a.

Kan Chief Minister hi kawng engkimah a tang em em a, tun ang dinhmun a thlen theihna tur hian 'kum tam tak a bei tawh thin' tih kan hre vek a, thinlung tak pawhin ka lawmpui a; Pu Speaker, i remtihnain sawi lan ve ka duh bawk a ni.

Demand No. 22 - Sports & Youth Services hi han thlur bing deuh ka duh a. Kan kalna lam deuh te a lo nih ve avang hian infiam-mite tan hian rualawh te hi a lo na ve thin a. Infiam-mi te ka lo nih tawhna angin, tuna kan Minister hmalakna hi a chhuanawm ka ti hle mai a. Infiamna hmunhna siam tam aia, infiam-mite chherchhuah a tum thu a sawi te kha a lawmawm takzet a ni.

Mizoram pawnah kum 2006 atang inkhelin ka awm ve tan a. 'Mizoram-mi ka ni' tih ka sawi hian, Mizoram hrelo hi a tam zawk an ni thin a. Amaherawhchu, tunah chuan Mizo infiam-mi-te zarah, a bikin - Jeremy te, Lalremsiami te, Lalrina te, Lallianzuala te, Apuia te leh sportsperson dang kan neih hrang hrangte zarah hriat kan hlawh ve tawh hle a. Tin, Mizoram football team te Santosh Trophy khelh mekah kan che tha hle bawk a ni.

Tin, kan sawi tawh ang khan Aizawl FC-te I-League-ah kan han champion chho a, sports avang hian national newspaper headline-ah te hial kan lang tawh a. Tunah chuan hriat te pawh kan hlawh chho viau zel a, a lawmawm ka ti hle a ni.

Tin, Mizoram Sawrkar leh MFA hmalaknain grass-roots naupang tha tak tak an chher chhuak thin a. Mizoram Sawrkarin Football Academy tha tak Kolasib – Saidan ah kan nei a, Lunglei lamah SYS kan nei bawk a. Heng academy pahnih atang hian I-League te, ISL leh India player thlengin an lo chher chhuak tawh thin a. Hengte hi tun aia changtlung zawka thum chak theih ni sela, tun aia player tam zawk hi ISL leh I-League bakah India Team, India Senior thlenga khel thei turin player tam tak an chher chhuah

theih ngei pawh ka beisei a. Kan Minister pawh hemi chungchang hi lo ngai pawimawh turin ka han ngen nghal bawka.

Tin, Pu Speaker, Sport-ah hian infrastructure neih that a pawimawh rualin, tih tak takna nen grassroot lam hawia nasa zawka naupangte tana zirtirtu leh a zirna mumal tak kalpui hi a pawimawh khawpin ka hria.

Hnahthial-ah sawn 'Jeje 12 - Football Academy', under 14 leh under 12 tan kan siam ve a. Hemi chungchang pawh hian phai lam atangin zawhna kan dawng nasa thin em em a. Tin, Mizo naupang nu leh pa tam takin an fate academy awm theihna tur zawngin zawhna kan dawng nasa thei em em a. India ramah hian Academy belh tlak tak tak kan nei tam lo a. (*Hon. Dy. Speaker-in Chair a la a..*) Mizo naupangte'n sum leh pai tam tak sengin state dang academy-ah te pawh an awm phah hial thin a.

Tin, Pu Dy. Speaker, Saidan Football Academy - Kolasib khu a hmunah ka zuk kal tawh a. A hmunhma a nuamin, a zau tha hle mai a. Kan hmunhma neihte hi tun aia changtlung zawka kan hman theih nan (state sawrkar sum atanga hmalak a harsat pawhin) outsource turin, a ngaihna hria Minister kan nei bawka. ISL Club emaw, I-League Club emaw company lian deuh te zingah investment ti duhte pawh an awm ka ring a. Hetianga kan kalpui theih a nih chuan, a hlawkna tel bertu tur chu - kan Mizo naupangte tho hi kan ni a.

*Entirnan:* TATA Trust Football Academy-in kum 2018 khan Mizoram-ah Football Academy an rawn din a, an inrelbawlina te pawh a changtlung a. Naupang pawhin an hlawkpui hle a. An coach pawh English-pa a ni a. India camp-a ka awm hmasak ber, kum 2006-a kan coach kha a ni a, tawnhriat ngah tawh tak, mi tha tak a ni a. Ani kaihhruaina hnuaiha Academy changtlung tak helai Mizoram hmun ngeia kan han nei kha a lawmawm kan ti a.

Tin, tun hnaiah anni Academy atanga chhuak naupangte hian I-League -ah leh ISL-ah hmun an chang der tawh a. Tin, mumal leh changtlung zawkin an la kal zel dawn emaw kan tih laiin, a tawp ta tlat mai a. Hetiang naupangte tana hmasawmna tur ang chi ah hi chuan Sawrkar pawhin theihtawp kan chhuah ve zel hi a pawimawh ka ti hle a ni.

Tin, Pu Dy. Speaker, kan Minister-in a lo sawi tawh angin, sports discipline hrang hranga kan coach neih tha tak takte (he House zahawm takah pawh hian zawhna te ka lo siam tawh a) thingtlang kilkhawr thlenga sawm theih tura ruahmanna siam a nih tur thu a sawi te kha, a lawm berte zinga mi ka ni a, hei hi ka veina a rei tawh hle a. Sawrkarin sports discipline hrang hranga coach a neihte hi an indaih lovin ka lo hria a. Mizo zingah coach tha tak tak kan nei nual tawh a, hengte pawh hi hman tangkai dan kawng ngaihtuaha, anmahni tih theih tawka ang te leh an hmalak theih dan tur kawngte

ngaihtuahpuia, infiamna hmunhma kan neih that tluk zet hian coach lampang a thuam chak chungchangah pawh hian tan la lehzual turin Minister pawh ka ngen duh a.

Pu Dy. Speaker, infiam-mite hi a tam zawk chu thingtlang-mi, harsa te te kan nih thin avangin, sum tam tak senga khawpui pan a hautak hle thin a. Sports Department hian thingtlang kilkhawr zawkah te hian infiamna ‘discipline hrang hrangah coaching mumal tak te pe thei se’ tih hi ka duhthusam a ni thin a, naupang talent an zawnchhuah kawngah pawh hma kan sawn ngei a rinawm a.

Tin, Association leh sawrklar thawh dun that hi a pawimawh hlein ka hria a. A changtu Minister-in a sawi tawh a, Association-te pawh thuam chak a nih tur thu a sawi te kha a lawmawm ka ti a.

Pu Dy. Speaker, Mizoram-ah hian kan phuloin (ti mai ila) sports infrastructure kan nei tha thawkhat viau a. Amaherawhchu, hemi zingah hian combat sports erawh hi chu ngaihtuah deuh bik an ngai zualin ka hria. A bik takin badminton hi han sawi ka duh a. Veng leh khaw tin deuh thawah hian badminton khelhna tur hall hi kan nei fer fur hlawm a. Heti chung hian national lamah hian player han langsar tak hi kan neih lohna a rei ta khawp mai. Amaherawhchu, tunah hian Mizoram Badminton Association-in Academy mumal zawk te an han buaipui chho a, tunah hian India Under-19 player tha ber pawl ni thei, Thazuala te pawh an rawn lang chho nghal te hi a lawmawm ka ti a. Hei hian infrastructure tha kan neih rualin, naupangte tan academy mumal tak a pawimawh zia a tilang chiang hle a ni.

Boxing bikah pawh ‘Setea Boxing Academy’ a awm hnuah professional boxer kan neih phah nual a, hengte hian naupang te zawkte tan mumal taka zirna tur academy a pawimawhzia hi a ti langchiang hle a ni.

Kan ramah hian Sports-in hma a sawn zual theih nan kan sport hmunhmate, kan infiam-mite, a bikin naupang leh zualte tan hun kan pek tam leh zual a pawimawh hle mai a. Kan infiamna hmunhmate hi ‘thil dang tih nan kan hmang nasa lutuk mah mah em aw’ tih chang te pawh hi ka nei ve thin a; kan infiam-mite an khawngaihthlakin an hawihai thin hle a. Hemi kawngah hian kan infiam-mite tan department hian hma a lak a ngai ka ti hle a ni.

Tin, Pu Dy. Speaker, mahni han insawi leh ila. Ka khup hliam avangin ka tum hmam football ka chawlhsan a ngai a. Infiam-mi tan chuan inhliam hi a pawl em em mai a. Hemi kawngah hian kan infiam-mite tan an inhliam changa enkawlna tur Rehabilitation Centre hi sawrkar hian kan ngaihtuah a ngai hlein ka hria. Tun dinhmunah changtlung taka kan kalpui thei lo a nih pawhin, ‘a theih ang anga hmalak ni se’ tih ka ngen ve duh a. Mizoram State Sports Council hnuaiiah Centre for Sports Science kan neih mek hi tun



aia mumal zawka hman t̄angkai a nih theihnan sawrkar hian thuam chaka, infiam-mite tana belhtlak tak a nih theih nana hma lak sak turin Minister ka ngen nghal bawk nise la.

Tin, Pu Dy. Speaker, he House zahawm takah hian, (nangmah kaltlangin) infiam-mi naupang zawkte tan sawilan duh ka nei a. Infiamna avangin newspaper leh social media-ah te kan hming a lo lang a; Mizoram aiawh tein kan kal chhuak a. Amaherawhchu, kan kal lohna lam tur incheina leh hairstyle lama buai nghal pawlthe pawh hi kan lo awm t̄hin a. Hemi kawngah hian hnam dangte kan tluk lo em em a, hei hi kan nih tur min thlentir lohtu pakhat a niin ka hria.

A bikin infiam-mi naupang zawkte zirtirna a hrana pek dan te hi awm thei sela; moral reformation chungchang hi a pawimawhin ka hria a. A bikin kum lama naupang zawk Mizoram aiawha kal turte hi sawrkar hian anmahni bik tana inzirna tur, a bikin - moral reformation chungchanga zirtirna hran bik awm thei sela tih hi rilruah a lo awm t̄hin a. Hemi kawngah hian a-ngaihna hria - minister kan nei a, aniin ruahmanna fel tak a siam turah ka han ngai a. Naupang talent nei t̄ha tak tak, theihna sang tak tak neite' n an nun an hloh leh si chuan, an nih tur an thleng phak lo t̄hin a. Hetiang mi hi Mizo footballer (a bikah sportsperson) zingah ka hriatah pawh an awm ve nual mai a. Heng kawngah pawh hian t̄ha zawk leh chak zawka hma la turin a changtu Minister pawh kha ka ngen ve leh nghal duh bawk a ni.

Pu Dy. Speaker, a tawpna - point khat chiah sawi ka duh a, a remchan laiin. Bial lam han sawilan ve lawk ka duh a.

Hnahthial District hi hockey lamah hian potential kan nei t̄ha hle a. Tunah pawh hian hockey khelhna hmun tur mumal pawh kan nei lova. Heti chung hian tunah Indian Senior Women National Championship, Pune-a khelh mai turah hian Hnahthial District at̄angin player pathum kan thawh chhuak a. NI. Didiki te phei chu India Team-a an player pawimawh tak an ni chho ve zel a ni.

A changtu Minister hnena ka ngen duh chu - Hnahthial District-ah hian hockey khelhna tur leh a zirna mumal deuh min tihsak thei a nih chuan NI. Lalremsiami aiawh tur hi kan rawn thawh chhuah theih vat kan inring tlat a ni.

A tawp berah chuan - kan Chief Minister Pu Lalduhoma leh Minister Pu Lalnginglova Hmar te demand hi ka pawmpui a, he House-ah hian pass ngei turin ka rawn thlawp a ni e. Ka lawm e.

**HON. DEPUTY SPEAKER:** Tunge sawi leh ang? Aw le, Pi Prova ka sawm e.

**PI PROVA CHAKMA :** Pu Dy. Speaker, ka lawm e. Hmeichhia ve ve kan han phar rual a, min han hmu fuh kher chu a lawmawm e. Nge, wawiinah

hian ka inthumna hi a danglam deuh avangin min hmu zawk emaw ni chu kan ti deuh a. A lawmawm e.

Minister zahawm tak tak demand Pu Lalnginglova Hmar leh Pu Lalduhoma, CM zahawm takin an rawn put luh hi kei pawh a tha ka ti a. Amaherawhchu, tlemin sawisel duhna lai ka nei a, Sports-ah hian ka han kal phawt ang e.

Delhi a kan training-na atang khan kan Sports Minister hnenah, (Pu Dy. Speaker, nangmah kaltlangin) keini chu khelhmual kan nei lova, 'khelhmual hi min tih sak rawh aw', ka ti thin a. Unstarred Question ka zawhna ah khan – “Tlabung khelhmual tihchangtlun tumna a awm em? Awm ta se, engtia hmalak tum nge a nih?” tih chhanna kha, 'awm lo' tih a ni a. Keini lam hi min ngaihtuah lo em maw ni chu aw? Pakhatmah hi kan nei si lova. khelhmual pakhat ka rawn dil ve takah chuan min pe turah ka ngai a. Delhi-ah te khan kan zin hova, min pe ang chu ka lo ti rilru a. Mahse hei, a awm tlat lo hi tlemin ka rilru chu a na ve deuh hlek a ni.

Amaherawhchu, hei sum kan harsatzia hre chungin hei hi chu ka rawn ti ve a, kan bial 35-West Tuipui-ah hian pakhatmah khelhmual kan nei loh avangin. Kan neih pakhat chu sawrkar hmasa ina min pek futsal ground hi a ni mai a, chu pawh chu la complete loh, tunah la siam mek a nih thu ka dawng a. Tichuan khelhmual ka dilna chhan pawh hi 15th August, Ni pawimawh tak kan hamchhawn a, mahse a lawman tur mual hi kan nei lova. Chuvangin, 'kan mamawh tak zet a ni' tih hi ka rawn sawi duh a. 'Khelhmual' chu khelhmual a ni a, amaherawh chu, khami khelhmual piah lamah khan, important events hmanna tur pawh kan nei lo hi ka rawn sawi lang duh a.

Khelhmual hi kan mamawh takzet a, kan bial mipui, a bikin thalai infiam-miten ka bulah te an rawn sawi an rawn sawi ve thin a. “Madam, khelhmual chu min tihpui rawh, min sawipui rawh” an ti thin a. Amaherawhchu, kan Finance Minister, kan CM zahawm tak thu thu hi a ni a. Sports Minister pawh hi Finance Minister atanga a kal loh chuan a thu bik lova, chuvang chuan ka hrethiam a.

Tichuan, Finance Minister chiah pawh ni lovin, Planning & Programme Implementation Demand No. 14-ah pawh khan tlem sawi duh ka neih chu - estimate eng pawh lo thleng ta se P&I hi kaltlang zel a ngai thin a. Chuvangin, he department kaltlang hian min chhinchhiah sak se, nakin zela tan; tun tum chu kan thei lo tih ka hria a. Reminder-ah, keimahni bialchung tan ngenna kan siam duh a.

Tin, thil pakhat rawtna PHE & PWD-ah hian siam ka duh a. A department chu ni lo mahse, Finance-ah hian a kal vek thin avang hian, Finance thu thu a ni a. Hei, 'PWD leh PHE' ka tihna chhan chu - kawngte an han siam ve a, a tha emaw, a tha lo emaw tiang khan an han siam a. PWD in an siam zawh hnuah PHE hian kawng hi an lai chhe leh thin a. Kha kha nakin zelah pawh PHE leh PWD hi inrawn tlang ila, hnate pawh a tha ang zawk ang a, sum pawh kan seng tlem zawk dawn a ni. Hei, Finance-ah hian

kumin hi ‘Year of Consolidation’ tih a nih avangin, kan economy a that zawk nan leh sum sen a tlem zawk dawn avangin hei hi ka rawn tarlang a. Hei hi min lo chhinchhiah sak dawn nge, in thu thu a ni a; ka sawi tur ka han sawi ve a ni e.

Tichuan, tunah hian MLA Hostel-ah kan awm ve a. Tuna Legislators' Home kan awmna hi renovate a ngai hle mai a, mahni sum senga ti tur pawhin kan in adjust thei tho ka ring a. Amaherawhchu, kan bial mipuite’n “E khai! kan MLA te hi hetiang hian an lo dah a ni maw” tih te kha a awm lohna turin MLA - Legislators' Home hi a hma thei ang bera min renovate sak theih chuan a lawmawm ngawt ang.

Tunah hian rem leh rem lovin, keini kan bial phe chu helamah chhung leh khat kan nei vak lova. Abik takin Chakma bikah hian chhung leh khat kan nei vak lova, kan harsa a; MLA te hi min pan deuh ber a. Tichuan, dormitory hi kan hmang mai thin a. Hei hi sawilan ka duha chu, dormitory-ah hian khum te pawh a awm lova, khum a awm loh avangin chhuatah te kan indah a, a mawi lo deuh chu ka ti a. Chuvangin renovation hi min hmanhmawh sak thei chuan a tha khawp ang.

Tichuan, thil pakhat leh - kan bial 35 - West Tuipui hi bial hnufual ber kan niin ka hria a. Amaherawhchu, Planning lamah hian department hrang hrang hi ka han en a, kan bial lam hi a lang tlat lo mai a. Tlabung hi a lang lova, pakhat lang awmchhun chu, health lampang ah a ni a, Pi Rinpui hnenah pawh hian lawmthu ka sawi duh a. A bak department dangah chuan kan lang tlat lo mai a. Governor Speech-ah te pawh khan ‘rualkhai taka enkawl tur’ tih te a ni bawk a, kha kha ka rilruah a awm reng a. Sawrkar hia khatiang khan min enkawl thei se ka duh a ni.

Chu zawng chu ka sawi theih ni se. Tuna demand rawh put luhte hi a zavaiin ka sawi vek lo naa, Pu Nghinglova Hmar leh Pu Lalduhoma te demand rawn put luhte hi a tha ka ti a, pawmpui ngei turin he House-ah hian ka rawn thlawp e. Ka lawm e.

**DEPUTY SPEAKER** : Vawiin chu ‘*Zo-thuam*’ kan ti a; i nalh bawk si a, hun ka pek belh vak ang che ka ti a sin maw le. A tawp ni a ni ta bawk si a, han dah khawl turin. Tunah Pi Baryl Vanneihsang, Aizawl South III bialtu ilo sawm ang u.

**PI BARYL VANNEIHSANGI:** Pu Dy. Speaker, ka lawm e.

Pathian hruaina leh venhimmnain budget session-a kan sitting hnuhnung ber kan lo thleng ta a. Pathian hnenah a tharin lawmthu kan sawi ang a. Tin, he hmuna kan awm ve theihna chhan, Aizawl South-III Bial-mipuite chungah, nangmah kaltlangin a tharin lawmthu ka sawi leh a ni.

Pu Dy. Speaker, han chhiar lawk duh ka nei a, i phalna in - Kan CM zahawm tak leh Finance Minister ni bawkin a Budget Speech-ah tunlai khawvelah hian mipa leh hmeichhe intluktlanna sawrkarin a ngai pawimawh hle a, “tun tum budget-ah hian, a

vawikhatnaa tan *Gender-Budget Statement* pawh kan pharh tel dawn a ni' tiin, Gender Budget Statement a rawn pharh ta a ni a. Tin, rorelna in sanga hmeichhia pathum a ruala kan awm tum a lo ni bawk nen, a fuh hlein ka hria a; heng avang hian lawmthu kan sawi hmasa a.

Chutih rualin, chhan hrang hrang avangin India ramah *35-Years Plan* a hlawhchham a. Kum 1966-1969 inkarah khan *plan-holiday* te pawh lo puan a ni tawh a. Khatiang te India ram pum pawhina kan hmachhawn theih chuan, kan state-ah hian *Year of Consolidation* hi puang lo ta ila, 'kan hmachhawn ve palh ang' tih a hlauhawm a. Chuvang chuan, kan sum dinhmun bihchianna, inenchianna leh inrenchemna hunah bul kan han tan a, sawrkar kum-thar kan han tan thei hi a finthlakin ka hria a, kan Chief Minister chungah lawmthu ka sawi duh a ni.

Tichuan, Demand No. 9 leh 14 hi sawi pawlh loh theih a ni lova, hei hi ka han sawi mai ang a. Finance Minister Pu Lalduhoma demand a ni a; kan state inrelbawlina laimu tak chu, kan hriat angin Finance Department leh Planning & Programme Implementation te khawih hi a ni lo thei lova. An hna a chak theih nan officer leh staff dawhkan tam tak paltlang ngai thin hi 'tih tlem ni se', tiin duhthu kan lo sam ve thin a. A chhan chu, kan hriat ve chinah pawh Pu Dy. Speaker, Arunachal sawrkar te pawhin hmun khatah Finance leh Planning Deptt. te an lo chhun fin a. Tichuan, awlsam zawk leh zangkhai zawkin (a saptawngin) a short cut zawk te pawhin thil an lo kalpui tawh thin a. Chutiang te pawh chu kan ramah hian 'tih ve theih a ni em', tih te zawhna zawh pah leh, suggestion siam pahin ka han tarlang a ni.

Tin, kan hriat theuh angin, central sawrkara planning commission tihtawp a nih hnuah NITI-Aayog an din a, kan han nei a, kan hmang chho a ni a. NITI-Aayog ang deuhin kan state planning board te pawh hi revamp-a, "State Planning & Finance Board" tia han thlaka, a layer thui lutuk kaltlang lova, state planning process anga sum leh pai inenkawlina hmunkhata kalpui a nih chuan tha leh zung bakah inrawn-tawinna tam tak hi a tlem phah thein ka ring a. Chungte pawh chu ka han tarlang ve ni sela.

Pu Dy. Speaker, hmasawna hnathawktu department ten 'concurrence' kan tih te, 'approval' kan tih te, 'permission' kan tih te leh a hrang hrang la tura an tlan kualna kawng thui lutuk hi 'tih tawi dan awm se,' tih kha, uar deuh hlekin ka han sawi ni sela. Chutiang a nih chuan, kum khat chhungin tun aia tam lehzual hi hnate pawh kan thawh theih a rinawm a ni. Chubakah, hmasawna hnathawktu a line department-te intersector leh inter-departmental issue an neih hian, department pahnihah an tlan kual chiam te a lo ngai thin a, heng te pawh hi "department pakhat a tihfel mai theih a ni em?" tih te; a zangkhai zawng leh a awlsam zawng, *digital age* a awm tawh kan nih avangin, chutiang zawnga hmalakna te awm se ka han ti a; a changtu Minister pawhin min lo hriatpui sela a tha awm e. Chutianga kan ti a nih chuan, kan ram hmasawna hian *bung-thar* a kai

ngei ka beisei a. 'Timely completion of projects' kan tih thin, kan sawi chamchi, kan hlado chham thinte pawh hian awmzia a neih phah ka ring a, ka beisei a ni.

Tichuan, a point dang lehah chuan - A endiktu turte hi a hnathawktu atanga an tang tlat thin hi a felhlel deuhin ka hria a. Kan hmasawwna hnathawh dan tur ruahmanna - planning titu an awm a; tin, a enzuitu/a bawhzuitu - monitoring leh evaluation an awm leh a. An mawhphurhnaah hian lo in concentrate sela, department hi an mandate-ah hian lo awmin, lo thawk mai sela, chu chu kan ram hian a chhawr zawkin ka ring a. Chutiang ni lova, kan thawh kawpa kan inpawh kawp hian, hmasawwna hi tlem hian a tithuanawpin, a timuang thinin a lang a. Duhthusamah pheh chuan, state sorkar flagship programme te pawh hi dedicated board a ni emaw, *agency* ang te pawh hi awm ta sela, chungte chuan lo enzui sela. Tun aia chak lehzuah dedicated board kan nei a nih chuan, hma kan laka flagship programme tihhlawhtlin kawngah pawh sawrkarin ke a pen ngei theih ka han ring a ni.

Tichuan, Minister Pu Lalnghinglova Hmar Demand No. 22 - Sports & Youth Services hi ka han sawi ve lawk ang a.

Hei, Smart City Project atanga siam khelhmual kha kan sawi nasa a. Hun hmasa lamah khan Minister ngei pawh hian zawhna a chhang a. Tichuan, hmun hrang hrang, bial hrang hranga hmalakna an sawiah khan, kan bial chhunga hmun pakhat saw tarlan a la ni ve lova. Minister-in rem a tih chuan, hei hi a wind-up-ah khawngaihlin rawn tarlang thei se. Hlimen-ah sawn field siam mek a ni a, sawtah sawn (ka hriat suah loh chuan) vaibelchhe 6.59 sanction a ni a. Tichuan, field saw han tlan thuaka en mai hian field puitling - standard size sawi taka kha 'a tlin chiah em' tih zawhna a awm a, chung chu 'min enpuin, a lo hre tawh em' tih te leh, 'a tlin loh chuan, revise theih a ni em; hmalakna a awm tawh em,' tih kha ka zawhna a ni a. Vawiinah hian min chhana, min hriattir ngei pawh ka phut tlat a ni.

Tin, Pu Dy. Speaker, (i thut lai a ni bawh a) i sawi ve thei bawh si lova, keimah hian in bial lam ka han sawi tel ang a. Kolasib bial lamah khuan 'Pu PC Zoramsangliana Football Playground' te leh 'Nula Remsiami Hockey Playground' tur te pawh i lo donate tawh a ni tih te kan hria a. Tichuan, hmunhma tha tak an nei a, amaherawhchu, khang kha engchen nge kalpui a nih kan Minister hian khawngaih takin (rem a tih chuan) min chhang sela. 'Tihhlawhtlin a ni dawn tawh em?' tih lai kha, i thut laiin ka lo sawi sak, kan lo zawh sak che a ni.

Tichuan, Demand No.7 - Excise & Narcotic chungchang hi ka han sawi ve leh lawk ang a. Hei, sawrkarin nasa zawka ruihhlo do tura huaisen taka ke a pen chhunzawm hi a lawmawm ka ti a, a changtu Minister pawh a fakawm ka ti a, a department-a thawkte zawng zawng pawh an fakawm hle a. Chutih rual chuan, Excise & Narcotic hi department naupang tak ni mahsela, state chhunga zu leh ruihhlo khuahkhirhna dan ND

& PS Act te, MLP Act te kengkawhtu an ni a, nodal department an ni a. Chutah chuan, hnathawktu indaihlohna te nichin lamah an sawi tawh a, a figure hi ka han tarlang ve reng reng ang a -

Enforcement staff 599 awmin, post luah chu 431; vacant post 128 a ni a. State chhunga district hrang hrang - Khawzawl, Saitual leh Hnathial tih lovah chuan district office te, station te an nei a. Heng office an neih zingah hian Aizawl, Mamit leh Lawngtlai ah man chawiin mi in an luah hawh mek a ni a. Chutiang te chu an dinhmun a nih avangin, kan Minister-in a hriatpui chu ka ring a, hma lak theih ni sela. Staff indaihlohna te pawh hi 'theih tawpui bawhzui ni se' tiin ka han sawi ve ni sela.

Tin, lirthei pheih chu an leina te hi a lo rei tawh tlangpui a. Ralthuam leh hmanrua hi sawi mawilo a ni em, ka hre chiah lova. Anni hi ruihhlo rawn tawlh luttute umzuia, kut tuar palh thei leh nunna chan palh thei dinhmuna ding an nih avangin, hemi kawngah te pawh hian thuam chak deuh hlek pawh a tha awm e.

Tichuan, Pu Dy. Speaker, helai te hi ka han sawi leh lawk ang a. ND & PS Act hi (kan sawi ang khan) Mizoram-in 1992 ah nodal department atan a notify tawh a. Chutah chuan ruihhlo kan man te tihral dan tur - a seizure te, a storage te, 'sampling and disposal' kan tih Rules, 2022 te pawh a awm a. Helaia ka sawi duh chu, khawtlangah mi-tlawmngai tak tak thahnemngai, kan ram pasaltha - NGO pawl hrang hrang te'n hma an la a, ruihhlo an do thin a ni. Hemi kawngah hian *Dan* chhungah zel hma kan lak loh chuan, nakin zelah pawh tute emaw suaksual deuh te, dan hre ve tho si teina tlawmngai pawlte an lo khin palh te, eng emaw *Dan* hmanga an chungah hmalak ngai ang chi te a awm palh ka hlauh avangin, heng kawngah hian tlawmngai pawl hrang hrangte pawh hian he NDPS - *Seizure, Storage, Sampling & Disposal Rules* hmang hian hma lo la zel sela tih kha nangmah kaltlangin ka han sawi a ni.

Tichuan, kan ramah ruihhlo kan do nasa a; chutih rualin, a rawn lut reng tho a. Hei vang hian hmanni lawkah jail tawt chungchang pawh kan sawi a. ND&PS hian dan dik tak leh chak zawka case an dispose zung zung chuan, 'kan jail te pawh khu a lo thawlin, a lo ziaawm thei dawn a ni' tih te pawh kha ka han tarlang leh ni se.

Ka hun a zo tepin ka hria a; LESDE hi a tawp nan ka han sawi leh lawk ang a. Demand No. 28 - Skills Development hi 'uar zawka kalpui ni se,' tih kha suggestion a ni a. Tichuan, state dangah te chuan sawrkar hian skill-development fund a lo dah thin niawm tak a ni a, kan han zir velnaah hian. Tunah hian kan thei lova, a la remchang lo a nih pawhin, a changtu Minister-in a hre tho a, nakin kan sawrkar sum dinhmun that zawk hunah te chuan kalpui ve theih ni sela a lawmawm dawn hle a ni.

Tichuan, India sawrkarin technical-intern training programme a ti a, hei hi 'TITP' an ti mai a. Hemi atan hian MoU an sign pui ramtea kan thalaite awlsam zawka kan kal zung

zung theih nan heng language zirna (tawng zirna) – ‘IELTS’ kan tih te, Japanese, German tawng hrang hrang, ramina a lo required ang zela zirna hi kalpui theih ni sela a lawmawm dawn hlein ka hria a. State - Skill Development Authority te pawh hi neih ve theih a chakawm ta a, skill programme mumal zawk leh, kan khawtlang leh nunphung mila training leh thiamna kan inpeka kan inzirtir chhuah pawh hi a hun tawh hle a ni.

Aw le, ka hun a zo a, ka bawhpelh lo ang a. He kan Chief Minister, (Finance Minister ni baw) leh Sports & Youth Services Deptt., Excise & Narcotic Deptt., LESDE changtu Minister demand-te hi kan ram tan hmasawna thlentu tak tak a nih theih nan pass ngei turin ka thlawp e. Ka lawm e.

**HON. DEPUTY SPEAKER:** Tunge sawi leh ang le? Aw le; tunah House zahawm tak Member Pu V. Malsawmtluanga, Lunglei North Bialtu ilo sawm ang.

**PU V. MALSAWMTLUANGA:** Pu Dy. Speaker, kan hun ka pel deuh vek mai a, tun tum chu hun hmang rei lo ber nih ka han tum ang e. sawi tur tam tak awm mahse. Awle; ka lut deuh mawp mawp ang a. Kan Minister duhawm tak takte, a bik takin kan CM, kan House Leader, kan Finance Minister ni baw demand-ah hian ka han lut ang a.

Demand No. 22-ah hian, ‘Youth Services Minister’ ka han ti kher ang a; ‘Sports’ laia hi ‘kan tilar lutuk’ kan ti kha a ni a. Kei pawh helai hi ka vei em em kha a ni a, ‘Youth Services Minister Demand’ ka han ti deuh kher a ni.

Zawhna wind-up huna min chhan atana ka han zawh duh chu – “Zobawk Sports Complex-a hman tur artificial-turf pawhpen tak kha, a ai dah tumna a awm em?” tih kha nakinah min han chhang se, kan Sports Minister duhawm takin.

Tin, he Demand No. 22 tho ah hian - Kan vengka ka chenna in kawmthlang maiah sawn SYS Football Academy a awm a, 2015, April Ni 10-a din kha a ni a. Amaherawhchu, vawiin ni thleng hian Govt. approval mumal tak la nei lo niin a lang a, saw sawn harsatna kawng hrang hrangin a tawk mek a. Tin, facilities-ah te pawh a ni a, khum mumal te pawh tunah sawn kan la nei lo niin a lang a. Kei ngei pawhin kan kawmthlang mai a nih piah lamah, Sport lama ka lo tuina avang te, sulhnu chhete ka lo neih ve tawhnaah te ka lo zu tlawh thin a; a hriatpuitu - mit ngeia hmuhpuitu ka ni a. Saw football academy saw kan chhawr em em mai a, ka hriat theih chinah mi 38 velin I-league te, MPL te, ISL kan tihah te pawh professional football ah a lo chher chhuak tawh a. Tin, chu chang a ni lova; Professional football-te an rawn chawlh changa an practice-na hmun ber a ni a. Sawng saw kan Minister duhawm tak hian min rawn ngaih pawimawh sak se duh a ni.

Tin, hei, Sports ah hian kan hriat angin, major games-a hi mizote hian ‘a bik takin kan thlur bing deuh em aw’ tih tur a ni a, kan sawrkar thar hian major games lo deuh,

“individual games-te pawh hi major games kan ngaih pawimawh tluk zet hian ngai pawimawh thei ila” tih te pawh ka han sawi duh bawk a ni.

Tin, ka bial chhung tho, Chhipphir lam ka han hawi lawk ang a, sawi tur tam tak chu a awm ang a. Badminton Hall tunah hian sak mek a awm a, a court line leh a bang a insi lo chauh a ni a, inkhelhna atan phei chuan ‘tih chi a ni ang em aw’ ka ti nghe nghe a ni. Hetiang infrastructure tuna hmalakna kal mek te hi kan Sports Minister duhawm tak hian (a bik takin Chhim lampang) minrawn enfiah sak thei se ka duh hle a ni.

Tin, hei ‘*Catch them Young*’ te kan ti a, a tha hle mai a. Chuta ka rilrua lo awm thina chu – ‘*Catch them Star*’, tih hi a ni. Kan hria ang a, veng aiawh te, khawtlang aiawh te, district aiawh, Mizoram aiawh te, State aiawh tein an kal a, mahse, heng players tam zawkate hi professional player atan an chhuak bik loa ni. Ram an ti hmingtha a, khawtlang an tih mingtha a; amaherawhchu, zirna te kalsanin tiang khan an hun leh tha pumhlum an pe tluk a ni. ‘Hengho hian ngaihsak an taw lo em aw’ tih te rilruah a lo awm a. He kan sawrkar hi chuan kawng hrang hrangin, an phak taw hna lak kawngah te pawh tun aia nasa zawk hian ngaihsak leh zual ta ila.

Tin, nichin khan Member zahawm tak Pu Jejea khan a sawi tawh a, Sports lama vanduaina tawkte pawh han enkawl na kawng mai ni lo, compensate-na lam tur te pawh ti ila, hemi chhawmdawl na kawngah te pawh hian (tun vut vutah kan ti thei lo anih) sum zia awm deuh hunah te chuan hma lak ni se ka duh bawk a.

Tin, he House zahawm tak kal tlang hian, Pu Dy. Speaker, ka thalai-puite ka chah duh chu – Tournament hrang hrangah te kan han chhuak thin a, chutah chuan team te, club te, association ang tein sum kan tuak thin a ni. He kan sum tuak dan kawngah hi kan moral kal fuh tawh loh vang niin ka ngai a, a fuh zan lovin ka hria a ni. Donation hi kan han khawn leh thin a, donation khawn hi sum-tuaknaah kei chuan ka ngai chiah lo a ni, Pu Dy. Speaker. Ka thalai-puite he House kal tlanga ka han chah duh chu - kan senior zawkte thlir ila, jersey tuak tein, a tul a nih chuan brick te an thiar mai a, chutiang zelin cubic lung te, ban khur te pawh an lo lai tawh thin a ni. Khang te kha *Zonun-zemawi* kan pi leh pute, kan senior players te’n an lo tih thinate kha ‘chhawm nung thar leh ta ila’ tih te kha ka han sawi lang leh duh a. Hetiang anga donation kan khawn hian kut-ling lova sum la lut te kan ti huangtau palh thei a ni.

Tin, chu chang a ni lova; keini MLA-te ngei, corruption duh miah lote pawh hi, kan duh loh thleng thleng thalaite’n min hnuk thei a ni. Chuvang chuan, ka thalai-puite sum tuakna kawngah pawh, ‘donation hi sum tuak puitling a ni lo a ni’ tih pawh kha min lo hriatsak turin, he House kal tlang hian ka han sawi duh bawk a ni.

Tichuan, kan Sports & Youth Service Minister ka han ngen duh ve pakhat chu (thil pakhat chiah ka’n ngen ang a) - Tun rum rum sum kan harsat lai hichuan a theih ka ring



lem lo a ni. Amaherawhchu, a theih hun masa lamah ka bial chhung Zohnuai-ah sawn football khelhmual hi a awm miah lova, te-takte pawh a awm miah lo a ni; hei hi min rawn ngaihtuhsak thei se ka ti hle mai a. Tuna kan footballer Lallianzuala Chhangte te khua a ni a, talent nei tha tak tak te pawh an awm a ni.

Tin, chu chang a ni lova, Pu Dy. Speaker, ka han hrilhru che ang a; *Indian-Sniper* lo ni tawh, hei, vawiinnia footballer ropui, he House Member zahawm tak lo ni ta Pu Jejea pawh hi, a tlangval laia a nula rim thinna a ni; a lo tualchai thinna a ni. Aw le; kha lam kha chu thui tak ka sawi lo ang. Engpawh ni se, kha kha kan Minister duhawm tak hian min lo hriat sak ta se. Tin, a theih pheih chuan kei pawhin fund ka neih dan ang ang te pawhin 'hma ka lo lakpui ang' tih te ka han sawi duh a ni.

Tichuan, Demand No. 7-ah hian, ka bial a sawih loh theih lova, chu chuan Zoram-pum a hril tho a. Dragon fruits an thar hnem em em a, sawrkar hmasa lam te'n scheme an kalpui a, chungah chuan a tihlawhtling-pawl an ni. Amaherawhchu, a hralh chhuahna lam kawngah harsatna tam tak an tawh a. A processing lamah hian, wine ang zawng te hian process remtihna awm ta se, tuna grape-wine chauh mai kut-hnathawktute'na kan kalpuia hi, huang zauh ta ila. Tin, Mausem khua ngei pawh ka bial chhungah balhla te, lakhuihthei te an thar nasa a ni. Grape-wine ringawt lo deuh hian, fruits- wine te pawh hi 'kan sawrkar hian han remti ta se' tih te rilruah a awm a, chu chu kut-hnathawktute tan vek kha a ni, Pu Dy. Speaker.

Tin, Demand No. 28 hi, ka han sawi nawn leh duh chu - LESDE hnuaiah hian District Employment office kan nei a, kum 30 laia upa a ni tawh a ni. A building Assam-type a ni a, sawng te pawh saw hun remchangah chuan kan Minister duhawm tak hian min rawn enpuin, sak that dan te pawh min la rawn ngaihtuah sak se kan duh hle a ni.

Tichuan, a tawp lam ka han lut mai ang a; Demand No. 14-ah hian he House zahawm takah hian lawmthu ka han sawi nawn leh duh chu - Lunglei tan pawh High Power Committee tan, inrenchem kan kalpuina karah vaibelchhe hnih laiin fund a pung a, kan Chief Minister - kan House Leader chungah mipui aiawhin lawmthu ka han sawi a.

Tin, a tawpna atan, Demand No. 1 hi nichin khan an sawi tawh a, Assembly staff-te, a lu berin a zir bawh a, in chhuanawm hlein ka hria a. In punctual a, time in vawng dik a. Tin, chu chang a ni lova, keini ang te pawhin mawl tak taka kan thil zawhte min chhan sak a, kan mamawh ang angte min pe a; in service hi a ropui hlein ka hria; in entawntlak a ni. Chu chu a changtu Minister leh inchungah ka han sawi bawh a ni.

Aw le; heng Demand, kan Minister Pu Lalnghinglova Hmar Demand - No. 7, 22, 28 leh leh Pu Lalduhoma Demand - No. 1, 2, 3, 4, 5, 9, 11, 14, 15 te hi he House zahawm tak hian 'pawmpui ila' tiin ka thlawpna ka rawn tilang a ni e. Ka lawm e, Pu Dy. Speaker.

**HON. DEPUTY SPEAKER:** Tunge sawi leh ang? Aw, Pu K. Laldawngliana, House zahawmtak member, Tuirial Bialtu ilo sawm ang.

**PU K. LALDAWNGLIANA:** Pu Dy. Speaker, ka lawm e. Tun tum Budget Session ni-hnuhnung ber kan lo thleng leh ta reng mai a. Kan Speaker leh kan Dy. Speaker te min kaihhruaina hnuaiiah kan House Leader leh Opposition Leader te, Member-te kan thawhhona a lawmawm hle mai a. Vawiin hun tawp min hruai thlengtu Pathian hnenah lawmthu ka sawi duh a ni.

Kan Finance Minister (Chief Minister ni baw) leh kan Minister zahawm tak department 12 te demand sawihona hun tha kan nei hi a lawmawm hle mai a. A hmasain Minister zahawmtak Pu Lalnghinglova Hmar chan, Demand No. 7 - Excise Deptt. hi ka sawi duh a.

Kan hriat angin, Excise Department hi a pawimawh khawp mai a, ram-mipui zawng zawng ten kan buaipui ruihhlo dotu department ang tluk a ni a. Chuvang chuan, staff-te an indaih lova, ram pumin kan buaipui a ni ber mai a. Tun tum budget-ah hian hnathawktute lakbelhna tur cheng nuai 375.49 dahbelh a ni hi lawmawm ka ti a. ‘Ruihhlo do hi kan ngaipawimawh a ni; kan sorkarin’ tih chiang takin a lang a, hei hi lawmawm ka ti hle a ni Ruihhlo do kawngah hian staff-te mai kutah dah lovin, NGO hrang hrang - Central YMA leh Kohhran hrang hrang ten kan buaipui a, Central KTP inkhawmpuinaah pawh ‘Ruihhlo-do’ an han puang te kha lawmawm ka ti leh zual a ni. Hei hi chhungkua, mimal ang tein kan buaipui mup mup a ngaiin ka hria a, tawngtaina pawh a tam thei ang ber kan neih a tul hlein ka hria a ni.

Chutihruai chuan, checkgate hi kan ngah lo khawp a, hei hi neih belh a tulin ka hria a. Chu mai piah lama ka sawi leh duh chu – A-hremna hi ‘tun ai hian tihnat deuh a tha em aw’ tih hi ka sawi lang tel duh baw a ni.

Demand 22 - Sports & Youth Services Deptt. ah hi han, kan hriat angin thalai infiam-mite eizawna siamsaka promote-tu department a ni a, Mizoram State Sports Council te nen nasa takin hna an thawk a. Hemi piah lamah Sports hnuaiia enkawlte chu - Youth Adventure te, Scout & Guide te, NCC te, NSS te a ni a. Sports person tihhlawhtlinna tur atana a hlawhtlingte ‘incentive cash award’ pek thin te hi ropui ka ti a. Hei hi a aia uar leh zual tul hlein ka hria a ni.

Tichuan, ka sawi leh duh chu, hnamdang aia kan hnufualna chu Grassroot Academy - training-na hmun hi uar leh zuala kalpui a ngaiin ka hria a. World-class sport infrastructure kan nei thawkhat deuh tawh a, mahse a la nei lo kan awm teuh mai a. Ka bial chhungah pawh a lawmawm khawp mai a, Kawnpui-ah grass-turf kan phah mek a, kan zo tep tawh a, hmannah kan Minister pawh a zuk kalin ka hria a, a lawmawm ka ti

a. Tin, Thingdawl-ah hmanni lawk khan kan zuk kal a, kan Minsiter hovin. Futsal-ground an la nei miah lova, chu pawh chu kan nei vat theih ka beisei a ni.

Pawimawh em em mai chu - Nikum November Ni 10, 2023 thlenga Mizoram-in medal kan lak hi, tan kan lakna atan ka sawi lang tel duh a - International level-ah 2 chauh kan la la a, national level-ah 47 kan la a, regional-ah 65, a vai hian 114 chauh kan la tawh a ni; kan hnufual viau a ni. Chuvang chuan, sport person-te hmasawna tur, an thatna tur kan ngaihtuah fe a ngai a ni. Olympic games, 2036 neih tura inbuatsaihna kal mek, kum 10-a lokal tur hi kan vision pawimawh tur niin ka hria. Kan Sports Minister tui zawng tak a niin ka hria a, lo chhinchhiah sela; kan sports person-te major games-ah pawh theih tawkin kan tang ang a, contact sport - mimal, weight-a kum awm zatah hian hma kan lak uar deuh hlek a ngaiin ka hria a ni. Tin, Association hruaitu hrang hrangte kan ngaihpaawimawha, anni pawh tihphur a pawimawh hle bawk a ni.

Nichin khan kan Member-puiin District Sport Committee chungchang a rawn sawi a, Aizawl District Sport Committee din tirh atanga Chairman ah kum 10, term hnih Vice Chairman, Finance Secretary kum 10 bakah kum 10 - OB kan nih ve lai kha a ni a. Khati lai kha *Mizoram Sport Policy, 2020* mila siam a ni a. *Khelo India* te, PMJVK leh CHS zawng zawngte DC chetna hnuai a nih avang khan, khami mil khan State Level Association zawng zawngte inrawn khawmin, ‘a tha e’ an tih avanga tih a ni a; kha kha kan Chairman lai te a nih ve avang khan ka sawilang duh hrim hrim bawk a ni. *Sports* hi thalai rualte tana eizawna tling kan siam theihna turin nasa lehzuala hma kan lak a tul hle a ni.

Demand 28 - Labour, Employment, Skill Development & Entrepreneurship, a hming ang chiah hian tunhma chuan a ni lo deuh a ni. Tunah hi chuan Labour Employment te, Skill Development te, Entrepreneurship te thalai rualte tan a eizawna tlak, training-na tha tak tehna hmun a ni a, a aia nasa, kan Minister zahawmtak tui zawng a ni bawk a, rawn chhonzawm sela, thalai rual, mithiam training chhuakte ram pawnah hnathawk tura tun aia tam zawk thawn chhuah hi kan thupui a ni.

Kan Chief Minister zahawmtak (Finance Minister ni bawk) Pu Lalduhoma chan Demand No. 9 - Finance chungchang hi ka sawi hmasa duh a. Hmasawna thang tur chuan, Finance-ah hian budget pawh hi tam lawih tur hi a ni reng bawk a ni. A tam lawih hi a nih tur phung a niin ka hria a, ‘ram hmasawn tur chuan Finance-ah hian sum a tam tur a ni’ tih kha ka sawilang tel duh bawk a ni.

Tichuan, hei a budget sanna pawh a tam viau a. Finance Minister-in budget a pharhnaah khan sawrkar leiba tlingkhawm zawng zawng kha vaibelchhia 14,034.76 a nih kha. 2023-2024 BE ah khan kan department GSDP ratio chu 37.84% a nih thu kha kan hmu a, helaiah hian. Kuminah hian leiba tihtlakhniamna tura department GSDP ratio hi

29.22% a tlahniam tura beisei a ni hi hmasawna ropui tak a nih bakah, ‘inrenchemna a takin a lang a ni’ tih kha ka sawilang tel duh bawka ni.

Tichuan, kan Finance Minsiter zahawmtak kha ka pe tawh tho a, ‘lehkha a rawn keng der der a tih kha’, khalai kha amah pawh a tuk khan ka pe nghal tho a. Ka sawifiahna tur chu, RBI - Study of December, 2023 ami kha a ni a, download theih mai a ni a, page no. 103-ah khan chiang deuhin a lang a. A lehkha hetia tilan ringawt kha a ni lo deuh a, kan Pu (kan Chief Minister zahawmtak) kha ka pe tawh tho a, kha kha Finance chungchang a nih avangin ka sawilang ve duh hrim hrim bawka ni.

Tichuan, *Zawhna & Chhanna* hunah khan sawrkar thar lo pian khan December Ni 18, 2023 atanga February Ni 14, 2024 thlenga sorkarin pawisa kan puk thar leh hi crore 193.12 a ni a; mamawh a nih hi chuan puk a ngai reng a ni.

Tichuan, chhannaah khan COVID laia sum ‘crore 2370.80’ tih chungchang kha, nakinah felfai deuha a rawn tihlan ka beisei a, kha kha ka sawilang tel duh bawka ni. Demand 4 - Law & Judicial hi sawi tur tam tak a awm a. Amaherawh chu, kan budget-ah hian hmasawna tur *Dan leh Hrai* kawngah hian khawng takin kalpui kan tum niin ka hria a; budget ka en vang vang hian. A tamna ringawt pawh hi nikum aiin nuai 2041.49 lai a ni a, hei hi a lawmawm kati hle a ni. tih kha ka sawilang tel leh duh bawka ni.

Demand No. 11 - SAD hi ka sawilang tel leh duh a. Hei pawh hi inrenchemna langsar deuh mai chu, nikum budget aiin kumin budget-ah hian SAD hi inrenchemna hmang chhuak chi a ni a, motor maintain-na leh a tul anga sum senna a nih angin nuai 516.69 a awm a ni.

Tichuan, Pu Dy. Speaker, Demand No. 15 - GAD budget ah hian hmasawna kan hmu a. A tamna hi nuai 1,180.74 a ni a, a lawmawm ka ti a. GAD-a ka sawi lan duh chu - Women Commission *Chairman* ruat chungchangah khan, a kumzat te kha enchian deuh a tul hle mai.

Demand No.1 - Legislative Assembly chungchang hi sawi loh theih loh a ni a; kan sawi deuh vek tawh tluk a ni a. Amaherawh chu, ‘fak tlak hi chu fak mai ila, sawisel ngai chu sawisel mai ila’ tih hi ka ngaihdan deuh hlek a ni a. Kan Assembly Staff-te thinlung takin ka fak a, ka chawimawi a, an hnathawh leh thil tihah engkim mai sincere takin an ti hi lawmawm ka ti a, ropui ka ti a ni. Zanrei tak taka pawh tul leh mamawhte fel tak leh smart takin engkim min tihsak thin a, kan mamawhte min provide thin avangin an chungah lawmthu ka sawi bawka ni.

Pu Dy. Speaker, kan Chief Minister zahawmtak tak leh kan Minister zahawmtak Pu Nghinglova Demand te hi a zavaiin sawi vek lo mah ila, a tha ka ti a. ‘Ka pawmpui e tih kha ka sawi duh a ni e. Ka lawm e.

**HON. DEPUTY SPEAKER:** Kan House Member zahawm tak Pu Lalmuanpuia, Hrangturzo Bialtu i lo sawm ang u.

**PU LALMUANPUIA PUNTE:** Pu Dy. Speaker, ka lawm e. Vawiina ka rawn inthumna, ka puan ven hi *Hmar-puan* a ni a, ka diar hi *Lusei thangchhuah puan* a ni. Vawiinah Pi Prova Chakma rawn inchei dan hi fakawm ka ti khawp mai a. Anmahni hnam incheina nilovin, *Mizo-puan* in a rawn inchei a, anmahni hnam incheina ai khan a inhmei zawk hian ka hria a; wawiin hian ka hmu hmeltha sawt mai; *Bawng in kawmthlanga antam dawng hluah ang* a ni a, ‘hetiang hian inchei zel thei sela’ tih te ka request a ni.

Hei, Pu Dy. Speaker, i veilama mite hian an sawi ngai bawk hi an rawn sawi leh thin a, ‘hmunphiah’ tih te. An ni hi, kha leh chen an sawrkara an tih duh lem loh kan han tih ve tur hi an han ti a; enge maw kan han tihsual palhah, a sual dan leh kan tuma thil a kal loh dan zawng zawng sawia, “Mipui tih hnual theihna chance ani awm mang e” ti ni awm taka sawi reng mai hi a tha lo ka ti a. An ni hi, - khaw pakhata nula lepchia deuh, daia an pawh liam fo mai thin kha a piangthar a, a lam a lam ve mai a; thla 6 vel hnuah chuan lam lam chungin daiah an lo pawt liam leh mai thin” tih Upa hovin an hria a. An kawm a, an zil malh malh a, tihngaihna a hre lova, “Pathian pawl chang a awm ang a, tlangval pawl chang a awm ang a..” tia a chhang ang deuh hi an ni. An ngaihtuahna hi i veilama an thut lain ‘nationalism’ rau ten a pawl a, helam a an thutin, *thluaka sum lut* rau ten a pawl a. Tunah pawh hian an tih duh loh tawp kan tiha hi a sawi pawr theih dan ber hi an zawng a, sawi vak kha a tul tawhin ka hre lova.

IR chungchang kha, a hmingah ringawt pawh ‘Indian Reserved Battalion’ a ni. Kan ta a ni lo, a bul tanna chauh hi Central-in a tum a ni. Chuvang chuan, “heti zat hlawh kan pek reng, kan ta ni si lo hi, a hlawk lo” tih kha kan Chief Minister-in a sawi mai a ni.

Tin, hetia sawrkarna kan chelh tak hnua kan hmalaknaah hian kan CM chan department Vigilance ah te pawh hmasawna nasa tak kan hmu a, tunah pawh Lok Ayukta-ah chairman thar kan nei a. Tin, prosecution lam pawh hi an chak tawk lo thin a, hrem tura an tih te case pawh an ziah dan a chak tawk loh thin avangin, hrem tur ngawih ngawih hrem tak loh magistrate lamin an lo chhuahte pawh an tam a ni. Chuvang chuan, prosecution te pawh hi tunah directorate a siam tumna a lo awm ta hi a lawmawm takzet a. Hei hi kalphung-thar in a rawn hrin chhuah tha tak mai a ni a, a lawmawm ka ti takzet a ni.

Tin, GAD ah hian, Pu Dy. Speaker, tunah leh hun lo kal zel tur bakah tun hma lo kal tawhah MLA quarters leh Minister Bungalow hi, Speaker Bungalow Tuikhuahtlang-ah a awm a, Minister Bungalow hi 3 a awm a, Khatla Shivaji Tillah ah MLA quarters 3 a awm bawk a; chu zawng chu a ni mai a. Tun term ah hian mahnia in leh lo nei lo kan thahnem deuh a, kan indaih lo nasa mai a ni. Hengte pawh hi a sak belh lamah hian tang nasa ila a tha khawpin ka hria a ni.

Tin, Aviation-ah hian hmanni a an sawilan helicopter service hi duh ang tawkin kan la indaih lo hle niin ka hria a, a bik takin, ka sawi leh thin kan unaute'n Manipur buaina an tuar mek a. Chutih laiin Lamka - Aizawl service hi kar khatah vawikhat chiah a awm a, chu chuan 'kg 900 vel a phur thei' an ti a; chuta tang chuan mahni mihring weight leh bungraw neihzat tur nen kan han in report thlapa, chutianga zira passenger lak te chu a nih avangin an indaihlo em em a. Heng te pawh hi hmanni Delhi-a ka kal khan helicopter lian service tir tumna a awm a niin ka hria a, chak taka hmalak theih ni se.

Tin, Pawan Hans lo hi helicopter service dang lakchhuah theih ni se a tha khawpin ka hria a. Pawan Hans helicopter hi a tar lutuk tawh a. Hmanah pawh tuna kan Leader of Opposition nen hian Arunachal-a kan zin tum pawhin, kei hi thlawhtheihna hlau zet mai ka ni a. Itanagar atanga kan lo thlawk thla tur Guwahati, Dibrugarh-ah kan tum phawt a, petrol an thun belh a, keini kan chhuk phawt a; an tanky chhin te kha thirzaiin an tawn mai mai a ni. Hetiang service-ah chuan dam-thlamuanna chauh nei tan chuan a hrehawm khawp a ni. Chuvang chuan, Pawan Hans ni lo helicopter service dang rintlak deuh hlek tih theih ni sela a tha khawpin ka ring.

Demand No. 7 - Excise Department hi, he department-a thawktu an indaih lova, manpower ah hian an tlahniam em em a, an vai hian police motor pawh an zat lo a ni. Chuvang chuan thuam chak an ngai khawp mai. Nichinah Champhai North Bialtu MLA rawn sawi angin, tribal-zia deuh kan ti nge ni, ruihhlo ah hian kan tal buai nasa em em a; a bik takin (a hnam ang hian sawi ta ila) zu te hi kan duh em em a, Kohhran-in a han do viau thin chung hian a tihngaihna a awm vak lo a ni. Zu te chu kan Biak-in khuangpu hian a sawi thiam khawp a, "Zu hi mi ti sosang thei; mi insum thei piangthar chauh in chi a ni" a ti a, a dik hmel viauin ka hria a. A insum theilo, a piangthar lo zawk te hi a duh duh an ni si a, chu chu kan khawtlang leh kan hnam hian kan mualpho pui nasa em em a ni. Chuvang chuan, helamah pawh hian tan lak a ngai nasa em em a ni.

Chu mai a ni lo; drugs ni se, kan chhiatpui nasa em em a, tunhma te chuan sawlai Vanapa Hall phei ah te, Vanapa Hall atanga step chhukthlaka Mizofed petrol pump chhukna bulah pawh (mi pangngai tan chuan kalna chi loh tawp hian) langsar taka inchiu ngawng ngawng hi kan hmu vek a ni. Amaherawhchu sawrkar thar a lo pian hnu hian Minister hmalakna hi a chak viau a nih ka ring a, khang kha hmuh tur a awm ta lova, a reh ta duak a ni. Chuvang chuan, hengah te pawh hian Excise Department hi thuam chak lehzual ni sela. Minister fit tak mai kan nei a, hei hian tun aia chak zawk deuh hleka hma min lakpui theih hi ka ring a ni.

Ruihhlo, drugs chungchang ah hian, (nichina Pu TBC-a Aizawl West-I Bialtu sawi ang khan) drugs hi lian tak tak man a tam a, a kengtu an mana te han en reng reng hian, a sumdawng-pui - a *Drugs-Lord* an ni lo tih hi a chiang reng a. A transporter-te mai kan man a, chhui thui hleih theih loh hian tawp tlat chin a awm reng mai a. Helaiia mawhpurtu berte chhui thlen theih hi ni sela chuan a tha khawpin ka ring a. Drugs hi,

kha, hmannah kha zawhna chhannaah Minister-in a rawn sawi tawh a, tun hmain helaia rawn chhuk thla hi tam hle mahse, (Manipur buai vang te pawh a ni ang a,) helama rawn kal man hi chu a tam a. Amaherawh chu, chik taka an zir khan, helai bika kan lo hman khawloh hi chu a tam chuang lo; a ngai deuh reng a ni. “A san phah chuang lo” a ti te kha a lawmawm khawp a, kan thenawm vel boruakin a zirloh avang a helam a lo kal khawm deuh te pawh hi a ni mahna. Hengte hi chak leh zuala hmalak a chakawm khawp mai. Ruihhlo kan dona kawngah hian ke kan pen thiam deuh hlek a ngai a ni.

Tin, nichinah Pu Malsawmtluanga a rawn sawi ang khan, winery lam te pawh hi, grapes chauh nilo hian thei dang atanga wine siam dan te pawh hi awm thei sela a tha khawp mai. Sawrkar hmasain grapes an chin tir a, winery an siam tir a, an han mansak leh lawi chi ang kha chu thleng nawn tawh lo sela. Kut-hnathawktute chawikan nan wine mai ni lo, beer te pawh siam theih ni sela.

Khi, ka bialah pawh fu hmun a tha em em a, fu atang pawhin beer an siam thin ni tein an sawi a; heng te pawh hi a tih theih chuan, kan bial tan chuan hmasawmna ropui tak a ni dawn a ni. Chuvang chuan, winery te hi uar ila. *Wine* hi Isua pawhin, “Min hriat reng nan ti thin rawh u,” a tih kha a ni a. Chuvang chuan, hengte pawh hi kan siam tama, kan tih ve chuan kan kut-hnathawktute hnathawh a thlawn lohna tur a lo ni bawk si a, a tha dawn hlein ka hria.

Pu Dy. Speaker, kan Chief Minister leh Pu Lalnghinglova Hmar demand-te hi ka thlawp a, tlang ngei se, pass ngei ila ka duh a ni. Ka lawm e.

**HON. DEPUTY SPEAKER:** Tunah House zahawmtak member Pu H. Lalzirliana, Mamit Bialtu i lo sawm ang.

**PU H. LALZIRLIANA :** Pu Dy. Speaker, ka lawm e. Demand ka sawi hmain, hei, Health Minister zahawm tak hi kan nghak deuh a, mahse, a rawn awm tlat lo mai a, kan House Leader a awm tho a. Hetah hian kan bial chhunga thil thleng han sawilan lawk duh ka nei a. Vanduaina kan tawh, Nimin piah 11.3.24 khan Pi Lallawmchhungi, Kum 36 w/o Pu Lalramhmachhuana Mamit chu Civil Hospital-ah nau neih avangin raichehin a thi a; nimin khan Pi Laltanpuui, Kum 42, w/o Pu Chanchinmawia, Lengpui chu ZMC-ah nau nei turin an rawn chho a, nau a han vei a, amaherawh chu nau a nei thei lova, buaipui ngaiin an awm ta thut a. ICU a remchan loh avangin Ebenezar hospital ah refer a ni a. Amaherawh chu, Ebenezar hospital an thlen meuh chuan a chat thla tawh a ni.

Vanduaithlak kan ti hle a, he thil hi tunlai khawvelah, kan khawpui leh kan medical facilities that ber berna hmunah hetiang a thleng hi a vanduai thlak hle a. Tumah minimalin emaw, a Damdawi-in te emaw dem thu a awm lova; vanduaina tawk te hi an lainatawm hle a. An fate naupang te te, matric exam hmachhawn mek te an ni a, an tawrhpuiawm hle a ni. Thinlung takin kan tawrhpuui a; waviin ni hian a victim te pawh

hian legal case emaw kha lak an tum a ni lova. Amaherawh chu he House-ah hian anmahni tawrhpuina ni pahfawmin, thil thlen dan te leh an vanduaina tawh te hi mumal deuh zawka hrilhhriat theih nisela, an vanduaina tawh dan te hi anmahni pawhin chiang taka an lo hriat ve theih nan tih kha kan rawn sawichhuahpui a ni e.

Pu Speaker, Demand lamah kan kal ang a. Hei, Sports te kan sawi a, Sports demand te kan nei a. Kei hi Sportsman ka ni ve a, football ka khel thin a. Vawiinniah hian House chhungah hian, “Santosh Trophy khel tawh zawng ding rawh u,” ti sela, Pu Jejea nen bak hian ding tur kan awm lo maithei a ni. Aw, Pu Laltea hian kan zarah certificate tam tak a dawng ve tawh bawk.

Hei, vawiin ni hian kan sawi duh em em pakhat chu - Mizoram Volleyball Association-ah hian term khat chung kha President-in ka lo awm ve a, MVA te hi vawiin ni thleng hian an la baihvai hle mai a, an mahni puala hmunhma hi an la nei lova. Association nung ber pawl leh activities ngah an ni a. District level te, village level te, pro-volleyball team te, first division te an awm a, hmeichhia-mipa in team participate tha tak chhuah thei an ni zel a ni. Chuti chung chuan an mahni bika hmunhma la nei lo an ni a.

Sawrkar hmunhma thenkhatte chu discipline thenkhatin an han intitatu bik a, Hawla Stadium te leh khawi khawi emaw state association ho hian han intihtatu bik an nei a. MVA erawh chuan vawiin ni thleng hian an nei lo a ni. Sawrkar hmasaah khan hei kan Sports Minister hlui te nen hian nasa takin kan bei a, hmun eng emaw zat pawh kan en a, amaherawh chu, a tawp kan thlenpui thei ta chiah lova; kan champion-pui lova, vawiin ni thleng hian baihvai takin an awm a. Hei hi engtin nge ni hmunhma te, anmahni hian LSC te leh khatiang hmunhmate kha lo nei ta se, pass te kha lo nei ta sela, kan Sports Minister hian hma a lakpui thei ang em, MVA te tan hian? Anih loh pawhin Dengthuama Hall emaw te hi anmahni hming bika han dah theih dan te hi a awm ang em? Tuna NEC Olympic neih turah pawh hian an inbuatsaih nasa a, MVA te hi, TNT hmunah camp an nei ringawt mai a ni. Chu chu an dinhmun a ni a, kan han sawichhuah sak ni sela.

Tichuan, ‘Sports’ tih lai laia ka han sawi chhunzawm duh chu, Sports - SDRP-ah hian (hei hi kan lo by-heart ve lek lek tawh a) demand sawi apiangin kan lo phawrh ve a. Heta Sports Section bik chapter 11-ah hian ‘Zofa-Olympic kum thum dana huaihawt tur’ tih te kan hmu a, a lawmawm hle a. State Games kan neih tawh kan hlimpui zia te leh district hrang hrang kan infrastructure tlakchham zia te kan hmuchhuak a, khangah khan rualawh nat zia te kan hmu a. Tin, Adventure Sports tih-hmasawn tur chungchang te kan hmu a. Sawrkar hmasaah khan a tentative deuhin proposal kha engchen nge an kalpui chiah ka hre lova. Water Sports lamah hian Dapchhuah, Tutlui, Dapchhuah atanga Phaizau kalkawng khu han develop tura ruahmanna te kha a awm deuh a, heihi khawngaihtakin kan Sports Minister-in min lo hriatsak sela. Kha kha bul tan - hmalak deuhna te a awm tawh a, tihzui zel atan kan duh hle mai a.



Tichuan, Sports bikah chuan, kan vannei a, District Sports School tur te, Residential Sports Center leh School te tih mek a ni a, hengte hi phuisui tak, a nihna tur ang taka hman a nih theih nan, zawh thak piah lamah a hman zui zelna tur pawh min ngaihtuahpui zel turin kan han chah a ni.

Tin, Finance Department-ah hian sum tam tak, vaibelchhia 34,38,13,62,000/- ngawt kan han hmu a, a lawmawm hle a. Sawi leh sawi hnu, financial year a la tawp lova, kan Governor thusawi tihhlawhtlinna remchang tak te pawh a la ni a. nimin lawkah khan Soil Department kha kan sawi bawh a. Finance Minister hian heta tang hian hmunphiah leinate sanction thei hlahu sela kan duhpui hle a ni.

Tin, Excise hi sawi leh a chakawm khawp mai a, minute 7 a kal der tawh mai a. Amaherawh chu, ka subject lo te pawh ka han touch ve bawh a.

‘Excise’ han tih hian ‘Zu’ a ni deuh mai a. Excise product hi tam tak a awm a, keini state hian kan buaipui ber chu *Zu* hi a ni deuh mai a. Motor fuel, petroleum product-te pawh hi excise leh custom product-a awm a ni a. Tin, cigarette te, energy product te pawh hi excise goods zingah an dah tel a ni. Vawiin niah hian manpower strengthening a pawimawh, chutih mek lai chuan “*Sangha chu pe lovin, a man dan zirtir rawh*”, tih ang deuh khan, kan Excise-te buaipui ber tih thawvanna tur awlsam. a bul tuma chu - kan thalaite, kan naupangte develop-na tur a ni. Drugs, zu leh ruihtheih thil danga indulge hman lova kan siam hi a pawimawh em em a. Chuta tan chuan sports infrastructure kan neihte develop hi a ni a.

Tin, ‘private entrepreneur’ kan tih te, job-creation, manpower development, human resource development zawng zawng a fun tel a ni. Tin, LESDE chungchang hi - tunah hian ITI centre 3 – ITI, Aizawl, Lunglei, Siaha District ah te kan nei a, district dangah hian mamawhna a sang hle a ni. Kan Minister-in min lo hriat sak se ka duh em em a chu - Mamit-a polytechnic building tha deuh mai khu staff leh principal quarter zawng zawng nena awm a ni. Chu chu luah lovin a awm a; JNV School kha kan han luah tir a, engtin emaw Higher & Technical Department te nen agreement siamin. Amaherawh chu, an ni pawh building an sak zawh tawh avangin an rauh san leh a, tunah hian ruakin a awm a ni. Polytechnic hi engtikah mah kan *run-in* ka ring lova. Heng te hi kan Minister hian ITI Center-ah min leh sak se la, department-te nen convergence kan tih ang deuh khan Higher & Technical-te nen ti se la. Min tan sak thei a nih chuan, MLA fund te leh keima resource atang emawa tanpuina kan han hmuh theih ve chi ang te pawh sawr khawmin, rang takin ‘kei pawhin theih tawp ka chhuah ang tih’ kha vawiin ni ah ka sawi duh a.

Pu Speaker, doctor a nih vek theih lova, engineer a nih vek theih lova, IAS emaw, MCS emaw pawh a nih vek theih loh. Chuvangin, kan thalai rualte hna thawk theia kan siam

hi a pawimawh a, chuta tan chuan ITI level hi kan ngah hle a ngai a ni. Chu chu, kan Minister zahawm tak hian min lo hriatsak se ka duh hle a ni.

Tin, member thenkhatte'n an sawi tawh ang khan, GAD ah hian MLA facilities hi, kan Speaker hmasa (Ex-Speaker) khan MLA-te min ngaihtuah hle a, phaia kan zin chang tein Minister-te chauh ina motor an avail theih chi kha, "MLA-te zawng zawng pawh hian motor an mamawh angin, airport a pick up te, thlah te leh a tul anga hman te hi kan entitle vek tur a ni" tih te kha a sawi a, vawiin ni thleng hian chu chu kan la chhawm niin ka hria a. Tichuan, 'MLA hostel' kan tih hi a changtlung lo em em a, sawi ang khan, phuisui zawka tih ni se la.

Tichuan, Assembly Secretariat-te an fakawm a. Vawiin kan session tawp ni thlenga min han dawngsawng te hi kan lawm a, Pu Dy. Speaker te, Speaker te, kan Commissioner leh Staff zawng zawngte chungah lawmthu ka sawi a ni.

Vawiina kan Minister pahnihte demand zawng zawng hi ka pawmpui e. Ka lawm e.

**HON. DEPUTY SPEAKER:** Thu tawi tlem ka han nei ang a.

Kan AC hi a ri rum-rum a. Vawiin hi a lum tho mai a, kan AC hi a chak lovin ka hria a, member-te hriatthiamna ka ngen a. In han ham a, in ang pawp pawp te pawh ka han hmu a, lo en that kan tum ang a; in mi hriatthiamna ka han dil a ni. Tunah Pu Robert Romawia Royte, Hachhek Bialtu zahawmtak ilo sawm ang.

**PU ROBET ROMAWIA ROYTE:** Pu Dy. Speaker, vawiinah kan sawrkar thara Budget Session hmasa ber tawp ni kan lo thleng chho ta a. Kan Speaker te, Dy. Speaker leh Panel of Chairman te min kaihhruaina a lawmawm hlein ka hria. Tin, kan House Leader-in thiam takin a tawpah min tihlim zawng tein thu a rawn sawi thiam ang reng a; engpawh ni se, tun tum Session hi nuam ka ti hle a ni. Tin, kan Speaker khan zaninah dinner min siam sak dawn niin ka hria a, a lawmawm hle a. Tin, naktukah kan House Leader - kan Hon. CM-in dinner, MLA leh an kawppuite pualin a siam dawnin kan hria a. Keini lam hi Opposition tih takah, kan tamin, kan nghakhlel khawp mai a.

Tin, kan Speaker leh Dy. Speaker-te, in kaihhruainaa Assembly Secretariat thawktute, (a te ber atanga lian ber thleng) ina kan session min vil dan te, kan session loh nikhua a Library-ah emaw khawiah emaw kan mamawh nikhuaa min attend thin dan hi (kan thiante dang pawhin an sawi ang khan) a chhuanawmin ka hria a, fak an phu takzet a ni.

Pu Dy. Speaker, Demand No. 7 - Excise & Narcotics Deptt. hi ka sawi hmasa ang a.

Mizoram-ah hian ruihhlo a tam a, kalkawng kan ni a, 'ruihhlo tamna ramriah kan awm' tih kha sawi tam a ngai lova. Chutih mek lai chuan sawrkar leh NGO-te thawh ho thinna hi sawilan a thain ka hria a, a lawmawm hlein ka hria. A bik takin kan Central YMA

leh Sub-Headquarters group te bakah branch zawng zawngte ruihhlo chungchanga tan an lakna hi sawrkar ang pawhin kan recognize-a, a tul anga kan thawhpui thiam pawh a tulin ka hria. Chutiang zawng chuan sawrkar hmasa lam te pawh a kal thin a, tun sawrkar thar pawh chutiang zawng chuan an kal chho mek zelin ka hria a. Vawiinah hian, he rorelna sang berah hian kan NGO liante, a bik takin YMA ten ruihhlo dona kawnga tan an lak dan hi a ropui ka ti a. Tin, Kohhran lam atang te pawhin social front leh kohhran pawl hrang hrang ten a tul ang anga hma an lak hi sawi chhuah tlakin ka hria a, ka han sawi lang ve duh hrim hrim a ni.

Tin, Demand No. 28 - LESDE chungchangah hian sawrkar hmasa lama kan Minister zahawm tak hmalaknain hma thar tam tak lak a ni a. Thalaite hawi-her leh ngaihtuahna pawh nasa takin ‘re-orient’ ti teh ang a, sap tawngin, her dik a ni te pawhin ka hria a, hlawhtlinpui tam tak pawh an hma laknaah hian an awm a, a lawmawm hle a ni.

Tun kan sawrkar tharah hian Minister, a-nachang hre tak LESDE changtu kan nei hi kan vannei hlein ka hria. Tun china a hmalak tawhna te pawh hi hre kim vek lo mah ila, ral khat atang pawhin kan lo hre ve zel a, duhsakna thar ka hlan a. Skill Development hi a pawimawh a, skill-base in kan sumdawna te pawh kalpui a pawimawh a, skill base-a hausa te hi hausa nghet an ni a, skill base-a kan thalaiten eizawna an zawn a pawimawh a. Hardware nei tha viau mah ila softskill/software lama kan than leh si loh chuan kan hardware te kha a tangkai tur angin kan hmang tangkai thei lova, softskill/software develop turin LESDE hi nasa takin tang zui zel turin duhsakna ka hlan a ni.

Tin, Sports & Youth Services Department chungchang hi han sawi leh ka duh bawk a. *National Education Policy, 2020* hi kan han buatsaih tirh atang khan ka tuipui angreng a, a copy pawh minrawn thawn ve thin a. Sports Minister a nih angin a draft-stage-a a awm lai pawhin vawiinah hian kan Education Minister hi a awm lo naa, Sports hi (physical activities dang kha chu thu hran ni se) ‘Sports’ tih ngat hian he National Educational Policy ah hian vawi 30 (thirty time) lai a inziak a. ‘English’ tih chu vawi 5 chiah a inziak a, ‘History’ tih hi vawi 11 a inziak a. Sawrkar hmasa lamah sports kha (kan thutna lamin a zir lo nge ni) kan ZPM unaute ngei pawh khan ‘a ti lutuk deuh’ min ti deuh thin khan ka hria a. Mahse, tunah chuan sports hian facility an mamawh zia te an han sawi chhuak ta hi, Pu Dy. Speaker, a lawmawm khawp mai. National Educational Policy te kan thlir chuan, Sports hi ngaihnep theih a ni lova, education nen a integrate dan mumal zawk zawn te a ngai a ni. Kan Minister a-nachang hre em em ve ve an ni a, helai hi fel taka a in converge-a, Sports leh Education hi fela taka a kalkawp chhoh chuan ‘tha takin danglamna a thleng ang’ tih ka sawi duh a ni.

Tin, vawiinah hian Minister kan nih ve laia sports budget kan sawiho lai te kha ka hre chhuak a. Khang lai khan fiamthu deuh te pawhin min kap nasa khawp thin khan ka hria a. Kan PWD Minister zahawm tak pheih chuan, “Sports Minister budget hi NECS-a an building pakhat sakna zat pawh a ni lo ang” te kha a ti deuhin ka hria a, a record

tak ka en thar lova. Kan budget kha a tlem khawp mai a, chutiang tho chuan tuna kan Sports Minister zahawm tak hian budget tlemte a han nei zui ve leh a. Ka chhut thuak thuak a, (ka chhut sual mai thei a) 0.17 or 0.147 vel percent a ni a, a budget hi. Kan nih ve lai ai khan a sang hret nge a hniam hret aw? Chutiang chuan 0.17 hi sports budget a ni a. Tin, kumina kan Finance Minister zahawm tak (kan CM ni bawk) budget punna amount ai hian Pu Lalnghinglova Hmar kan Sports, Excise leh LESDE te minister budget pumpui hi Finance Department-a budget punna aiin crore 100 velin a tlem zawk a ni.

Vawiina Minister pahnihte demand kan sawi dunah hian an budget amount hi a inang lo khawp mai a. Mahsela, kan Speaker ten an remkhawm fuhin ka hria a, a pe nghal thei mai tu leh sum tam tak khawltu nen khan an demand hi kan sawi dun a. Thalaite mamawh - infrastructural gaps hi a la tam em em a. Hengah hian kan Sports Minister hi 'sum tam zawk pek a ngai a ni' tih ka sawisak duh a; a tak taka ka experience ve tawh a ni a. Kan nih ve laiin kan state-budget atang chuan engmah ti hleithe i lovin kan awm a, a hrehawm duh khawp mai. Kan House Leader leh kan Finance Minister pawhin thalaite tana thahnem ngaia sport promotion lama thalaite hmasawna tura thil phal lehzual a tul ka ring a ni.

Pu Lalnghinglova Hmar - kan thianpa nen hian inan lohna deuh kan nei a. Ka minister tirh khan lungngaihthlak deuh deuh thil kha a awm a, ka sawi thui lo mai ang a. Nichin khan ka chhut thuak thuak a, kan sports Minister hian nuai 20,000 chuang sanction sa hi a chhawm dawn niin ka hria a. Chuvang chuan, Lawngtlai West Bialtu Pu C. Ngunlianchung'a 'Chawnhu field laihna 8.5 lakh' tih te, Sangau field laihna tur '10 lakh' tih vel teah kha chuan lo lungngai lo sela. Nuai 20,000 fai te-taw kha chuan kan Sports Minister thar hi chuan khang velah kha chuan harsatna a nei lo turah ka ngai a.

Tin, SASCI-ah pawh '2 crore' tih te kha a awm ve ran a, a process a *lapse* te a nih loh chuan, kha kha chu thil awm palhah te pawh min ngaihsak sela, minrawn hriatreng sak te pawh ka ring a, a sawi te pawh kan sawi dun nual tawh a ni. Tin, field a ni emaw, basketball court a ni emaw, sports facilities tam tak hi RD atang te, MLA fund atang te, SYS Department state fund atang te, central scheme atang tea siam hi a inchawhpawlh nuaih mai a. Sport-ah hian hmalatu tam tak an awm a, UD & PA lam atang pawhin a siamna rate te pawha inanglo thleh-thluah a. Hengah hian mi thenkhatin khawilaia an siamna emaw rate te sawia, 'chumi zah siah chuan avan nep ang reng' tih te pawh a awm a, ka department enkawl vek a nih lai khan. A ni chiah lo naa, mipuiin kan hriatthiam a ngai khawp mai.

Tin, Planning Department te pawh kum kal ta leh a hmalam te pawh khan kan che tha thei thin khawp mai a, a lawmawm hlein ka hria. Thil pakhat ka rawt duh chu - line department an ngaihpawimawh thiam hi a tha khawpin ka hria. NEC, DC leh khawi khawi atang tea rawtna siam an duh thin a, hengah hian a line-department te nen hian in coordinate hram thin se a tha khawp ang. Nikum aiin an smart viau naa, an tangkai

lehzual te pawh ka beisei a. Sawrkar hmasa lam atanga an buaipui - investment policy an han tihlawhtling te hi a lawmawm a.

Pu Speaker, GAD-ah hian, helicopter service hi tun aia tam zawk kan mamawh a. Nichina Chawngte Bialtu zahawm takin a rawn sawi kha, Chawngte khawpui saw ‘notified town a la ni lo’ tih kha ka lo hre ngai lo va, a mak khawp mai a, heng hi kan ngaihtuah vat te pawh a ngaiin ka ring a. Saw khawpui saw district pathumah a inthen a, mahse an inthen avanga an chanvo pek loh ngawt saw chu a dik lo ang a. Kan sawrkar laiin kan lo ti lo a nih pawhin, kan omission, kan tih loh sual-pawi tak niin ka hria a.

Tin, Finance Department hi, Finance lamah hian nichin khan “Covid avanga sum hmuh loh kha a tam lo ve; a hnuah an rawn recover a lawm” tih kha, recover a ni lovin ka hria a. (*Warning bell a ri a..* ) A pawimawh lai kan sawi dawn hian Pu Speaker, bell hi a rawn ri leh thin a; hun tlemte minute 2-1 lek ka han dil teh ang che. (*Hon. Dy. Speaker-in chair a la..*)

Pu Dy. Speaker, i hriatthiamnain, hei hi a pawimawh em a, ka sawi lang leh lawk duh a. Share of taxes hi kum tin a rawn kal a. ‘Covid hnuah a rawn kal tam’ tih kha, formula tam tak hi a awm niin ka hria a. Total collection of taxes, central sawrkarin tax a collect zawng zawng leh, a cost of collection minus hnuah .5% em maw ni kha Mizoram-in kan chan ve tur a ni a, a percent tak kha chu ka sawi sual mai thei a; khatiang kha a ni a. Covid a tan sum tam zawk an rawn release belh lam a ni lova, percentage kha an rawn pe mai a ni. Covid avanga CSS sum kan hmuh loh tam zia kha chu kan hriat atan kha kha ka sawi lang hram duh a, a chhan chu mipuiin thu dik an hriat a ngai a ni.

Pu Dy. Speaker, a za lai sawi hian bell hi a ri tluk-tluk zel a, engpawh ni se, ‘police ke vung’ tih vel kha chu ka sawi tawh lo mai ang a, kan IR Battallion neitu erawh hi chu kan zawn chhuah a tulin ka hria a, ‘tu ta chiah nge an nih’ tih kha. Nichin khan IPS senior tak central sawrkara thawk lai ka zawt a, “Mizoram 3<sup>rd</sup> IR battallion an nih chuan, Mizoram sawrkar ta an ni” a ti a.

Awle, Pu Dy. Speaker, vawiinah kan CM zahawm tak Pu Lalduhoma department enkawlte demand leh kan Sports Minister zahawm tak Pu Lalnghinglova Hmar demand te kan sawi ho a. Heihi ka thlawp a, ‘a hlawhtlin nan (kan tih theih ve te a awm chuan) theihtawp chhuahin kan pui zel ang’ tih kha ka sawi duh chu a ni e. Ka lawm e.

**HON. DEPUTY SPEAKER:** Tunah chuan, Member zahawm tak Tuichang Bialtu, Pu W. Chhuanawma ilo sawm ang.

**PU W. CHHUANAWMA :** Pu Dy. Speaker, ka lawm e. Han sawi ve tawh lo mai te ka tum deuh a, amaherawh chu, helaia kan thut chhan te a lo ni ve bawk nen; ka hmaah hian Zonet tv. live ka inchhawp a, ka en pah a; tun ang reng renga mipuite’n an

ngaihven hi a la awm lo; a sawi apiang comment a kal nghal zut zut a, mipui an inhnial pah a, comment te pawh a ngaihnaawm a. Ka ding hreh em em tawh a, ‘*Speaker*’ tih leh ‘*Chairman*’ tih sawi pawlh nawk-nawk thin ka nih avangin. Amaherawhchu, wawiinah khan mi-pathum laiin an *chairman* ve tho a nia.

Niminah khan ka sawi zawh ve leh ka thusawi kha ka en let leh a, mipui comment vel; pakhat chuanin ‘Aw le, ka nghakchhuak ta’ a ti a ni. Chumi a nghahchhuah chu ‘card-var, card-eng’ tih vel solve dan tur a ni a. Village Development Committee kan din ang a, party tin leh NGO tin aiawh an awm dawn a, kha kha kan policy-a kan lo sawi thin a ni a. Party mal VC sawrkar awmna pawh ni se an thei dawn tawh lo. Chuvangin, a kaldan tur dik tak ka sawi khan khalai kha a lo nghakchhuak a; “an campaign laia an sawi nasat teh lul nen; hei hi an sawi dawn tawh lo emaw ka ti a” a rawn ti a ni. Chuvangin, ‘kan thusawite hi an lo chhinchhiah vek a ni’ tih te hi hriat a pawimawh hle mai a, thil sawi mai mai a chi loh zia te ka zu hria a.

Chuvangin, inthlahrung tak chung si, sawi tul ti bawk siin ka rawn ding ve ta a. Sawi tam pawh ka tum lo, kei chuan demand zawng zawng pawh sawi ka tum lova. Kan CM demand ho phei hi chu sawi pawh ka tum lova, a chhan chu, keini aia hria leh thiam an ni a, tin, kan va dai ve zeuh ang a; i veilama thu te ang mai hian, kan sawi hma kha kan ngaih vawng vawng ang ka hlau deuh a. Chuvangin, ka va dai ve lo law law mai teh ang. Tin, PU Lalnginglova Hmar demand ho pawh hi sawi vek ka tum chuang lova, LESDE hi tlemte chauh sawi ka tum dawn a ni.

Tin, Pu Speaker, Sports & Youth Services pawh hi sawi chu ka tum lo na chu, han sawi teh mah ila Pu Nitea’n “*rilam laia sustainable development lo tih lo tih te chu*” a tih ang deuh khan, han sawi luai thin mah ila, ‘chhungkaw budget a tlem miau chuan, tih ngaihna vang tak a ni’ tih khan duh tawh mai phawt ila.

Demand No. 28 ah hian tlemte han sawi ka duh a. ‘*Hna*’ kan tih hi engnge maw ni ber le, tih ka ngaihtuah a. Employment-ah hian hna zawng inziaklut an tam thei em em mai a, sawrkar-hna lah chuan a daih bawh si lova; ‘sawrkar-hna hi ‘*hna*’ kan tih ber chu a ni em aw’ ka ti thin a. Kan chhung zingah sawrkar-hnathawk kan awm lova. Engpawh ni se, sawrkar-hna hi dik taka an hlauh hi chuan, hausakna a keng tel lo hian ka hre thin a, zu awh viau tur hi ni awm pawn ka hre lova. Chuvangin ‘*hna*’ kan tih hi engnge niang aw; ‘*infiamna*’ kan tih te hi engnge ni ang aw” ka ti thin a; boxing hi infiamna angah chuan tlem chuan ka la ngai deuh a. Tunlaia ‘mix-martial arts’ an tih phei hi chu infiamnaah ka ngai vak lova; sum a tam em avangin khawvel hian infiamna angah a ngai a. Hengah hi chuan a chak zawk pawh an awl bik chuang lova, an thi seng-sung tho a, chak lo zawk nen an inang reng zel mai a; infiamna ah hian ka ngai ve vak thin lo a ni. Mahse, sum a awm miau chuan, infiamna a ni mai a ni.

Kan campaign thin lai khan Sialhawk-tlangval, MA leh graduate 7 lai mai kan inah an rawn lut a ni. Zankhat chu kan inkawm a, ‘in policy - *kut-hnathawktute tan a hranin budget kan siam ang* tih hi, in ti tak tak dawn em? min ti a, ‘ti tak tak ang’ ka han ti a. “In tih tak tak dawn chuan kan haw leh ang; hnathawh hi kan hreh lo; kan thawhrimna hian awmzia a neih thin loh avangin kut-hnathawh hi kan hlau a, hrehawm kan ti thin chauh a lo ni” an ti a ni. Kan bial ah tho MR-a thawk nena kan inkawm tum pawhin, “in sorkar a nih chuan, ka hna ka bansan nghal ang a, sawhthing hmun ka nei ang; kum 3 vel chu ka la thawk thei ang; kan upa tan ve tawh a, min regularize dawn lo; chuvangin, ka bansan nghal ang” a ti a ni.

Kan ramah hian ‘hna’ kan tih hi a danglam em em thin a, mi ramah hnathawk turin an kal nasa em em a ni, kan thalaite. Thiam-thil nei, hlawh tam tak tak hlawh ang chite hi chu ‘kan ramah a awm ve lo’ a tih thei a. Mi hnuaiah, mi hausate emaw, company hnuaia hna tenau deuh te leh mi hnuaia inhlawhfa – mi-awmpui ang chi te pawh, thawk tura chhuak hi an tam em em mai a ni. An thawk rim em em a, ka hriat theih chin chu ka kawm fo a ni. Mi ngilnei tak an tawn fuh chang erawh chuan an nuamsa ve deuh a; chutiang a nih loh chuan, ‘zep miah lovin han sawi teh’ tia ka zawh chuan, “sal leh chhiahhlawh inkarah a chang chuan kan awm thin” an ti a ni; an hlawh erawh chu a chhe lo. Chutiang khawpa hrehawm tuar leh, chhungte ngai vawng vawng chungin hmangaih takte nen inthema mi rama hnamdang hmuhsit leh tihduhdah chung a rim taka thawh chu, kan hmangaihte awmna a tan chuan khawngaihthlak tak anni. Kan ramah ‘hna’ kan tih hi, hlawh a chhiat em avangin thawhin awmzia a neih thin lo a ni.

He sawrkar thar lo pian dawn hian ka rilru chuan, he sawrkarin hlawhtlinna a neihna tur ka teh ve dan chuan, kan hmangaihte mi rama hrehawm taka inhlawhfa tura chhuaklo theilo hote hi kum 2 vel kan sawrkar hnuaiah chuan ‘an lo haw leh vek ang’ tih hi a ni. Mi rama hnathawk tura inthawn chhuah te hi a lawmawm e, a tha; amaherawhchu, kan ram chhungah nei, mahni ramah ngei hmangaihte nena hlim taka kan thawha, kan thawh rah kan seng theih hun tur hi ka thlir thin a, chu hun lo thlen hun tur chu kum hnih, kum khat pawh liam se an lo haw vek duhin ka ring a. Chutianga an lo haw hun hun hi kan hlawhtlin hun tur niin ka hria. Chung atan chuan kan flagship programme te kan tih hlawhtlin a ngai dawn a, ‘hna’ kan han tih takah hian a ni a.

Nitish Kumar-sawrkar ah khan Aizawl-a inhlawhfaho Bihari leh Santali hote kha an haw duak mai a nih kha! An ram economy a tha ta a ni ang, sorkar kalphung a dik ta a ni ang. Chhim-pei World Bank Road te pawh kha tih laia siam a nih lai vel kha chuan, a muang lutuk te pawh kha nawrna a nasa a. Contractor-ten an sawi chu - hlawhfa tur, manpower an hmuh zawh loh vang a ni a; Bihari ho kha an haw deuh vek a nih kha; an ramah hnathawhin awmzia a neih tawh vang a ni.

Chuvang chuan, Demand No. 28-ah hian, tunhmaa a hawi dan ngai reng kha ni lovin, han inher rem ve hret se la, hawi dan han thlak deuh hlek sela, kan ramah hian 'hna' kan tihte pawhin awmzia a nei tawh ang.

Pu Dy. Speaker, thil pakhat chauh; kan mihausate school dintute emaw, dawrkaite emawina kan mi chhawr zirtirtu te emaw, dawr nghaka kan chhawrte emaw hlawh hi a tlem em emin ka hria a, awmpui hlawh, dawr nghak hlawh te hi; "hlawhfa rate te hi engtin emaw sawrkarin control theih dan deuh te hi a awm em; a ruaituin a duh ang zata a rawih chauh hi em ni; a rawiha te hian sawi theih an nei lo reng dawn em ni?" tih te hi ka ngaihtuah thin a ni. Science subject la te pawh an thla khat hlawh hi a tlem em em a ni.

Pu Hlana, kan Minister demand an sawi a, kan Speaker-in 'ram pum huap sawi thin rawh u' a ti a, kan demand te pawh hi sawi ve hi ka duh viau a, sawina hun a awm tawh lova. Pu Dy. Speaker, vawiinah kan Minister Pu Lalnghinglova Hmar demand te, kan Chief Minister Pu Lalduhoma demand te hi tha ka ti a, ka thlawp a; hlawhtling taka a kal zel theih nan lawm takin ka thlawp a ni e. Ka lawm e.

**HON. DEPUTY SPEAKER:** I lam sual zing thin avangin hun i khawhral tam deuh a, ka han han belh deuh che a ni. Tunge sawi leh ang le? 5:30 PM khi kan ti a. Aw le, Leader of the Opposition thusawi turin i lo sawm ang.

**PU LALCHHANDAMA RALTE, OPP. LEADER:** Pu Dy Speaker, ni 20 chuang zet zawt kan Speaker nen min kaihhraina zarah budget session te kan han nei chho a, kan hlim hle a, a nuam kan ti a. Kan House Leader-in min uapna hnuaiah inhawng tak, inpawh tak, hlim takin hun kan hmang thin a, vawiinah a hmawr bawkna ni kan lo thleng ta a. Vawiinah Minister pahnihte demand ka han sawi dawn a, a theih ang rangin sawi ka han tum ang a. Amaherawhchu, kan hun bi hi dan angin nakinah min extend sak mai turah ka ngai a.

Pu Lalnghinglova Hmar, kan Minister zahawm tak, chak tak leh thalaite pawhin a maha beiseina an neih, mi mal tak pawha kei pawhin a tha nia ka hriat department enkawlte hi kan sawi hmasa ang a; Demand No. 28 - Labour, Employment, Skill Development & Entrepreneurship LESDE hi.

Vawiin nia demand-te hi department 12 - kan Chief Minister department 19 leh Pu Tetea department 3 hi, a pawisaa sorkar kum kal lai pha lo awm chhun a ni a; nuai 17.65 in tun financial kal laia sum hi a pha lo a. Amaherawhchu a phenah hian thil tam tak a inbilh turah ka ngai a. He department hi ministry kal liam taah khan a enkawltua ka lo tan ve avangin sawi tur ka ngah khawp mai. Kan hotu thenkhatte'n an sawi tawh ang khan, Mizoram department upa pawl, amaherawhchu, department lian loa ngaih, a scope leh a nihphung pawh mipuiin kan hriat vak loh a ni a. A thawktute emaw, a thawktu dah tur reng rengte pawhina an chak vak loh thinna a ni. Mahse, ka ngaihtuahna



awm thin chu, India leh khawvel pumah pawh Labour Department enkawltu Minister te, Skill Development enkawltu Minister te hi chu, ‘Minister-ah pawh duhsak deuh leh hnathawk thei tur dahna a ni’ tih hi ka thinlungah a len avangin, he department hi a la len theih ka ring a.

A thawktu kan thawhpuite an fel em em a, ‘an talent haichhuah a ngai a ni’ kan ti a, theih ang tawkin he department hi bul kan han tan chhova. A tirah chuan (zep thu a awm lova) ACB case te, PAC case te, CAG case te nen kha department kha kan va luh hlimah a lo inphiar nasa viau a ni. Mahse, a thawktute nen theih tawpin kan han thawk hova, engkim kan clear a. Infrastructure development te, manpower development te a scope ang ngeiin; skill lamah te, labour wing-ah te, entrepreneurship-ah te nasa takin hma kan la a. Mizoram sawrkar hnuaiia department 50 dawn zingah hian department scope nei tha ber, hmalam beiseina nei tha ber, hand-holding policy kalpui kan tumna kawngah pawh hian, “a kal chiah ang a, he department hi a la lian ber dawn” tih hi kei hian ka hma thlirah ka sawi thin a ni a. Director awm turte pawh an chak vak lova, inhremna angah an ngai thin a ni. Mahse ka sawi duh chu - reilote ah LESDE Director hi an la inchuh dawn; cadre review a la awm ang a, ‘IAS ho hian LESDE hi, *kan cadre tur a ni* an la ti dawn’ tih hi ka sawi thin a ni.

Chuti taka scope nei tha chhonzawm tur tam tak awmna, kan Minister zinga a ngaihna hriain a han chhonzawm chho a. Hemi hnuaiiah hian a bik takin skill development ah te pawh, Mizo hming tak thil te pawh kan han phuah a, ‘*kawtchhuah*’ tih te, ‘*pum*’ ti tein programme lian pui-pui kan siam a. ITI train chhuak hote startup-na tur sum leh pai tam tak kan pe a. Tin, Mizo entrepreneur tha tak tak motivate-a encourage tur tein theih ang angin kan ti a. Labour Wing ah ni se, kut hnawthawktu tha tak tak an hamthatna tur te, an facility neih dan ina a pek, an chanvo an neih theihna turin nasa takin thawktute nen hma kan la a ni. Hetah hian nasa takin hma an la thei dawn niin ka hria. Cess collection ringawt pawh hi a pung ta em em a, tunah hian vaibelchhe 40-50 vel kan neih tawh ka ring. Chutiang tak chuan he department hian ram tan thil tha a ti a, Covid 19 harsatna kan ramin a neih lai pawh khan LESDE hnuaiia Welfare Board ringawt pawh hian vaibelchhe 25-26 dawn Mizo-mipui riltam leh harsate tan a luangchhuak thei a ni. Chutiang chu he department hi a nih avangin sawi duh ka ngah a. Mahse, Pu Dy. Speaker, khati chinah khan ka duh tawk mai teh ang.

Tichuan, Demand No. 22 - Sports & Youth Services demand hi cheng nuai 33.97 in a pung a. He Department hi thalaite department tho a ni a, Ministry kal taah kan Minister chak tak maiin hneh takin a enkawl a, infrastructure development lamah te nasa takin. Tin, kan thalaite thinlung pawh nasa takin min chawikan sak a. Vawiiinah amah pawhin a sawi, “cheng nuai 20,000 dawn vel Minister tharin hma a lak chhonzawmna tur kawng hrang hrang atangin a awm thei” tih a rawn sawi kha. Ka rilua lo awm chu - National level emaw, Asia level emaw, world level emaw ah hian “kan thalaite hian medal tha zawk, awmze nei zawk engtinngge an lak theih ang” tih hi Mizoram leh khawilai vel

emawah chuan kan ti ve thin. Kan thenawm Manipur te hian National level ah dinhmun sang zawk an chang fo mai a. Chuvang chuan, kan Sports Minister tharin hmanna khan “infrastructure development chu kan ngaih pawimawh ber a ni lo ang; kan ti lo ang tihna nilovin; a manpower develop te, an skill develop te leh coaching tha zawk nen kalpui kan tum ang” a tih pawh hi a thatna chin atam viauin ka hria. Chutih lai chuan, infrastructure development hi khatiang khawp khan kan ti chung hian Zoram hmun hran hran hi kan cover kim hman bik lova, Covid leh a kaihnawihthe avangin. Ka bial lamah te pawh tunah hian tender a chhuah mek, Darlawn ah phullem phah te kha kan han ti a, SASCI ah sawrkar liam ta ah khan kan dah a; a tira token ah 200 kan dah a. kan House Leader-in min hriatpui tura ka duh chu - tunah tender a awm mek a, 400 vel la dah belh tura beisei a nih avangin, tuna kan tih mek hi SASCI tharah pawh minrawn chhonzawm pui ka beisei a.

Tin, Sakawrdai-ah sawn mini-sport complex, kan hmaa sorkar zawk khan bul a tan a, ka hunah kan zo a, amaherawhchu, kan hawng hlei thei lo a ni. Court case avangin khilai te khi tihfel ngai kan nei a, heng te pawh hi min ensak kan duh a. Mizo tlangval te tan hian ‘engnge kan uar ang’ tih hi ka ngaihtuah a, combat games ang chi, a kg level-a inelna hi a ni loh chuan, kan physical nen world level-ah han ti tur chuan harsatna a awm mai thei. Chungah pawh chuan helam pangah hian ‘nasa zawkin kan kal hi a tha ang em le’ ka ti a.

Tin, ‘Youth Services’ a nih angin, hemi hnuaiah hian NSS te, NCC te a awm a. NSS - leh higher zirlaite tan, an thupui pawh tha em em ‘*Not Me, But You*’ tih hmang ngat ang a ni a. Tin, self-discipline tha awm theihna tura zirtirtu NCC te hemi hnuaiah promote theihna tangkai tak a awm avangin, hei hi ka ngai pawimawh khawp mai a, institution tam zawka inzarpaharh a nih theihna turin hmalak ka duhpui hle a ni.

Demand No. 7 - Excise & Narcotics ah hian, ruihhlo vanga harsatna kan nei nasa em em a, hei hi “kan sawrkarin nasa zualin kan luhchilh dawn a ni” tih kan Chief Minister budget speech-ah khan kan hmu a, ka lawm khawp mai a. Kan thalai rual heti taka min khawih avangin hei hi lian zawkin Kohhran nen, NGO te nen, Legislator zawng zawngte pawh hian kan party nihna dahtha a, helamah hi chuan aw-khat kan neih hi tul ka ti a. A bik takin excise force hemi kawnga law & order kengtute hi kan thuam chak a ngai a. Excise Sub-Inspector 7 lak tur hi rei loteah an la turah kan ngai a. A constable emaw, thil dang emaw pawh hi kan Finance Minister pawh hian a tam zawk pek belh theih se. Kan ram hi eng ang pawhin develop mahse, a mihring bera te - kan thalai rualte hi hliam an tuara an damloh chuan awmzia a awm dawn lova, *hmasawwnna-kebai* a nih dawn avangin, kan thalaite target zawnga helai hi nasa taka kan chet tul ka ti a ni.

Kan House Leader Demand ah kan lut ang a. Kan House Leader hi a budget speech sawihona - general discussion ah ka sawi tawh a. A tei rei peihna te, a tumruhna te Pathianin mal a sawm a, kum 40 dawn zet mai veilamah te; tin, House-a thu chiah lova

a tei chhung pawh a rei a. Pu Dy. chungte avang chuan ama mind-set hrim hrim pawh hi, a dinglama thut pawh a la thiam lo deuhin ka hria. Fiamthuinn mite'n an sawi chu, "thu in sawi a, a naupang zawk hi *ruling* ni awm ang deuh hian in sawi in sawi a; House Leader zawk hian opposition mind-set hi a la nei a, a tawpah hian a la rawn khak kual teuh zel a" an ti a. Amaherawhchu, ani pawh hian a thiam ve zel ang a, House Leader hi chuan an naute hi eng ang pawhin han vawm mah ila, a chhan dan chin tur tawk te, 'pa-chan changa awm kha a tul' tih te kha a hre tho turah kan ngai a.

Chuvang chuan, nakinah pawh ka han sawi ang a, a then hi chu thlavang hauhna te, han sawifiah chhonzawm ngawi awmte pawh han sawi duh te pawh ka nei a. Chuta GAD hnuaihan sawi ka duh chu - nichinah khan member thenkhatte'n an sawi a, keimahni legislators ho zingah ngei pawh designated quarter kan nei tlem lutuk hi kan Minister-te, kan MLA-te, sawrkar officers-te pawh an ni ang; a bik takin SASCI emaw, fund dang emaw atanga pawha quarter tam zawk kan neih hi a tul ka ti khawp mai a. Hei hi a hmasaa kan hmalak atan tul ka ti a.

Tin, chuti lovah chuan, kan SDRP-a inziak pakhat - Sustainable Development and Reforms Policy-ah khan, thingtlang khaw tinah Village Development Committee (VDC) din a nih tur thu te, Block Level ah te, District Level ah te an din tur thu inziak kha, tun financial year tharah hian kalpui an tum em? Kawng chi hrang hranga kan development han kalpui turah hian "khairuala, thlei bik awm lova kan tihna tur hmanrua tur a ni" kan ti a. Tin, municipality awmlohna notified town-ah hian 'Town Development Committee kan din ang' tih te a awm tel a. Chunglam te chu kan hawi dawn em? Tin, inziak lian deuh pakhat chu, MINECO - Secretariat-a Chief Minister office sawn thlak tur anga inziak kha a awm bawka; heng te hi kan sawrkar hian "tun vut-vut ni lo, hmanhmawh vak lovin tih a tum zawk em? Hei hi SDRP-a awm a ni a.

Chutih ruala han sawi tel ka duh chu - GAD leh Planning te a inkawp a. Tunhnaiah hian kan sawrkar hian committee peng hrang hrang leh monitoring-tu tur Board te a siam a - Mizoram State Project Monitoring Committee te, Mizoram State Planning Board te, State Policy Coordination Committee te, Mizoram Education Reform Committee te, Mizoram Resource Mobilization Committee te a awm a. A committee emaw, a board emaw composition han en hian, kan sawrkar hian a ngaihtuahna thui tak a hman rualin, sawrkar department officials lam hi kan hmaih nasa viauin ka hria a. Mizoram Education Reform Committee te a awm a, ex-officio tur emaw talah pawh department lam mi pakhatmah awm lo, pawn lam mi thiau an awm a. Chutiang bawkin, heng committee dangah pawh hian sawrkar department mi pakhatmah awm lohna a awm fur mai a. Project Monitoring committee-ah hi chuan a tel loh a tul pawh a ni maithei e, a then awm chhunah pawh hian; *Entirnan*: Resource Mobilization Committee-ah te pawh hian Taxation Deptt. lam atang te pawhin awm ve ta sela, eng emaw hlawk zawka kalna tur hi tam tak a awmin ka hria a; ex-officio tala awm theih dan tur provision pawh kha a awm lova. Hengte hi ennawn theih a ni ang em?

Tin, Vigilance leh Law & Judicial Department-te hi ka han sawi kawp mai ang a. Kan sawrkarin CBI hnena general consent kan pek hi, han sawi nawn leh ka duh a. A lawmawm ka ti a; corruption hi theih ang tawka kan do tlanna tur leh kan Chief Minister ngei pawhin “Chief Minister office thleng pawha chhui tur” tia a han sawi hi, a ropui ka ti a, hei hi kan tihchak a tul ka ti a. Hei nena han sawi zawm rem chu - Lok Ayukta hi sawrkar tharah pawh amendment tul te kan han ti a, chairman te pawh kan han ruat thar a, chak zawk, awmze nei zawka kal tir kan tum a. A prosecution lam tihchak hi tun dinhmunah chuan a ngai ta a. ACB - Home Department hnuiaia mi kan va hawh tawktawk a. An ACR leh an mahni chungchang ziak theitu kha Home a nih avangin, prosecution hi Lok Ayukta-ah mumal zawka kan luh tira, service khata kan luh tir loh chuan, corruption kan check-na tur Dan leh Hrai lekkawhna turah hian

**HON. DEPUTY SPEAKER** : Ngawi lawk rawh aw; kei pawhin ka lo theihngihl a. Dar 5:30 kan pel a. Kan sawi tlang tir law law dawn nge? (*House-in sawi zawh tir a remti a..*) Aw le, sawi zo law law rawh le.

**PU LALCHHANDAMA RALTE, OPP. LEADER:** Pu Dy. Speaker, ka lawm e. Helaiah hian Lok Ayukta awmze nei zawk, hriam zawka kan kalna tur kha a tul hle a ni.

Tin, Finance bikah hian, tukin zingah kan thiante pawhin an sawi tawh a; helama kan House Leader te an thut lai khan, kan Chief Minister, (Finance changtu ni baw) hnenah khan sum a tam deuh thin a. Ani chuan, ‘Khawnpui’ a ti a, “kha kha a dik lo a ni; *Dictatorship* a ni” tiin kan House Leader hian a sawi dum dum thin a. Amaherawh chu, ding lamah a han thu ve ta chiah a, sawrkar hmasa Chief Minister ai khan budget kal laiah hian nuai 11,338.83/- in an dah tam ta hi, “a thatna, finance bikah an hmu thar thut ta em ni?” tih ka zawt a. Sawrkar hmasaah pawh khan a tha zawk a ni ang; thil pawimawh tak tak project han tihah te pawh ‘ tul a awm a ni ang’ kan tih kha kan inhnial thinna a ni.

Tin, Covid laia kan sum chungchangah te pawh nimin lamah statement mumal a awm ta a, covid chungchanga kan inhnialna kha, kei, a tha lo hian ka hria a. Harsatna khawvelin kan tawh khan, ‘kan development sum lut tur ang pawh a lut lo a ni’ tih hi pawm mai ila, ‘development tam tak a lo lut tho’ in tih chi pawh a ni lova. Kan nih tur ang kan ni lo; mi tam takin nunna an chan tih kan hria a ni. Vaibelchhe 2,000/- chuang fe a lo lut lova, ‘development a thuan a thu a ni’ tih hi i pawm tlang ang u.

Tin, Accounts & Treasury-a pension lam khawihhtute hi ‘thuam chak an ngai deuh hlek’ tih kan dawng a. Hetah hian kan senior pensioner-te vawi tam tak manganna an tawh thin avangin, kan Chief Minister, finance changtu khan min lo hriat sak kan duh a ni. Tichuan, ka sawi tur hi Pu Deputy Speaker, (bell hmeh sek ngai lo) ngaih pawimawh em em ngai lai a ni a; kan thut duna kan sawi dun tawh kha.

Kan Chief Minister hi ka khawngaih khawp mai; ‘khawiin nge, engin nge mawlh aw’ tih ka ngaihtuah a. Nimin piah lawk, kar hmasa tawp lamah khan he House ah hian restricted tender chungchang a sawi a, “tender pahnih emaw hi chu loh theih lohna vangin restricted-a kan tih a ngai a ni; ka chhia leh tha hriatna pawhin tih loh deuh kan tum pawhin, hei hi chu a tul; a mawh pawh ka la ngam e” a ti a, House pawh min convince khawp mai a. A awm a lawm maw le. In inzuar thui lutuk thin a; in strict lutuk a. “Eng emaw hi chu a ngai ve a nia” kan ti a, kan sawrkar hmasa kan mualphona pawh kan restricted tender kha a ni a. “In party te pawh khan fund te in mamawh ve a, damlo kan te pawh in ngai a” kan ti a ni. Mahse kan House-ah meuh kan Chief Minister-in puangin a sawi a, “E, a dik alawm” kan ti a, helam pawh kan ngawi thap a ni. Mahse a tuk, tuk leh lawkah House commitment kha, mi thahnemngai thenkhat leh tute emaw an leng a, restricted kha an cancel leh a, open tender tura tih te kha a lawmawm rualin, he House zahawmna, kan Chief Minister thusawi tawh khawilai emaw danglam leh ringawt kha, House-a commitment awm tawh danglam thin khan min tibuai a ni.

Thil tam tak kan House Leader hian a sawi a, helaiiah hian Sakeibaknei ha hriam tak nei angin a hahum thin a, a sawi thin a, Pa-ber a ni a. Amaherawh chu, a sawi dur-dur kha, a tuk lawkah House ni lovah a tawp leh mai chuan, sawrkar kal dan tur thil tam tak a sawite pawh kha, ‘suh’ hi a ‘se’ leh ang tih kha a hlauhawm khawp mai. Chuvang chuan, heng kawngah hian House-a kan sawi tawh hi chu a lo tha lo deuh anih pawhin, House zahawmna kan maintain a tha ka va ti em!

House Leader hi ka khawngaih khawp mai. Party atangin an nawr nasa lutuk thin a, an chhahih buai lutuk a. “Tu tu emaw nawrna avang mai hian i chhia leh tha hriatna hi huai takin dipui/kalpui zel la, he ram tan kum 40 zet i vaihvaiha i thil tih tum i tihna tur kawngah hian, i veilama mite hian i tha tihchak hi kan inhuam a nia. Hlau suh ang che” tih hi ka sawi nawn duh a ni.

A dawt leh ah ka han sawi duh chu - ‘*Year of Consolidation*’ kan ti emaw, hnam issue kan ti a ni emaw, eng zawng pawh hian kan House Leader hi thil tha tur hria, *experienced-person* a ni. “Kan House-ah pawh experience nei ber i ni. I kalpui turah hian huaisen takin kal la, kan ram tan, kan hnam tan thil tha i tih theih ngei kan beisei a, i approach pawh a thain kan hria a ni. Chumi ti tur chuan huaisen ang che” kan ti a, kan fuih ve che a ni. Naktuk tlaiah chawhlui min buatsaih sak i tum bawk si a, khalam sawi tam kha ka han duh tel deuh a ni.

A tawpna tak tak tur point-ah hian, Pu Dy. Speaker, Legislative Assembly sawi loh hi chuan keini hi kan kim thei lo a ni. Kan Speaker te, kan Dy. Speaker te, Commissioner & Secretary te in mi kaihhruaina avangin he session kan neih chhung hlim takin, inpawh takin, engkim a hun takah kan ti thei hi kan lawm a. In efficiency, in service-ah, i veilama mite’n lawmthu kan sawi a ni.

A dawtah chuan, kan House Leader-in min lo chhinchhiahpui atan - Kan Assembly House awmna hi, hun tharah hian ngaihtuahna thar i hmang ang u hmiang. Traffic te, security ah te a harsa tawh khawp mai. Hmun remchang, Aizawl atanga hla deuh pawh a ni maithei e. Khatla Assam Rifles Range hnung lampang bawr te pawh saw; MNF Ministry khan MINECO zawng zawng khu kan laksak tawh a nia. Sawrkar thar hi Delhi lamah a tlatlum thawkhat deuhin ka hria a, eng emaw portion saw han cut ila, Assembly House tur hi i sual teh ang u. Hmun zahawm deuhin i siam teh ang u. Vawiin niah chuan a tawt lutuk tawh, engkim mai hi. Ram rorelna zahawmna tur te, a ropuina tur te pawh hi a keng zo tawh lovin ka hria. Chu ngaihtuahna chu Assembly bik kan sawiah hian ka han belh duh a ni.

A tawpna tak takah chuan, kan House Leader te, kan Speaker te in mi kaihhruaina zawng zawngah leh he House min uapnaah lawmawm kan ti a, i veilama mite hian. Pu Dy. Speaker, kan sawi nawn awn-awna chu - he ram tan, he hnam tan kan ngaihtuahna kan hmang a, ngaihtuahna hrisel lo kan nei lo. 'Thil thaah chuan sawrkar kan thlawp dawn' kan tihah hian kan ding reng a; nangni pawhin chutiang tur chuan min hmu ula. Amaherawh chu, ram tana tha lo tih ruk tum innih erawh chuan, kan theihna chin-chinah mipui thlavang hauh turin kan ding dawn; 'Opposition role kan play dawn' tih hi ka han sawi nawn duh a ni.

Kan demand-te hi pass turin kan thlawp em em a. Chutih rual chuan, tangkai taka sum leh pai hi a nihna ang taka hman ngei kan duhsak che u a ni e. Ka lawm e.

**HON. DEPUTY SPEAKER:** Hei, kan sawi zo thawkhat tawh a, Kan tlai ta deuh mah mah a. Kan han sawi hi kan pel hret thin a, '*a tawp nan*' kan nei a, '*a tawp ber atan*' kan nei a, '*a tawp tak tak atan*' kan nei leh a, kan pel thui ta deuh thin a. Engtin nge ni ang? Kan chawl lailawk dawn nge nia, kan House Leader kan sawi tir ang? Kan House Leader ilo sawm ang u.

**PU LALDUHOMA, HON. CHIEF MINISTER:** Pu Dy. Speaker, House Leader angin ka sawi ang a, nakinah ka wind-up leh tho dawn em ni?

**DR. K. BEICHHUA :** Pu Dy. Speaker, Minister wind-up hunah khan sawi mai se; a hranpaa sawitir kha chu a ni lem dawn em ni?

**HON. DEPUTY SPEAKER:** Kan lo bye-heart than deuh kha a ni a, ka han ti maw le. Anih leh, nakin wind-up hunah House Leader a nihna angin sawi nghal bawk se. Tichuan, kan sawihona kan chawl rih ang a, 6:30 PM-ah kan chhonzawm leh dawn nia. Kan Speaker-in chawhlui a buatsaih a, kan zavaiin kan ei tlang ang a. Kan ril te pawh a tam tawh a, House te pawh hi a hmui deuh rum rum tawhin a hriat a ni.

**PU ROBERT ROMAWIA ROYTE:** Pu Dy. Speaker, zanin kha chu lunch-pack ang, dinner kan ei ang emaw kha a ni dawn lova. Hun a la rei deuh ang em aw? Dar 7 PM-te hi a tha ang em? A khaikhawm tawi tur chi ve ve kha annih hmel tho baw k a.

**HON. DEPUTY SPEAKER:** Anih leh, dar 7:00 PM-ah kan chhonzawm leh dawn nia.

*(Recess)*

**7:00 PM**

**HON. SPEAKER :** Aw le, kan Minister pahnihte demand kan sawi ho kha a ni a, sawihona kan zo a. Tunah chuan Minister zahawm tak Pu Lalnghinglova Hmar-in a demand -te han wind-up se la, sawifiah ngai a tihte rawn sawifiahin a demand-te House-ah pass rawn dil nghal turin ilo sawm ang u.

**PU LALNGHINGLOVA HMAR, HON. MINISTER:** Pu Speaker, ka lawm e. Sawrkarah nikhat pawh la thawk ngai lo kha, Pathian khawngaihna leh Aizawl West-II mipuite duhsaknain MLA kan han ni a. Kan hotute, a bikin kan Chief Minister duhsaknain *Minister* ka han ni a. Tichuan, department pathum kan han enkawl ta a ni a, kan la ti thang lo khawp mai a, file kal dan atangin kan inzir tan a. Vawiinah hian demand-te kan han present chho a, min pass-pui turin kan han dil dawn ta a ni a. Inzir chawp kan nih angin ngaihdam ngaite pawh kan awm dawnin ka hria.

Pu Speaker, ‘zaninah hian’ ti tawh mai ila, a zan lam tawh baw k a. Hmanhmawh taka tih kha ka tum hranpa lova, tha taka ka tih kha a lo tawi deuh a nih pawhin, a tha mai a. Tha taka kan tih kha a sei deuh a nih pawhin, min dawh hram hram turin member-te ka han sawm lawk a ni.

Hei Pu Speaker, kan demand te kan han en a, pass turin kan han dil dawn a ni a. A nihna takah chuan ka han zirchiang thin a; sawrkara ka thawhpuite, department-a ka thawhpuite lawmman leh hlawh tur kan dil dawn hi a ang deuh berin ka hria a. Chuvang chuan, Pu Speaker, nangmah kaltlanga ka ngen duh chu – department-a ka thawhpuite pawh tha taka kan thawh hi a ngai a ni. *Punctuality* chungchangah te, *integrity* chungchangah te leh thildangah pawh kan sawrkar, kan budget kalphung reng reng han en hian, anmahni hi a kaw k thui em em mai a. Chuvangin, ‘inthlahdah thiang lo a ni’ tih hi ka thawhpuite leh Mizoram sawrkara thawk zawng zawngte hian han hre hrim hrim se. Tichuan, kan thawk ho ang a, ‘tha takin i thawk ho tlang ang u’ tiin Pu Speaker, nangmah kaltlangin ka han sawm hmasa duh a ni. ‘Lawm chung mipui rawngbawl tur kan ni’ tih hi kan zavai hian pu tlang ila. A thlantlina te hian bul tan ila, a thawktua te pawhin chu chu hrechiang ila, tichuan, ‘ramin hma a sawn thei ang’ tih ka rilruah a lang lian tlat mai a, Pu Speaker. Chu chu a bul tan nan ka han hmang duh a.

Tin, politics hi a lo mak khawp mai; a chhungril han luhchilh phei chuan a lo danglam thei khawp mai a. I veilama thu ho hian thil an han sawi dan te, tin helam atanga kan han sawi dan te pawh ka han thlir ka han thlir hian mahni nupui te awmdan tur duh uluk mang si lova mi-nupui te awmdan tur uluk ang deuhin, hmanni lawka an uluk vak loh te kha an uluk ta em em mai a. Hman kum, a kum 5 chhung - a kum 10 tel an lo duhtui vak loh kha, an duhtui ta viau mai ni te pawh hian a lang a. Ka han thlir ka han thlir a, *hand-holding policy* kan kalpui dan tur te pawh hi i veilama mite hian min duanpui ti tih deuh maiin ka hria a. SDRP kan han tih te pawh hi keini ai mahin an duhtuiin ka hria a. Kan Opposition Leader tawngkam takin, *constructive opposition* pawh an ni dawnin ka hria a, an chungah pawh lawmthu ka han sawi hmasa duh a ni.

Pu Speaker, Demand No. 7 - Excise & Narcotics Department atanga bul tan hi ka duh a. 1974-ah Inspector pakhat neiin bul kan tan a, kan kum 50-na a ni, kumin hi. Tunah erawh chuan enforcement staff hi a post zatah chuan 559 a ni a, luah mek 431 niin, a ruak hi 128 a ni. Nichinah Member Pu Lalmanpuia Punte sawi ang khan, kan nihna tak zuk thlir chian chuan police motor pawh hi kan zat lo tak tak a ni. Chu chuan Mizoram-ah zu leh ruihlo kan han do dawn ta a ni a. Chuvang chuan, a thawktute chang ni lovin, Kohhran mipui te, tlawmngai pawla thawktu te, tin, Mizoram mipuite kan thawh ho tlan a ngai.

Chuvang chuan, nangmah kaltlangin, Pu Speaker, Mizoram mipuite ruihhlo do kawnga Excise & Narcotics Deptt. leh sawrkar pui turin ka sawm duh a ni. Excise & Narcotics hnathawh dan leh a policy te, 'eng hna nge a thawh' tih zawng zawng hi chu ka inbuatsaihnaah tel mahse, ka ti tel lo mai ang a. Amaherawhchu, kan dinhmun hi chu min hriatpui ve a thain ka hria a. Assembly kawmthlang maiah khuan Commissionerate building kan nei a, district 7-ah tunah hian district office kan nei mek a - Aizawl, Lunglei, Siaha, Champhai, Kolasib, Serchhip leh Mamit te a ni a. Hengahte hian Narcotics cell, ruihhlo-dotu bik pawh a hranpain kan din vek tawh a. Tin, station hi hmun hnihah kan nei a, Lawngtlai leh Vairengte-ah. Tichuan, Vairengte-ah hian check gate kan nei bawh a, tin, Rangvamual-ah outpost kan nei bawh a ni. Kha kha kan dinhmun tawi a ni a.

A dawt lehah chuan kan ruihhlo leh zu man chungchang hi ka han kai tawi ang a. Hmanni khan kumin ami bik ka sawi zawk tawh a. 2023 ah khan zu, 'country liquor' kan tih hi litre 81,221.885 man a ni a, zu bilh lai hi tin 1,94,733 man a ni. 'A sen-chi' kan tih mai IMFL hi um puitling 20,516, a chanve 'half' kan tih mai kha 3,134 a ni a. Heroin hi kg 76.058 Excise & Narcotics hian 2023 khan kan man a. Tichuan ganja hi kg 179.233 bakah a dang pawh a tam a. Amaherawhchu, Pu Speaker, ka han sawi duh lai chu, kan Investigating Officer pakhat hian kum khatah zu kaihnnawihah case 140 a ziaak lutin a bawhzui a, an thawkrim hle a ni. Tin, nitin 'MLP Act' kan tih, *Zu khapburna Dan* hnuaiah hian mi 16.35 man ziah ang a ni a. Tin, ruihhlo bik, NDPS Act hnuaiah hian investigating officer hian kum khatah case 31.85 a ziaaklut a, bawhzuiin, a



enkawl a. Tin, nitin hemi kaihhnawihah hian mi 2.98 a ni a, mi-pathum ang vel man a ni a. Chu chu kan thawktute nichina kan sawi tak 431 te thawhrim dan kha a ni. Tin, Pu Speaker, zu leh a kaihhnawih an man a, chu mai ni lo chuan revenue te pawh hi kan chhung lut ve a. 2023 a kan target chu nuai 180 a nih laiin nuai 237 sawrkarah kan chhung lut a ni.

A dawt lehah chuan, wine chungchang hi sawi ka duh a. Pu Speaker, *The Mizoram Liquor (Prohibition) Rules, 2022* tlawhchhanin winery pahnih - Hnahlan leh Champhai-ah grape atanga siam wine hi siam phal a ni a. A zuartu phalna nei hi vendor 43 Mizoram-ah hian an awm a ni. Pu Speaker, nangmah kaltlanga Mizoram mipuite ka han hrilh duh chu - a bak zawng hi chu dan bawhchhia vek an ni, tun dinhmunah chuan. Nichinah khan member zahawm tak takte'n lakhuihthei-a siam wine tih te, balhla tih te, sunhlu tih te rawtna hrang hrang kha a awm a, tunah rih chuan he dan hnuaiah chuan dan bawhchhiatna vek a la ni a.

Amaherawhchu, Pu Speaker, han sawi hret ngai chu, nichina mite kha a mal te tein ka react lo mai ang a. Tunah hian ngaihtuahna awm, officer-te nen pawha kan han sawiho chu, grape-a wine siam kan phal tho a nih chuan, lakhuihthei te, dragon fruit te, balhla te, sunhlu tea siam a wine a ni emaw, a beer a ni emaw siam te hi phal ta ila, 'kut-hnathawktute tan hian a tha dawn mang e aw', tih te chu kan sawi ri feih-feih tan tawh a ni. Amaherawhchu, a kalpui dan turah te fimkhur a ngai a, chu chu tuna kan sawiho chin chu a ni a.

Tin, Pu Speaker, zawhna ka zawh duh chu - kan ram dinhmun dik tak hi kan sawi tlan a ngaiin ka hria a. Budget a awm a, demand te a awm a, kan sawiho a, kan pass a, department-in a kalpui piah lamah hian a tak ram, engvangin nge sawrkar a pian a, engvangin nge department a awm a; engvangin nge thawktute'n hlawh an neih? A tawpkhawkah chuan Mizoram thianfai tur te, siamtha tur te a nih lai hian, kan indaih loh dan te, kan dinhmun dik tak en hian zu chhe em em mai ina kan thalaite an thi zawih-zawih mai te hi 'engtinngeng niang aw?' tih ka ngaihtuah a. A chang chuan ka muhil hlei thei lo a ni.

Pu Speaker, dik tak chuan a in lo thei lo an awm bawk si a, engti chiahin nge ni ang aw; zuar dawn ila a tha ber lo thei a. Tun aiin intihchak tum ila, kan ram dinhmun - tlawmngai pawlte nen theihtawp kan chhuah pawhin heti mai hi kan ni a, ngun deuha kan ngaihtuah tlan chu a ngai a, 'a awm chhun a chhe si a, an thi zawih-zawih bawk si a' tih te Pu Speaker, ngaihtuahnaah a awm a ni. Engpawh ni se, Pu Speaker, khalaiah khan kan cham rei lutuk ang tih a hlauhawm a; Excise & Narcotic Department hian mamawh kan nei ve a ni. Chungte chu han sawilan a tha a, mihring mamawhna chu kan sawi tawh a. Lirthei te, quarter chungchang te, tin kan ralthuam leh kan hmanruate hi tun aia tihchangtlun hret te chu kan mamawh chho dawn a, sawrkarah te pawh rawtna kan thlen dawn a.

Tin, chubakah chuan, District 11-ah hian in office te pawh hawn tumin hmalakna te pawh a kal mek a, zawi zawiin sawrkar sum awm hunah kan bei chho dawn a ni. Kumin chhung hian zu leh ruihhlo chungchangah hian meeting vawi 6 hmun hrang hrangah kan nei tawh a. Tin, January, Ni 13 khan a sawihona te pawh kan nei a. Kan Chief Minister hovin Kohhran thalai hruaitute ko khawmin kan sawiho tawh a, “engtingge kan tih ang; hawh u, i tang ho ang u” tih te. Tin, kan dinhmun dik tak te pawh kan sawi a ni.

Tin, Pu Speaker, he ruihhlo dona kawngah hian kan inthuum-chak theihna turin tunah hian DPR te kan buaipui a, hmalak te pawh kan tum zel a, kan State budget piah lamah hian tan lak tumin kan inbuatsaih mek zel a, thui tak ke te pawh kan pen tawh a ni.

Tin, ‘ruihhlo engtingge kan man theih ang’ tihah pawh hian, NDPS Act hnuaiah hian ‘informer’ kan tih, midang hrilh theitu turte tan lawmman te pawh siam a ni a. Narcotic Control Bureau te nen tangkawpin Mizoram sawrkar sum sen belh ngai lo hian, chutah chuan nuai chuang te pawh hlawh theihna, sing eng emaw zat hlawh theihna hi tunah hian duan tawh a ni a. Amaherawhchu, Pu Speaker, a tawp thlen a ngai; witness-ah te tan a ngai a, chutiang ho tan pawh awlsamna kan siam chho zel dawn a ni.

Ruihhlo kan dona kawngah hian website emaw, portal emaw siam turin kan inbuatsaih mek a. ‘Offender’ kan tih te, ‘repeated offender’ kan tih, thil tisual thinte pawh chhinchhiaha, *Dan* ina phal chin tarlana citizen information report an pek theihna turin reporting module te pawh buaipui a ni dawn a. Chumi hnuaiah chuan mipui-nawlpuite pawhin “Heng ho hian ruihhlo an zuar e” tia an report theihna tur hi mipui ban phakah siam tumin hma kan la mek a ni.

Pu Speaker, ka han sawi lan leh duha chu, ‘ruihhlo kan do’ kan tih hian, a ruia te hi kan do hran lova. Mizo thalaite, Mizo mipuiah ruihhlo avanga talbua tam tak an awm; anmahni chu a hranpain kan do lo. Amaherawhchu, ruihhlo chu kan do dawn a. Chuta ka han chah duha chu, khawlaiah te, mipui vantlang hmunah te chuan i rui lovang u; i inchiu lovang u. “*Hawh u, i inthiarfihlim hram hram ang u*” kan ti a. A nih loh erawh chuan, tuna kan tih mek ang hian sawrkar tha chakna hmangin khawtlang hruaitute nen tangkawpin, khawpui hmun lun lai leh hmun ualau chu thenfai zel kan tum a. Hemi chungchangah hian Police Department pawhin min tawiawm tha hle a, tlawmngai pawlte pawh an tang tih kan hria a, kan lawm hle a ni.

Pu Speaker, tikhan, Excise & Narcotics Department hnuaiah hian sawi duh tam tak nei mah ila, ka sawi rei kha kan hlau tlang deuhin ka hria a, kan duh tawk mai ang a. Nakin, a tawpah khan kan thusawi hrang hrangte kha tawitea react kan tum dawn si a.

Demand No. 22 - Sports & Youth Service Department chungchang hi; he department hian ‘eng chiah nge thlen kan tum’ tih te, ‘eng hi nge kan tih ber le’ tih te hi Pu Speaker, ka ngaihtuah thin a. Infiam-mite kan promote a ni a, tute’n emaw eizawna an lo hmu

a, tute'n emaw nun khaw nuam zawk te an lo nei a, tute'n emaw ruihhloah leh thildangah te an lo fihlima, nun hrisel zawk an lo neih theihna tur a ni tih ngaihtuah chung lo chuan 'heng department hi kalpui chi a ni awm lo mang e aw', ka ti a. Tin, he department kan sawi dawn chuan, thil hrang hrang lo chhawpte leh lo tih tawhte pawh Pu Speaker, han sawilan a ngai dawn a.

Hei, hmahlir te pawh kan han nei ve a, hei kan department thawktute pawh ka zah khawp mai a, tuna information min pek pawh hi chhah el-awl tak mai a ni a, Sports & Youth Services Department leh Mizoram State Sports Council atanga kan dawn pawh hi. Amaherawhchu, kan chhiar vek hman lova, zaninah hian ka inbuatsaihna angin a kaitawi zawngin ka han kal mai dawn a ni a. Kan hmahlirah chuan – *'A tam thei ang ber training leh competition kalpui'* a ni a, kan zawhna thenkhatte pawh ka chhang nghalin ka ring a, tikhan. Kan Coach-te hi thingtlangah an koh phakah dah kan tum a, kan dah mek baw k a. Thingtlang mite pawhin Mizoram State Sports Council-ah a ni emaw, Sports & Youth Services hnuaiah a ni emaw Coach hi kan dil thianga ni. Tin, Pu Speaker, kan member-te pawh hian hria se ka duh chu, Coach hi kan dil thei a, an awl lai a nih phawt chuan an kal zel ang. Aizawl-a office luah tur an ni lova, kan Coach te hi. Kum tira an office ka tlawh tumin kan sawi tawh a; April thla atang chuan tumah hi helai hmuna awm tur kan nih loh avangin, in taksa pawh lo inti fit ula, 'hun kan inpe a ni' kan ti a. Chuvang chuan, kan che chhuak dawn a ni. A tam thei ang competition siam kan duh a, amaherawhchu, sum leh paite kan mamawh a, a tul angin kan khawnkhawm zel ang a.

A dawt lehah chuan, Sports Association thuam chak kan ti a, hemi chungchangah hian sawi tur a tam hle mai. Tunah hian Sports Association kan enkawl danah hian Mizoram State Sports Council hian duat takin a enkawl a, sports promotional fund te discipline 33 hnenah a pe a, a hnuaia inziah luh duh discipline dangte pawh an awm zel a. Heng ho tana kan sum pek theih hi a beitham deuh hlek a, nakinah a kimchangin kan sawi ang a. Hemi piah lamah hian 'engtingge kan induat ang' tih te ruahmanna kan siam mek a, 'Academy neih sa tihchangtlun' tih te kan dah a. Tin, 'Organisation tihchak' - sports kan inenkawl na tihchak a ngai a, tin, 'Thawhpui leh partner zawn' - pawn lamah thawhpui kan mamawh dawn. Reliance te pawh kan dawr tawh a, Tata Trust te pawh kan dawr mek a. Tichuan, midangte pawh kan dawr dawn a, 'engtin nge kan intihchak theih ang' tiin.

Tin, a tawp berah chuan, kan hmahlira tel chu, Pu Speaker, kan Member-te lawm loh zawng tak tur chu - Bungraw sem tihtlem a ni. VIP zin chhuak turin a budget neitlem ber department atanga 'ball, net, TT Bat' kan han tih chi hi tihtlem kan duh a. Sports Association ni lo hnena sports bungrua sem hi tihtawp kan duh a ni. Chuvang chuan, a changa kan lo kawm deuh anga kan ngai a nih pawhin, kan inhrethiam hram hram ang a. Chungte chu kan kalpui tum dan a ni a.

Tin, Pu Speaker, a dawt lehah chuan, *Uar-bik* discipline leh ‘Vision 2036 Olympics’ kan ti a. India-in 2036 Olympics thlen a tum a, tunah hian a bei tan tawh a ni. Hei hi Union Sports Minister pawh vawi hnih ka sawipui tawh a - tumkhat chu Delhi-ah, tumkhat chu Guwahati-ah a ni a, chutah chuan ka thusawi pawh a pawm ve hle niin ka hria, Pu Speaker.

India hi ram-hausa a ni a, pawisa pawh a nei tawh; Olympic chu a thleng thei em em ang. Infrastructure, world-class infrastructure hi a siam thei. Amaherawhchu, tu infiammi nge tah chuan inel dawn? Chinese em ni? American em ni? Indian kal tel ve theihna turin tun atanga programme kan buatsaih loh chuan kan tlai tawh ka ti a. Tuna kum 10 hi 2036 ah chuan kum 22 a ni tawh dawn; chuvang chuan, ‘kan tlai tawh a ni’ te kan ti a. Chumi mil chuan ‘Vision 2036 Olympics’ tih hi kalpui kan tum ta a.

Tin, Pu Speaker, ‘hei hi India ramah a ti hmasa ber nih kan tum’ kan ti a. Tichuan, Youth Affairs and Sports Ministry lam kan zuk dawr a, chutah chuan hemi mil hian ‘*National Sports Conclave* neih kan duh e’ kan ti a. Tichuan, ‘proposal rawn thehlut rawh u’ an ti a, kan thehlut a, tunah hian cheng nuai 68.85 min sanction nghal a ni. Tichuan, he session zawh ve leha tih hi kan tum a. Amaherawh chu, an pawisa rawn thlen a chawpchilh deuh avangin Lok Sabha inthlan zawh lamah emaw hian Mizoram ah a vawikhatna atan *National Sports Conclave - Vision 2036 Olympics* kan buatsaih ang a, India rama sports lam mithiamte sawmin, ‘engtin nge he Olympics-ah hian Mizofate leh Indian mite a tam thei ang kan tel theih ang’ tiin. Chutah chuan, *Uar-bik* discipline-te Pu Speaker, neih kan tum dawn a ni. ‘Engte nge kan neih theih’ tih te pawh kan han zir chiang dawn a ni.

Nichina an sawi ang khan, SAI Centre kan neihna te hi Olympics lamah chuan ‘kan beisei awmna a ni ang a’ kan ti a. Tun hnai National Games a kan medal lakna te kan han zir chiang a. SAI hovin training - calendar year kum tluana training min peknaah deuh zel a lo ni. Chuvang chuan, ‘training a ngai; a hmun hma neih a ngai’ te kan ti a. Chumi min pui tur chuan PSU te pawh kan dawr tawh a, indawrna pawh a kal mek a. Kan hlawhtling thei a nih chuan, heng ho tana training bik deuhna te pawh siam tumin tunah hian hma kan la mek a ni, Pu Speaker.

Tichuan, Pu Speaker, discipline 33 Mizoram State Sports Council hnuaia kan enkawl chung chuan a thlan bik deuh, duat bik deuh te kan nei dawn a. Chu chu kan ram kal zelah hian a tangkai dawn a ni tih kan hriat avangin Mizo te ina kan tuipui ber ber a ni lo anih pawhin, a medal lamah ram pum huap-inelna ah hian kan hniam miao si avangin, ‘kan tan tlan a ngai e’ kan ti a, chulam chu hawi kan tum a ni.

*Incentive Cash Award* chungchang hi; Pu Speaker, kan sawrkar hmasa khan chak takin a kalpui a, 2021-2023 inkar ringawt khan infiam-mi 479 hnenah cheng nuai 73 chuang a lo sem chhuak a, a lawmawm hle a; hei hi chhunzawm kan tum a ni. Amaherawhchu,

khatih lai khan Olympic Sports ah chauh khan sem a ni a, Non-Olympic Sports kha eng emaw zat an awm si a. Tin, Olympic Sports hi kumin Olympics ami hi a dawt lehah a lo inthlak a, a inthlak a inthlak bawk si avangin, Mizoram State Sports Council hnuaia discipline 33 tan hian he Incentive Cash Award hi siam kan tum a ni tih hi Pu Speaker, nangmah kaltlangin ka han puang nghal duh a. Hei hi ZPM-ina kan promise, inthlan dawna kan au-hla a ni a, ‘discipline tinte hnenah kan sem dawn a ni’ tih kha, a taka kalpui kan tum a ni.

Tin, Sports Association tan Incentive Cash Award ang hi siam kan tum a, chu chu a ruangam tur te duan chhoh mek a ni a, Mizoram State Sports Council Executive Committee Meeting ah pawh hei hi kan pass tawh nghe nghe a ni.

Pu Speaker, training te kan han kalpui a, *Khelo India Centre* te kan Sports Minister hmasain a lo sualchhuak a, a lawmawm hle a, *Khelo India - State Center of Excellence - boxing, judo leh weight-lifting* tan a sual chhuah te hi a fakawmin, a chhuanawm hle a ni. Mizoram State Sports Council leh SYS hian Non-Residential Coaching Programme kan kalpui mek a, a zavai chuan kan sawi lo mai ang a. Fit India Movement hnuaiah *Fit-Mizoram* kalpui mek hi, uar zawka kalpui kan duh a. Fit-Mizoram hi kan kalpui uar loh chuan *Fat-Mizoram* kan ni tan dawn tlat. Chuvang chuan, Pu Speaker, hriselna lam kal uar hi kan duh dawn a ni.

*Youth Wing* hi kan kalpui mek a, kan Member zahawm tak Pu T. Lalhlimpuia sawi - NSS chungchang te kha a lawmawm hle a, min bengvarin ka hria a, ‘theme bik neia kalpui’ a tih te kha a tha hle mai. Environment humhalh leh ruihhlo do ang zawng tein kan NSS neihte (tunah hian member 30,000 chuang tunah hian inziak lut a), anni ho nena kan beih chuan awmzia a nei ang tih kan ring. Pawl 11 atangin College, University ah NSS hi kan nei a. Tin, kum hmasaa thisen an pek ringawt pawh Pu Speaker, a chhuanawm tham khawp mai; unit 6,093 lai a ni. Chuvang chuan, annite nen hian thawhho that leh zual kan tum chho ang a.

‘*Nehru Yuva Kendra*’ leh NCC te hi battalion 4 awmin, an hnuaiah hian inziaklut thahnem tak an awm a. Sipaiah eng emaw zat an tling a, sipai officer-a tling tharte pawh tunhnaiah kan nei a. Anni ho nen hian drug awareness campaign te, pollution awareness campaign te leh blood donation drive te pawh neih tawh thin a ni a, neih chhonzawm zel kan tum a ni. Chutiangin Scout & Guides lamah te pawh kan sawi seng lo.

Pu Speaker, kan duhtawk dawn hnai mai ang a. Sports bikah hian - Sports & Youth Services kan nei a, a hnuaiah hian Mizoram State Sports Council kan nei a, chu chu Sports Association te enkawltu a ni ta a. Pu Speaker, nangmah kaltlangin Mizoram mipuite hriattir ve hrim hrim a tha a; a chhan chu, hriat pawlh a awm thei a ni. Mizoram State Sports Council hi autonomous body niin, a hranpain Act a nei a, 2002 khan. Chumi hnuaiah chuanin Sports Council-ah hian thawktu 89 a ngheta thawk kan awm a.

Chubakah chuan, hlawh nei lova thawktu Sports Association ah hian enkawltu thahnem tak thahnem ngai em em mai, chawi belh huama thawktu an awm a, anni nen Mizoram Sports hmasawn nan hian kan thawk ho zel dawn a. Sports Association buaipuia enkawlina atan ₹2,15.50 lakh dah a ni a. Tin, District Sports Committee (nichina kan sawi) enkawlina atan ₹25.35 lakh dah a ni bawk. Pu Speaker, District Sports Committee chungchangah rawtna hrang hrangte a awm a. Engpawh ni se, sawrkarin beng a dawh zel a, ‘engnge tha ber’ tih te kan ngaihtuah ang a. A tul leh tha a nih chuan, ram tana tha tur chuan han inher-rem hret te pawh a ngai mai thei a, chung chu ka han sawi lawk duh a ni.

Mizoram State Sports Council hian thil hrang hrang a ti a, chung zing a langsar tak chu - *Sports Infrastructure* a ni a. Sawrkarin technical authority-ah a pawm tawh avangin, gazette chhuah tawh a ni a, 2020 atang khan uar takin sports infrastructure kalpui a ni. PMJVK hnuai ah hian project 84 kalpui mek a ni a. Tin, hei bakah hian thil dang *Khelo India* scheme-ah te, tuna SASCI (S.A.S.C.I a ni a, a lamtu hmasa lam hian ‘SASCI’ hi kan ti a.) Engpawh ni se, hemi hnuai pawh hian Sports hian hna eng emaw zat an thawk bawk. Tichuan, Pu Speaker, heng bakah hian Residential Sports Training Center hi Saidan, Kolasib-ah neih a ni a, hei hi football tan a ni a. Boys’ Hockey Academy, Kawnpui-ah kan nei a, tin, SYS - Football Academy Lunglei-ah kan nei bawk a.

Pu Speaker, ka han sawi lan duh chu heng hmunah te hian chaw-ba, leiba hi kan lo nei nual mai a. Tunah hian Saidan chaw mana kan leiba hi ₹21,32,900 lakh a ni a, Boys’ Hockey Academy, Kawnpui-ah ₹24,17,800 lakh a ni a. Heng atan hian tun budget (kan Demand sawi mek) ah hian ₹11.05 lakh ve ve chiah dah a ni a; kan han buai phawt chu a ni a. SYS - Football Academy Lunglei-ah ₹21,17,500 lakh a nei mek a, hei phei hi chu Budget Head-ah a lang lova, kan ba neih zat hi kan Academy enkawlah hian ₹67,22,200 lakh a ni.

Hei vang hian, nichina Pu Jeje Lalpekhlu rawtna kha Pu Speaker, ‘engtingge kan kalpui zel ang’ tih hi ngaihtuah tham a ni ta a. ‘Investor lian te kan sawm dawn nge, midang pawnlam mite nen kan indawr ang’ tih hi ngaihtuah mek a ni. Tun hnaiah PSU liante pawh pahnih chu kan indawr tawh a, a then chuan a *trial* angrenga rawn en phawta, anmahni Academy leh keimahni Academy te han inkhelha, chumi hnuah kan level te teha tih te an ti a. A then chuan inthlan zawhah, ‘budget tharah rawn kal leh rawh u’ te an ti a. Chungte nena kan thawk ho lo a nih chuan, Pu Speaker, kan budget hian a zo lo chu a ni deuh der a; Residential Sports School eng emaw zat sak mek a la ni bawk nen, rin ai chuan Pu Speaker, thil hi a awl-ai dawn lo khawp mai a. Amaherawhchu, ‘theihtawp kan chhuah ang’ tih erawh chu kan sawi lang duh a ni. Sports bikah chuan khati khan kan duhtawk leh mai ang a.

Pu Speaker, Demand No. 28 - LESDE (Labour, Employment, Skill Development & Entrepreneurship) chungchangah hian tawite han sawi leh ila.

He LESDE hi Ministry pahnih - Ministry of Labour & Employment leh Ministry of Skill Development & Entrepreneurship hnuai awm a ni a. Tichuan, department-upa tak la ni lo mahse, Labour & Employment hrim hrim hi chu a rei tawh a. 'LESDE' tih hi chu a-tunhnai thil deuh a; amaherawh chu, Pu Speaker, hna hi a thawk tha hle a ni, he department hian. Nichina kan Sports Minister hmasa ka fak ang chiah khan, kan LESDE Minister hmasa pawh ka fak duh a, a chhan chu - a hun laiin he department hian nasa takin hma a sawn a ni. Tuna LESDE hmel kan hmuha hi Pu Speaker, keini thawhchhuah a la ni lova, kan thawhrah pawh a ni lova, Ministry hmasa thawhrah a nih avangin, an fakawm ka ti a. Nangmah kaltlangin Pu Speaker, an fakawm zia hi kan puang duh a ni.

Tichuan, Labour & Employment Wing-te an nei a, chumi hnuai a chuan Labour Law hrang hrangte keimahni mil turin an siam rem a, tichuan thil hrang hrang an kalpui. LESDE hnuai a hian Job Fair-te kalpui thin a ni a. Tin, *EmpEx Portal* chungchang hi Pu Speaker, hei hi 'Employment Exchange-ah kan inziaklut' tih ang kha online-in a inziaklut theih tawh a ni. A hawn tirh chuan mi 32,400,2023 January khan an inziaklut a, tunah erawh chuan Pu Speaker, January thla khan mi 2,12,551 an inziaklut tawh a ni. Chuvang chuan, nichina zawhna awm, Member zahawm tak Pu C. Ngunlianchunga zawhna kha, sum indaihlohna avangin Lawngtlai ah khan kan la indah thei lo deuh a nih pawhin, Pu Speaker, a inziaklut duh kha chu *Empex* kaltlang hian a inziaklut theih reng tawh a ni. Hei hi thalai thenkhatin an hria a, la hre lote kan awm a. Pu Speaker, LEDSE hnuai a thil lian tak pakhat chu - *Mizoram Building & Other Construction Workers' Welfare Board* hi a ni a. Sum a thahnem a, fimkhur pawh a ngai. He Board hi, Pu Speaker, Mizo-mipuite hian hrechiang ila ka duh hle mai. Kum 18 – 60 inkar; India khua leh tui; kum khata ni 90 hna thawk thin labour hrang hrang, *Entirnan*: thing mistiri, lung mistiri, cement mistiri leh an hnuai a labour-te, welder te, plumber leh thil hrang hrang hnathawk chi ho chu a inziaklut theih vek a ni ber mai. Chuta an inziaklut chuan, chumi te chuan pension an nei thei; hmeichhiain nau an neihin, an thihin, inneih lawmpuina, an fate zirna, tin an fate leh an chhungte skill zirna a thlawnin, chung zawng zawng chu bilh tel a nih lai hian, han inziaklut hi an thahnem tho nanging, thawk ngei ngei si, construction worker ni si, building worker ni si inziaklut lo an la awm avangin, Pu Speaker, tun tum hi remchanga lain inziaklut turin kan insawm duh a.

Heng atang hian 'Labour Cess' kan tih, contract hna thawkte apiangin a an rawn chhunluh kha a tling khawm ta a. Kum 2023-2024 February thla thleng khan ₹44,51,48,895 Labour Cess-ah hian sum a lut tawh a, sum hman tawh hi ₹10,08,31,944 a ni a. Chuvang chuan, Pu Speaker, Mizoram-mipui a taka thawktute hian hengte hi hre chiang zel se a duhawm hle a ni.

LESDE hnuai a hian thawktute inziaklut luhna '*e-shram portal*' pawh a awm a, kum 16 - 59 inkar tan a ni. Kan thiam lo a nih pawhin kan *common service center*-ah te leh office lamah kal se an lo ziaklut zel ang che u; hamthatna tam tak tak a keng tel. Chung zingah

chuan engmah sen belh a ngai lova, accident a thihna thlenga ₹2 lakh hmuh theihna te pawh a awm a ni. Khatiang hamthatna tam tak kha a awm.

Tin, Employment State Insurance (ESI) chungchang te hi Pu Speaker, mi 10 chin chung lam chhawrte inziahlul theihna a ni a. ₹2,1000/- hlawh pha lo anmahni hnuai mite tan thil hrang hranga hamthatna awm heng – ‘healthcare bill tang’ te kan ti, healthcare chu tah hian a tha; a thlawn a ni, heng ho tan hian. ‘Inziaklut zel ang u’ tiin Pu Speaker, tun budget session hi campaign-na atan kan hmang deuh a ni.

Tin, skill development chungchangah pawh sawi tur a tam hle mai a; amaherawchu kan sawi vek lo ang. Industrial Training Institute pathum kan neih mek chungchang chu kan sawi tawh a, kan upgrade chho zel a ni. (Kan zawhna kha kan chhang pah ni se). Kuminah, tun session-ah hian *Solar Technician* trade te dah belh a ni a. Tunlai khawvelina a buaipui mek - *Drone Technology* hi, a zirna kum tharah kan dah dawn a ni.

Tin, Pu Speaker, Land Revenue lam tan surveyor pawh training kan nei mek a, National Trade-ah tun hnaiah hlan kai a ni a. National Council for Vocational Training-in min recognized tawh avangin kan surveyor chhuakte pawh hi an chhawr theih zel ang.

Pu Speaker, *Mizoram Youth Commission* a la awm bawk a, LESDE hnuai hian. Tunah hian Chairman tha tak mai kan nei a, phur takin kan kal mek a ni. A chipchiarin kan sawi lo ang a; hmachhawp te kan nei a, amah ngei pawh zin kualin hma a la chho mek a. Kan ram pawn lam mite pawh kan dawr nual tawh a, an project kal dan te chu kan hriat tlan a nih avangin ka zu lut tawh lo mai ang e.

Pu Speaker, hmanni khan zawhna chhan pah khan ka han sawi zawk a. Kan lawm ve na em em chu – ‘PMKVY’ kan tih kan kalpui thina kha tun sawrkar kumah hian pawisa kan hmu si lova. Tichuan, Chief Minister phalna lain Ministry lamte kan dawr a. Chumi hnuah chuan, ‘lo kal leh rawh u’ an ti a, kan zu kal nawn leh a. Kan sawi tawh ang khan, Pu Speaker, Mizo thalai mi 10,220 te an training theihna turin cheng vaibelchhia 31.6 chu March Ni 1 khan sanction kan hmu a ni. Hei hi project kan zu dilnaah pawh ka sawi lan tawh ang khan, ‘*Bana-kaih*’ tih kha kan dah kher a ni a, Mizo tawngin; chu chu kan zu present ve a ni. ‘*Bana-kaih* hi khu lam pawhin min lo pawmpui a ni’ tih kha, Pu Speaker, House-ah te pawh hian kan han puang duh a ni.

Tin, Pu Speaker, Mizoram KVI Board nen thawhhona thuthlung kan ziak a, KVI hian hmun-hma tha tak tak an nei a, hengte hi an hmang tangkai lo ni lovin, hman tangkai zawk theih niin kan ngai. Nichina kan han sawi tak, a hnuai training hrang hrangte kha KVI hian anmahnia an kalpui ve theih dan tur te kan ngaihtuah dawn a. chu nilovin, kan training partner leh kan training center ten chu KVI Training Center chu an hman tangkai theih dan tur te kan ngaihtuah dawn a ni. Chutiang tur chuan Mizoram KVI Board Chairman pawh a phur hle a, thawhhona nimin mai khan kan ziak a. Hei hi ZPM-



in kan policy-a kan dah ‘Convergence’ kan tih kha, *thawh-ho* kha a ni a. LESDE leh KVI Board chu banah kan inkai tan der chu a ni deuh mai a, Pu Speaker. Tichuan, tunah hian ‘*Sankalp*’ kan tih hnuaiiah entrepreneur-te tan ‘sum leh pai project rawn dil leh rawh u’ an ti a. Ni 4.3.2024 khan kan thehltut a, ₹5 crore a ni a, hei hi hmuh ngei pawh kan han beisei a ni.

Kan budget han tlakhniam hret thu te kha thahnemngaite’n min han sawipui a; a dik a. Amaherawhchu, Pu Speaker, *bana-kaih policy* a taka kalpuitu tur department kan nih avangin, hei hi finance-ah leh planning-ah khan a inbilh tel a. Kan Finance Minister-in ‘a thawk apiang te’n an lak tur’ a tih avangin, a thawk chak nih kha kan tum a, a la-tam nih pawh kan tum dawn a ni. Chutiang tur chuan LESDE hian hma kan la mek a ni.

Pu Speaker, a tawp dawn atan chuan, kan thusawi (a zavai ni lovin) han react kha a thain ka hria a. A ziaikin kan nei a, ka rawn sawi lo palh a nih chuan, nakinah min rawn dil ula, kan pe thei che u a, Pu Speaker, nangmah kaltlangin. Lunglei West Bialtu Pu T. Lalhlimpaia sawi - NSS leh NCC chungchang nichin khan ka sawi a; keimah min han khawih deuh zawktu chu, ‘*theme neia kalpui*’ tih lai kha a ni a. Department hian hawi zawng neiin kal ila, tih zawng te, tih loh deuh zawng te nei ila, chu chuan a tawpah kan goal kan chhuihlut theiin ka ring a. Chutiang tur chuan ‘NSS te hman tangkai hi a theih dawn’ tih min hrilh avangin, a chungah pawh ka lawm hle a. Tin, ‘training dan tura thlan fimkhur’ a tih, East Tuipui Bialtu Pu Ramthanmawia sawi kha kan lo vawng reng ang. Kan lawm hle a ni.

Pu Lalramliana Papuaia sawi - ITI ngaihsak chungchang a sawiah khan, Principal ruak hi a zavaiin, a pathum-ah hian a ruak vek a. MPSC-ah tunhnai ah hian exam neih a ni a, 2 lak tur a ni a, exam pawh an zo tawh nghe nghe a ni.

Foreign-a thawktute chungchangah overseas placement te hi chu tun dinhmunah chuan Home Department hnuai a ni a. LESDE hnuaiia kalpui hi tun dinhmunah hian kan dil mek a, min pe phal turah pawh kan ngai a, hei hi tha tak leh fimkhur taka kalpui tum a ni.

Pu Speaker, Aizawl West-I Bialtu Pu TBC Lalvenchhunga khan khulai Rangyamual leh a chhehvel kha a sawi a, hei hi chu a harsa khawp mai. Tuk hnih - tuk thum an zuk duty a, an bo duak a, an kal bo a, an rawn lang leh a. Tan-ina khung ngawt theih anni lova, mi-khawngaihthlak an ni. Anni ho enkawl na tur lian tham hi awmin, enkawl chu an ngai khawp mai. Excise tha in a tlin lova, zep thu a cheng lo; kan inmualpho pawh a ni ang. Khawtlang nen, Kohhran nen, department dang nen i tangho ang u. Kan khawpui lun lai leh kan vantlang hmunhmate tal hi chu a fihlimna turin, ‘hawh u, i tangho ang u’ tih hi remchangah ka han sawi nghal a ni.

Pu Speaker, Lawngtlai West Bialtu, Pu C. Ngunlianbunga rawn sawi – “Sangau-a ₹10 lakh man lo thawh tawh, sports department hnuaiiah” tih kha, kan han inzawt chiang a,

keimahni atang chuan administrative approval leh expenditure sanction awm lo, project awm chiah lo a nih avangin, ‘kan lo inzawt chiang ang e’ tih hian kan han sawi phawt mai ang e. Tichuan, LESDE chungchang chu kan chhang tawhah ngai ta ila.

Pu Lalrintluanga Sailo, Dampa Bialtu-in, “infrastructure enkawl nan a Kohhran lam te pawh han be chhin teh u” a tih kha, a bengvarthlak hlein ka hria a. Kan Residential Sports School liante hi Kohhran lam te hian an la duh a nih chuan, kan inhawng reng a ni. Kan han sa zo ang a, enkawltu tha hnena a luh kha kan duh a ni. Pu Speaker, Champhai North Bialtu Pu H. Ginzalala, Hrangturzo Bialtu Pu Lalmuanpuia Punte, Aizawl West-III Bialtu Pu VL Zaithanzama te leh mi thahnem ngaitute’n “grape-ah chang ni lo, engtingge wine kan siam theih ang” tih an zawhna kha, nichinah khan ka chhangin ka hria a.

Tin, “Youth Services chawinun; chawilar” an tihah pawh hian, theihtawp kan lo chhuah ang e. Mission Vengthlang Science Centre chawinun chungchang pawh hi an sawi fo thin a. Science Centre khu Imphal hnuai a awm a ni a, tunhnaiah India Sports Minister hnenah kan dil a, “Guwahati hnuai a min dah rawh u” kan ti a, “kan dah nghal ang” a ti a. Hmanni khan a Secretary-in min rawn phone a, dah turin kalpui mek a ni a, hma te pawh kan sawn kan beisei a ni.

Tin, Siaha Bialtu Dr. K. Beichhua khanin “Huapzo-sports services ni rawh u” a tih kha, a sawi thiam hle mai. ‘Thingtlang mite min huap rawh u’ a ti kha a ni a. Nichina kan sawi khan a chhang tawhah ngai ta ila. ‘ITI hmasawna tur’ a tih te kha, tunhnaiah STRIVE hnuai a ₹68 lakh hmangin a equipment bik tihchangtlun a ni a. Pu Speaker, kan ITI, Aizawl hi a upa tawh a. A hmunhma a tha si, a building a chhe si; a bialtu kan member Pu Lalchhuanthanga hian a vei em em bawk a. Khumi atan khuan SASCI hnuai a cheng vaibelchhe 25 tunah hian ruahman mek a ni a, kan lawm hle a ni.

Pu Speaker, Pu Jeje Lalpekhlua, South Tuipui Bialtu zawhna – “Sports & Youth Services Football Academy te leh academy dangte tih changtlun” tih kha, nichina kan sawi tawh khan a chhangah ngai ta ila. TATA Trust - Centre of Excellence tawp ta hi a uiawm ka ti a, khatiang ang chi kha partner kan nei leh thei ang em kan hre lo. Sawi thui tawh lo mai ila, khalai bik kha chu. “Association thum chak” a tih te, “*Centre for Sports Science* hman tangkai” a tih te pawh kha, tunah hian kan sum neih ang tawkin kan inthum tha ve mek a. Kan chawlh lai khan kan Health Minister, Pi Lalrinpuui ka lo titipui a, sports medicine doctor kan neih chhun vanduaithlak takin a boral a, kan la nei leh mai bawk si lova. “Sports injury te tan treatment a hranpaa tih dan min ngaihtuah sak rawh” te pawh ka lo ti a, ka lo dil tawh nghe nghe a ni.

Pu Speaker, Pi Prova Chakma, West Tuipui Bialtu kha a zahawm hle mai. “Tlabung-ah khelmual siam tumna a awm em” tih kha, a la awm hma chuan, ‘awm lo’ tia chhan kha a ngai mai a, Pu Speaker. Amaherawh chu, “a bial pumah pakhatmah a awm lo” a tih

kha chuan, “ZPM kan sawrkar har deuh a ni” tih te ka rilruah a lo lang a. Kha chen kha Tlabung leh a chheh velah khelmual puitling a lo awm lo a nih chuan, kum 5 hi kan sawrkar turah ngai ta ila, Pu Speaker, kum 5 chhung chuan khelmual pakhat chu, ani lo hi chu kan la tiam lo a ni mai awm mang e; “grass chu kan phah thei lo ang a, a laih erawh chu kan lai thei ang” tih kha Pu Speaker, ka han tiam tawp mai ang a, a lehpekah chuan kan lamah hian a thut ngei pawh kan beisei a ni.

Pu Speaker, Pi Baryl Vanneihsang, Aizawl South-III Bialtu zawhna - Hlimen chungchang kha, kan department a ni chiah lo a. Ka han zawt chiang a, ‘a revise theih em’ tih te leh, ‘a dinhmun kha a lian tawk lo niin ka lo hria’ a tih kha, a hriat chin kha a thui lutuk lo nangin, kan zawhbelhna atang chuan a thui deuh tawh a. Pu Speaker, ruahmanna awmsa ah khan, metre 90 x 45 a siam tum a ni a, Smart City project hnuai mi khelmual hrang hrang zauh tura kan tih zingah khan telin metre 100 x 50-a zauh turin tunah hian hma lak tan tawh a ni. Hemi atan hian Pu Speaker, ₹6,59,23,380 budget-a dah a ni, a contract amount-a chu.

A zawhna dang kha, kan Dy. Speaker a zawh sakna a ni deuh ber a, Kolasib-ah Pu Speaker, kan Dy. Speaker hi a chhuanawm khawp mai; ama ram hi Nl. Lalremsiami, kan hockey star, Mizoram mai ni lo, India-ina kan chhuanvawr Remsiami hmingin a pe tawp a, ‘*Remsiami Hockey Ground*’ a ni. A hma khan an lo siam si lova, ‘kan siam a ngai e’ a ti a, ‘turf kan phah ang’ tih thleng kha chu kan tiam thei lo. Amaherawh chu, ‘hockey khelh theih nan kan siam phawt ang’ tih chin chu, Pu Speaker, kan sawi ngam ang a, a bak erawh chu kan funding hmuh dan a zirin, *Year of Consolidation* te han zo ila, chumi hnu lamah chuan kan la ngaihtuah dawn nia. Pu Speaker, Pu PC Zoram Sangliana puala ground dah pawh kha, football khelmual turah kan ngai a, ‘a tul angin kan lo enzui ang e’ tih chin hi kan sawi theih chu ni mai se.

Pu Speaker, a tam tawh lo; kan zo tep. Kan member-ten thahnemngai takin an sawi a, react loa ‘a ziakin kan sem’ tih ngawt kha a fel lo deuhin ka hria a, churang chu a ni e.

Pu V. Malsawmtluanga, Lunglei North Bialtu kha, ani hi footballer thin tho a ni a, thahnemngai takin SYS Football Academy chungchang te arawn sawi a, a bial Chhipphir chungchang te pawh arawn sawi a. Tin, ‘Zobawk-a artificial turf kha engtinng e ni ang’ a tih kha, Zobawk-a artificial turf phah tur Rajiv Gandhi Stadium lama lak phei chungchang kha thawnthu a nei thui deuh a, kan sawi tawh a, sawi nawn tawh lo ila. Vanduaithlak deuh chu, helai House chhunga kan sawi kha political party-in press release nen min umzui a, a insawifiahna hi Pu Speaker, helai hian ziakin ka nei vek mai a, leh kha kal dan zawng zawng kan sawi chuan a fuh lo zawk dawn a, sawi lohah ka tlak ang a. Amaherawh chu a tul huna phawrh turin engkim hi peih sa a ni a. Engpawh nise, heti hian sawi chhuah lovin kan dah ang a. Zobawk artificial turf hi dah kir leh rual a ni lova, ‘engtinng e kan kalpui zel ang’ tih chu department hotute kanrawn a, *National Green Tribunal* hnuai thubuai awm mek a nih avangin, khawih chet theih

loh a ni. Pu Speaker, a tak takah chuan Zobawk atanga lak phei pawh kha a rem tawh lo a ni, thubuai nei lai kha a ni tawh a. An stay tawh hnu kha a ni a, chuvang chuan, thubuai nei lai anih avangin he House-a lo comment emaw, assurance lo siam kha remchang lovah ngai ta ila, ti khan, a nih ang ang khan dah ila. October Ni 9 ah khan inthlan puan a ni tawh a, October Ni 9 hnua activity deuh vek a ni. Chungte pawh chu thil chhui dawn chuan a hnawk a tam a, ti hian duh tawh phawt ang. Pu Speaker, a hre chak kha chu nakinah ka hrilh mai ang che u; kan duh tawh rih phawt mai ang.

Pu Speaker, Pu K. Laldawngliana, Tuirial Bialtu khan ‘medal-ah kan hnufual, national level leh international level ah’ a ti kha a hmu dik hle mai. Hei hi Pu Speaker, tuna kan tanna tur dik tak chu a ni. ZPM ina kan sawi ang khan, a tira kan sawi pawh infiam-mi leh association-te chawikan hi theihtawp kan chhuah ang kan ti a. Nichina kan sawi, duat bik deuh tur association te nen khan kan tan ho chuan, kan kan ve hret kan ring. Tunah hi chuan kan dinhmun a tha lo hle. Kan hma lawkah hian North East Olympic - North East Sports inelna a awm leh dawn a, hei hi chu kan la rin lut tel lo ang a. Hemi zawh atang hian ‘tih tak taka bein, tum tlang teh ang’ tiin, Pu Speaker, House member-te pawh ka sawm duh a ni.

Tin, Pu Speaker, Pu Lalmuanpuia Punte, Hrangturzo Bialtu khan drugs man chungchangah ‘a te tham kan man a, tam deuh thahnem kan man pawhin a neitu lian kan man thei si lova; a transporter chin man’ tih hi kan han inrawn tlang a, Excise & Narcotics hotute pawhin, “Myanmar atanga lo chhuk deuh vek a ni a, a neitu-lian hi chu a ral leh lama awm an nih deuh vek a, hei hi chu keimahni tih theih piah lam deuh a nih avangin a harsa khawp mai’ tih te min chhanna a ni a.

Tin, chumi piah lamah chuan mi thenkhatte hian an thil man hlutna te an ziah duham ve deuh bawh thin a, “tam deuha, international market value a an ziah thin ai hian Aizawl-a an hralhna te chu a tlawm zawk a ni” tih te pawh min han hrilhfiah a. Engpawh nise, kan tan-tlan chuan, Mizoram chhungah hetiang ruihhloa sumdawng mi-lian an awm a nih chuan, nichinah kan sawi, informer ten an hrilh theihna tur, kan man hnem dan a zira pawisa thahnem tak (a nuai thleng pawh) an hlawh theihna tur kha awm a. Amaherawh chu, witness-ah te an tan zel a ngai dawn a, khatah khan kan tangho ang a, mipuite nen. Pu Speaker, “awmze neiin hmalak i tum tlang teh ang u” kan han ti a ni.

Pu Speaker, Pu H. Lalzirliana, Mamit Bialtu kha, ani hi Mizoram Volleyball Association President thin a ni a, volleyball in hmunhma an nei lo hi a vei hle mai a, a vei awm khawp mai. Pu Speaker, ka sawi theih chu, tunah hian *Khelo India* hnuaiah hian Durtlang North-ah khian indoor stadium lian kan sa dawn mek a. Pu Speaker, a nihna hi sawi mai a tha a, kan Sports Minister hmasa Pu Robert Romawia hmalakna vek a ni, hei pawh hi. An hun laia an sawi, kan hunlaia chhuak a ni. Hetah hian volleyball khelh theihna khawpa indoor stadium lian sak tumin kan inbuatsaih mek a ni. MVA kha kan pe chiah thei lo a nih pawhin, ‘multi-purpose indoor

stadium a ni dawn' tih kha kan sawi lang duh a. Chuvang chuan, MVA tan pawh thu lawmawm turah kan ngai.

'Tut Lui-a water-sports buaipuina tur' tih chungchang hi chu, PMJVK lama buaipui tura ri feih-feih kha a ni a. Hei hi a tul angin nakinah finance leh DCMA lam te nen a inrawn tlanga tih theih a nih chuan, bawhzui thei turah ngai ila. Pu Speaker, ITI leh Polytechnic building chungchang kha, Polytechnic hi Higher & Technical Education hnuaiyah a la awm rih a, amaherawh chu, a sawi-rem dan te pawh a awm a. Chutih rual chuan a building chauh mai hi hmun hrang hrangah hian a awm a.

Pu Speaker, a tira ka sawi point-a let leh duh ka neih lai a chu, sawrkar kan leh ram kan hmuh dan te leh kal zel tura kan tih hian, buiding, building; building ringawt anih hian, engtingge kan ram hi a kal zel ang aw? 'Tunge luah ang; tunge enkawl ang; tunge sum pe ang' tih lai hi a buaithlak lai chu a ni. Kan hun lai theuh hian kan fimkhur tlan chu a ngai ve khawp mai. Engpawh nise, Pu Speaker, 'hman tangkai theih dan a awm em' tih chu, department hotute nen kan lo sawiho dawn a nia.

Pu Speaker, Hachhek Bialtu Pu Robert Romawia thusawi kha a bengvarthlak a, NEP 2020 in sports a ngaihpawimawh thu hi ama ka atang hian ka hre zeuh zeuh tawh a, kha khan min tiphur hle a ni. Chutihrual chuan, Pu Speaker, a pawisa min hnutchhiah zat a sawi kha a thahnem leh lutuk a; ka han zawt fiah deuh a, department lam te. Amah ngei pawh ka titipui tawh a, nichin break lai khan. "Nuai 20,000 kha i ti mai si a, 'Nuai 20,000 kha i ti bo em ni' min tih loh nan sawifiah a ngai dawn a nia" ka ti a. A awmzia deuh berah chuan, a hun laiin hna a thawk chak a, PMJVK hnuaiyah (nichina ka sawi ang khan) project khati zat kha a kal a ni. ₹422 crore project hi kalpui a ni a, 1<sup>st</sup> installment kal tawh, 2<sup>nd</sup> installment la lut si lo a nih avangin, khata 2<sup>nd</sup> installment lo la lut tur pawisa a sawina kha a lo ni zawk a; project thar diaia kan hman tur pawisa kha a ni lo a ni. Pu Speaker, chuti a nih loh chuan, Nuai 20,000 kha ka ti bo mai ang tih ka hlau a ni. Chuvang chuan, a awm tawh sa, ti khan UC te kan pe ang a, vawmluh zel tur kha a ni a. Chutih rual chuan sport infrastructure tha Mizoram-in kan ban phak ngai loh min hnutchhiahtu anih avangin, a chungah pawh lawmthu ka sawi a. Amaherawhchu, 'min hnutchhiah a' tih kha chu, min hnutchhiah ni chiah lovin, a hun lai ami pawisa hman kal zel kha a ni.

Pu Speaker, a dawt leha chuan Pu W. Chhuanawma, Tuichang Bialtu in hna chungchang a sawi khan mi a cho hle mai. "*Mizo thalait'e'n engnge hna nia kan hriat'*" a tih kha. Pu Speaker, LESDE hnuaiyah hian 'chumite tan chuan hna a awm e' ti khan duh tawh ila. Tin, hna kha kan han sawi a, sing chuang tan training kha Pu Speaker, zawhfiah theih reng a ni, office lamah. A train duh tak tak tan chuan thunna tur kha a awm zel dawn a, kha kha uluk taka kalpui tur a ni.

A hnunung berah chuan kan Opposition Leader Pu Lalchhandama Ralte, Tuivawl Bialtu kha, ‘a hnathawh kan chhunzawm a ni’ tih nichinah ka sawi tawh a. Darlawn ground chungchang kha a sawi a, ₹2 crore kha kan han dah a, open tender-in kan chhuah a. Open tender hi, ₹1 crore chunglam chu e-tender a tih tur a ni a, e-tender-ah February Ni 29 khan kan dah a, tumahin an chhang lo. A tawp niah chanchinbuah an chhuah ta ringawt a, March Ni 6 emaw khan; miin an hre tan chiah kha kan retender leh a ni; Open tender kha kan lo ti thang lo deuh tawh a. Engpawh nise, Pu Speaker, ti khan kan member zahawm tak tak ten ...

*(interruption)*

**PU ROBERT ROMAWIA ROYTE:** Pu Speaker, Sport Minister zahawm tak thusawi kha, a lawmawm a. Thil pakhat lek, he House-in kan hriat ve ngai a awmin ka hria a. Lunglei SYS Academy saw Sports Department ta a ni a, Kolasib Saidan Dy. Speaker zahawm tak biala Sports Academy pawh khu kal reng lai a ni a. Hostel fee leh mess fee a ni ber maiin ka hria a, sum bat kha. Finance-ah kan dil thin a, nuai tam pawh a ni lova. ‘An lo pe fel daih tawh ang chu’ tih laia, tun thlenga kan Sport Minister rilru hah nana la awm kha a dik lo hle mai ka ti a, he House-ah hian ka han sawfiah ve hrim hrim a. A vai pawh khan nuai 40-50 vel em ni? Kha kha a ni a.

He Academy pahnih hi international level-ah pawh, eng nge ni; (a hming ka theihnghilh thut chu..) Delhi-a an khel thin kha, chutah pawh chuan Kolasib Saidan khu an champion fo a, Lunglei SYS Academy pawh saw national level-a champion fo anni a, a tha dun em em a ni. Khatah khan kan Sport Minister zahawm tak rilruhah loh nan khan Finance Department-in financial year tawp dawna an in clear thin ang khan, hostel fee kha lo clear mai sela a va tha awm ve, tih kha rilruah a awm a.

Tin, RG Stadium chungchang kha chu sawi loh kha a tha a. ₹5 crore SASCI-ah khan a la awm kiau a; kha kha a ni a. Tihfel mai theih turah ngai ila, kan Sport Minister hian a tihfel mai turah ngai mai ang u.

**PU LALNGHINGLOVA HMAR, HON. MINISTER:** Pu Speaker, ₹5 crore pawh kha a ni tawh chiah lova, ₹2.5 crore a ni tawh zawk a, tunah rih chuan. Engpawh nise, kha kha chu a subject kha kan khar deuh tawhin ka hria a. Kan sawi chhuah leh dawn chuan heta hi ka keng khiau a nia; a thui lutuk dawn a. Chuvang chuan, duhtawk mai ila.

Tichuan, Pu Speaker, vawiinah hian memberte’n thahnemngai takin min sawihopui a, ‘min phurpui hle a ni’ tih ka hria a. Chuvang chuan, heng ka Demand te hi hi he House zahawm tak hian min pass pui turin ka rawn dil e -

<i><b>Demand Nos.</b></i>	<i><b>Purpose</b></i>	<i><b>Amount (in ₹)</b></i>
7	Excise & Narcotics	54,56,93,000.00
22	Sports & Youth Services	25,71,20,000.00
28	Labour & Employment, Skill Development & Entrepreneurship	31,75,42,000.00
<b>TOTAL</b>		<b>1,12,03,55,000.00</b>

**SPEAKER :** Aw le, tunah chuan Minister zahawm tak Pu Lalnghinglova Hmar Demand te –

<i><b>Demand Nos.</b></i>	<i><b>Purpose</b></i>	<i><b>Amount (in ₹)</b></i>
7	Excise & Narcotics	54,56,93,000.00
22	Sports & Youth Services	25,71,20,000.00
28	Labour & Employment, Skill Development & Entrepreneurship	31,75,42,000.00
<b>TOTAL</b>		<b>1,12,03,55,000.00</b>

House-ah pass a rawn dil ta a. Remti apiangin, ‘Remti’ ti rawh ula, Remti lo kan awm chuan, ‘Remtil o’ ti ula.

(House-in a remti a..)

Aw le, Minister zahawm tak Pu Lalnghinglova Hmar Demand-te chu House-in lungrual takin a pass ta a ni. **(Pu Lalnghinglova Hmar, Minister:** Pu Speaker, ka lawm e.)

Aw le, tunah chuan Chief Minister zahawm tak Pu Lalduhoma’n a demand te han wind up sela, sawifiah ngaite han sawifiahin, a demand-te House-ah pass rawn dil nghal turin ilo sawm ang u.

**PU LALDUHOMA, CHIEF MINISTER:** Pu Speaker, demand-a ka luh hma in Mamit Bialtu member zahawm takin a a bial chhunga thil thleng a sawi kha han sawi fiah lawk ka duh a.

Pi Laltanpuui, kum 40, Pu Chanchinmawia nupui, Lengpui (Mamit District) a awm hian a fa 4-na a neih hun tur hi Dt.11<sup>th</sup> March kha a ni a, chumi ni ah chuan Gynaecology OPD ZMC Falkawn ah a neih hun anih tawh vangin nau nei tura admit a ni. OPD ah hian uluk taka check a ni a, nau tha taka nei thei tura ngaih leh beisei a ni. Hemi ni hian maternity ward, OBG ward 1-na ZMC ah admit niin, thisen test leh a tul dangte tih nghal a ni a. Hemi ni dar 2:00 PM ah veitirna damdawi hman tan a ni a, uluk taka nau vei sawt leh sawt loh endikna partogram hman a ni bawk. Zan dar 11:00 PM ah a chhul kawngka a chanve, 5 cm in a inhawng a, naute lungphu, a nu BP leh pulse te pawh a tha

a ni. Zing dar 1:00 AM ah a chhul kawngka a inhawng kim a, a sang tan bawk a, heti lai hian a BP leh naute lungphu te a tha bawk a, nau tha taka nei thei tura beisei a ni.

Zing dar 1: 55 AM (Ni 12) a tuk kha a ni tawh a, naute lu kha duhthusama a chhuk theih loh avangin, khawl hmanga nau neih tir tum a ni ta a. Zing dar 3:00 AM velah nau a la neih theih mai loh avangin hmanhmawh takin emergency a zai tura buatsaih a ni ta a ni. Zai tura buatsaih a nih lai hian dar 3:30 AM velah dam lo chu vanduai thlak takin a BP a hniam thut a, a buai ta a. Critical care lam thiam ICU doctor hriat tir nghalin, buaipui nghal a ni a. A nunna chhan tumin a tul ang ang damdawi te pek niin, ICU ah rang taka enkawl mamawh a ni tih hriat a ni a. ZMC ah ICU khum ruak a awmlah lai tak a nih avangin, a awl awm chhun Ebenezer Hospital, Chawnpui ah thawkna dawt vuah chungin ZMC doctor pahnih ten rang takin an kalpui nghal a ni. Vanduaithlak takin Ebenezer Hospital thlenpui hnu reilote ah hian enkawl hman lohin a boral ta a ni.

Kha kha a chanchin a ni a. Engpawh nise hetiangah hian rinhlelhna emaw lungawilohna emaw kan neih phawt chuan, khua leh tui tute pawh hianin ‘kan chanvo kan claim thei a, kan complain thei a ni’ tih kha hria ilangin.

Aw le; Pu Speaker, hei, demand pakua lai mai ka nei a, Min lo tihbuai loh chuan rei lutuk lo turah ka inngai a.

Pi Prova-i te khan Legislators Home leh MLA Hostel chungchang kha an rawn sawi a, a ngaih-pawimawhawm khawp mai a. Tunah hian kan quarter hrim hrim repair tur hian ₹100 lakh kan dah a, SASCI-ah hian ₹15.44 crore kan dah bawk a. Heng hi quarter sak thatna tur leh repair-na tur te a ni dawn a. Helaiyah hian ka member puite’na in ngaimawh kha kan rilruah kan lo dah hmasa ang a, sum a awm remchan ve leh kan lo ngaihsak dawn a ni.

Tin, vawiin hi Pi Prova-i hi a nalh hle mai a, nalh kan ti tlang a, a lakah pawh kan thilphal tlang niin ka hria. Tih leh hunah chuan Chakma-nu inchei dik tak te pawhin rawn inchei sela ‘kan *welcome* em em a ni’ tih kha ka han sawi duh a ni.

Tin, member thenkhatin IR Battalion chungchang kan rawn sawi nawn leh a, thudik hi kan hriat a tha a. IR hi din a nih tirh khan, a bul chiah Central Sawrkarin min tumpui a, a bak zawng zawng hi chu keimahni State suma maintain vek a ni. Chu tak chu a ni kan duhlohna ni. A police-a kha kan duhlo a ni lo, a battalion-a kha kan duh lo a ni lo, a sum sena kha kan huphurh a ni. Khatih lai dinhmunah khan khati zat IR Batallion dina, enkawl zui zel turin sum leh paia kan dinhmun kha a chak tawk lo tih kan hria.

Tin, kan phak tawkin Mizo Battalion neih kan duh a ni, kan thuhnuaia awm tur. Mizo Battalion chu engnge ni? MAP. MAP chu engnge a lam pum? ‘Mizoram Armed Police’ tihna a ni. MRP hi eng nge a lam pum? ‘Mizoram Police’ tihna a ni. IR-ah hian



Mizoram a tel ve lo, *Indian Reserved* a ni. India Sawrkar ta a ni; kan ta a ni lo. Hei hi chu chiang takin i hria ang u.

Chuvang chuan, ‘an tangkai lo’ kan ti a ni lova, neih rau rau a nih chuan, keimahni ta i nei ang u; sum kan seng tho si, an chungah thu kan nei full si lo. An duh duh hunah Mizoram pawnah duty turin an ko chhuak a, kan dal thei tak tak lo; chuta an senso erawh chu kan tum vek a ngai si. Hei, tunah pawh, Pu Speaker, MP inthlan a lo awm leh dawn a. Chutah chuan kan IR Battalion-te Mizoram pawnah duty turin tih an ni leh dawn a. Chumi atan chuan ₹127.7 crore tunah hian kan dah a ni. A uiawm in ti ve lo em ni chu chu? Mi ramah an va duty dawn a, khati zat pawisa kha kan seng dawn a ni. Kan Police chu ni se la chuan, min rawn dil a nih pawhin, a senso zawng zawng an tum ve ang a, kan hlawk zawk ang. Chu chu thil awmzia a ni a. Chuvang chuan, anmahni kha kan duh lo ni lovin, ‘sum kan seng tho dawn a nih chuan, keimahni ta, kan thuhnuai a awm tur i nei zawk ang u’ kan tihna a ni.

Tin, ‘kan Police-te hian thla an timuang lo’ tih hi ka sawi a ni lova, kan Opposition Leader sawi a ni. Thla an tihmuan loh thu a rawn sawi a, “E! A ni khawp mai”, ka lo ti a ni, keiin. (**Pu Lalchandama Ralte, Opp. Leader:** Pu Speaker, House record kha a awm vek a. ‘Thla an timuang lo’ tih lam chu kan sawi lova, ‘fitness tih that kan duh’ tih chungchang kha kan sawi a, a rawn belh deuh ta a, a rawn sawi thui ta deuh hlek a; a lam bah deuh nawk nawk a nih ta kha maw le. Record kha a awm vek a. Thudik tak hi sawi ila, (helai hi chu) a tha ang a. Ka tibuai lo che a nia aw, tikhan aw. Mi rawn tibuai hmasa zawk a nih kha) Ni e, an fit loh thu kha i rawn sawi a, ka lo tawmpui che a ni.

Pu Speaker, kan Opposition Leader ka fakna em em chu, mahni party leader tur atana duh tui mang si lova, mi-pawl leader tur atana a duhtui em em mai hi, fakawm ka ti khawp mai.

An fit loh thu kha kan ngaithla a. Nia, “kut vung ber burte an la atin a nih kha” ka ti a nih kha. An la tlat a; keini lak a ni lo, kha kha. Police Training School hi ‘Police Training Centre’ tih a nih lai atang khan an awmna hi term 4 ka bial dawn ta a, ka bial thei khawp mai a. West-I ah ka bial tawh a, Serchhip ah ka bial zui zel a, an rawn sawn zel a. Ka chiang khawp mai; drugs hi kan police-te zingah buaipui an awm a ni. Police an nih hnu ah an buaipui pawh a ni lo; khatianga a buaisa la duh ram hruaitu kan nei a ni. Heng hian ‘ram an hmangaih’ ka ti thei lo. Vawiinah hian, Zoram mipuite hian heng mite hi hnualsuatna chang an hriat tawh ka duh khawp mai, hun kal zelah pawh.

Tin, hruaitu hmasate kan inpawng dem ngawt lova, an tih that te kan chhunzawm a, kan chawimawi a. An tih that loh laite chu, a chhe laite siamthatu tura rawn lang kan ni miau a, kan tih a ngai ve a. Chuvangin, kan Bible pawhin, “*Sual do in thisen chhuak khawpin in la tang lo*” min ti ve bawk si a, sual do hi a ngai a ni. Tin, hruaitu hmasate an chhiat/an

that hi helaiah kan sawi hi a tul lo; inthlan result ah a hriat, mipuiin ‘tha’ an tih leh tih loh chu inthlan result ah kan hriat kha.

Tin, kan Member Pu Rintluanga zawhna kha, kan Women Commission chairman thar Pi Lalchhandami hi ‘a kum a over tawh a ni’ a ti a. Tunah hian a birth certificate ka kawl a, a siam ni hi Ni 30.3.1960 a ni a, tunah hian kum 64 a nih chu. Kum 65 thleng nih theih a ni a, kum khat a tang hman dawn tihna a ni; sorkar hmasa lamah khan kum 70 thleng tein an inpawhsei sak a ni. Tute nge an hming chu kan sawi lo ang a. Amaherawh chu, keini chuan kum 65 bak chu danin a awih loh avangin, kan ruai lo ang a, a thawh theih hun chhung erawh chu a thawk turah kan ngai a ni.

Tin, Serlui Bialtu khan ramri chungchang ngaih pawimawh awmzia a rawn sawi a, kan pawm thlap a, theih tawp kan chhuah tlang ang a. Khulai bialtu a ni a, tunhma pawhin a tangkai tih kan hria a. Hmunphiaha min rawn hawl leh kher erawh kha chu, a hmunphiah ngaih pawimawh vang a ni lova, a chhan ka hria a. A hring rate a thata, a ro rate chhiat tlat te kha ka hrethiam ve lova. A hring rate a that chuan, a ro rate pawh that mai awm a ni a. Ka lakah hian lungawilohna a nei a, term hmasa atang khan. Bangkok-a a kal ka phalsak lova, chuvang chu a nia, tihian mi rawn kher buai hi a tum deuh reng mai a ni.

Tin, Pu Beichhua kan Member zahawm tak Siaha Bialtu ina Latawh chungchang a sawi kha, PWD atanga Assembly question chhanna kan hmuh angin, Airport atana New Latawh aerial survey leh preliminary survey hi Ni 10.1.2020 – 23.3.2020 chhung khan neih a ni a, Feasibility Survey Report pawh hemi kum vek hian submit a ni. Cutting leh filling a tam lutuk dawn avang te, tlang pawng a awm vang te leh terminal building sakna tur hmun duh anga zau a awm loh vang tein airport siam hi rem lo tura ngaih a ni.

Directorate General of Civil Aviation dan ang chuan, airport leh airport inhlath zawng (aerial distance) hi km 150-a inhlath tur a ni a, amaherawhchu, tul bik thilath chuan exemption dil theih a ni. Lengpui Airport leh Kawmzawl, Lunglei inhlath zawng hi km100 a ni a, Lengpui Airport leh New Latawh inhlath zawng hi km 160 a ni. Heng hi a dinhmun a ni a. Chutiang a ni chungin, Mizoram chhim lama airport siamna tur hmun dang lo endik tawhte pawh kha a vaiin en thlithlai nawn leh ila, “cabinet meeting-a ngaihtuah turin cabinet memorandum rawn siam rawh u,” tiin hmanni khan kan hrilh a, nimin piah mai kha a niin ka hria a. Tichuan, kan GAD-a Civil Aviation Department hian an rawn buaipui ang a, Cabinet-in kan thlir ang a. Kan MLA-te pawh min finchhuah pui turin kan duh ang che u a. Tichuan, engnge, a theih leh theih loh dan te; tin, survey-puitling ti tur chuan Airport Authority of India te an ngai a, sum sen pawh a ngai a ni. Chungah chuan thil awmzia kan la thlir tlang zel dawn nia.

Tin, kan Opposition Leader khan “Board leh Committee hrang hrangah official aiawh an awm lo” a ti a, a hriatsual deuhhleka a nih ka ring a. Mizoram State Planning Board-

ah hian Secretary Planning hi Member-Secretary a ni nghal a. Tin, Planning & Programme Implementation Department-a official te hi Secretarial-Assistant pe tura ruat nghal an ni a. Tin, Mizoram Resource Mobilization Committee member ah hian Principal Adviser P&PID a tel sa a. Tin, Addl. Secretary - Finance Department te; Secretary - MPSC te ho kha an awm nghal a ni. Mizoram State Policy Co-ordination Committee ah hian Secretary hi Member Secretary ah Planning Department a mi hi hman nghal a ni bawk a. Tin, Mizoram State Project Monitoring Committee ah hian Principal Adviser hi member ah a awm bawk a ni. Khang kha official awm sa te an ni.

**PU LALCHHANDAMA RALTE, OPP. LEADER:** Pu Speaker, ka lam chhuah bera kha chu, “Mizoram Education Reform Committee ah khan official an tel lo e” tiin. A hming pawh ka rawn lam tak kha; Education Reform Committee a ni a. A dang – “Resource Mobilization te, Taxation te pawh telh a tha lawm ni; an tlem deuh e”, tiin thahnem ngaihna thua ka han sawi kha a ni a. A Committee lam chu, Education Reform Committee kha a ni e. Khatah kha chuan an tel lo a ni; list-ah khan.

**PU LALDUHOMA, HON. CHIEF MINISTER:** Kha kha chu Education Department lamin tha an tih angin an kalpuiah ngai ila, ka hriatpui pha lem lova. Hemi - *Policy Monitoring Committee* ah phei chuan, ka sawi ang khan party tin aiawh kan awm a nih kha; naktukah kan meeting nghal dawn a ni, nghe nghe a.

Tin, MINECO-a Chief Minister Office sawn hi tha kan ti a, tuna Chief Minister Bungalow khi thil tangkai dang, hmun dangah a hman theih turah kan ngai a. A chhan chu, khitah Chief Minister a tawm tlat mai a; hetah MINECO nen a inkarah file put-up leh meeting-a kal a tam si a, hun a hek a ni, traffic jam karah. A tha lo hi kan ti khawp mai a. Chuvang chuan, ‘a kawng a awm em?’ tiin, kan han nih tirh khan ka han dap tir nghal a. Amaherawh chu, Chief Minister Residence leh a office han nghah nghal maina tur saw tunah space kan nei rih lo tlat mai a ni. Nei thei ila chuan, hei hi chu hun kal zelah pawh a tha a ni.

Tin, Village Committee te, Town Development Committee te kha engtikah nge in din dawn?” tih a ni a. Kan la hmanhmawh vak rih lo, hei hi chu. A chhan chu VC term te, Local Council term te hi a laklawh rih a, term thar te pawh han ni te te sela, chung hunah chuan la ti ila. Tunah hi chuan ‘Year of Consolidation’ ah kan la awm leih leih chauh a ni a. Chuvangin, chuti em ema hmanhmawh tulah kan ngai lo a ni. Tin, restricted tender chungchang kha he House-ah hian kan sawi tawh a, a tulna te kan sawiin min hriatthiampui viau ni te pawhin ka hria a, ka lawm khawp mai a. Amaherawh chu, kan hriatthiam anga hrethiam lem lo, dam thei tlat lo, tuar thiam lo riau mai kha eng emaw zat media lamah te mi an lo awm a, an mi beisei dan leh hmuah dan nen khan a inmil thei lo tlatin an hria a, tihtak zeta tap chung a min rawn ngen te an awm a ni. Chuvang chuan, mi thenkhat thinlung kan tina ngawih ngawih a nih chuan, he thal chhung hian he hna hi open tender pawhin chhuah ila kan zo hman tho beisei chungin, ‘mi rilruna

ngawih ngawiha siam a tha lo e' tiin, kan han cancel leh a. Tichuan, tunah hian open tender-in tih tura buatsaih a lo ni ta a ni.

Tin, kan Assembly House ngei pawh hi India ramah hian, kan Opposition Leader rawtna ang khan a nalh lo pawl a ni tawh a ni. Mi rama Assembly building te a mawi em em hlawm a ni. Chuvang chuan, hmun tha nei ila chuan mawi taka han sak ve pawh a tha khawp mai a. Amaherawhchu, a hmun a ber hi kan buaina a ni hrih a.

Tin, Pu Speaker, helaiah hian "i.. i.. i.." te kan inti a, first person hian kan inti lawlh lawlh mai a, hei hi Assembly kalphung tur a ni lova. Hetia direct-a keimahni leh keimahni kan in address hi chin loh hram hram tur a ni.

Tin, Member zahawm tak Pu Nguna khan healthcare sum chungchang kha a han sawi a, 'engati nge Finance hian an kawl' an ti a. Corpus fund hi Finance enkawl a ni tlat a; chuvang chuan, a sum enkawltu chu Finance Department a ni a, a tul ang zelin a pe chhuak mai a ni.

Tin, UIDF leh SIDBI te pawh hi Ministry of Finance hnuai a awm an ni a, Finance in a enkawl loh theih loh thil a ni. Loan lak te a lo tul a, khangah khan Finance lo chuan han khawih chi a ni lo a ni.

Tin, *Other Charges* kum danga kan hmuh thin kha paih a ni tawh a. '*Other Revenue Expenditure*' tia sawn a ni tawh a. Chuvangin, tunhmaa *Revenue* hnuai a mi ni thin kha *Capital* hnuai a dah anih tawh a, han en kha chuan kan hriat than loh anih avangin, 'engati nge' han tih mai pawh kha awl tak tur a ni.

Tin, *Counterpart Funding* atan hian crore 250 dah a ni a. Kha kha Finance Department hman tur a ni lo a, department hrang hrang hman tur a ni. Chu chu Planning Department-in a lo thlifim a, 'hemi project hi chu kan ram tan a tha ang a; hemi SMS tur hi lo pek ni se' an rawn tih ang ang kha, Finance chuan a release mai a. 'Sum a awm e' tih mai avanga Project lo kalpui nghal zung zung te kha keini chuan kan duh ve lo a. A counterpart funding tlem thei ang chi, 100% funding thei ang chite kan ngai pawimawh hmasa dawn a ni. Tin, a infrastructure hman ngaihna awm lo tur leh maintain hautak tur ang chi te kha kan duh lo bawk.

Kha, vawiinah pawh hman tangkai ngaihna awm miah lo, sawrkar hmasain a lo tih tawh infrastructure kan han hmuh belh leh a. Document awm lo, expenditure sanction pawh awm lo, administrative approval pawh awm lovin building thar an lo sa ve leh ngawt mai zel a. Khang kha kan kovah a tla ta chu a ni si a, Pu Speaker, a khawi sumin nge an lo tih pawh ka hrethiam tawh lo. Chhui tur awm mang si lo, hna lo inpek bawk si, verbal a thil kal, official document la hmuhchhuah theih si loh ang chi ah te khan Finance

Department hi a fimkhur em em dawn a ni. Chuvang chuan, helaiah a SMS tur kha a lo kawl a ni mai a, amaherawh chu, pekchhuah leh tho tur a ni a.

Tin, ZPM hian mipui hmaah intiamna kan nei a, “Chief Minister hian works department a khawih ve lo ang a, a portfolio a nei lo ang” kan ti a ni. Finance Department hi works department a ni lo a ni. Chuvang chuan, tunah hian works department pakhatmah ka khawih lo a, works department ni lo dangte pawh ka chan loh hi a awm zawk a ni. Chu chu a ni a; chuvang chuan, mipuia kan intiam ang zel khan kan kal a ni.

Tin, “Minister ten road map an nei lawk vek ang a, chumi ang chuan an kal ang in ti si a” tih kha a awm a. Ni e, road map kan nei vek a ni; an kawl vek a ni, tunah hian. Amaherawh chu, khatiang khan kuminah hian kan kal thei rih lo. *Year of Consolidation* kan hmang mek a, chuvang chuan, khata ‘ram kaihhruai kan tumna ang tak tak khan tu minister mah hi ke an la pen thei rih lo’ tih kha kan chian a tha awm e.

Tin, Pu RM Chakma zawhna - *excluded area* chungchang kha chu, a hre fiah tawh a, chhan a ngai tawh lova. Amaherawh chu, “Dawhkan atangin thil an rawn ti thin; sikul tha em em te pawh sak that an rawn tum” tih ang chi te kha a tam mai a, Mizoram-ah hian. Kha kha chu kan opposition leader hi lo zawt la, a chhang thei zawk ang che. Kan tih a ni lova, a hunlai ami kha a ni a. A pawl khawp mai, khatiang kha a awm thluah mai. An sawrkar lai khan NABARD sum puk chu a awm ngei a, hmun hnihah then a ni a. A za tel sikul repair leh reconstruction a awm kan hre vek.

Tin, “Finance Department-ah hian engatinge sum a tam viau” te kha kan ti a. Sum hi, sawi ang khan, Finance Department-a sum tam ber hi pension fund a ni a, 1965 crore leh 75 lakh a awm a ni, pension ringawt pawh hi. Chu han paih ula, a tlem ngawt ang. “Sawrkar hmasa ai khan a tam zawk a ni; kan CM hian sum a ngah zawk a ni” ti zawng te khan kan sawi a, kha pension fund kha an lo ba khawl teuh si a, a lang tam lo theilo a lawm. Chu chu a ni.

Tunah hian a dawta tam leh chu SASCI a ni mai a, chu chu crore 500 a ni a, a dang chu crore 150 te, crore 60 te te vek a ni. Heng hi Finance Department ta tur pawh a ni lova, thil danga la pekchhuah leh tur - healthcare ang te a lo kawl kha a ni mai a ni.

Tichuan, *Khawnpui* erawh chu a awm ve ta lo a ni. ‘Khawnpui’ kan ti lui tal dawn a nih chuan, kan hand-holding-a crore 200 kan dah hi a ni mai a, sawrkar hmasa ang khan kan dah ve teuh lo a, va intlawanna tur pawh a awm chuang lo. Department chak, project nei tha apiang kha kan lo pe mai dawn a ni; an intlansiak dawn a ni. Tichuan, inelna thianghlim an nei ang a, a thawk zo hmasa apiang UC kan lo pe ang a, SMS kan lo pe ang a, a next an la leh zel ang a, tikhan kan kalpui dawn a ni a. Chuvangin, a chang leh ‘a tam lutuk’ kan ti a Pu Speaker, a chang leh ‘a tlem lutuk’ an ti baw si a; thlir dan hi

a inang lova. “*Ni chhuak lai te pawh hi bungbua thlir chuan, ni tla tur angin a lang*” an ti a ni a. Chuvangin, an *posi* hi a dik lo deuh hlek niin ka hria.

“Covid avanga sum hmuh zat RTI nena inmil lo” tih kha chiang takin sawifiah theihin a awm a. Covid avanga Central atanga Mizoram sawrkarin sum a dawn tura beisei ang a dawn tak loh, Ni 19.8.2022-a Pu J. Lalramnghaka RTI zawhna chhanna - Financial year 2020-21 chhunga *Share of Taxes* dawn kim loh zat chu ₹1,093.73 crore” ti a chhan a ni a. Amaherawh chu, he RTI chhanna hi financial year 2020-21 atana actual figure neih hma niin, *Union Budget Revised Estimate 2020-21* zula chhan a ni. Accountant General lam nena reconcile a nih hnuah actual figure neih theih a ni ta a, tichuan, a figure kha a lo danglam ta duai a, ₹957.41 crore chauh a ni ta a ni.

Tin, Financial Year, 2021-22 first quarter-a *Share of Taxes*-ah ₹125.46 crore dawn loh a awm thu tarlan a ni bawk a, kha RTI chhannaah khan. Nimahsela, hei hi chu first quarter chhunga beisei, la dawn loh a ni a, a kum tawp March, 2022-ah pek kim leh vek a ni thung a ni; a kum pumpuiah dawn kim loh a awm lo. Chutiang chuan, hemi hnu lamah chuan final figure ang hian chhanna pawh buatsaih a ni ta a, 2023 budget dession-a Pu C. Ngunlianchunga zawhna pawh hetiang hian chhan a lo ni tawh a ni. Khatih laia kan Finance Minister khan a chhang a ni; hetiang hian a lo chhang daih tawh a ni. Chuvangin, han sawi thar leh hluai chi vak kha a ni tawh lo a ni, a dik chiah chuan.

Tin, Covid avang hian engnge kan dawn? SASCI hi Covid avang liau liauva pek kan ni. India ram pumah Covid kan tawrhna atanga lei rem kan rah leh theihna tura rawn ruahman a ni a. Chutah chuan, 2020-21-a approve amount chu ₹200 crore a ni a, 2021-22 ah ₹300 crore, 2022-23 ah ₹497.50 crore, 2023-24 ah ₹700 crore; tichuan, a vaiin ₹1,697.5 crore a ni a, dawn chiah erawh hi chu ₹1477.27 crore a ni. A chhan chu, kha kha rawn pe mahse, sawrkar khan a hmang tha tlat lova; a hman hmanloh tlat chuan, kha pawisa kha tikhan hman lohin a awm ta a ni; nichina kan ngaihthlak sports lam thil ang chiah khan.

Hei, tun kum kal lai liam turah pawh hian SASCI atanga pawisa lo kal hi kan sawrkar khan a lo hmang tam hman lova, (ti mai ang) 200 vel bak hi chu tam belh a ni hman dawn lo a niin a lang a. Inthlan dawna contract an han sem vak lah kha, tunah hian an la thawk tam vak bawk si lova, kan ui em em dawn a ni. Chuvangin, a approved amount ang zat hi hman an ni ngawt lo a ni.

Tin, CMRF-a donation neuh neuhah hian crore tam tak a lo lut bawk a, covid avang hian; additional borrowing limit kha 2% of GSDP ah min tihsan sak bawk a; GST tlak hniam avanga compensation hi 0.5% GSDP min phalsak bawk a. Tin, covid zara sum kan hmuh belh thu ah hi chuan kan Finance Minister hmasa zawk thusawi kha a dik ka ring a, a hun laia changtu a ni a, video nen kan la nei vekin ka ring a, “Covid hnuah ringawt pawh nuai sing tel min pe tawh” a ti a nih kha, helai a tang ngei hian. Chuvang

chuan, ‘Covid hnuah khan kan dawng tam a ni’ tih kan Finance Minister-in min hrilh kha, keini chu kan dinna a ni mai a. “*Jal Shakti* Minister, Shekhawat-a rawn sawi phei chu a tam leh lutuk a, sawi pawh ka sawi ngam lo” a ti hial a nih kha. Chuvang chuan, kan Finance Minister hmasa hunlai thil a ni a, khami statement ah khan kan ding mai turah ka ngai a.

Tin, devolution kan dawn hi 2021-2022 inkarah khan kan dawn tur aia tam ₹895.05 crore kan dawng a ni. 2022-2023-ah ₹662.01 crore chu kan dawn tamna a ni. Kan dawn tam lam sawi duh si lova, a tlem lam ringawt mai sawi te pawh hi ‘a *one-sided* deuh hlek’ tih kha ka sawi ve mai mai duh a ni.

Tin, kan Member, Pu MST-a zawhna - “NGO ten eng eng emaw function an siam a, sum an nei mang si lova” tih lam deuh kha a ni a. A ni khawp mai a. Hei, kan bial theuhah hei hi kan buaipui vekin ka ring a. Pawl kan ngah em em a, Mizoram-ah, enge maw function neih an tum deuh vek mai a; an mahniin sum an nei si lova, sum an dil kual thin a. A chang phei chuan, “In neih loh leh in tlin loh hi chu tih tum lo ula a ni mai a lawm maw le!” tia hrawk chang te pawh ka nei thin a ni. Hetiang hi kan society ah hian discourage deuh a thain ka hria a. Tin, mi-thenkhat, dik vak mang loa lo Hausa thut te khan sponsor an lo chak em em a, an lo sponsor a, kan society-a hming tha vak lo te kha kan NGO function ropui tak takah chief guest atan te an lo lang leh a, society chungah an lo leng chho leh a, a thalo viau a ni. Chuvang chuan, kan zawh tawh hi chu a eng pawl pawh hian hrethiam thei ila chuan, a tha khawp mai.

Tin, dragon fruits Mausem-a an ngah thu te an han sawi kha, a processing lamah harsatna a awm vak ka ring lova. Hei, keini Thenzawl-ah pawh kan ngah a, kan sawrkar hmasa khan a hmunpui a lo siam a. A dik tak chuan, party ang zawng chuan ti ila, MNF hlang deuh thaw an ni a. Mahse, khati zawng khan kan ngaihtuah lova. Hmanniah a hmun ka va tlawh a, kawng an nei that loh te kan hria a, crore 30 chuang a kawng laihna tur kan tih sak a, wawiiinah pawh kan inhma a, an Association hotute, anmahni te nen. Sawlaia an dragon fruits tharte saw chu an process thei vek tawh a, a process tute nen an inthlunzawm tawh a; chutiang zawng chuan hma lo lak chhoh zel ni sela a tha ang.

Tin, Member zahawmtak Pu Dawnga’n RBI Statement a rawn sawi kha - RBI Statement hi a ni a dang a dang a, chuvang chuan ka RBI statement leh a RBI statement kha a dik ve ve ah i pawm mai ang, a hun a inang lo a ni.

Tichuan, Pu Speaker, Demand-a luh pahin a dangte kha chu ka rawn chhang deuh zel tho ang a, tuna ka han react ho kha chu a bik deuha chhan ngai ni ta sela.

Demand No. 1 Legislative Assembly- ah hian lawmthu kan sawi duh a. Hei, chawhma lamah *Dan* thar kan pass a, kan vaiin kan ram tan kan in sacrifice a, kum dang, term danga kan lo dawn thin angte dawng tawh lo turin kan insiam a, a crore telin kan dawn

tur ang kan dawng pha dawn ta lo; chu chu ruling party policy, mipui hmaa a lo intiamna, vawiinah hian i dinglam leh i veilama miten ang khat thapin kan pawm tlang thei hi a lawmawm ka ti a, “Zoram-mipui hmaah keimahni ngei hian hma kan hruai a, ke kan pen hmasa a ni” tih chhuang takin ka han sawi a, kan Member zawng zawngte chungah lawmthu ka sawi a ni.

Tin, Demand No. 3 - Council of Ministers hi, Council of Ministers hian a hranpain budget a nei ve lova, kan sawrkar hnu hian Cabinet Meeting hi vawi 3 kan nei tawh a, *by-circulation* in vawi 4 kan nei tawh a ni.

Demand No. 4 - Law & Judicial-ah han lut ila. Law & Judicial hi major department Mizoram-in kan neih pariat zinga pakhat chu a ni a, directorate a nei ve lo a ni. *Dan leh Hrai* chungchanga thurawn petu a ni. (*‘Dan leh Dun’* kan ti thin a, *‘Dan leh Hrai’* tih tur an ti deuhin ka hria.)

Law & Judicial-ah hian Service pathum - Mizoram Judicial Service te, Mizoram Legal Service te, Mizoram Secretariat Service te an awm a, chungho chuan an enkawl a ni. Advocate General te, Additional AG te, Govt. Advocate te, Prosecutor te kan nei a ni. Kan AG hian MINECO-ah office a nei a, Guwahati-ah office a nei bawk a ni. Heng hi *co-terminus* a ngaih a ni a, sawrkar a thar apiangin an bang a, sawrkar tharin a duh zawngin a thlak thin a; tikhan, party-in an duh zawng kha an dah tawp mai a ni. Keini erawh chuan ‘interview ti rawh u’ kan ti a, “interview in ti ang a, chuta laktlak loh an awm chuan, tu pawh nise, in la tur a ni lo” kan ti a. Kuminah chuan interview thlapin kan han tihtir a. Tin, kan lo hmanhmawh lem lova, sawrkar ve leha han thlak rum rum kha kan tum lem lova, anni kha an lo bang ta mai bawk si a, ‘kan la inpeih lo’ tiin thawk zui leh turin ka ngen hlawm a, eng emaw chen kha an han thawkzui nghe nghe a.

Tichuan, hetah hian Pu Speaker, ka han sawi duh chu - kan kalphungah chuan, sawrkar a inthlak chuan an niho hi chu an bang vek tur a ni a, sawrkar tharah midangin a rawn thlak tur a ni. Kan Court rorelnaa kan Prosecutor-te leh AG thleng maia Ruling lamin a duhzawng a dah hlir maiina kan Court hmaa kan ai an awh hi, ‘thil dik ber a ni em’, tih hi ka ngaihtuah a ni. Sawrkar dinglai tan tur; sawrkar dinglai-malsawmna dawnga kha hna hmu kha an ni ta a, a thiam ber ber pawh an ni lo thei tlat a ni. Chuvang chuan, hei hi chu la ngaihtuah tlana, hna nghet anga MPSC ten emaw khatia uluk taka an laka, sawrkar a inthlak avanga inthlak ve chuang lo turin, chutianga rin nghal zel tura tih hi ‘kan kalphung thar atan a tha awm mang e aw’ tih ka rilruah a awm a. Ka mimal ngaihdan a ni a, kan House ka han share ve phawt a ni.

Tin, Notary hi 22 kan nei a, Registrar General of Marriage hi kan nei a Registrar - inneih chhinchhiahtu hi mi 735 kan nei a, ram-pumah hian Zirtirtute kan hmang deuh ber a ni. Tin, Library hi sawlai New Building, New Secretariat Basement-II ah sawn kan nei a, a changtlung khawp mai a, kan Member-te pawh hianin chhawr tangkai ula kan duh a.



Tin, mipui-mimir pawhin kan library hi an chhawr tangkai em em a, kan chhuang viau a ni.

Tin, Mizoram State Legal Authority hi a awm a, kan Executive Chairman chu, Justice Michael Zothankhuma a ni a. Chutah chuan Panel of Advocate-te an awm a, mi-harsa, sum leh paia harsa, ukil rawih ngai si rawihna tur neilote a thlawnin an dinsak thin a. Hei hi mipuiin hria ila, mi-harsate chuan kan ukilte hi in ruai thei a ni, a thlawnin.

Tin, Fast Track Special Court hi Aizawl-ah hmun hnih kan nei a, Champhai-ah hmun khat kan nei bawk a. Tin, Special Court, ND&PS Act ngaihtuahtu tur hi pakhat kan nei a, Aizawl leh Champhai atan tunah hian GAD-ah dil mek a ni a. Tunah Aizawl ah hian ND&PS Act hnuaiah hian thu buai pending hi 900 vel englai pawhin a awm a, an hneh lo khawp mai a. Nichin ah kan sawi a, ruihhlo chungchang kan vei tlang em em a. Helaiah Court-ah ber a delay a rei lutuk chuan a tha lo khawp mai a. An mawmawhna hi a genuine em em mai a, thu neitu te pawhin lo phalsak atan a tha khawp mai a ni.

Tin, heng kan case-ah te hian thiam kan chan loh thinna chu witness a din hi kan hreh tlat mai a, Mizote hian. Thu sawm peka - “Hek suh” tih hi kan chang-chawi a. Dawta mi hek hi a ni kan Bible-in a khap ni; dawt lo zeppuitu kha thiamloh a chan tir zawk a ni. Chuvangin, kan ram a lo felfai zawk theihna turin witness a tan te hi hreh lo ila.

Tin, ‘*a phena sangha lian zawk awm man a harsa*’ kan tih kha, a ni khawp mai a. Engkim mai ah hian *ai-kal* kan nei a, ‘lung in tang tur pawhin *ai-kal* an la’ te an ti a ni; a mak khawp mai a. Heng hi a reh theihna turin Excise Act pawh hi amend kan tum mek a, Session leh ah chuan kan amend thei turah te pawh ngai ila.

Tin, Demand No. 5 - Vigilance-ah hian, *portal* thar kan nei a, January Ni 1 khan kan launch a ni. Chu chu Sawrkar-hnathawk zawng zawng tena ‘Annual Immovable Property Return’ an tihna tur a ni a. Tun hma lamin kan sawrkar hnathawk ten *property return* an nei mumal vak loa sawi a ni thin a. Tunah chuan portal fel tak kan nei tawh a, hei hian corruption min check pui dawn a, hei hi kan sawrkar-hnathawk zawng zawngte pawhin an zawm atana thil tha tak a ni.

Tin, *Lok Ayukta* Chairman tur kha sawrkar hmasa khan Selection Committee te an lo siam a, khatah khan kei chu thlimin ka awm zel a, sawrkar hmasaah khan kei chu min tel ve duh ngai lova. A dangah hi chuan min tel zel a, Lok Ayukta-ah hi chuan a bul atanga a tawp thlengin min thlim tluan chhuak a ni. Keini erawh chuan kan Opposition Leader hi tunah hian kan meeting-pui zat zat a, kan tiho vek a ni tunah chuan. Tichuan, sawrkar hmasain chairman tura a lo tih kha a fuh lo deuh nge ni, member pakhat khan a sign duh ta si lova, thutak a tlin tak loh avang khan, a thar kan zawn a lo ngai ta. Tichuan, Search Committee te a tharin kan han din a, uluk takin an niin an han zawng a; tichuan, recommendation a rawn siam chu kan pawmpui ta a. Tichuan, Selection

Committee chuan, kan Opposition Leader te nen lungual takin Pu Lalmalsawma, kan Chief Secretary hlui kha Lok Ayukta chairman a tan kan recommend ta a. Governor-in a pawm tawh a, tunah hian *swearing-in* ti turin kan inbuatsaih a. Governor hi a lo haw hma theih chuan Thawhtan tlai dar 4 ah Raj Bhawan-a nei turin tunah hian kan inbuatsaih mek a ni.

Tichuan, member pakhat a la awm thei a, chu chu Judicial-mi a nih a ngai tawh a, chu chu lo zawng leh turin kan Search Committee te hi thuneihna kan pe nghal a. An niin an zawn felah member pakhat kan dah leh dawn a ni. Hengte hi corruption chhuitu tur anni a, mi tupawhin kan pawmtlak, kan rintlak an nih a ngai a. Tute emaw duhsak zawng, tute emaw humhim tura ngaih bel theih mihring indah mai maina chi a ni lo. Mipuiin rinna kan nghah ngamna *body* a ngai em em a, chuvang chuan uluk takin kan han ti a ni.

Demand No. 9 - Finance-ah lut ila. Tunah chuan *Govt. e-marketplace* kan introduce tawh a, 'GeM' kan tih hi chu chu tun hma atanga lo kal tawh kha a ni a, tun hma zawng khan lirthei leh computer lampang atan chauh a hman a lo ni thin a. Tun February thla atang khan Sawrkar thar hian machinery, equipment leh furniture chi reng rengte pawh hi 'GeM kal tlanga lei vek ni rawh se' tiin thutlukna a siam a, tul bikah erawh exemption pek theihna lai provision a awm tho a. GeM kaltlanga thil lei a nih reng reng hian, a market rate aia 10% a hniam a ni tlangpui a ni. Chuvang chuan, crore 100 man kan lei chuan crore 10 chu kan hlep zel dawn tihna a ni a. Hetiang ni lo hian tunhma lam khan thil lei a lo tam lutuk a, procurement-ah kan ram sum a lo kal ral hnem lutuk a ni.

Tun atang hi chuan GeM kaltlang lo chuan (hmanhmawh thlak riau te a awm anih loh chuan) kan ti dawn tawh lova, kan sum pawh thil kan leinaah hian kan save zel turah kan ngai tawh a ni. Kan dealer-te pawh hi an tan a ngai a, GeM hmanga an thil kan han lei hian, a capital chu vai hnenah (vai ipte-ah) an thawn thla leh tho tho mai a, helai kan ramah *circulation of money* a siam tak tak lo a ni. Chuvangin, kan rama thil siamchhuah hi kan uar a ngai a, Mizo leh Mizo inkarah hlir pawisa a in circulate ve theihna turin; ₹1 hi vawi sawm kan hman chuan ₹10 a hen tawh mai dawn a ni. Chuvang chuan, kan ramri pela kan sum luangchhuak tur hi dang turin theih tawpin kan entrepreneur-te pawhin tan la se kan duh a. Kan bungalow leh sawrkar-building reng reng hi repair ngai a ni emaw, cheithat ngai a ni emaw, sak that ngai a ni emaw a nih chuan, 'Zo-siamin a theih chen chena thlak tur' kan tih kha hre reng ila, hei hi, 'kan economic nationalism' kan tih thin kha a nih chu.

Tin, tunah hian pending cheque leh treasury hrang hranga bill la tang zat hi tukinah kan ngaithla tawh a, ka sawinawn lovang a, crore 1000 chuang a ni a. Tunah hian crore 1430 crore vel power leina bill bat a awm a, a huphurhawm khawp mai a. Hei hi kan han inngaihtuah a, tun March thla chhung hian a zualpui hi chu kan clear thei turah kan ngai a. A vai vai hi chuan tun thlaah kan clear thei lo turah kan inngai a, a thla leh chhovah

chuan kan in clear zel ang a, a penalty chawi lovin leh a surcharge chawi lova rebate hmu thei turin electric bill hi pek zat zat theih kan tum chho dawn a ni.

Tichuanin, pending bill hi kan ngah ang reng a. Pensioner mi 1193 ho pawisa tunah hian sawrkarin kan ba mek a, crore 270.46 a tling a ni. Hengte pawh hi pekchhuah vat vat a chakawm. Amaherawh chu, a lo inhnawh tlingkhawm tam ve tawh avangin, chuti maia han sut kian zung zung theih a ni lo a ni.

Healthcare-ah hian mi 12,792 te ta bat sak a ni a. Tun hnaiyah khan crore 50 kan release a, tichuan, hemite ta tur hi chu crore 44.77 kan pe chhuak a, chu chuan a daih turah kan ngai a; tunah hian crore 4 vel balance kan la nei ve a ni. Chu chuan damlo tharte bill a lo tum ve tawh ang a, kan damlo ten a kuma kum, rei tak tak bill an ngah thin kha awm tawh lo turah kan beisei bawk a ni.

Tin, DA pung hi commuted anih hian harsatna min thlen nasa em em a. Kan sorkar-hnathawkte DA pung kha khatih laia kan Sawrkar leh Service Association ten inremna an lo siam a, “a pung te chu sawrkarin min pe ula, a pawisa erawh chuan min pe chhuak lo ula, kan GPF ah lut se la, commute mai ni rawh se” an lo inti a; chutiang chuan thu an lo intiam a. Tunah hian a pawisa chuan sawrkarin kan pe chhuak ta lova. Thangkhatlian lai alo tling a, mi an lo pension ta a; khatih chhung zawng zawnga a pung nen khan an pension niah kan pek chhuah a lo ngai ta a. Tlema sawrkar-hnathawk senior deuhte phei chu crore 2 crore chhuahpui thei te an awm a ni. Kan dinhmun hi a ti chhe em em ta a, kha inremna a kal zel si a. Pension an tam poh leh kan tuar ve zel dawn tihna a ni a, chu chu kan dinhmun a ni.

Tin, 16<sup>th</sup> Finance Commission a lo ding dawn a, 15<sup>th</sup> Finance Commission khan a mimal takin ngaihdan te min rawn zawt a. Press Conference-ah point 39 ka thehlut a, Sap tawng leh Mizo tawngin ka sem vek a nih nghe nghe kha.

Tunah hian sawrkar kan lo ni ta a, uluk leh zualin kan ram mamawh hi sawi tlan kan duh dawn a, kan inbuatsaih a. Finance Commission Cell din a ni a, a buaipuitu tur nodal officer te pawh kan ruat fel tawh a. Kum 5 dang lo awm leh tura kan mamawh tur chianguang taka 16<sup>th</sup> Finance Commission hnena kan thlen theihna turin hna kan lo thawk ang a; a tul a nih chuan keimahni pawh kan zin ang a, kan sawipui ang a; chutiang tur chuan tun hi tan lak hun a ni.

Kan sum a hekna em em pakhat chu, Provisional Employees-te saving scheme kan siam sak a, GPF ang deuh a ni. An ni hi thihna emaw lo tawk sela, lo pension se, an bang tawp a ni mai a, engmah lukhawng an nei ve lo a, chuvangin saving scheme hi siam a ni ta a. An account hi Accounts & Treasuries-in a hawn sak a, an sum chu Apex Bank-in a kawl sak a, pawisa an hlawh atangin kan ‘deduct’ sak ve ta a. Kum 60 an tlinin emaw, regularize an nihin emaw, an thihin emaw pek chhuah zel tur a ni. A hun a lo

thlen chuan Sawrkar tan sum tam tak pek chhuah a lo ngai ve zel a ni. Contract leh Provisional Employees te tan hian regularization guidelines siam a ni a, tunah hian Group B, C leh D-ah mi 233 regularize an ni tawh a. Contract emaw, PE emaw kan lak belh theih zat hi, tunah hian Group A, B, C, D-ah post 234 fill up theih kan nei a ni.

*Guidelines for Outsourcing Manpower, 2022* a awm a, sawrkar kan lo indaih loh deuh chuan department thenkhatah tul zual lai a awm a. Khami atana sawrkar-hnathawk nghet va lak ringawt kha, tul leh loh hunah thawh tur nei leh si lo an awm khan sawrkar hekna a ni. A tul hun chhung atan mi an rawih theihna turin outsource dan tur guidelines fel tak sawrkar hian a nei sa a ni.

*Guidelines for Empanelment of Firms for Engagement on Executions of Various Works, 2024* kan nei tawh bawk a. February Ni 15-ah notification tih chhuah a ni a, hei hi technical department ni ve lem lo, engineer nei ve lem lote pawhin an department chhunga hna thawk tura firm te empanel ho an lo rawih ve theihna tur a ni.

IFMIS hi kan hre vek tawhin ka ring a. Kan ramah kan han introduce a, rei tak chhung kan buai a ni. A bik takin police-ah te an hlawh an han la a, cash-in an hawn a, an nupui hmasate chan tur te an han inpe a, an fate chan tur te an han inpe a; IFMIS-ah chuan khang kha a then hran theih tawh miah loh mai a, an buai ta nak nak mai a, chu chu harsatna thlenna lai chu a ni. Amaherawhchu, IFMIS hmang hian Central Sawrkar hian min hmu reng mai a, pawisa minrawn pek ni, pek chhuah leh ni leh a amount engkim an hria a, min thlir reng thei a ni. Financial System tha deuh mai a nih avangin hman loh theih a ni lova, tunah chuan kan thiam nal ve viau tawh a, kan harsat vak tawh lova, hei hi kan tan thil tangkai tak a ni.

Demand No. 11 leh 15 - SAD leh GAD hi kan la kawp mai ang a. ‘*Chief Minister’s 100 days programme*’ kan nei a, chumi atan chuan monitoring committee a awm a, financial year a tawpah chuan an tawp ve mai emaw a ni ang a. ‘Ni 100 chhungin he sawrkar hian engge a achieve’ tih erawh chu a bu te pawhin kan la chhuah duh mai thei.

Biometric Attendance System introduce thar a ni a, kan thatpui hle a. Office hrang hrangah punctuality a siam a, hmun thenkhat - Education-ah te chuan ‘kai’ tih an lo siam a, awlsam zawkin. Aikal te pawh awm theih miah lohna a lo ni a, hna pakhat chauh thawk mai lovin, hna tangkai dang a thawk thei a ni.

Tichuan, Kolkata Mizoram House khu ₹38.36 crore-a hralh a lo ni a, a aiawh tur hmun engmah buatsaih a ni bawk si lova. Kan Kolkata Mizo Welfare te leh Mizo zawng zawngin hrehawm an ti a; an ui a, pawh an ti ngawih ngawih a; kan hnenah an lo sawi a. Kan han enchiang a, agreement te kan han bih chiang a, ‘*deed* te pawh la sign loh a ni bawk a, kan la cancel theih hi’ kan ti a. Khati ngawih ngawiha kan ui, mizo mipuiin kan ui ngawih ngawih han dah ral ngawt mai kha dika kan hriat loh avangin, pawisa

kan pe kir leh vek a. Tunah a leitute khan Kolkata High Court-ah min khing ta a, vawikhat hearing a awm tawh a. Kan Advocate General hi a tang hle a, a master hneh hle bawk a, thiam kan chan kan inbeisei a ni. Min khingtute hi Excel Vincom Private Limited an ni a, tun hma kha chuan Aizawl-ah an hmel hmuh tur a tam viau awm e.

Tin Mizoram House-ah kan District Council Elected Member-te Mizoram House zawng zawngah harsatna an tawh tawh lohna turin ‘official duty anga treat tur an ni’ tihna order kan chhuah tawh bawk a ni. Tin, New Town, Kolkata khu, ‘min rawn tlawh lawk teh’ an ti a, kan zin khan kan zuk tlawh a. Centralized AC a lo ni a, a lo chhe deuh vek a, kum tin a repair nan nuai eng emaw zat an lo seng ziah a. Chu chu, “A, heti hi chuan kan tlin dawn lo; split AC in min tihsak rawh u” an ti a; chu chu *on the spot* ah order kan han pe nghal a. “Khua alum leh tan dawn a, chumi hma chuan lo tih hman tum ula, split AC hian lo ti rawh u” kan ti a, chu chu tunah khuan an thawk mek a ni.

Tin, New Mumbai ah Mizoram House khu a rei tawh khawp mai; kum 2008 ah khan pek kan ni tawh a ni. A rei tawh zia chu. Chutah chuan US Roof Limited te nen January, 2009 ah agreement an lo sign a, Congress sawrkar lai kha a ni. Tichuan, House Committee-in kan zuk tlawh vang vang a, ka tel ve a, kei pawh. Bombay-a kan Mizote an lo lungni lo em em mai a, House Committee pawh kan lung ni lo a ni. A building sak kha 25% te chauh kha kan chan ve tur a ni a, a dang zawng zawng kha a ma ta tur a ni ta a ni.

Tichuan, chhياتni-thatni leh Krismas vela han punkhawmna tur pawh kha kan nei dawn lo reng reng a, awmzia kha a nei lova. Chuvang chuan, kha tih laia Chief Minister hnenah khan Committee hming pawhin kan thlen a, mahse engmah action lak a awm lova. Tichuan, a kal chho a kal chho a, tun hi a la thleng a ni. A hmun khu a tha khawp mai a, a bulah khuan Nagaland House te, Arunachal House te an awm ve thliah hlawm a, hmun nuam tak a ni. Khutiang hmun kan han nei te khu a lawmawm kan ti a.

Amaherawhchu, Mizoram House hmun tur ni si, a Mizoten hman tur nei mang lo, a vaipa-ina sumdawn nan a hman tura lo pek zawh vek deuh mai kha, a pawh hi kan ti ngawih ngawih a, ‘engtin hian nge maw kan hotute hian thil hi an ngaihtuah thin aw’ kan ti a ni. Chu chu tunah hian kan zir chian tir leh mek a. Hmanniah kan Chief Secretary nen pawn kan sawi dun a, “i cancel teh ang, a theih dan kawng lo zawng teh u” kan ti a ni. Chu chu kan cancel leh thei a nih chuan, tha tharin sak kan tum dawn a ni.

Tin, Aviation Wing kan nei a, ‘kan airport khu engtinng e kan tih zel dawn’ tih ngaihtuahu tur ‘Working Committee on Maintenance on Management of Lengpui Airport’ kan din a, a chairman chu, Pu TBC Lalvenchhunga, Adviser to Chief Minister a ni a, an ni hian thla thum chhungin report an rawn theh lut ang a, airport kal zel dan tur chu kan la ngaihtuah dawn a ni. A boundary te khu a lo chiang lo em em a, encroachment a lo tam em em mai a; mi-thiltithe ten LSC an lo nei teuh mai a. Chu chu Revenue

Department hian demarcate fel sela, ground demarcation a awm phawt a ngai; ‘chumi hnuah fencing kan ti ang’ kan ti a, chu pawh chu hmanhmawh takin kan ti dawn a ni.

Tin, runway hi, Pavement Classification Number - ‘PCN’ an ti a, kan airport khu PCN number 36 a ni a. Airport thlawhna tumna tlak ni thei tur chuan PCN 48 a ngai a, keini chu a tling lova, 48 ni turah 36 chauh a ni. Chuti chung chuan kan tum tir a, chuvang chuan kan thlawhna te hian full load a la ngam lo a ni. Baggage a lo tam bawk si chuan, passenger seat 10 te, seat 15 te an tih awl a ngai a, khami ai kha a fare-ah min charge leh ta a.

Chuvang chuan, kan runway that loh avangin passenger fare pawh a tam phah a, mipuiin kan tuar mek a ni. Chu chu kan dinhmun a ni a.

Tichuan, kum 3 kal ta chhung khan SASCI, NESIDS leh SEDP atang hian ₹86.94 crore, khumi cheithat nan khuan kan lo hmang tawh a. Tunah hian, ‘a runway i siamtha leh ang’ kan ti a, ₹50 crore kan dah leh a ni. A runway hi kan tih that vat loha, ‘kan tlan duh lo’ te an tih mai chuan a pawl dawn a ni.

Tin, a fare hi competition awm lo - monopolize a nih avang hian, duh duh hunah hian an tisang emaw tih mai tur hian a awm ta a. Chuvangin, hemi atan hian airline pakhat chauh a service hi a tawh lova, mi 2-3 in compete selang tiin kan ngaihtuah a. Tunah hian ‘Akasa Airline’ an ti a, hei hi low cost airline a ni a, chungte chu kan be mek a.

Pu Speaker, House information atan - Central-a Civil Aviation Ministry-a Chief Controller ni thin kha kan la chhuak a, Secretary to Chief Minister-in tunah hian a join a. Vawiinah hian an nite hian hemi kawngah hian nasa takin an experience neih tawhte hmangin min tanpui theih kan ring a ni. Tin, helicopter service hi ‘Pawan Hans chauh’ Pu Muanpuia’n a tih kha, kha chauh kha kan nei avangin kan duhtawh lo em em a, tihpun kan tum mek a ni. Ka sawi tam lo mai ang.

Tin, heliport hi district tin (hmun 11) ah; ‘helipad’ ni lovin, ‘heliport’ neih kan tum a. Heliport pangngai hi hmun 15-ah dah tumin ruahmanna kan siam a, sum pawh kan ruahman a ni. Tin, ka sawi tawh ang, chhim lamah airfield emaw, airport emaw ‘neih belh dan kawng a awm em’ tih kha Cabinet-in a ngaihtuah turin chhawp a ni dawn a ni. A dawtah chuan, Demand No.14 - Planning & Programme Implementation-ah hian; Mizoram Startup Mission hi kan nei tawh a, Startup Hub kan siam tawh a, kan entrepreneur-ho tan hei hi a tangkai em em turah kan ngai a ni. Tin, MSDG - ‘Monitoring of Sustainable Development Goals’ kan ti a, hei hi dashboard te kan siam tawh a, *Mizoram Vision, 2030* kan nei a, kan vision chu 2030 a ni. Heta kan achieve tur hi tunah hian target neiin kan kal a, tunah hian SIT kan nei dawn bawk a, pawisa pawh crore eng emaw zat minrawn pe a, kan la inpeih lo deuh a; hei hian min pui hle dawn a. Hemi dashboard hi Chief Minister Office-ah pawh kan dah ang a, ralkhat atanga in monitor mai thei tur te pawhin siam kan tum a ni.

Tin, Planning hnuai hian organization 3 kan nei a - Research & Development Branch, Economic & Statistic Branch, Science & Technology lamte a ni a. Heng hi sawi zau chakawm tak vek an ni a, mahse ka sawi zau lo mai ang. Tin, Meteorology & Climate Change lam kan khawih bawk a, hemi tel lo hi chuan tunlai khawvel kan awm thei tawh lo a ni. Tin, Socio-economic Survey te kan khawih bawk a ni.

Pu Speaker, tunhnaiah kan budget piah lama sum leh pai central atanga kan lak luh kha a awm nual tawh a. Session chhungin kan sawi tawh a, khang kha sawi nawn a ngai lo ang a. Kan Minister-te an chhuanawm a, engtin tin emaw, kan beisei loh laiin kan budget pawh ni lo, sum tam tak an lo zuk la chhuak zel thei hi lawmawm kan ti a. Tin, kan Officer on Special Duty te an tangkai em em a, an mahni zar a ni bawk a ni.

Tunah hian CSR eng emaw zat hual mek kan nei a, chung kan CSR hmang chuan a tul tul thawh nan kan hmang ang a. Tin, hand-holding policy-ah special package kan dil a, chu chu nimirah khan a chhanna kan dawng a. Hei hi chu ‘DoNER hnuai in priority-ah rawn dah phawt mai rawh u’ an rawn ti a, chu chu an thu kan awih ang a, khatiang khan kan han ti ang a; khata tang khan a fund min pek an tum zawk dawn a ni maithei. Hei hi chu a hranpain Prime Minister te pawh la sawipui leh turah kan chhawp a ni.

Tin, nimirah maiah khan Urban Financial Reform, UD&PA hnuai ami a ni a, ₹25 crore min rawn sanction leh hlauh mai a; “Inthlan puan hmang hmanhmawh deuhin heng hi rawn ti ula, kan lo ti vat ang” an ti a. Kan tih vat chuan, an lo ti vat ve zel a, a lawmawm khawp mai. Tin, Prime Minister Ekta-Mall, ‘Unity-Mall’ an tih, kan member tu ber nge min zawt ka hre lova, ‘kha kha in hmu ta em’, min ti a. Kan hmu ta e; nimirah kan hmu, hei hi. ₹127 crore, Ministry of Finance atangin an rawn sanction fel tawh a ni.

Hei, America rama Kohhran hovin min rawn tlawh a, kan inkawm a. An lo hausia viau mai a, toilet - Indian leh European chi hi “tui awmna hmunah a thlawnin kan rawn pe vek ang che u; a thawh pawh kan rawn thawk vek ang,” an ti a. Tichuan, Lawngtlai leh Mamit District atangin kan thlang a ni, a bul tan nan. Chu chu, an rawn thawk mai ang nakinah. Biak-in tui that deuhna hmun tur leh khatiang kha thlan tur a ni. Hall - YMA Hall ah te, MUP-inah te pawh a tih theih a, tui a tha tur a ni phawt mai a ni.

Tin, Article 275 hnuai - Ministry of Tribal Affairs atangin vawiihah khanin ₹7.57 crore kan dawng bawk a ni. Hei, Pi Rinpui a lawmpuiawm hle mai. Tin, British Army a tang duh ho, kal thla ho khan, ‘Visa ah kan buai deuh e, min rawn sawi sak the’ an ti a, British High Commission te kan zuk bia a, an vaiin Visa an pe a, harsatna an nei lo a ni.

Tin, ZMC hi kan mut titui lotu a ni a, ‘inspection kan dawl lo ang a, kan paltlang zo lo ang’ tih hi kan hlau a; chu mi tan chuan ₹300 crore chuang *principle* in min pawmsak a. Chutah chuan, ‘a 1<sup>st</sup> Installment han ti rawh u,’ an ti a, ₹90.19 crore a ni em aw, (₹99.9 crore zawk nge) chu chu ‘hmanhmawh deuhin tih a ngai e’ kan ti a, ‘Rawn

hmanhmawh rawh u aw, inthlan puan hmian' an ti a. Kan Health Minister-in Union Minister a zuk hmu a, kei pawhin ka hmu a. South Indian lam mi a ni a, an tawng kan thiam lova, kan tawng a thiam vak bik bawk si lova. Chuti chung chuanin kan inkawm ve phian a; 'ka ti ang,' a ti ve tlat mai a. Hei, a buai ta em em mai a, inthlanin a nang chho a, campaign in a vak ve lawp lawp mai nen. Chu chu, 'helaiah hian DPR peih thuai thuai rawh u' kan ti a, kan theh lut tlai ta lutuk a ni. Nimin lamah te kan han innawr leh a, an zahawm khawp mai. "Hetiang khawp sum tam tham, ni hnih-khat lek chhunga ti tura in tih te chu, a hma daih khan rawn thehluh tur a lawm" min ti a, sawi tur a vang khawp mai. A paw ka ti, kan che tlai hi.

Tin, chet tlai hi a paw ka ti em em a ni. Hei, education ah SEDP teachers ho an term a tawp dawn a, kha mite hmun awl hnawh khat tur khan Minister hian recruitment tih vat a duh a ni. 'MR in ti phawt mai ang' a ti a, hemi file pawh hi ka hnen a la rawn thleng thei reng reng lo; khawng a tan ka hre lo. Dt.31.3.2024 lo thleng sela, zirtirtu thar la hman si lo ila school engzatin nge tuar ang? Chuvangin, kan department te pawhin ram tana pawimawh zual hi lo ngaihven rawh u; hmanhmawh thil hi a awm a nia. A tul chuan tlaivar mai tur. Chu chu a ni mai.

Chuvang chuan, kan thil delay avanga thil thleng thin hi a paw ka ti em em a ni. Hei, 'file-tracking device' te kan han sawi ve a, kan la ti thei chiah lova. Tin, simplification te kan sawi a, 'ease of doing things' tih te leh heng 'artificial intelligence' te tih ve kan duh a, 'single-window system' te thlengin; hengah hian nakinah chuan kan la ti tha chho zel thei turah ngai ila.

Ka'n ti tawp dawn hnai tawh ang a, Pu Speaker.  
(*interruption*)

**PU C. NGUNLIANCHUNGA:** Pu Speaker, tukin zingah Power Minister ka zawhna chhannaah khan, 'electric bill ba kha March thla chhungin kan petla ang' tih kha a ni si a; record ah a la awm dawn a. Kan Finance Minister khan, "a vai vai chuan kan thei lo deuh ang a," a tih kha; khalai kha nakinah, Minister leh Finance Minister thusawi kha, session nikhat thil a nih avangin tih chian a tha.

Tichuan, a pahnihnaah - Thenzawl dragon fruit huan siamtute kha; crore 30 kha anih chuan, a va thui awm ve? (**Pu Lalduhoma, Hon. CM** - crore 30) Aw le, anih tak chu. Tichuan, Pu Speaker, nangmah kaltlangin Autonomous Council hruaitute Mizoram House-a official anga treatment pe tura kan House Leader zahawm takin a tih kha, District Council aiawhin lawmthu ka sawi e. Ka lawm e.

**PU LALDUHOMA, HON. CHIEF MINISTER :** Ni e, a changtu Minister sawi kha dik zawk turah ngai ila, a finance lam zawk a kha. Chuvang chuan, nakinah speech correction a la awm hunah kan Power Minister chuan lo correct mai selangin a



that mai ka ring e. A vai vai chuan tun thlaah chuan kan clear hman loving; kan sum dinhmunin a phak lo.

Tin, sawlai dragon fruit kha tunhma Aizawl-Lunglei Road hlui kha a zawh a. Tichuan, a inkarah Lau Lui a awm a. Chu chu rawn kai chho selangin, Sialsuk, (khimi Chakkhai Restaurant piah lawkah khan kawngthlang lamah peng thla) chu nena inpawh tur chuan kan ti a, mahse kan sum in a daih lo an ti tlat mai a, kan PWD ten; crore 36 bawr vel niin ka hria a, kan pek kha. Chuvang chuan, a lui ral lehlamah khan leilet hi a awm chho vek a. Khami leilet kawng awm sa kha a zawh chho ang a, petrol pump-ah a chhuak ang. “Chuti zawng chuan daih tir hram i tum ang” kan ti a, tukin zingah khan alignment pawh Association hruaitute nen kan han sawifel a. A dragon fruit an chinna ah khan lut dawn ta sela, ‘an thlai a tihchhiat kha an phal em’ tih kha PWD lamin an hre duh a; an lo phal a, kan inhrilh fel e, tukinah khan.

Tichuan, heng ‘100 days programme’ te, ‘biometric attendance’ te, ‘Mipui Aw’ han tih hi kan ram tana thil thar a ni a. *Mipui Aw* hi tangkaipui hle tura kan inngaih lain, department thenkhat chuan a en pawh an en tha lo tih kan hria a; hei hi chu a dik lo ang. Chuvangin, mipuiin awlsam taka department hrang hranga an harsatnate an rawn thlen zung zung nan leh, chu chu kan respond zung zung theih nana siam anih angin, hei hi kan zavaiin - mipui pawh, sorkar lam pawhin hman tangkai kan tum theuh dawn nia.

Tin, ‘Right to Public Service’ te pawh 2015-a pass tawh a ni. Amaherawh chu, kan la hmang tak tak lo viau a ni. A tirah implementing department 7 awmin notified service 51 a awm a, tunah sawrkar thar hian kan han tih belh dawn a. Chutah chuan, inimplementing depadrtnent hi 16 kan awm ang a, notified service hi 186 a awm dawn a ni. Tichuan, mipui ten awlsam takin department hrang hrang hi an zuk take-care thei dawn a ni a. Hei hian nasa takin *mipui-sawrkar* a nihna a lantir dawn a ni. Tin, CBI hnenah general consent pek a ni bawk.

Tin, *Sustainable Investment Policy, 2024* duan fel a ni tawh a. He policy hnuaiiah hian India ram leh foreign atanga investment rawn ti duh tam tak tunah hian dawrtu kan nei mek a. Fimkhur takin chung chu kan dawr mek a ni. Tin, sawrkar hmasa khan 2011-ah Congress sawrkar lain, *Ceiling on Government Guarantees Act* an pass a, amendment an siam a. He floor-ah hian nasa takin kan inhnial a, mahse an pass lui a, chu Dan chu mimal guarantor atan sawrkar tan phal lohna a ni ta a. Vawiinah hian he sawrkar thar hi kan thalai tan te, kan farmer-te zinga *urban-poor* leh *rural-poor* te tan guarantor-ah tan kan duh a ni. Chu chu he dan hian a dal tlat a, tunah hian tang thei pawh kan la ni lo. He dan hi kan siamthat a kan amend phawt a ngai a. A rang lamin, session lehah chuan he dan amendment bill te pawh hi a lo lut thei tawh turah kan ngai a ni.

Tichuan, tunah pawh hian loan, interest awm lo eng emaw zat min rawn tih sak dawn a. Amaherawh chu, ‘guarantor-ah in lo tang ve a niang chu’ min ti a ni. Chu pawh chu

han tang ngawt dawn ila, he Dan hian min dal avangin kan la tang thei si lova, a itawm lutuk a ni, interest awm lo loan te chu. A duh hi an tam lutuk dawn, kan entrepreneur te zingah hian. Chungte chuan min la dal a ni.

Tin, *Project Monitoring Committee* kan nei a, naktukah kan thu dawn a. Tin, Pi Baryl-in arawn sawi - DPR siamtute thawktuah an tang bawk a; ‘*chawm bawk, hawp bawk*’ kan tih ang chi kha thil lo awm tawh thin a ni. Hei hi kan sawrkarah chuan a awm kan phal dawn lo. DPR siamtu chuan a siam mai ang; a thawktu chu mi hran an ni tur a ni. Kha kha a awm kawp tur a ni lo. Project Co-ordination Committee kan nei a, hei hi ‘hand-holding policy’ bika convergence awm ang angte lo ngaihtuah tur a ni a, hei pawh hi naktukah meeting kan nei dawn a ni.

Tin, *Resource Mobilization Committee* kan nei a, kan hria a. Hengah te hian mi tha tak tak kan Chief Secretary hlui te, senior cheng 1/- hlawhin kan ruai a, an zahawm em em a ni. Healthcare ah kan rul vek tawh a, kan sawi tawh a.

Tichuan, ka sawi leh duh chu, hei, ruihhlo chungchang kan han sawinaah hian vantlang hmaa political party kan kalkhawmna ah te, kan NGO kalkhawmna ah te zurui kan tam lutuk hi, keini party hian tireh kan tum a ni. Nasa takin kan inzirtir a, Champhai-ah pawh ka thusawi laiin (MNF-pa emaw ni khan) min rawn tibuai a, ‘dah bo rawh u,’ ka ti mai a ni. A sawt khawp mai kha kha. Hmanniah ZPM General Assembly kan nei a, mi 5,000 vel kan kalkhawm a, pakhatmah zu rim nam an awm lo; a dangdai tawh a ni, he thil hi chu. Tun hnaiah Chapchar Kut kan han hmang a, zurui buai an awm lo; tlai lamah an lo awm zeuh a nih chuan, ka hre lo. Mahse, kan hmuh phak chinah chuan, mi reng rengin ‘kumin chu a danglam’ an ti a ni. A lo inzirtir theih a ni. Chuvang chuan, an in duh a nih chuan, a hun leh a hmunah in mai rawh se; kan sawi phak a ni lo, an zalenna a ni. Amaherawhchu, khawlaia kan rui thin hi chu tih reh a tha a, party tin te pawh hian tan la ila a tha hlein ka hria a ni.

Tin, kan rama kan thing leh mau, kan luidung, kan ramsa, kan nungchate zawng zawng pawh hi thlamuang takin awm rawh se. Hemi hi a dimdawi thei ang bera kan enkawl a tha a. ZPM sawrkarna hnuaiah chuan lui sanghate pawh thlamuang takin awm teh se. Hei, kan *work culture* te pawh a lo danglam sawt a, kan *value system* te pawh a lo inthlak chho ta zel a; hei hi kan zavaia kan contribution a ni a. Helai kan rorelna a tawp ni ah hian kan Opposition mamberte pawh Pu Speaker, lawmthu ka hrilh duh a - “he hun thar lo awmah hian inhne-hnai takin, thil tha-ah chuan ke kan pen tlang a ni,” tih hi mipuiin min hmu reng a, a lawmawm. Tin, mipui pawhin he *kalphung-thar* lo thleng turah hian theih tawp min chhuahpuia, min tawngtaipui a ni.

Tin, kan MLA leh Minister-te an thawkrim em em a, an chungah lawmthu ka sawi duh bawk a. Thufing, Bung 12:17 chuan, “*Mihring sum hlu chu taimak a ni*” a ti a. Chuvang chuan, he kan session hi, he taimakna thu hian khar ka duh a. Kan taima phawt mai tur

a ni. A bak chu, Pathian-in malsawmna chu min pek leh pek loh chu Pathian kutah awm se; kan taima phawt mai tur a ni. Amaherawhchu, mihring kan ni a, tlinlohna te, tihsual te kan nei ang, tun session chhung pawh hian thinlung hliam palh te pawh kan lo nei thei e. Chung zawng zawngah chuan ngaihdam ka han dil a, thawhkhona tha tak neih chhoh zel beisei ilangin.

Tichuan, naktuk zanah zanriah kan kil ho ang a, talent kan show theuh ang a, kei pawhin talent show tur tha deuh ka nei a nia. Hlim takin chaw kan kil ho dawn nia.

Awle, Pu Speaker, heng ka demand-te:

<i>Demand No.</i>	<i>Purpose</i>	<i>Amount (in ₹)</i>
<b>1</b>	Legislative Assembly	47,44,15,000.00
<b>2</b>	Governor	30,60,000.00
<b>3</b>	Council of Ministers	7,37,45,000.00
<b>4</b>	Law & Judicial	47,73,44,000.00
<b>5</b>	Vigilance	7,11,46,000.00
<b>9</b>	Finance	34,38,13,62,000.00
<b>11</b>	Secretariat Administration	1,20,32,60,000.00
<b>14</b>	Planning & Programme Implementation	1,20,27,41,000.00
<b>15</b>	General Administration	1,05,30,67,000.00
<b>TOTAL</b>		<b>38,94,01,40,000.00</b>

Heng ka demand te hi he House zahawm tak hian min pass-pui turin ka rawn dil e. Ka lawm e.

**HON. SPEAKER** : Aw le, tunah chuan kan Chief Minister zahawm tak Pu Lalduhoma'n heng a demand-te –

<i>Demand No.</i>	<i>Purpose</i>	<i>Amount (in ₹)</i>
<b>1</b>	Legislative Assembly	47,44,15,000.00
<b>2</b>	Governor	30,60,000.00
<b>3</b>	Council of Ministers	7,37,45,000.00
<b>4</b>	Law & Judicial	47,73,44,000.00
<b>5</b>	Vigilance	7,11,46,000.00
<b>9</b>	Finance	34,38,13,62,000.00
<b>11</b>	Secretariat Administration	1,20,32,60,000.00
<b>14</b>	Planning & Programme Implementation	1,20,27,41,000.00
<b>15</b>	General Administration	1,05,30,67,000.00
<b>TOTAL</b>		<b>38,94,01,40,000.00</b>

Hous- ah pass a rawn dil a. Remti apiangin, ‘remti’ ti rawh u le. (**Member-te:** remti). Remti lo kan awm a nih chuan, ‘remti lo’ ti rawh ule. Remti lo an awm lova, a lawmawm e.

Aw le, Chief Minister zahawm tak Pu Lalduhoma Demand-te chu House-in lungrual takin a pass ta a ni. (**Pu Lalduhawma, CM:** Pu Speaker, ka lawm e.)

**LEGISLATIVE BUSINESS:**

Aw le, tunah chuan Legislative Business ah kan kal ang a. Kum 2024- 2025 chhunga Minister ten an department theuh te an enkawl na tur *Demand for Grants* kan vote tak zawng zawng leh, charge hnuaia sum hman turte hman a nih theih nan Bill kan pass a ngai a. Tunah Chief Minister zahawm tak Finance changtu Pu Lalduhoma’n “*The Mizoram Appropriation (Demand for Grants 2024-25) Bill, 2024*” hi House-ah introduce phalna rawn dil turin ilo sawm ang u.

**PU LALDUHOMA, HON. CHIEF MINISTER:** Pu Speaker, Governor of Mizoram phalna leh i remtih nain, “*The Mizoram Appropriation (Demand for Grants 2024-25) Bill, 2024*” hi he House zahawm takah hian introduce phalna ka rawn dil e.

**HON. SPEAKER** : Kan remti em? (*House-in a remti a.*) Aw le, han introduce sela.

**PU LALDUHOMA, HON. CHIEF MINISTER:** Pu Speaker, i phalna leh he House remtih nain, “*The Mizoram Appropriation (Demand for Grants 2024-25) Bill, 2024*” chu he House zahawm takah hian ka rawn introduce e.

**HON. SPEAKER** : A copy kha han sem ula.. (*A copy sem a ni a.*) Kan chang kim maw? Aw le, kan chan kim chuan, Chief Minister zahawm tak kan sawm leh ang a, “*The Mizoram Appropriation (Demand for Grants 2024-2025) Bill, 2024*” House-a a introduce tak chu rawn move-a pass rawn dil nghal turin ilo sawm ang u.

**PU LALDUHOMA, HON. CHIEF MINISTER:** Pu Speaker, kan budget pumpuaia kan Demand hrang hrangte kha hman a nih theihna turin “*The Mizoram Appropriation (Demand for Grants 2024-2025) Bill, 2024,*” he House-a ka rawn introduce tak kha ka rawn move a, khami tel lo chuan kan hman theih dawn loh avangin, he Bill hi min pass-pui turin ka rawn dil a ni e. Ka lawm e.

**HON. SPEAKER** : Awle, Appropriation Bill hi kan sawiho ngai lova, kan Chief Minister zahawmtak in pass a rawn dil nghal baw k a. Kan buk nghal mai ang a. “*The Mizoram Appropriation (Demand for Grants,2024-2025) Bill, 2024*” hi remti apiangin “remti” ti ula, remti lo kan awm a nih chuan “remti lo” ti ula. (*House-in a remti a.*) Aw le, a lawmawm e.

Kum 2024-2025 chhunga sorkar sum mamawh *Voted Amount* ₹13,176.85 crore bakah ₹35.12 lakh, ₹26.78 lakh, a belhkhawm ₹14,000.1213 crore hman theihna tur bill “*The Mizoram Appropriation (Demand for Grants 2024-2025) Bill, 2024*” chu House-in lungrual takin a passed ta a ni. (**Pu Lalduhoma, CM:** Pu Speaker, ka lawm e.)

**SUMMARY:**

**HON. SPEAKER** : Aw le, tunah chuan, *Summary of Business transaction during 2<sup>nd</sup> Session of the 9<sup>th</sup> Assembly* kan ngaithla ang a, chumi hmain engemaw Member-te information atan Data te, Statistic te, a zualpui tak tak hriat kan duh takin.

Kha kan Session chhung zawng khan ZPM atangin mi 374 an ding a, MNF atangin mi 186, BJP atangin tum 32, Congress atangin tum 30. Tichuan, kan hun hman dan chu - ZPM khan darkar 21:57 an hmang a, MNF khan darkar 20:32 an hmang a, BJP khan darkar 2:40 an hmang a, INC ten darkar 2:25 an hmang a ni.

Hei, mak deuh chu, ZPM kha 374 sawitu an awm a, MNF kha 186 a nia, a zatve vel a ni a. Kan hun hman kha - ZPM in darkar 21:57 an hmang a, MNF in darkar 20:32, darkar hnih-khat bawr vel chauhin an hun hman a inthlau a ni. Tumkhat dinah MNF te khan an hmang rei deuh zawk a ni maithei.

Tichuan, hmannah kan Member zahawmtak Pu Jeje-a hian, “hun ka hmang tha viau a sin maw le; i puang lova” tiin min chhuahchhal deuh a, chuvangin kan discussion kha a top 3 leh a bottom 3 kan sawi ri mai mai dawn; Aw, a top leh bottom kan sawi mai zawk dawn em ni?

Aw, a hmang tha ber chu - Pi Prova Chakma a ni a, minute 7:57 a hmang a. Tichuan, (hmang rei ber - kan Opposition leader leh kan House Leader kha chu ka sawi tel lo a nia) hun hmang rei ber chu - Pu C. Ngunlianchunga a ni e.

Tichuan, kan Session chhung zawng zawnga hun hmang rei ber 3-te sawi leh ila - Hun hmang rei ber chu - Pu Lalduhoma a ni a, tum 38 a ding a, darkar 7:52 a hmang a ni. Tunge a dawttu ni ang tih chu inrinsiak tir a chakawm hle mai a, mahse ka han puang nghal mai ang a - Pu C. Ngunlianchunga a ni a, tum 30 a ding a, darkar 2:25 a hmang a ni. Tichuan, ding tam pathumna-ah chuan, Pu Robert Romawia Royte niin, tum 27 a ding a, darkar 2:37 a hmang a ni.

Tichuan bottom 3 kan sawi ve ang - Pu Lalthansanga tum 6 a ding a, minute 42 hmang a, a dawtah Pu C. Lalsawivunga, tum 6 a ding a, darkar 1:15 a sawi a ni. Tichuan, pathumna-ah chuan Dr. Lorrain Lalpekliaana Chinzah a ni a; tum 7 a ding a, minute 42 a hmang a ni. Kha kha a tlangpui a ni e.

Tunah chuan, *Summary of Business Transacted during 2<sup>nd</sup> Session of the Ninth Assembly* kan ngaithla ang a. Tun tum Session hi Ninth Legislative Assembly-a Session vawi 2-na a ni a. Budget Session a ni bawk a, Business Advisory Committee (BAC) thukhawmin a rel angin, Session hian ni 24 chhung awihin, vawi 16 thu tura duan a ni. Budget 2024-2025 sawiin tuang takin hun kan hmang a, vawiin hi kan thutkhawm ni hnuhnung ber a ni ta reng mai a. tun Session chhunga kan hnathawh a tlangpui tarlang thuk thuk ila -

***Governor's Address:***

Kan Governor zahawmtak in Session tan ni ah House a rawn address a, he a thusawia *Motion of Thanks* hi Pi Baryl Vanneihsangin a rawn pulut a, Pu T. Lalhlipua'n a rawn thlawp chu Ni 19.2.2024-ah sawiho a nih hnuin lungrual takin kan pawm a ni.

***Panel of Chairman:***

Panel of Chairman-te ruat an ni a, heng - Pu Rasik Mohan Chakma, Pu Lalrinsanga Ralte, Pu K. Hrahmo leh Pi Baryl Vanneihsangin te an ni.

***Obituary:***

He House zahawmtaka Member lo ni tawh, Pu K. Lianchia, Ex-Minister boral ta chu House-ah sunna neih a ni a. Pu Lalduhoma, House Leader-in a chanchin tawi sawina leh sunna thu a sawi hnuah Pu Lalchhandama Ralte, Leader of Opposition leh Pu Vanlalhlana, Minister, Parliamentary Department changtu ten sunna thu an sawi bawk a. Hemi zawhah hian sunna entirnan ngawi renga minute khat din a ni .

***Vice President Address:***

Ni 26.2.2024 khan Hon'ble Vice President of India Pu Jagdeep Dhankhar-a chuan Mizoram rawn tlawhin House a rawn address a, House aiawhin a chungah lawmthu ka sawi a ni.

***Statement:*** Minister, Dr. Vanlalhlana, School Education Department Minister changtu chuan HSLC Examination 2024 chungchangah Statement a siam a ni.

Tin, tun 2<sup>nd</sup> Session-cum-Budget Session-a zawhnate NeVA Application kaltlangin Memberte'n kan zawt ta a, hei hi *paperless* atana kan hmasawna pakhat a ni nghal a, a lawmawm hle a ni.

Zawhna kan dawn dan tlangpui chu hetiang hi a ni:

- Starred Question- ah zawhna lut zat - 482,
- Zawhna admit zat - 475;
- Zawhna reject zat - 4;
- Memberte'n zawhna an withdraw leh kha 3 a awm a ni.
- List of Business a dah zat - 280;
- House-a chhan zat - 75;

- House-a chhan hman loh - 205;

Hei hi ka han sawi lawk ang a. Vawiinni thleng khan *Zawhna & Chhanna* a awm a. Amaherawh chu, vawiin nia kan chhan tawp thleng data kha tunah hian puan theihin an rawn peih a, Assembly Secretariat-a thawktute an fakawm hle a ni.

- Tin, Unstarred Question-ah zawhna lut zat - 37;
- Zawhna admit zat - 37;
- Starred Question atanga leh zat - 194;

***Presentation of Budget:***

Pu Lalduhoma, Hon. Chief Minister chuan kum 2024-25 Budget leh 2023-24 Supplementary Demand te House-ah a present a ni.

***Presentation of Reports:***

Tun Session ah hian House-ah report pathum present a ni.

***Resolutions:***

Tun second session-ah hian Official Resolution 1 Home Minister rawn putluh chu sawihoa passed a ni a, Private Members Resolution 94 a lo lut a, avaiya admit vek a ni. Pahnih sawiho a ni a, pakhat hnawlin, pakhat adopt a ni.

***Laying of Papers:***

Tun Session-ah hian House-ah paper 16 lay a ni.

***Government Bill:***

Tun Session-ah hian Government Bill 10 a lut a, pass vek a ni.

***Election to Financial Committees:***

Kan House hian Financial Committee 4 kan nei a, chungte chu –

1. Public Accounts Committee;
2. Committee on Estimates;
3. Committee on Public Undertakings;
4. Committee on Local Funds Accounts te anni a.

Heng committee member turte hi thlan kher ngai lovin memberte inrawnin inruatfel a ni a. Memberte chu House-a kan puan bakah Bulletin Part-III hmangin kan rawn hriattir tawh che u kha.

Financial Committee bakah hian House hian Committee peng hrang hrang 16 kan nei a, heng Committee hrang hrangte hi session loh lai hian an committee mawlh mawlh mai dawn a; kan MLA-te hi an awl mai mai lo tih Zoram-mipuite hriatah kan sawi ve duh a ni. Session loh laia awl veng veng inngaih hi awm thei a ni a. Amaherawhchu, session karah pawh kan MLA-te kha an awl dawn lo a ni.

***Passing of Demands:***

Minister hrang hrangte'n an department enkawlna atana an demand-te chu memberte'n thahnem ngai takin kan sawiho hnuah House-in lungruul takin kan pass vek a ni.

Tichuan, kan session hun tawp kan lo thleng ta a, tih tur kan duan angte kan zo thei a, a lawmawm hle a ni. Kan member thenkhat damlohna avanga rawn kal tha thei lo an awm erawh chu pawl kan ti hle a ni.

Mizoram Assembly hi hun hmasa lamah te an lo sawi fo tawh thin a, rorelna tluang taka kal thin tia sawi a nih vanga 'state dangte entawntlak' tih a ni a, chutiang a nih zel theihnan chuan keini pawh hi kan tan tlan zel ka duh a ni.

Kan hriat theuh angin kan NeVA application hi kan hmang tangkai hle mai a, sawi tak ang khan Question te pawh NeVA hmangin kan ti a nih kha. Tun tum session-ah pawh he application kaltlang deuh vekin member te'n zawhna kan zawt a, department lamah pawh zawhna thawhchhuah leh chhana kan lo dawnte pawh NeVA kaltlang vek hian kan ti a, hei hi hmasawna ropui tak a ni.

Department hrang hranga thawktu official-te chungah pawh lawmthu kan sawi nghal a, session leh hunah chuan tun aia tangkai leh zuala hman zel tum ila a lawmawm hle ang.

Tun tum session hi thil pawimawh tak tak sawina leh hun hlimawm takin kan hmang tluan thei a, a lawmawm takzet a. Member tam zawkte hi House-a a vawikhatnaa thu kan ni a, kawng tam takah khawrna leh han chet phehna te pawh kan nei ngei ang a, hriatthiamna nena min lo dawnsawn avangin lawmthu ka sawi a ni.

Ruling lam tan chuan tuna Opposition member zahawm tak takte hi an thlamuanpuaiawm tak zetin a rinawm. Ram an veinaah a pawng a taka sorkar beih hrim hrim ang chi a awm lo viau a, sawrkar laka beiseina sang tak karah chuan han insawisel te chu a awm lo thei lova. Mahse, an thil sawisel te kha sawiselna awmzenei - *constructive criticism* kan hmu a ni.

Nimina kan Opposition Leader-in a sawi, "Tun tum kan rilru hi a tha in tih viau pawh ka ring a, resource mobilize dan tur hi kan sawi mawlh mawlh mai a, a chhan chu, kan ram hian hma lam pan, a tha lam pan theihna turin kan thahnem ngai tlang a ni" a tih te kha a ropui a. Thil thaah chuan sawrkar an tawiawm tha dawn a tih te kha a mawi em em a ni. Unau karah chuan han inhnial chang te chu awm thin mahse, 'inhuat vang emaw, rilru fel lo taka inhnialna a ni lo' tih kan hriat theuh kha.

Tun hmaa kan hmuh thin, a bawp lawka laa, inhnial chiam chiama hun khawh ralna te a awm lo viau ringawt pawh kha a lawmawm em em a ni. Chawlhkar hmasaa kan ngaihthlak zawng zawngte kha a tak a chan theihna turin tupawhin kan hma zawn



theuhah theihtawp chhuah tlang ila. Kawng tha kan zawh phawt chuan, Zoram mipuite hian min thlawp em em hian ka ring tlat a ni. Kan hmaa helaia House-a lo thu tawhte khan an theihna zawng zawngin ram an lo kaihruai tawh thin a, *Zahna-chibai* ka buk a ni.

“Pu Chairman”, tih kan han thlang zawk tlat te, “Pu Speaker”, kan han ti duh zawk te, tui *liluh* loa kan han *lulih* duh tlat te leh, ‘kut vung ber bur, ke vung ber bur’ tih kan sawi dik thiam hunah chuan kan ram hian hma a sawn ngei turah han ngai ila.

A tawp berah chuan, Session tluang taka kan kal theih nana rim taka thawktu official lam venhimna thawktu - Home Deptt. a kan Police-te, hriselna lama min viltu - Health Department leh kan doctor-te, Power Supply-a a khaihlak loh nana thawktu - kan Power Department lam te, Sawrkar official min tawiawm tlat tute leh Press mi - DDK, Radio, Cable TV leh chanchinbu lama mipui hriat tura House rorelna min lo puanzar thintute hnenah lawmthu ka sawi a. Assembly Secretariat lama thawktu zawng zawngte thawhrimna leh thawhhona tha kan neih avangin ka lawm em em bawka a ni.

Tunah chuan, kan tih turte kan lo zo ta a. Thupuan tur a tawp ber atan - naktuk Governor-ina lunch min buatsaih sak kha remchan zawkna avangin thulh a ni e. Tunah chuan kan duhtawka ang a.

*The House is Adjourned Sine Die. (8:45 PM)*